



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

### About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



3 3433 06823909 8



ZFF  
KENRICK













# DOGMATICÆ THEOLOGIÆ

QUAM CONCINNAVIT

FRANCISCUS PATRICIUS KENRICK,

Episcopus Arathensis, in *partibus infidelium*, et Coadj. Ep. Phil.

VOLUMEN III.

---

Εἰ μὲν γὰρ ἄσώματος εἶ, γυμνὰ ἂν αὐτά σοι τὰ ἄσώματα παρέδωκε δῶρα· ἐπεὶ δὲ σώματι συμπλέκεται ἡ Ψυχὴ, ἐν αἰσθητοῖς τὰ νοητά σοι παραδίδωσι. S. Joannes Chrys. in Matthæum hom. lxxxii. al. lxxxiii.




PHILADELPHIÆ:

TYPIS L. JOHNSON, IN GEORGII VICO.

AN. MDCCCL.

1851



---

Entered according to the Act of Congress, in the year 1840, by  
**FRANCIS PATRICK KENRICK,**  
in the Clerk's Office of the District Court of the Eastern District of Pennsylvania.

---



# INDEX.

## TRACTATUS IX.

### DE BAPTISMO.

Prolegomena	-	-	-	-	-	-	13
C. I. De aqua ad baptismum necessaria	-	-	-	-	-	-	21
Propositio. Christus Dominus instituit aqua baptismum, perpetuò, ad finem usque mundi, ministrandum, qui proinde est novæ legis Sacramentum	-	-	-	-	-	-	22
Objectiones solvuntur	-	-	-	-	-	-	25
Animadversio	-	-	-	-	-	-	38
C. II. De modo baptizandi	-	-	-	-	-	-	39
Propositio. Valet baptismus infusione vel aspersione collatus	-	-	-	-	-	-	40
Objectiones diluuntur	-	-	-	-	-	-	42
Animadversiones	-	-	-	-	-	-	46
C. III. De baptismi effectibus	-	-	-	-	-	-	49
Propositio. In baptismo gratia Jesu Christi Domini nostri confertur, per quam tollitur totum id quod, veram et propriam peccati rationem habet, et Deo renascimur	-	-	-	-	-	-	50
Objectiones diluuntur	-	-	-	-	-	-	53
Animadversiones	-	-	-	-	-	-	58
C. IV. De Joannis baptismo	-	-	-	-	-	-	59
Propositio. Baptismus Joannis non habuit eandem vim ac Christi baptismus	-	-	-	-	-	-	ib.
Objectiones	-	-	-	-	-	-	60
C. V. De baptismi necessitate	-	-	-	-	-	-	63
Propositio. Baptismus est necessarius ad salutem	-	-	-	-	-	-	64
Objectiones solvuntur	-	-	-	-	-	-	66
Animadversiones	-	-	-	-	-	-	69
C. VI. De Infantium baptismo	-	-	-	-	-	-	70
Propositio. Infantes baptizari possunt et debent	-	-	-	-	-	-	71
Objectiones	-	-	-	-	-	-	73
C. VII. De ministro baptismi	-	-	-	-	-	-	78
C. VIII. De caractere	-	-	-	-	-	-	84
C. IX. De cæremoniis	-	-	-	-	-	-	86

## TRACTATUS X.

### DE CONFIRMATIONE.

Prænotanda	-	-	-	-	-	-	93
C. I. De Sacramento	-	-	-	-	-	-	96

Propositio. Confirmatio est verum ac proprium Sacramentum	-	96
Objectiones	-	100
Animadversio	-	106
C. II. De chrismate	-	107
Animadversio	-	110
C. III. De Ministro Confirmationis	-	111
C. IV. De confirmandis	-	113

## TRACTATUS XI.

## DE EUCHARISTIA.

Pro-œmum	-	117
Pars. 1. De Eucharistiæ Sacramento.		
C. I. De ritu Eucharistico	-	118
Propositio. Christus Dominus ritum instituit eucharisticum sub panis et vini speciebus perpetuo in Ecclesia sua servandum	-	118
Objectiones solvuntur	-	119
C. II. De Re Eucharistiæ	-	122
C. III. De sexto Joannis capite	-	127
Propositio. Vera, realis et substantialis præsentia corporis et sanguinis Domini nostri Jesu Christi in eucharistia invicte probatur ex promissionis verbis relatis apud Joannem	-	127
Probatur I. ex Christi Domini verbis	-	127
Probatur II. ex patrum interpretatione	-	130
Objectiones	-	132
C. IV. De institutione Eucharistiæ	-	142
Propositio. Christi Domini eucharistiam instituentis verba simplici et obvio sensu excipienda sunt, ideoque vera realis et substan- tialis corporis et sanguinis ejus præsentia in hoc sacramen- to invicte inde probatur	-	142
Probatur I. ex ipsis Christi verbis	-	142
Probatur II. ex Patrum interpretatione	-	146
Objectiones diluuntur	-	148
C. V. De usu Eucharistiæ	-	159
Propositio. Vera, realis, et substantialis præsentia corporis et sanguinis Domini nostri Jesu Christi in eucharistia invicte probatur iis Scripturæ testimoniis quæ usum hujus Sacramenti res- piciunt	-	159
Probatur II. ex Patrum interpretatione	-	160
Objectiones diluuntur	-	162
C. VI. Patrum testimonia	-	166
C. VII. Objectiones contra realem præsentiam	-	174
C. VIII. De Transubstantiatione	-	183
Propositio. In Eucharistiæ Sacramento non remanet substantia panis et vini, sed mirabilis et singularis conversio fit totius sub- stantiæ panis in corpus et totius substantiæ vini in sanguinem, manentibus dumtaxat speciebus panis et vini : quæ conversio aptissime transubstantiatio a Catholica Ecclesia appellatur	-	185
Probatur I. ex Scripturis	-	185
Probatur II. Patrum testimoniis	-	185

Probatur III. auctoritate Conciliorum	-	-	-	-	188
Probatur IV. ex Liturgiis	-	-	-	-	188
Probatur V. argumento præscriptionis	-	-	-	-	188
Objectiones diluuntur	-	-	-	-	189
C. IX. De Liturgiis	-	-	-	-	208
Propositio. Vera, realis, et substantialis præsentia corporis et sanguinis Domini nostri Jesu Christi in Sacramento eucharistiæ, et transubstantiationis dogma invictè demonstrantur ex liturgiis omnibus antiquissimis, toto orbe christiano usurpatis					210
C. X. De fide Orientalium sectarum	-	-	-	-	221
Propositio. Viget viguitque semper apud Græcos et Orientales omnes fides de vera, reali et substantiali præsentia Domini nostri Jesu Christi in Eucharistia, adeoque dogma transubstantiationis	-	-	-	-	221
C. XI. De permanenti præsentia	-	-	-	-	227
Propositio. In hostiis seu particulis consecratis, quæ post communionem reservantur, vel supersunt, remanet corpus Domini					227
C. XII. De adoratione Eucharistiæ	-	-	-	-	231
Propositio. Christus in eucharistiæ Sacramento etiam extra actionem sacramentalem, cultu latriæ, tum interno, tum externo, adorandus est	-	-	-	-	232
Animadversiones	-	-	-	-	234
C. XIII. De Sacramenti ratione	-	-	-	-	235
C. XIV. De communione sub utraque specie	-	-	-	-	239
Propositio. Nullo Dei præcepto, nullaue necessitate salutis omnes Christi fideles utramque speciem sanctissimi eucharistiæ sacramenti sumere debent	-	-	-	-	241
Objectiones solvuntur,	-	-	-	-	244
Animadversio	-	-	-	-	247
C. XV. De suscipientibus eucharistiam	-	-	-	-	248
PARS II. DE MISSÆ SACRIFICIO	-	-	-	-	251
Prænotanda	-	-	-	-	251
C. I. De sacrificii veritate	-	-	-	-	254
Propositio. In Missa offertur Deo verum et proprium sacrificium					254
Probatur I. ex Christi sacerdotio secundum ordinem Melchisedech					254
Patres appellamus interpretes	-	-	-	-	255
Probatur II. ex vaticinio Malachiæ	-	-	-	-	257
Patres appellamus interpretes	-	-	-	-	257
Probatur III. ex verbis Christi	-	-	-	-	258
Patres interpretes damus	-	-	-	-	259
Probatur IV. ex Apostoli verbis	-	-	-	-	260
Probatur V. ex traditione	-	-	-	-	262
Probatur VI. ex liturgiis	-	-	-	-	264
Probatur VII. argumento præscriptionis	-	-	-	-	266
Objectiones solvuntur	-	-	-	-	267
C. II. De sacrificii proprietatibus	-	-	-	-	275
Proposito. Missa est sacrificium propitiatorium	-	-	-	-	278
Objectiones solvuntur	-	-	-	-	279
Propositio. Missæ sacrificium est propitiatorium etiam pro defunctis					281

## INDEX.

	Objectiones solvuntur	-	-	-	-	-	282
C. III.	De sacrificii proprietatibus	-	-	-	-	-	284
	Propositio. Missæ in quibus solus sacerdos communicat, licitæ sunt						287
	Objectiones solvuntur	-	-	-	-	-	288
	Animadversiones	-	-	-	-	-	290
C. IV.	De Lingua sacra	-	-	-	-	-	292
	Propositio. Missa non potest lingua vernacula celebrari, obstante Ecclesiæ disciplina, quæ æquissimis fulcitur rationibus						292
	Objectiones solvuntur	-	-	-	-	-	294
	Animadversio	-	-	-	-	-	296
C. V.	De ritibus Missæ	-	-	-	-	-	298

## TRACTATUS XII.

### DE PŒNITENTIA.

	Prænotanda	-	-	-	-	-	307
C. I.	De potestate remittendi peccata	-	-	-	-	-	309
	Propositio. Concessa est a Christo Domino Apostolis, et per eos iis qui ministerio sacerdotali funguntur, potestas vere judicialis in peccatorum remissione						312
	Probatur I. ex Scripturis	-	-	-	-	-	312
	Probatur II. ex Patribus	-	-	-	-	-	313
	Probatur III. ex Græcorum consensu	-	-	-	-	-	315
	Probatur IV. præscriptionis argumento	-	-	-	-	-	316
	Objectiones solvuntur,	-	-	-	-	-	316
	Corollaria	-	-	-	-	-	324
C. II.	De hæresi Novatiana	-	-	-	-	-	326
C. III.	De contritione	-	-	-	-	-	331
	Propositio. Contritio quæ paratur per discussionem, collectionem, et detestationem peccatorum, ponderando eorum gravitatem, multitudinem, fœditatem, amissionem æternæ beatitudinis, et æternæ damnationis incursum, cum proposito melioris vitæ, est verus et utilis dolor, et præparat ad gratiam						332
	Objectiones solvuntur	-	-	-	-	-	334
	Animadversiones	-	-	-	-	-	335
C. IV.	De confessione	-	-	-	-	-	337
	Propositio. Confessio omnium peccatorum mortalium quæ quis post baptismum se patrasse recordatur, jure divino est necessaria						339
	Probatur I. ex Scripturis	-	-	-	-	-	339
	Probatur II. ex Patribus	-	-	-	-	-	340
	Probatur III. conciliorum auctoritate	-	-	-	-	-	347
	Probatur IV. ex veteribus libris pœnitentialibus						347
	Probatur V. exemplis	-	-	-	-	-	348
	Probatur VI. ex Orientalium sectarum consensione	-	-	-	-	-	349
	Probatur VII. præscriptione	-	-	-	-	-	350
	Objectiones solvuntur	-	-	-	-	-	350
	Animadversiones	-	-	-	-	-	356
C. V.	De Satisfactione	-	-	-	-	-	358

§. 1. De pœna temporali	-	-	-	-	-	358
Propositio. Tota pœna peccati non semper a Deo remittitur simul cum culpa	-	-	-	-	-	359
Objectiones solvuntur	-	-	-	-	-	360
§. II. De operum pœnitentiæ virtute	-	-	-	-	-	361
Propositio. Satisfactiones, quibus pœnitentes per Christum Jesum peccata redimunt, sunt cultus Dei; nec aliquatenus doctrinam de gratia, vel verum Dei cultum, vel beneficium mortis Christi obscurant	-	-	-	-	-	362
Probatur I. ex Scripturis	-	-	-	-	-	362
Probatur II. ex Patribus	-	-	-	-	-	363
Probatur III. ex disciplina pœnitentiali	-	-	-	-	-	364
Objectiones solvuntur	-	-	-	-	-	365
§. III. De operum pœnitentiæ injunctione	-	-	-	-	-	366
Propositio. Claves Ecclesiæ datæ sunt etiam ad ligandum et propterea sacerdotes, dum imponunt pœnas confitentibus, non agunt contra finem clavium, nec contra institutionem Christi	-	-	-	-	-	367
Objectiones solvuntur	-	-	-	-	-	368
C. VI. De Sacramenti ratione	-	-	-	-	-	370

## TRACTATUS XIII.

### DE INDULGENTIIS.

Prænotanda	-	-	-	-	-	377
C. I. De potestate indulgentias concedendi	-	-	-	-	-	380
Propositio. Est in Ecclesia potestas indulgentias concedendi, quæ et utiles sunt	-	-	-	-	-	380
Objectiones solvuntur	-	-	-	-	-	382
C. II. De indulgentiarum virtute	-	-	-	-	-	386
Propositio. Indulgentiæ valent ad remissionem pœnæ temporalis pro peccatis actualibus debitæ apud divinam justitiam	-	-	-	-	-	386
Objectiones solvuntur	-	-	-	-	-	387
Animadversio	-	-	-	-	-	388
C. III. De Thesaurò Ecclesiæ	-	-	-	-	-	389
Propositio. Thesauri Ecclesiæ, unde dantur indulgentiæ, sunt merita Christi et sanctorum	-	-	-	-	-	389
Objectiones solvuntur	-	-	-	-	-	390
C. IV. De indulgentiarum applicatione	-	-	-	-	-	393

## TRACTATUS XIV.

### DE EXTREMA UNCTIONE.

C. I. De Sacramenti veritate	-	-	-	-	-	398
Propositio. Extrema Unctio est vere et proprie sacramentum a Christo Domino nostro institutum, et a Beato Jacobo Apostolo promulgatum	-	-	-	-	-	400
Objectiones solvuntur	-	-	-	-	-	404
C. II. De sacramenti ministratione	-	-	-	-	-	410

ERRATA.

P.	LINEA.	PRO.	LEGE.
14	23	Abrahæ	Abraha,
38	6	Apostolis	Apostoli
108	5 ab imo	<i>post</i> constat. <i>deest</i>	
124	33	sanguis	sanguinem
139	15	qua	quæ
144	25	sit	est
161	11	αχασδα	αψασδα
193	3	debantur	videbuntur
247	penult.	capit	cepit
290	16	ecessaria	necessaria
315	35	igaveritis	ligaveritis
358	30	egis	Legis

# THEOLOGICÆ DOGMATICÆ

## TRACTATUS IX.

### DE BAPTISMO.

#### PROLEGOMENA.

1. Gratia Dei, quæ Christi meritis nobis comparata est, tribuitur per sæpe, nullo externo adhibito instrumento, ea enim ad orandum excitamur, et orantibus nova dantur subsidia. Cæterum sapientissimus Dominus noster quosdam instituit ritus, quibus vim quamdam ac virtutem cælestem alligavit, quos vocamus *Sacramenta*, et de quibus jam agendum est.

2. Consueverunt Theologi tractatum de Sacramentis in universum præmittere, ut singula Sacramenta deinceps vindicent. Recentioribus tamen, in Germania præsertim, de singulis prius agendum visum est, ut quæ omnibus sunt communia tandem explicant. Hæc nobis opportunior visa est methodus, vix enim generalia illa principia possunt defendi, quin plurima ex iis quæ ad singulorum sacramentorum vindicias magis spectent proferantur, vel probationes differantur, lectoribus ad posteriores tractatus remis- sis. Idcirco haud novitatis, sed utilitatis studio, hanc insistimus viam: nec tamen negamus methodum antiquorum id afferre commodi, quod prævia notione proprietatum sacramenti, facilius sit de singulis tractare. Ne lectores nostri eo careant, præmittendam duximus brevem earum expositionem, probationes postea, pro occasione nata, allaturi.

3. Sacramenti vox a profanis scriptoribus pro militum jurejurando quo sese militiæ adscribebant; et pro pecunia quam apud sequestrem deponere solebant litigantes, victori reddenda, usurpabatur. Sed ab ecclesiasticis auctoribus novam mutuata est vim. Latius quidem aliquando sumpta à Scripturæ interpretibus *arcanum* denotat, sicut eo Tobiae loco: “Sacra-



men tum regis abscondere bonum est,"<sup>1</sup> et apud Paulum : " Magnum est pietatis Sacramentum."<sup>2</sup> Signum quodlibet sacrum etiam significat, quapropter crucis signum ita appellatur ab Augustino.<sup>3</sup> De veteris Testamenti ritibus eo fere sensu adhibetur, quippe qui typi fuerunt et figuræ redemptionis futuræ per Christi mortem. Sed sensu strictiori sacramentum est ritus gratiam animæ impertiens :<sup>4</sup> Græci *μυστήριον* vocant.

4. Extitisse ab ipsis generis humani primordiis ritum aliquem quo veluti instrumento usus est Deus ad indulgentiam peccati originistribuendam conjicit Augustinus, eo quod Deus suis in re adeo necessaria deesse non sit censendus. Abrahæ jussu est ut circumcideret se suosque, in fœderis cum Deo initi testimonium : quem ritum post Augustinum plerique existimant remedii habuisse rationem, quo scilicet peccatum originis tolleretur. Cæterum quomodo fœmellis subveniretur non liquet, nec quo pacto maribus pariter ac fœminis ante circumcisionem præscriptam, ut de vi hac ei absque certo aliquo documento tributa sileamus. " Nec ideo tamen, credendum est," inquit Augustinus, " ante datam circumcisionem famulos Dei (quandoquidem illis inerat Mediatoris fides in carne venturi) nullo Sacramento ejus opitulatos fuisse parvulis suis, quamvis quid esset aliqua necessaria causa Scriptura Sacra latere voluerit. Nam et sacrificia eorum legimus, quibus utique sanguis ille figurabatur, qui solus tollit peccatum mundi."<sup>5</sup>

5. Circumcisio igitur primus noscitur ritus a Deo institutus in fœderis cum Abrahæ, et ejus posteris signum, quo scilicet testatus est se eos sibi in populum peculiarem adsciscere, et promissionum facere hæredes, ea tamen conditione ut eum sancte colerent.

6. Moysis ministerio usus est Deus ut ritus plurimos Israelitis injungeret, quorum plerique divina beneficia commemorabant, vel spem indicabant redemptionis. Agni Paschalis immolatio divinitus servatos Israelitarum primogenitos, ob agni sanguinem superliminaribus illitum commemorabat, dum venturum Redemptorem, agnum verum qui tolleret peccata mundi, significaret iis quorum mens ævi futuri arcana aliquatenus explorabat. De ritibus omnibus dicit Augustinus : " Sacramenta quæ observantur et celebrantur ex lege, prænuntiativa erant Christi venturi : quæ cum suo adventu Christus implevisset, ablata sunt ; et ideo ablata quia impleta. . . . Et alia sunt instituta virtute majora, utilitate meliora, actu facilia, numero pauciora."<sup>6</sup>

(1) Tob. xii. 7

(2) I. Tim. iii. 16.

(3) In Ps. cxli.

(4) Ex latiori vocis usu argumentari solent Protestantes ut probationes ex patribus desumptas infirmant ; sed voce sola Catholici non innituntur, quæ enim eam comitantur ejus vim, quando stricte sumitur, demonstrant.

(5) L. v. contra Julian. c. xi.

(6) L. xix. contra Faustum, c. xiii.

7. Septem esse novæ legis Sacramenta a Jesu Christo Domino nostro instituta, videlicet baptismum, confirmationem, eucharistiam, pœnitentiam, extremam unctionem, ordinem et matrimonium, definivit concilium Tridentinum;<sup>1</sup> qua in re Græcos schismaticos, sectasque Orientales habemus concordēs.<sup>2</sup> Non omnia Sacramenta paræ sunt dignitatis, vel necessitatis. Eucharistia enim cæteris præstat, quum auctor ipse Sacramento in ea adsit, fons omnis gratiæ et sanctitatis: et baptismus præ cæteris est necessarius. Lapsis post baptismum pœnitentia opus est: confirmatio ad robur hominis christiani instituta, haud sine gravi crimine, spernitur: eucharistia districte præcipitur sumenda: extrema unctio subsidio est maximi momenti vita periclitantibus. Ordo non singulis, sed toti Ecclesiæ est necessarius, ut sacra donati auctoritate muneribus in hominum salutem fungantur. Matrimonium nubentibus in Christo gratiæ munera tribuit.

8. Sacramenta omnia negarunt sæculo secundo Archontici, et deinceps Manichæi. Sæculo decimo sexto Gaspar Schwenckfeldius ejusdem erroris incusatus est. Sequenti sæculo medio Georgius Fox, Anglus, arte sutor, spiritu se duci existimans, externos omnes ritus, subsidiaque salutis rejecit, sectamque conflavit *Quakerorum*, scilicet trementium, nomine a tremore quo aliquando arripiebantur, Deum colentes, desumpto. Hoc utimur vocabulo, utpote quod ipsi jam agnoscunt, ad eos a cæteris sectariis distinguendos, quin contumeliam, quod absit, velimus iis inferre. In America, quo se contulit Fox, anno 1662, secta habuit progressus, præsertim in hac Pennsylvaniae provincia, quam Gulielmus Penn, Anglus, genere insignis, et sectæ studio, fundavit anno 1680. Philadelphia, in qua scribimus urbe, plurimos adhuc continet Quakeros, divitiis plerumque et morum suavitate spectabiles. Ante paucos annos secta in duas scissa est contrariis studiis partes, Hicks nova propagante placita, quæ Deismum sapere dicuntur. *Hicksitæ* dicti sunt ejus sectatores, ut a Quakeris aliis discernantur. Hi omnes Sacramenta omnia rejiciunt, Spiritu nos sanctos justosque effici, absque externo aliquo ritu, affirmantes.

9. Plerique novatores duo agnoscunt Sacramenta, Baptismum scilicet et cœnam: quibus tamen Lutherani Pœnitentiam adjunxerunt in *Apolo-gia Confessionis Augustanæ*. "Si Sacramenta vocamus ritus, qui habent mandatum Dei, et quibus addita est promissio gratiæ; facile est judicare, quæ sint proprie Sacramenta. . . . Vere igitur sunt Sacramenta Baptismus, cœna Domini, absolutio quæ est Sacramentum Pœni-

(1) *Sess. vii. de Sac. can. 1.*

(2) *Vide censuram Lutheranæ confess. sibi oblatæ, a Jeremia patriarcha Constantinop. an. 1575. Vide etiam Conc. Constantinop. anno 1638, et anno 1642, et anno 1672. Vide de sectis Orientalibus Assemanum Compendio Storico vol. iii. Ven. 1736, et Lupiam, auctore Fausto Nairono, Banensi Maronita, Romæ 1694.*

tentiæ.”<sup>1</sup> Melancton Matrimonium habere Sacramentum visus est ; imò in conventu Lipsiensi anno MDXLVIII. omnia Sacramenta excipere.<sup>2</sup> Zuin-  
glius Baptismum, Cœnam et Matrimonium Sacramentorum nomine intel-  
lexit.<sup>3</sup> Calvinus ordinem haud ægre inter Sacramenta recensuit aliquando,<sup>4</sup>  
quando alias duo tantum agnoverit. Oxonienses de Ordinatione tamquam  
divinitus instituta ratione, qua et potestas sacra, et gratia confertur,  
loquuntur.”<sup>5</sup>

10. Definitur Sacramentum res sensibus subjecta, quæ ex Dei institu-  
tione sanctitatis et justitiæ tum significandæ tum efficiendæ vim habet.<sup>6</sup> Ita  
Catechismus Tridentini concilii jussu in usum Parochorum compositus.  
Ritus igitur externus in Sacramentis requiritur, qui gratiæ quam conferunt  
indiciū sit, nam recte docet Augustinus “ signa cum ad res divinas perti-  
nent, Sacramenta nominari ;”<sup>7</sup> et alias: “ Si Sacramenta quandam similitu-  
dinem earum rerum quarum Sacramenta sunt, non haberent, omnino  
Sacramenta non essent.”<sup>8</sup>

11. Divina requiritur institutio in perpetuum, nullum enim in nova lege  
agnoscendum est Sacramentum quod Christum non habeat auctorem,<sup>9</sup>  
quodque ipse haud statuerit ad finem usque mundi usurpandum : ipsius  
scilicet erat ea dare subsidia quibus salus comparari queat, ea eligere  
instrumenta quibus gratia, quam nobis sua morte promeritus est, tribuatur.  
Distinguenda igitur sunt Sacramenta a ritibus quos Ecclesiæ præsules ad  
decorem divini cultus et ad pietatem fovendam instituerunt.

12. Novæ legis Sacramenta gratiam conferunt, ideoque continent, sci-  
licet ex Christi Domini institutione certam vim habent gratiam impertiendi,  
meritis ejus et voluntate, adeo ut quicumque ea recipit eam certò recipiat,  
nisi forsan obicem ipse pravo sui animi affectu objiciat. Ut hanc Sacra-  
mentis insitam virtutem exprimerent, et contra hæreticorum cavillationes  
tuerentur Tridentini patres, definierunt per Sacramenta novæ legis conferri  
gratiam *ex opere operato*, vocibus a Scholæ doctoribus mutuatis. *Ex*

(1) Art. vii. de numero et usu Sacramentorum. Verba referuntur a Walchio qui frustra laborat ut ostendat Pœnitentiam latiori sensu Sacramentum vocari. L. i. Introd. ad libros symbol. Luth. c. iv. de Apologia Aug. Conf. § xviii.\*\*

(2) Ita refert Sleidanus l. xx. hist.

(3) L. de vera et falsa Rel. c. de Mat.

(4) In Antidoto conc. Trid. Sess. vii. c. iv.

(5) “ I know the grace of ordination is contained in the laying on of hands. . . .  
“ Through the Bishop who ordained us, we received the Holy Ghost. . . . If Ordina-  
tion be a divine ordinance, it must be necessary ; and if it is not a divine ordinance how  
dare we use it? As well might we pretend the Sacraments are not necessary to salvation,  
while we make use of the offices of the Liturgy ; for when God appoints means of grace,  
they are *the* means.” Tract No. 1. London, 1833.

(6) Cat. Rom. par. ii. c. i. n. 10.

(7) Ep. ad Marcellin.

(8) Ep. ad Bonif.

(9) Trid conc. sess. vii. de Sac. can. 1.

*opere operantis* oratio, eleemosyna, aliaque bona opera valent, pro pio animi affectu : sed Sacramenta ipsa vim habent gratiam producendi. Cæterum sicut solis lumen obice objecto excludi potest, ita et Sacramentorum gratia sua culpa privatur, qui ea haud rite dispositus accipit. Sic infidelis, vel peccato animi affectu adhærens, baptismi, si eum suscipiat, gratia caret, quam recipit infans nullum obicem objiciens. Ideo requiruntur in adultis, qui fuerint sui compotes, dispositiones quædam animi, sine quibus Sacramenta illis gratiam non tribuunt. Calumniantur igitur, qui asserunt ea ex Catholica doctrina peccatoribus, animi affectu peccato adhærentibus prodesse.

13. "Omnia Sacramenta," inquit Eugenius Pontifex, in decreto quod Florentino in concilio, pro Armenorum instructione edidit, "tribus perficiuntur, videlicet rebus tanquam materia, verbis tanquam forma, et persona ministri conferentis Sacramentum cum intentione faciendi quod facit Ecclesia ; quorum si aliquod desit, non perficitur Sacramentum."<sup>1</sup> *Materia et forma* voces sunt quas ex philosophia Aristotelica, ineunte decimo tertio sæculo, Guilielmus Altissiodorensis primus mutuatus dicitur, quamvis et *formam* vocaverit Tertullianus jam suo tempore verba Sacramenti, sed sensu, ut videtur, diverso.<sup>2</sup> *Materia elementum* ab Augustino vocata est : forma dicta est verbum ; "Verbo," inquit, "baptismus consecratur : detrahe verbum, et quid est aqua, nisi aqua ? accedit verbum ad elementum, et fit Sacramentum."<sup>3</sup> *Materia* igitur res est, vel actus sensibilis, v. g. aqua in baptismo : *forma* est verborum series quibus materia ad effectum Sacramentalem determinatur.<sup>4</sup>

14. Intentio ministri etiam exigitur, ut scilicet velit facere quod facit Ecclesia, nam hac tantum ratione fiet ut Christi nomine agat, ideoque sacrum perficiat ritum. Cæterum satis gravis agitur in scholis controversia utrum iis in rerum adjunctis, in quibus se gerit Ecclesiæ nomine, nullo dato indicio se velle mimum agere, vel illudere adstantibus, possit Sacramentum frustrari, occulto animi consilio haud faciendi quod facit Ecclesia. Catharinus, celebris Theologus, qui adfuit concilio Tridentino, censuit eum non posse, sufficere enim intentionem externum ritum seriò peragendi, Ecclesiæ nomine, quæ intentio *externa* inde vocari consuevit. Hunc sequuntur Jueninus, Drouenus, plurimique inter Gallos præsertim. Itali perique censeant necesse esse ut seriò velit facere quod facit Ecclesia, animi consilio externo actui respondente : nec alias actum Christi nomine vere fieri. Hanc *internam* vocant intentionem. Scholasticæ disputationis, pro more et instituto nostro, haud solliciti, intentionem faciendi quod facit

(1) Inter acta Conc. Flor.

(2) L. de Baptismo c. xiii.

(3) Tract lxxx. in Joan.

(4) Voces hæ scholasticæ usurpantur in Burneti analysi p. 418.

**Ecclesia requiri profiteamur, prout contra Lutherum in concilio Tridentino definitum est ; hic scilicet asseruerat nil referre utrum minister seriò an joco agat, quum totus Sacramentorum effectus ad suscipientis fidem foret referendus.**

**15. Id apud omnes Theologos pro re explorata habetur, necesse non esse, ut quis velit effectum Sacramenti producere, vel Ecclesiæ Catholicæ ritum imitari, vel peragere ; quum Ecclesia agnoscat valere baptismum ab hæreticis collatum, ritu quem Christus instituit servato, quos constat Catholicæ Ecclesiæ mores haud sibi proponere sequendos. Inde etiam liquet fidem ministri, vel ejus probitatem non requiri ut valeat Sacramentum;<sup>1</sup> quamvis peccet qui absque fide, vel animo peccato inquinato ea administret. Equidem Sacramenta totam suam virtutem a Christo derivant, cui tamen irrogat gravem injuriam qui ejus nomine agit, animo fovens peccatum.**

**16. Pleraque Sacramenta ut valeant sacrum ordinem in conferente exigunt, nec enim Christi nomine agere quis potest, nisi communicata, ea quam statuit ratione, potestate. Attamen valet baptismus a laico, etiam infideli, collatus, ob summam quippe hujus Sacramenti necessitatem, Christus, licet illud ministrandi Apostolis specialiter demandaverit munus, nemini tamen illud penitus denegavit, uti ex vetustissima, traditione et consuetudine Ecclesiæ didicimus. Matrimonium etiam, ob specialem contractus naturam, a plerisque censetur vim sacramentalem habere, si uterque contrahens sit baptizatus, qui idcirco habetur minister. Cæterum eucharistia, pœnitentia, et extrema unctio, postulant omnino ut Sacerdotio sit insignitus qui ea confert. Ordines majores, Sacerdotium saltem et Diaconatus, nonnisi ab Episcopo conferuntur. Confirmatio ab episcopo, tamquam ordinario ministro, fit, sacerdotibus nonnumquam ex Apostolicæ Sedis delegatione eam administrantibus in Ecclesia Occidentali; apud Græcos ex consuetudine tolerata, seu probata.**

**17. Sacramenta mortuorum baptismus et pœnitentia a Theologis nuncupantur, quia in remissionem peccatorum conferuntur, ideoque animam Deo mortuam resuscitant. Cætera Sacramenta vivorum sunt, nec suscipienda ab iis qui gratia divina non fruuntur. Cæterum etsi peccet qui peccato inquinatus ea suscipiat, non obstat pravitas animi valori Sacramenti, si excipias pœnitentiam, sed fructibus ejus eum vacuum relinquit, imo obstringit sacrilegii crimine. Qui baptizatus non est nulli sacramento suscipiendo est idoneus, nec aliquem experitur effectum aliorum Sacramentorum, etsi forte externus ritus peragatur. Sic Ordines nullo modo illi conferri valent, nec confirmatio ; nec enim augeri potest et ad maturam**

(1) Id fatentur Anglicani art. xxvi.

venire ætatem, qui adhuc natus non est baptismo, nec in Ecclesia munere aliquo sacro fungi valet, qui ipsam januam haud est ingressus.<sup>1</sup>

18. Sacramenti nomen apud novatores plerumque accipitur pro ritu a Christo instituto, quin aliqua virtus ei inesse dicatur.<sup>2</sup> Sociniani illud censent nudum ac simplex signum quo christianus ab infideli distinguitur. Lutherus dixit esse “proprie ea sacramenta quæ annexis signis promissa sunt.”<sup>3</sup> Calvinus dicit: “Videtur autem mihi hæc simplex et propria fore definitio, si dixerimus externum esse symbolum, quo benevolentiae erga nos suæ promissiones conscientiis nostris Dominus obsignat, ad sustinendam fidei nostræ imbecillitatem: et nos vicissim pietatem erga eum nostram tam coram eo et angelis quam apud homines testamur.”<sup>4</sup> Rationalistæ Sacramentorum christianorum præstantiam in significatione symbolica et fine morali positam esse docent.<sup>5</sup> Oxonienses ad veram Sacramenti notionem accedere videntur, queruntur enim de suis, qui plerique negant Dei dona in ritibus quibusdam contineri, vel Deum virtutem quamdam invisibilem his adnexuisse.<sup>6</sup> Quæ Episcopaliani in suis

(1) Tota errat re Staunton, Episcopalianus, (in opere: *A dictionary of the church, New York, 1839, art. Lay Baptism*) qui Paulum Apostolatus munere gavisum esse ante baptismum dicit: quamvis enim Christus eum in id elegerit, haud tamen suscipere illius exercitium debuit, nisi baptismo, et ordine susceptis. Porro Episcopatus Ordinem suscepisse censendus est una cum Barnaba, ea occasione quæ Actorum xiii. capite refertur. Eum paulo post baptismum Sacerdotio insignitum verosimile videtur, quum concionibus fidem magno zelo vindicaverit. Audiantur Oxonienses, sanius quidem Stauntono sapientes: “Were there any one person who might, from the very peculiar circumstances of his call and conversion, have had grounds for conceiving himself entitled to dispense with this ceremony, that person was undoubtedly St. Paul; yet we find that, favoured as he had been, when it was seen meet to send him as an Apostle to the Gentiles, the Holy Ghost deigned to give express directions that he should be separated for the purpose; ordained, that is to say, to such ministry.” Oxford Tracts, vol. i. No. 5.

(2) “Sacraments are holy signs and seals of the covenant of grace, immediately instituted by God, to represent Christ and his benefits, and to confirm our interest in him.” Presbyt. Conf. ch. xxvii.

(3) Lib. de captiv. Babylon.

(4) Inst. l. iv. c. xiv.

(5) Wegscheider § 165. cit. a Perrone.

(6) “As if there were some antecedent improbability in God’s gifts being lodged in particular observances, and distributed in a particular way; and as if the strong wish, or moral worth, of the individual could create in the outward ceremony a virtue which it had not received from above. Rationalistic, or (as they may be more properly called) carnal notions concerning the Sacraments, and, on the other hand, a superstitious apprehension of resting in them, and a slowness to believe the possibility of God’s having literally blessed ordinances with invisible power, have, alas! infected a large mass of men in our communion.” Advertisement to volume ii. Oxford Tracts, London, 1836.

articulis proferunt de Sacramentis viderentur his consona, ea enim vocant *certa testimonia et signa efficacia gratiæ* :<sup>1</sup> attamen quæ adjieiuntur voces ambiguæ sunt, et vulgari sectarum errori facile accommodatæ ;<sup>2</sup> adeo ut totum articulum exscripserint tamquam suum Unitarii quidam in libello quem sæpe citavimus.<sup>3</sup> In analysi expositionis triginta novem articulorum Anglicanorum a Burneto datæ, vis sacramentis indita negatur, et tamen dicitur Christus adesse speciali quadam ratione, digne suscipientibus beneficia impertiens.<sup>4</sup>

(1) " Sacraments ordained of Christ be not only badges or tokens of christian men's profession, but rather they be certain sure witnesses, and effectual signs of grace, and God's good will towards us, by the which he doth work invisibly in us, and doth not only quicken, but also strengthen and confirm our faith in him." Art. xxv.

(2) " Indeed, this may even be set down as the essence of sectarian doctrine (however its mischief may be restrained or compensated, in the case of individuals,) to consider faith, and not the Sacraments, as the instrument of justification and other Gospel gifts." Pusey on Baptism, cited in Oxford Tracts, vol. iv. Letter to a Magazine.

(3) Unitarian Miscellany, vol. v. p. 216.

(4) Article xxv. p. 411.



## CAPUT I.

## DE AQUA AD BAPTISMUM NECESSARIA.

19. Sacramenti nomine intelligitur ritus a Christo Domino nostro institutus, perpetuò servandus, quo gratia ejus confertur. Baptismus primum inter Sacramenta locum obtinet, de quo imprimis agendum erit. Est autem ablutio corporis aqua facta, invocatis Patre et Filio, et Spiritu Sancto, qua quis Deo renascitur.

20. Fuerunt primis sæculis qui Baptismum rejicerent, Cajani scilicet ex Valentinianis, et Quintilliani, fœminæ Quintillæ sectatores, uti refert Tertullianus.<sup>1</sup> Manichæi, etiam testante Augustino,<sup>2</sup> Seleuciani et Hermiani, qui, uti idem sanctus doctor narrat, ignem adhibebant, uti *ad literam* implerent quod de baptismo Spiritus Sancti et ignis prædicaverat Joannes.<sup>3</sup> Bogomili sæculo duodecimo Spiritu se baptizari jactantes, Catholicorum baptismum Joannis esse, non Christi, dicebant, utpote aqua collatum. Quakeri, Georgio Fox duce, Roberto Barclaio vindice, prorsus repudiant aqua baptismum, quem ritum dicunt Judaicum, licet eum ab Apostolis, ex œconomia quadam, ad tempus adhibitum fateantur, quin Christi sanctionem et auctoritatem habeat.<sup>4</sup> Christi baptismum Spiritu Sancto interius perfici, nec ullam aquæ habendam rationem docent.

21. Concilium Tridentinum hac in re hunc edidit canonem : “ Si quis dixerit aquam veram et naturalem non esse de necessitate baptismi, atque ideo verba illa Domini nostri Jesu Christi : nisi quis renatus fuerit ex aqua et Spiritu Sancto, ad metaphoram aliquam detorserit ; anathema sit.”<sup>5</sup>

(1) Lib. de Bapt. c. i. et 2.

(2) Lib. de hær. c. xlv.

(3) Mat. iii. 11.

(4) “ As there is one Lord, and one faith, so there is one Baptism ; which is not the putting away the filth of the flesh, but the answer of a good conscience before God, by the resurrection of Jesus Christ. And this Baptism is a pure and spiritual thing, to wit : the Baptism of the Spirit and Fire, by which we are buried with him, that being washed and purged from our sins, we may walk in newness of life : of which the Baptism of John was a figure, which was commanded for a time, and not to continue for ever.” Prop. xii. concerning Baptism, Barclay’s Apology.

(5) Sess. vii. can. ii. de Bapt.

## PROPOSITIO.

*Christus Dominus instituit aqua baptismum perpetuo, ad finem usque mundi, ministrandum, qui proinde est novæ legis Sacramentum.*

*Probatur I. ex Christi verbis.*

22. Apostolos mittens dixit: “Data est mihi omnis potestas in cœlo, et in terra. Euntes ergo docete omnes gentes, baptizantes eos in nomine Patris, et Filii, et Spiritus Sancti. Docentes eos servare omnia quæcumque mandavi vobis. Et Ecce ego vobiscum sum omnibus diebus usque ad consummationem sæculi.”<sup>1</sup> *Baptizare βαπτίζειν*, juxta vim vocis, et communem Scripturarum usum, immersionem in aquam, vel aqua ablutionem significat, nec ad alium traduci potest sensum, nisi ex contextu a propria et obvia significatione vocem translatam esse constet. Ergo ex Christi mandato aqua baptizare debuerunt Apostoli. Porro perpetuum fore hunc ritum ostendit Christus, se illis ad consummationem mundi adfuturum pollicendo, quum enim id post mandatum baptizandi dictum sit, liquet baptizantibus semper per sæcula omnia Christum adfuturum. Apostolorum igitur successores, illud muneris perpetuò exercentes, Christi mandato comprehenduntur. Sacrum verò esse baptizandi ritum, ad animæ munditiem et salutem directum, ex solempni trium personarum divinarum invocatione colligitur, et ex promissione Christi, se illud peragentibus semper fore præsentem, auctoritate scilicet et gratia; et ex præfatione, qua se omnem potestatem in cœlo et in terris habere professus est, ut cælestis potestatis exercitium Apostolis demandare plane intelligeretur. Ex loco *parallelo* Marci constat insuper salutis assecutionem baptismi susceptioni alligasse Christum: “qui crediderit et baptizatus fuerit, salvus erit.”<sup>2</sup>

23. Joannes Evangelista refert Christi colloquium cum Nicodemo, Judæorum principe, qui, quum ex prodigiis Christum divinitus missum magistrum agnosceret, “respondit Jesus, et dixit ei: Amen, amen dico tibi, nisi quis renatus fuerit denuo, non potest videre regnum Dei.” Dicit ad eum Nicodemus: Quomodo potest homo nasci, cum sit senex? numquid potest in ventrem matris suæ iterato introire et renasci? Respondit Jesus: Amen, amen dico tibi, nisi quis renatus fuerit ex aqua et Spiritu Sancto, non potest introire in regnum Dei.”<sup>3</sup> Novæ nativitatis necessitatem inculcat Christus, eamque ex aqua et Spiritu Sancto esse declarat, dum explicaret quomodo quis iterum nasci posset. Erat igitur occasio clarius suam explicandi mentem, et verba obvio sensu usurpandi. Hanc ad regnum cœlorum assequendum conditionem necessariam esse ipsum aqua baptismum liquet, quum apud Marcum eam ad salutem requiri dicat,

(1) Matt. xxviii.

(2) Marc. xvi. 16.

(3) Joan. iii. 3.

Præterea Paulus dicit : “secundum suam misericordiam salvos nos fecit, per lavacrum regenerationis et renovationis Spiritus Sancti.”<sup>1</sup> De baptismo hic agi satis patet, quum lavacrum dicatur, quo regeneramur et renovamur, Spiritu Sancto in nos copiose effuso. De eo igitur intelligendus est Christus Dominus, dum docet nasci nos oportere denuo ex aqua et Spiritu Sancto. Baptismus idcirco agnoscendus est ritus cui nativitatem nostram spiritualem Christus alligavit, ut aqua abluti, Spiritus Sancti opera, filii Dei habeamur et simus.

*Probatur II. ex Apostolorum rebus gestis.*

24. Christi Domini mentem de salutis subsidiis ex Apostolorum rebus gestis colligere est ; nec enim eam ignorasse, vel violasse, censi possunt, Spiritu Sancto eis dato ut eos in omnem veritatem induceret.<sup>2</sup> Petrus, a Cornelio centurione accersitus, quum Spiritus Sancti indicia in ipso, et suis, miraretur, exclamavit : “Numquid aquam quis prohibere potest, ut non baptizentur hi, qui Spiritum Sanctum acceperunt, sicut et nos?”<sup>3</sup> Aqua igitur necessaria erat baptismo, qui ministrandus erat etiam illis qui Spiritum Sanctum jam acceperant : adeo urgebat lex Christi. Tantæ erat necessitatis baptismus, ut Deus dignatus sit cœlestia et divina præbere argumenta gentes ei suscipiendo esse idoneas, ne Judæorum præconceptis opinionibus tanto bono fraudarentur.

25. Totam Ecclesiam, universos scilicet fideles, aqua et verbo mundatam dicit Paulus : “Christus dilexit Ecclesiam, et seipsum tradidit pro ea, ut illam sanctificaret, mundans lavaero aquæ in verbo vitæ.”<sup>4</sup> Lavacrum igitur de quo Paulus alias loquitur, fiebat aqua, qua mundati sunt et sanctificati quotquot ea sunt abluti.

*Probatur III. ex baptismo quem Philippus diaconus ministravit.*

26. Dubitari non potest Philippum, Apostolorum exemplum et auctoritatem secutum, baptismum quem Christus instituit ministrasse. Post colloquium cum eunucho reginæ Candacis, de Christo a vate Isaia prædicto, et de salute per ipsum assequenda, “dum irent per viam, venerunt ad quamdam aquam, et ait eunuchus : Ecce aqua, quid prohibet me baptizari ? Dixit autem Philippus : Si credis ex toto corde, licet. Et respondens ait : Credo Filium Dei esse Jesum Christum. Et jussit stare currum ; et descenderunt uterque in aquam, Philippus et eunuchus, et baptizavit eum.”<sup>5</sup> Aqua igitur baptizatus est eunuchus, post fidei in Christum professionem, et postquam baptismum exquisierat, veluti ritum quem ex Christi mandato, Philippo docente, necessarium esse intellexerat.

(1) Tit. iii. 5.

(2) Non veretur Barclaius scribere : Prop. xii. obj. “Although it should be granted, that for a season they did so far mistake it, as to judge that water belonged to that Baptism (which, however, I find no necessity of granting,) yet I see not any great absurdity would thence follow.”

(3) Act. x. 47.

(4) Act. viii. 36.

*Probatur IV. ex constanti omnium sæculorum a Christo usu.*

27. Epistola quæ dicitur Barnabæ figuras Baptismi quæ in veteri Testamento præcesserunt, explicat: “Et quidem de aqua, scriptum est in Israelitas, quo modo baptismum qui affert peccatorum remissionem, non sunt recepturi.”—“Hoc ait; quod nos descendimus quidem in aquam pleni peccatis ac sordibus, inde autem emergimus fructum afferentes, in corde, timorem et spem in Jesum habentes ex spiritu.”<sup>1</sup>

28. S. IRENÆUS post mandatum Christi de baptismo relatum, Spiritus Sancti opera enarrare pergit: deinde addit: “Sicut enim de arido tritico massa una fieri non potest sine humore, neque unus panis: ita nec nos multi unum fieri in Christo Jesu poteramus, sine aqua quæ de cœlo est. Et sicut arida terra, si non percipiat humorem, non fructificat: sic et nos, lignum aridum existentes primum, numquam fructificaremus vitam, sine superna voluntaria pluvia. Corpora enim nostra per lavacrum illud quod est ad incorruptionem, unitatem acceperunt; animæ autem per Spiritum. Unde et utraque necessaria, cum utraque proficiunt in vitam Dei, miserante Domino nostro Jesu Christo.”<sup>2</sup> Liquet ex Irenæi sententia, et fide tunc vigente, lavacrum quo corpora abluuntur necessarium esse ad vitam et incorruptionem.

29. S. JUSTINUS M. in Apologia quam ad Ethnicos imperatores pro christianis misit, refert qua ratione fideles baptismo initientur: “Quicumque persuasum habuerint et crediderint vera esse, qua a nobis docentur et dicuntur, seque ita vivere posse promiserint, ii precari et jejunantes priorum peccatorum veniam a Deo petere docentur, nobis una precantibus et jejunantibus. Deinde eo ducuntur a nobis, ubi aqua est, et eodem regenerationis modo regenerantur, quo et ipsi sumus regenerati. Nam in nomine parentis universorum ac Domini Dei ac Salvatoris nostri Jesu Christi, et Spiritus Sancti, lavacrum in aqua tunc suscipiunt. Dixit enim Christus: “Nisi regenerati fueritis, non intrabitis in regnum cœlorum.”<sup>3</sup>

30. TERTULLIANUS tractatum de Baptismo sic exorditur: “Felix Sacramentum aquæ nostræ, qua abluti delictis pristinae cœcitatæ, in vitam æternam liberamur.” Cajanos rejicientes Baptismum veluti hæresim nefandam insectatur, quibus Christianos opponit—‘pisciculos’ ob nativitatem in aqua designatos: “sed nos pisciculi secundum ἰησοῦν nostrum Jesum Christum in aqua nascimur.”<sup>4</sup> Hanc nascendi rationem ad Christi legem refert: “Lex enim tinguendi imposita est, et forma præscripta: Ite, inquit, docete nationes, tingentes eas in nomen Patris, et Filii, et Spiritus Sancti. Huic legi collata definitio illa: “Nisi quis renatus fuerit ex aqua et spiritu, non

(1) Barnabæ ep. § xi. n. 2. 12.

(2) L. iii. adv. hæer. c. xix.

(3) Apologia I. n. 61. alias Apol. ii.

(4) De Baptismo. Christiani utebantur voce ἰησοῦς symboli et tessere instar, ut Ἰησοῦς Χριστὸν Θεοῦ υἱὸν Σωτῆρα, initialibus litteris designarent.

intrabit in regnum eorum, obstrinxit fidem ad Baptismi necessitatem. Itaque omnes exinde credentes tinguebantur. Tunc et Paulus ubi credidit, unctus est.”<sup>1</sup>

31. S. AMBROSIVS animæ munditiem a Spiritu Sancto effici animadvertit, nec enim qui balneo utitur mundatur: “Hinc cognosce quod aqua non mundat sine Spiritu. Ideoque legisti quod tres testes in baptismo sint, aqua, sanguis, et spiritus. Quia si unum horum detrahas, non stat baptismatis sacramentum. Quid est enim aqua sine cruce Christi? Elementum commune, sine ullo sacramenti effectū. NEC ITERUM SINE AQUA REGENERATIONIS MYSTERIUM EST: ‘Nisi enim quis renatus fuerit ex aqua et Spiritu non potest introire in regnum Dei.’ Credit autem etiam catechumenus in cruce Domini Jesu, quia et ipse signatur: sed nisi baptizatus fuerit in nomine Patris, et Filii, et Spiritus Sancti, remissionem non potest accipere peccatorum, nec spiritualis gratiæ munus haurire.”<sup>2</sup>

32. De sæculorum posteriorum usu adeo constat ut testimonia referre superfluum videatur.<sup>3</sup> Omnium vox haberi potest illa Augustini: “Tolle aquam, non est baptismus.”<sup>4</sup> Barclaius nonnisi paucos, sæculo undecimo, recenset qui baptismum rejecerint, Manicheismi, uti fatetur, incusati et damnati.

## OBJECTIONES SOLVUNTUR.

33. *Obj. 1.* Probatio ex Christi mandato nititur usu recepto vocis *baptizandi*: sed si quid valeat, immersio habenda erit prorsus necessaria, nam ita accipiebatur, juxta vim ipsius vocis.<sup>5</sup>

*Resp.* Vox illa plerumque pro immersione accipiebatur: attamen ablutio aqua quocumque modo facta, etiam ea designabatur, quapropter qui lustrali aqua, pro legis præscripto, aspersus fuerat ut mundaretur, baptizatus — *βαπτίζομενος* ab auctore Ecclesiastici dicitur:<sup>6</sup> constat autem usum auctorum Judaicorum, magis quam profanorum in vocum vi, prout in novo Testamento usurpantur, definienda esse respiciendum. Cæterum non agitur impræsentiarum de modo baptizandi, utrum scilicet aspersio vel infusio baptismi habere possit rationem; ideoque satis erit monstrasse vocem qua Christus usus est, vi sua nativa, et usu communi, aqua abluionem designare.

34. *Obj. 2.* Christus alio in loco baptizandi voce sensu translato usus

(1) Tertullian. lib. de bapt.

(2) L. de his qui, initiantur, c. iv.

(3) “I know there are divers of those called the Fathers, that speak much of water-baptism, calling it, ‘characterem Christianitatis.’” Prop. xii. Obj. 6.

(4) Tract xv. in Joan.

(5) Barclay prop. xii. § x.

(6) Eccli. xxxiv. 30.

est : “ Baptismo autem habeo baptizari, et quomodo coarctor usque dum perficiatur ?”<sup>1</sup>

*Resp.* Translatus ille sensus satis colligitur ex adjunctis : quum enim Christus aqua jam a Joanne ablutus fuisset, deinceps non amplius ablundus, loqui intelligebatur de ærumnis quæ eum manebant, quæ pelagi instar eum veluti obruturæ erant. In mandato autem Apostolis dato dum in universum mundum mitterentur, ipso in cœlos jam ascensuro, nullus est metaphoræ locus, sed verba sensu usitato et noto sumenda omnino sunt.

35. *Obj.* 3. Christus suum baptismum designavit Spiritus Sancti, eumque distinguendum docuit a baptismo aqua quem Joannes administravit : “ Joannes quidem baptizavit aqua, vos autem baptizabimini Spiritu Sancto non post multos hos dies.”<sup>2</sup> Ita Apostolos ante ascensionem suam allocutus est, qui ipsi non alium baptismum suscepisse noscuntur.

*Resp.* Eo loci Christus de Spiritu Sancto post paucos dies in Apostolos illapsuro locutus est. Illum illapsum ‘baptismus’ vocavit translato sensu, ut significaret copiam donorum cœlestium quibus affluerent. Eum a Joannis baptismo, aqua tantum constantem, meritò discrevit; nec enim aqua sola in eo adhibenda erat, sed vis divini Spiritus, ignis instar, ostendenda. Mittens autem Apostolos ut baptizarent, non potuit intelligi de baptismo Spiritus Sancti, quia de eo siluit prorsus, et ipsorum non erat divinam illam vim in animam exerere, quæ ipsius Spiritus est. Igitur obviæ vocis significationi inhærendum est, et baptismus aqua agnoscendus, cui tamen Pater, Filius, et Spiritus Sanctus sua virtute adsint. Quod autem non legatur in Scripturis Apostolos ipsos fuisse aqua baptizatos, non probat eos baptismum non suscepisse, quum nec Christi nec Apostolorum res gestæ omnes referantur. Cæterum penes Christum erat eos a baptismi lege eximere : quod tamen eum fecisse non est verosimile. Dicimus igitur cum Augustino : “ Non omnia quæ facta sunt etiam scripta inveniuntur, verumtamen facta esse ex cæteris documentis probantur. Scriptum est quando baptizatus sit Apostolus Paulus, et scriptum non est quando baptizati sint alii Apostoli : verumtamen etiam ipsos baptizatos intelligere debemus : quemadmodum scriptum est quando baptizatæ sint plebes ecclesiarum in Jerusalem et Samaria, quando autem baptizatæ sint aliæ plebes gentium, quibus Apostoli epistolas miserunt, non est utique scriptum, et tamen etiam ipsas baptizatas utique minime dubitamus propter illam Domini sententiam : ‘ Nisi quis renatus fuerit ex aqua et Spiritu Sancto, non intrabit in regnum cœlorum.’”<sup>3</sup> Porro Evodius qui Antiochenam Ecclesiam primus rexit, si Apostolum Petrum excipiamus, in epistola το φως inscripta, retulit Christum Petrum suis manibus baptizasse : “ Christus,” inquit, “ manibus ipse suis Petrum tantummodo baptizavit : Petrus porro Andream

(1) Luc. xii. 50.

(2) Act i. 5.

(3) Aug. ep. cclxv. alias cviii. ad Seleuciam.

et filios Zebedæi : ii deinceps reliquos apostolos. Septuaginta autem illos Petrus et Joannes, theologus dictus, baptizarunt.”<sup>1</sup> Habetur testimonium hoc apud Nicephorum. Clemens Alexandrinus id etiam suo libro dicto Hypotyposeon inseruit.<sup>2</sup>

36. *Obj.* 4. Apostoli nonnisi a Christo baptizari potuerunt, qui tamen neminem baptizavit; quum enim retulisset Joannes rumorem ad Phariseos perlatum Jesum baptizare, animadvertit: “quamquam Jesus non baptizaret, sed discipuli ejus.”<sup>3</sup>

*Resp.* Jesum ipsum quosdam baptizasse constat ex Joannis relatione: “Venit Jesus et discipuli ejus in terram Judæam: et illic demorabatur cum eis, et baptizabat.”<sup>4</sup> Quod postea dicit, intelligendum est de plurimis deinceps baptizatis, quos discipulorum opera eum suscepisse ritum adnotat. Non alia videtur ratio cur Joannes, ex sua sententia loquens, nullaque adjecta explicatione, Jesum baptizasse jam affirmaverit. Optime igitur Cornelius a Lapide adnotat Christum baptizasse “non tam per se quam per suos discipulos, quos tamen ipse prius baptizabat.”<sup>5</sup>

37. *Obj.* 5. Joannes suum baptismum aqua collatum a baptismo Christi, qui fit Spiritu Sancto, omnino distinguit: “Qui misit me baptizare in aqua, ille mihi dixit: Super quem videris Spiritum descendentem, et manentem super eum, hic est, qui baptizat in Spiritu Sancto.”<sup>6</sup>

*Resp.* Humilis Christi præcursor agnovit se nonnisi aqua baptizare, quippe qui non potuit ritui illi ullam indere vim; Christum autem in Spiritu Sancto baptizare, quia gratiæ est auctor. Id de gratia quæ pœnitentibus collata est occasione baptismatis Joannis intelligere licet, sicut de baptismo a Christo instituendo, qui jure optimo designatur Spiritus Sancti, ob divinam virtutem illi insitam. Cæterum aqua, veluti instrumento, conferri hanc gratiam liquet ex Christi verbis ad Nicodemum, et ex Apostolorum rebus gestis.

38. *Obj.* 6. Baptizare idem est ac *initiare cognitione Evangelii*, ideoque in cultores Patris et Filii et Spiritus Sancti jussi sunt Apostoli ut initiarent quos docerent, quin aliqua facienda esset corporis ablutio.

*Resp.* Nullo exemplo probatur initiandi significationem huic voci convenire, quod enim profertur a nonnemine, est quod in quæstione versatur testimonium. Equidem omnibus fatentibus vox in aquam mergere significat; et ad ablutionem quamcumque designandam a scriptoribus judaicis et christianis, haud inusitata licentia, usurpatur. Sed alius quicumque sensus ei tribui non potest nisi translatus. In mandato hujusmodi alienus

(1) Hist. Eccl. l. ii. c. iii.

(2) L. 5. Hypotyp, apud Joannem Moschum in Prato spirituali c. clxxvi.

(3) Joan. iv. 2.

(4) Joan. iii. 22.

(5) Comment. in locum.

(6) Joan. i. 33.



sensus quærendus sane non est, mandata enim legesque verbis claris obvioque sensu solent ferri.

39. *Obj.* 7. Verba Christi commode explicantur de doctrina cum potestate Spiritus conjuncta; non enim docere tantum, sed baptizare jubentur, in id scilicet totos incumbere ut divina Spiritus gratia auditorum corda tangat et convertat ad Patrem, Filium et Spiritum Sanctum :<sup>1</sup> εἰς τὸ ὄνομα, in virtutem et potestatem eorum; hæc est enim verborum vis juxta Scripturarum usum.<sup>2</sup> De ablutione nihil dicitur.

*Resp.* Baptizare, uti diximus, abluere mergendo significat, nec ad doctrinam potest referri, de qua Christus Apostolis mox antea mandaverat : μαρτυρεῖσθαι. Translati sensus nullum datur indicium, quamvis enim nomen virtutem et potestatem designet sæpius in Scripturis, tamen nullus occurrit locus in quo baptizare in nomen, docere cum potestate significet. Quum Petrus dixisset aquam non posse denegari ut baptizaretur Cornelius cum suis, “jussit eos baptizari in nomine Domini Jesu Christi;”<sup>3</sup> quod de ablutione aqua facta omnes, ne Quakeris ipsis exceptis, intelligunt.<sup>4</sup> Porro si velint Apostolis mandatum ut Spiritu Sancto baptizarent, id absonum est, nam Dei est tangere corda, hominis externum præstare ministerium.

40. *Obj.* 8. Apostoli revera baptizarunt Spiritu Sancto; “sermo meus, inquit Paulus, et prædicatio mea non in persuasibilibus humanæ sapientiæ verbis, sed in ostensione Spiritus et virtutis.”<sup>5</sup> Et alias: “Evangelium nostrum non fuit ad vos in sermone tantum, sed et in virtute, et in Spiritu Sancto.”<sup>6</sup>

*Resp.* Apostoli prædicarunt, a Spiritu Sancto moti, et Spiritus sua gratia permovit audientium corda, ut crederent in salutem, imo et prodigiis testimonium præconibus suis perhibuit: sed Apostoli nequaquam baptizasse Spiritu Sancto dicendi sunt, quum hoc sit animam ipsam sanctificare, quod divini Spiritus est opus.

41. *Obj.* 9. Paulus ad Romanos scripsit: “Desidero enim videre vos, ut aliquid impertiar vobis gratiæ spiritualis ad confirmandos vos.”<sup>7</sup> Corinthios a se genitos in Christo Jesu dicit: “Nam in Christo Jesu per Evangelium ego vos genui.”<sup>8</sup> Ergo non repugnat ut dicantur Apostoli Spiritu baptizare.

(1) “Baptizing with the Spirit is somewhat further than teaching or informing the understanding, for it imports a reaching to and melting the heart, whereby it is turned as well as the understanding informed.” Barclay, Apology, Prop. xii. § viii.

(2) Ps. liv. 3. Cant. i. 3. Prov. xviii. 10. a Barclaio cit.

(3) Act. x. 48.

(4) “This fact, as stated by the sacred historian is fully admitted.” Essay on Baptism, by Enoch Lewis, Philadelphia, 1839.

(5) I. Cor. ii. 4.

(6) I. Thess. i. 5.

(7) Rom. i. 11.

(8) I. Cor. iv. 15.

*Resp.* Ministerio suo recte dicuntur Apostoli gratiam impertiri, hominesque gignere Deo, quia ea præstant quibus Christus divinam alligavit virtutem. Ideo dici possent baptizasse Spiritu Sancto, quatenus aqua abluerunt homines, Spiritu Sancto simul emundante animam. Sed repugnat ut baptizent Spiritu Sancto, corda sanctificando, quod dicendum foret si aqua baptismus in mandato non intelligatur.

42. *Obj.* 10. Apostoli, tamquam instrumenta Christi, baptizare Spiritu Sancto dicuntur, tum *ordinaria*, tum *extraordinaria* ratione.<sup>1</sup> Pariter dæmonia ejecerunt, mortuos suscitaverunt, aliaque patraverunt prodigia, non sua, sed Christi potestate. Verbum prædicantes, vi quadam ac efficacia Spiritus comitante, corda converterunt, ideoque *ordinaria* ratione spiritu baptizasse dicendi sunt; *extraordinaria* autem, dum manuum impositione Spiritus dona conferrent, vel etiam dum Spiritus indicia manifesta darentur, iis concionantibus. De *ordinaria* illa Spiritu baptizandi ratione loquitur Paulus, dum Galatis se ministrare Spiritum dicit: “Ex operibus legis Spiritum accepistis, an ex auditu fidei? Sic stulti estis, ut cum Spiritu cœperitis, nunc carne consummemini? Tanta passi estis sine causa? si tamen sine causa. Qui ergo tribuit vobis Spiritum, et operatur virtutis in vobis: ex operibus legis, an ex auditu fidei?”<sup>2</sup> *Extraordinariam* rationem in eo videre est, quod Petro edocente Cornelium suosque contigit: “Adhuc loquente Petro verba hæc, cecidit Spiritus Sanctus super omnes qui audiebant verbum.”<sup>3</sup> Sic etiam de Petro et Joanne refertur: “imponebant manus super illos” (*Samaritanos*) “et accipiebant Spiritum Sanctum.”<sup>4</sup>

*Resp.* Apostoli jussi sunt baptizare, quin adjicerentur voces illæ *Spiritu Sancto*, quæ proinde nullatenus admittendæ sunt, ut opus sit excogitare rationem seu ordinariam, seu extraordinariam, qua Spiritu Sancto baptizasse censeantur. Cæterum Apostolos, tamquam Christi instrumenta, dare posse Spiritum Sanctum non negamus, eos scilicet peragere ritus, quibus Christus Spiritus sancti dona impertiri voluit. Haud tamen baptizarunt Spiritu Sancto prædicando, nam concionibus hanc non alligavit virtutem Christus, sed ipse sibi servavit munus mentem illustrandi cordaque tangendi, pro occultis et æquissimis judiciis suis, demandato Apostolis docendi munere. Quod autem Paulus dicat Galatas accepisse Spiritum ex auditu fidei, significat occasione prædicationis Apostolicæ Spiritus dona illis collata, accepto scilicet baptismo et manuum impositione facta, prout Petrus pollicitus est Judæis sua concione ad pœnitentiam et studium salutis commotis.<sup>5</sup> Qui autem tribuit Spiritum, et operatur virtutes, ipse est

(1) Objectionem mutuamur a libello: “A Treatise concerning Baptism,” &c. by J. Pike.

(2) Gal. iii. 2.

(3) Act. x. 44.

(4) Act. viii. 17.

(5) Act. ii. 38.

Deus, nec enim Apostolus se tribuere Spiritum innuit, sed Deo suum servat honorem. Petro prædicante Spiritus Sanctus se cordibus audientium illapsus esse manifestavit, qui Spiritu Sancto baptizati idcirco dicuntur: sed absit ut Petrus dicatur eos divino illo Spiritu baptizasse, nam dona illa tribuit, et miros illos effectus “operatur unus atque idem Spiritus, dividens singulis prout vult.”<sup>1</sup> Non fuit penes Petrum facere concione sua ut Spiritus illaberetur, quod ad divinam voluntatem prorsus referendum est. Quod autem Samaritani, eo et Joanne manus imponentibus, Spiritum Sanctum acceperint, non potest baptizandi munere Apostolis demandato intelligi, jam enim a Philippo baptizati fuerant. Igitur nec ordinaria, nec extraordinaria baptizandi Spiritu Sancto ratio exquirenda est, ut mandatum explicetur, sed simplici vocis acceptationi inhærendum. Comparatio a miraculis deducta non valet, Apostoli enim ea recte dicuntur patrasse, quia eorum operâ facta sunt: sed baptismus Spiritu Sancto directe respicit animæ sanctificationem.

43. *Obj.* 11. Nullam verborum formulam præscribi Christi mandato liquet ex libertate quam sibi sumpserunt Apostoli, baptizandi scilicet in nomine Jesu,<sup>2</sup> quin unquam baptizasse dicantur in nomine Patris, et Filii, et Spiritus Sancti.<sup>3</sup> Ergo in Jesu discipulos adsciti sunt credentes, aqua quidem nonnumquam ex prudenti œconomia abluti, sed plerumque Christi tantum baptismo, Spiritu Sancto scilicet emundati.

*Resp.* Baptismus in nomine Jesu intelligebatur ille quem Christus instituit, quique Spiritu Sancto, una cum Patre et Filio, invocato conferebatur, adeo ut quum quidam baptizatos se profitentes Spiritum Sanctum ignorarent, quæreret mirabundus Paulus qua ratione baptizati fuerint. Certior factus eos Joannis baptismum tantum accepisse, de Jesu, cujus adventui Joannes populum ritu illo præparaverat, eos edoeuit, et baptismum quem Jesus instituit iis administrandum curavit: “his auditis, baptizati sunt in nomine Jesu.”<sup>4</sup> Quod sacer auctor non retulerit verborum formulam ab Apostolis adhibitam contigit, quia res gestas breviter narravit, ritibus sacris haud descriptis enucleatius. Sed de verbis usurpatis nulla potest esse dubitatio, si mandatum respiciatur, et constans Ecclesiæ per omnia sæcula consuetudo.

44. *Obj.* 12. Si Christi ad Nicodemum sermo de ablutione aqua facienda intelligeretur, sequeretur neminem posse regnum cœlorum ingredi, qui aqua baptizatus non fuerit: id autem nequidem a Catholicis affirmatur, qui fatentur martyres, aqua non ablutos, suo sanguine baptizari, et alios qui cupiunt aqua ablui baptismali, cælestem posse adipisci gloriam, si pœni-

(1) I. Cor. xii. 11.

(2) Act. x. 48.

(3) Barclay, Apology, Prop. xii. § viii. Objectio hæc contra verborum formulam eo dirigitur, ut aqua adhibita denegetur.

(4) Act. xix. 5.

tentes, et Deum diligentes e vivis erepti fuerint, antequam susceperint baptismum.

*Resp.* Sententia illa Christi, prout sonat, accipienda est, et spe salutis privat qui ex aqua et Spiritu Sancto non renascatur. Cæterum ex ea renasci meritò censetur, qui ea vehementer cupit ablui, apud Deum enim sincera animi voluntas pro re ipsa accipitur, quoties externa deest occasio. Martyres idcirco aliique morte prærepti, dum cupiunt baptismum, ingrediuntur cœlorum regnum, quia ea gaudent nativitate quæ lavacro contingit. Quod si de iis sit sermo qui baptismi institutionem ignorant, vel desiderium concipere nequeunt, sanguis Christi causa fusus, hostium fidei furore, meritò habetur lavacri instar. Præclare Augustinus: “Quicumque etiam non percepto regenerationis lavacro pro Christi confessione moriuntur, tantum eis valet ad dimittenda peccata, quantum si abluerentur sacro fonte baptismatis. Qui enim dixit: ‘Si quis non renatus fuerit ex aqua et Spiritu Sancto, non intrabit in regnum cœlorum,’ alia sententia istos fecit exceptos, ubi non minus generaliter dixit: ‘Qui me confessus fuerit coram hominibus, confitebor et ego eum coram Patre meo qui in cœlis est.’ Et alio loco: ‘Qui perdiderit animam suam propter me, inveniet eam.’”<sup>1</sup>

45. *Obj.* 13. De Spiritu tamquam aqua Christus alibi locutus est, uti certiores nos facit Joannes: “Si quis sitit, veniat ad me, et bibat. Qui credit in me, sicut dicit Scriptura, flumina de ventre ejus fluent aquæ vivæ. Hoc autem dixit de Spiritu, quem accepturi erant credentes in eum: nondum enim erat Spiritus datus, quia Jesus nondum erat glorificatus.”<sup>2</sup>

*Resp.* De Spiritu divino, Apostolos replente, a quo veluti a fonte cælestis doctrinæ aquæ fluere, Christus locutus est. Ipsum Spiritum non dicit aquam, sed cælestia dona quibus credentes, præsertim Apostoli, augerentur, aquis quibus sæcundaretur orbis terrarum adsimilat. Hæc figura ex serie orationis satis patet, sitientem enim ad se vocavit Christus, ut biberet, credendo scilicet divinam doctrinam hauriret, et ita aliis ipse fieret fons salutis. Prædixerat Isaïas: “Haurietis aquas in gaudio de fontibus Salvatoris,”<sup>3</sup> homines ad bibendum vocaverat: “Omnes sitientes venite ad aquas.”<sup>4</sup> Præterea explicata est figura ab Evangelista, qui tamen nihil dixit quo aqua priori loco Spiritum Sanctum designaret.

46. *Obj.* 14. Christus aquam siluit, dum suam mentem magis vellet explicare, de sola Spiritu nativitate verba faciens: “Quod natum est ex Spiritu, spiritus est,” et venti flantis, ex qua parte, vel quo, nescimus, adducta similitudine, addit: “sic est omnis qui natus est ex spiritu.”<sup>5</sup>

(1) De Civ. Dei l. xiii. c. vii.

(2) Joan. vii. 38.

(3) Isaïæ xii. 3.

(4) Ibidem lv. i.

(5) Joan. iii. 6. 8.

*Resp.* Semel explicata a Christo ratione qua quis iterum nasceretur, opus non erat eam iterum inculcare. Perrexit ergo ostendere secundam nativitatem omnino requiri, quin modum repeteret: "Quod natum est ex carne, caro est: et quod natum est ex spiritu, spiritus est."<sup>1</sup> In hanc vitam nascimur, a parentibus geniti, sed ad vitam æternam capessendam ex Spiritu nascamur oportet. Divini illius Spiritus in cordibus nostris motus experimur, quin eorum auctorem semper agnoscamus. Sic omni qui natus est ex Spiritu contingit, scilicet miro Spiritus impulsu et opere fit filius Dei. Ad venti similitudinem quod attinet, non constat vocem *spiritus* ventum eo loci designare, quum potius ex serie orationis idem Spiritus de quo mox locutus fuerat Christus sit intelligendus, præsertim quum voluntas ei tribuatur, quæ vento, nisi sensu minus proprio, haud convenit. Ita plerisque patribus visum est. Quod si Chrysostomo, Cyrillo Alexandrino, aliisque ex veteribus, cum tota turba recentium interpretum Protestantorum, assentiamur, venti comparisonem illic agnoscentibus, nihil inde contra aquæ necessitatem, quum nativitas Spiritu fiat, gratiæ motibus occultis, sed aqua veluti instrumento.

47. *Obj.* 15. Christus Nicodemo exprobravit quod rem adeo notam ipse, magister licet et princeps Israeliticus, ignoraret: "Tu es magister in Israel, et hæc ignoras?"<sup>2</sup> Si autem de nativitate aqua egisset, nullus fuisset locus exprobrationi, nec enim eam nosse potuisset.

*Resp.* Nicodemus magisterio fungens, et, uti ex illis Christi verbis colligitur, sua scientia elatus, debuit nosse hominem non esse regno cælesti idoneum, nisi Deo nasceretur. Potuit etiam ex vaticiniis colligere aquam veluti instrumentum adhibendam ut animæ sordes abluerentur: "Effundam super vos," dixit Deus per Ezechielem, "aquam mundam, et mundabimini ab omnibus inquinamentis vestris."<sup>3</sup> Meritò illi iteratò postulanti: "Quomodo possunt hæc fieri?" exprobravit Jesus tantam hebetudinem, et divinæ potestatis ignorationem.

48. *Obj.* 16. Ipse Calvinus, aqua baptismum licet agnoscens, fatetur verba Christi de nativitate ex aqua et Spiritu Sancto, intelligenda esse de Spiritu Sancto, aquæ instar, mundante animam; "quasi diceret, per Spiritum qui purgando et irrigando fideles animas, vice aquæ fungitur."<sup>4</sup> Sic quæ de baptismo Spiritus Sancti et ignis dicuntur, de Spiritu Sancto, ignis instar, animæ exurente sordes, eamque amore divino incendente, recte explicantur. Equidem Joannes suum baptismum a baptismo Christi distinguebat in eo quod ipse aqua ablueret corpus, Christus verò igne divini Spiritus accenderet animam: "Ego quidem baptizo vos in aqua in poenitentiam; qui

(1) Joan. iii. 6.

(2) Joan. iii. 10.

(3) Ezech. xxxvi. 25.

(4) Inst. l. iv. c. xvi. n. 25.

autem post me venturus est, fortior me est, cujus non sum dignus calceamenta portare : ipse vos baptizabit in Spiritu Sancto et igni.”<sup>1</sup>

*Resp.* Nihil favet illi interpretationi verborum Christi, quum aqua primo loco nominetur, veluti res quæ primum in baptismo sese offert ; et Christus baptizare jusserit Apostolos, et Apostoli ei obtemperando aquam noscantur adhibuisse.<sup>2</sup> Hæc quidem symbolum est et imago puritatis quam tribuit Spiritus Sanctus, animam a peccati sordibus mundando, sed revera jussa est adhiberi, nec id negat Calvinus, quamvis, suo ingenio indulgens, ad metaphoram verba Domini detorqueat : sed nihil nos moratur ejus auctoritas. Locus qui objicitur non est *parallelus*, nec enim ignis prius ponitur, veluti res quæ in Baptismo sese offert sensibus sed Spiritui Sancto subjungitur, tamquam baptismi illius comes vel effectus. Præterea quum metaphora necessariò agnoscenda sit, dum baptizari igne quis dicitur, sensus translatus se prodit. Non ita dum de nativitate cœlesti ex aqua et Spiritu Sancto agitur, nam penes Deum est aquam instrumentum adhibere, eique Spiritus Sancti indere virtutem, ut quis Deo nascatur. Igitur ex verborum ipsorum discrimine et ex loquendi usu, diversa utriusque loci interpretatio oritur, præsertim quum plurima præsto sint testimonia quæ obviam aquæ significationem ostendant. Quod autem Joannes se aqua baptizare in pœnitentiam dixerit, suum baptismum significat eò tendere, ut quisque ad pœnitentiam excitaretur, abluendi animæ sordes causa : quum Christus Spiritum sanctum suo baptismo tribueret. De aqua siluit, quia non ea ratione præstaret Christi baptismum suo, sed gratia Spiritus Sancti.

49. *Obj.* 17. De diluvio, in quo pauci homines in arca servati sunt, loquens S. Petrus, baptismo nos servari pariter docet ; quod ne quis de ablutione aqua facta intelligat, diligenter animadvertit : “ Quod et vos nunc similis formæ salvos facit baptismum : non carnis depositio sordium, sed conscientiæ bonæ interrogatio in Deum per resurrectionem Jesu Christi.”<sup>3</sup> *Ἀντίτυπον* vocat baptismum Christi, scilicet quod typo respondet, Spiritu Sancto scilicet fit, cujus gratiam salutarem aqua qua arca sustentata est significavit.<sup>4</sup>

*Resp.* Non hæc dicit Petrus ut aquam deneget adhiberi in baptismo, nam Cornelius suique aqua abluti sunt, Petro auctore. Recte autem monet ipsam corporis ablutionem, quæ ad carnis sordes emundandas nata est, non esse rem præcipuam ; nam conscientia bona, fide scilicet illustrata, et ad divina mandata parata, necessaria est, ut quis adultus resurgat e peccato. Igitur baptizatus renascitur, vi Christi resurrectionis, dummodo nullum obicem prava conscientia objiciat. Quod autem baptismum Christi

(1) Matt. iii. 11.

(2) “ That the term ὕδατος must be understood of baptism, is quite plain from Titus iii. 5, and other passages.” Bloomfield.

(3) I. Pet. iii. 21.

(4) Barclay prop. xii. Proof 4, § iv.

typum impleat veterem, ex gratia Spiritus Sancti, quæ aquæ veluti adnectitur, fit; nec enim necesse est ut res ipsa nihil sensibus objiciat typo simile.

50. *Obj.* 18. Paulus gloriatur se paucos baptizasse, seque omnino haud missum a Domino ut baptizaret dicit: “Gratias ago Deo quod neminem vestrum baptizavi, nisi Crispum et Caium: . . . baptizavi autem et Stephanæ domum: cæterum nescio si quem alium baptizaverim. Non enim misit me Christus baptizare, sed evangelizare.”<sup>1</sup> Quod igitur quosdam aqua abluerit, factum est ex eadem œconomia, qua ritus alios judæicos ad tempus servaverit: quod de cæteris Apostolis pariter dicendum est.

*Resp.* Quum Corinthii partium studio scinderentur, aliis Pauli, aliis Apollo, aliis Cephæ, aliis Christi se discipulos profitentibus, vehementer eos redarguit Paulus, eisque in memoriam revocat Christi nomine, non suo, eos esse baptizatos: “Divisus est Christus? Numquid Paulus crucifixus est pro vobis? aut in nomine Pauli baptizati estis?” Gratias igitur agit Deo se paucos ex illis baptizasse: “ne quis dicat quod in nomine meo baptizati estis.” Se autem ad evangelizandum missum, haud ad baptizandum, dicit, quia Deus voluit ejus opera in prædicanda Evangelii veritate præsertim uti, quum alii possent baptismum ministrare. Sic Petrus aliis demandavit manus baptizandi Cornelium cum suis: “jussit eos baptizari.”<sup>2</sup> Omnes ad quos scripsit Paulus baptizatos fuisse liquet; quum argumentum ex nomine illius in quo baptizati sunt, alias non haberet vim. Ipsum autem aut alios Apostolos œconomia et indulgentia erga Judæos hac in re usos nullo documento ostenditur, quum ritus non foret judæicus homines abluere aqua, tribus divinis personis invocatis; et Apostoli constanter eum commendarint veluti unicuique prorsus necessarium: “Pœnitentiam agite, et baptizetur unusquisque vestrum in nomine Jesu Christi in remissionem peccatorum vestrorum; et accipietis donum Spiritus Sancti.”<sup>3</sup> Ita respondit Petrus Judæis quærentibus quid sibi faciendum esset. Objectionem hanc, a Cajanis olim prolatam, præclare solvit Tertullianus: “Sed de ipso Apostolo revolvunt, quod dixerit, Non enim me ad tinguendum Christus misit, quasi hoc argumento baptismus adimatur. Cur enim tinxit Gaium et Crispum, et Stephanæ domum? quamquam etsi non eum miserat Christus ad tinguendum, tamen aliis Apostolis præceperat tinguere. Verum hæc pro conditione tunc temporis ad Corinthios scripta sunt, cum schismata et dissensiones inter illos movebantur, dum alius Paulo deputat, alius Apollo. Propter quod pacificus Apostolus, ne sibi omnia defendere videretur, non ad tinguendum ait se missum, sed ad prædicandum. Nam

(1) I. Cor. i. 14.

(2) Act. x. 48.

(3) Act. ii. 38.



et prius est prædicare, posterius tingere. Sed sit prius prædicatum : puto autem licuit et tingere, cui licuit prædicare.”<sup>1</sup>

51. *Obj.* 19. Apostolus veteres ritus, qui jam abolendi erant, recensens, baptismata iis accenset : “ quæ parabola est temporis instantis : juxta quam munera et hostiæ offeruntur, quæ non possunt juxta conscientiam perfectum facere servientem, solummodo in cibis et in potibus, et variis baptismatibus, et justitiis carnis usque ad tempus correctionis impositis.”<sup>2</sup>

*Resp.* Agit Apostolus de variis baptismatibus, scilicet de corporis totius ablutionibus, de lustrationibus, et de aliis lotionibus quæ in lege præscriptæ sunt, quæque *justitiæ carnis* merito dicuntur, quia ad carnis munditiam referebantur. Cæterum totius corporis lotiones pleraque fiebant absque aliena opera,<sup>3</sup> quum ritus Christi aliena manu indigeat, nemo enim se baptizare valet. “ Unum baptismum” Christianorum prædicat, quo scilicet universi abluuntur, et quod semel suscipitur, et cordis affert munditiam, Spiritus Sancti gratia. Ideo dicit : “ Accedamus cum vero corde in plenitudine fidei, aspersi corda a conscientia mala, et abluti corpus aqua munda.”<sup>4</sup>

52. *Obj.* 20. Apostolus dicit : “ Quicumque in Christo baptizati estis, Christum induistis.”<sup>5</sup> Id de omnibus aqua ablutis dici nequit, sed de iis qui Spiritu Sancto baptizati sunt. Liquet etiam inde non omnes fuisse, in Christo baptizatos. Alias dicit : “ An ignoratis quia quicumque baptizati sumus in Christo Jesu, in morte ipsius baptizati sumus ? Consepulti enim sumus cum illo per baptismum in mortem : ut quomodo Christus surrexit a mortuis per gloriam Patris, ita et nos in novitate vitæ ambulemus.”<sup>6</sup> Ad Colossenses scribit : “ consepulti ei in baptismo, in quo et resurrexistis per fidem operationis Dei.”<sup>7</sup>

*Resp.* Apostolus agit de adoptione qua gaudemus in Christo, et conditionem nostram cum Judæorum servitute comparat : “ Omnes enim Filii Dei estis per fidem, quæ est in Christo Jesu. Quicumque enim in Christo baptizati estis, Christum induistis. Non est Judæus, neque Græcus : non est servus, neque liber : non est masculus, neque femina. Omnes enim vos unum estis in Christo Jesu.”<sup>8</sup> Omnes igitur baptizati sunt in Christo, et Christum induerunt, facti unum in ipso, adsciti scilicet in Dei filios. Id dicendum de omnibus aqua baptismo lustratis ; licet contingere possit quosdam, sui culpa, gratia quæ adoptioni adnectitur carere. Non statuit

(1) L. de Baptismo c. xiv.

(2) Heb. ix. 9.

(3) Moysi præceptum est ut Aaron et filios ejus lavaret aqua, eos sacerdotio initiaturus. Exod. xxix. 4.

(4) Heb. x. 22.

(5) Gal. iii. 27.

(6) Rom. vi. 3, 4.

(7) Col. ii. 12.

(8) Gal. iii. 26—28.



Apostolus duas veluti classes, sed universos alloquitur, eosque a lege judaica liberos probat, ex eo quod in filios Dei, Christi baptismo, adsciti sint. Ad Romanos autem scribens, ex baptismo suscepto ostendit oportere peccatum prorsus effugere, quum Christi mortis et sepulturæ baptismus sit imago : quapropter baptizatos cum Christo resurgere oportet, novam cœlestemque vitam ducendo. Omnes baptizati recte dicuntur consepulti Christo in baptismo, quia baptizandi solemnis ratio sepeliendi ritum quodammodo exhibebat, et resurrexisse etiam per fidem operationis Dei ; nec enim necesse est ex generali illa locutione excipere eos qui sua culpa non resurgunt.

53. *Obj. 21.* Apostolus omnes Christianos Spiritu Sancto baptizatos dicit : “ Etenim in uno Spiritu omnes nos in unum corpus baptizati sumus, sive Judæi, sive Gentiles, sive servi, sive liberi ; et omnes in uno Spiritu potati sumus.”<sup>1</sup>

*Resp.* Non hæc dicta sunt quod Spiritu, non aqua, baptizati simus, sed quod idem Spiritus nos sanctificaverit omnes baptismo. Ipsa vox baptizandi aquam includit, nisi ex adjunctis ad alium sensum transferatur. Equidem solo Spiritus baptismate in unum corpus coalescere non possemus, nec enim quis novit se aliumve Spiritu baptizatum : sed ablutione, quæ res sensibus subjacet, initiamur, et Ecclesiæ jungimur, uti contigit tribus hominum millibus, qui, Petro concionante et hortante, baptismum susceperunt : “ Qui ergo receperunt sermonem ejus, baptizati sunt : et appositæ sunt in die illa animæ circiter tria millia.”<sup>2</sup>

54. *Obj. 22.* Petrus ipse Joannis baptismum a Christi baptismate discerni docet, eo quod aquam ille adhiberet, hic Spiritu Sancto baptizaret, gratia absque ullo lavandi ritu tributa. De Cornelio et suis narrat : “ cecidit Spiritus Sanctus super eos, sicut et in nos in initio. Recordatus sum autem verbi Domini, sicut dicebat : Joannes quidem baptizavit aqua, vos autem baptizabimini Spiritu Sancto.”<sup>3</sup>

*Resp.* Petrus quidem, visis indiciis Spiritus Sancti in corda Cornelii et suorum illapsi, Christi verba in iis impleta agnovit, scilicet Spiritu Sancto baptizatos esse, licet adhuc salutari lavacro abluti non essent. Illud tamen divini favoris argumentum adhibuit, ut Judæis adstantibus suaderet licere illos aqua abluere, ut baptismo Christi fierent discipuli, et bonorum omnium quæ hominibus comparavit consortes.

55. *Obj. 23.* Aqua nonnisi externa forma, et imago haberi potest internæ a Spiritu Sancto factæ ablutionis. Ergo nullius per se momenti est, nec enim ea indiget Spiritus Sanctus ut dona sua largiatur.

*Resp.* Aqua una cum invocatione trium personarum divinarum ex Christi

(1) I. Cor. xii. 12. Objectionem sumimus ex libello dicto : “ A Treatise concerning Baptism and the Supper,” by Joseph Pike. London, MDCCIX.

(2) Act. ii. 41.

(3) Act. xi. 15.

mandato adhibenda est, cui ritui ipse adnexuit virtutem illam cælestem mundandi animam. Nullius foret momenti, nisi eum ipse jussisset faciendum: sed jam summi est momenti, quum nonnisi amplectendo quæ præbet nobis salutis subsidia, possimus gratiam assequi. Non indiget ritu aliquo Spiritus Sanctus, quo dona sua impertiatur: sed sapientissimo consilio ritibus quibusdam vim indidit, ut homines instrumenta et pignora gratiæ haberent.

56. *Obj.* 24. “Unus Dominus, una fides, unum baptisma,”<sup>1</sup> juxta Apostolum. Sed duo erunt baptismata, si ablutio aqua fiat, Spiritu Sancto interius animam abludente.

*Resp.* Mens est Apostoli Christianos omnes eundem colere Dominum, eandem profiteri fidem, et eodem ablui lavacro. Unicum est baptisma, ablutio scilicet aqua facta, invocatis Patre, Filio, et Spiritu Sancto. Quod interius simul abluatur anima Spiritus Sancti gratia, est baptismatis effectus, quem Christus Dominus externo illi ritui alligavit. Baptizari autem quis Spiritu Sancto dicitur sensu translato, nec enim abluit Spiritus Sanctus animam, prout sonant verba, sed tollit peccatum, et animam efficit, dono gratiæ, Deo acceptam.

57. *Obj.* 25. Baptismus aqua collatus a Joanne figura fuit Christi baptismati, cui proinde cedere debet. Ergo Christo baptizante jam Spiritu Sancto, desiit Baptismus aqua.

*Resp.* Quam faciebat Joannes aqua ablutio, eo consilio est facta, ut homines pœnitendo animæ munditiem quærerent, et ita pararentur Christi adventui. Desiit ille ritus, postquam Christus misit Apostolos in universum mundum, mandans ut baptizarent, Patris et Filii et Spiritus Sancti sub invocatione. Ablutio quidem aqua fieri non desiit, sed ex invocatione patebat discrimen; et effectus longe præstantior inde sequebatur. Ideo autem suum baptismum aqua fieri dixit Joannes, Christum verò Spiritu Sancto baptizaturum, ut illum omnis gratiæ agnosceret auctorem, animosque eveheret ad desiderandum baptismum tam longe suo præcellentem.

58. *Obj.* 26. Baptismus aqua erat apud Judæos ritus initiandi proselytas, quem ab Ethnicorum sacris mutuati videntur. Morem illum jam vigentem ad tempus servarunt Apostoli, ut hos ad Christi cultum facilius traducerent.

*Resp.* Docti homines de more illo disceptant, utrum ante Christi tempora extiterit, vel serius inductus sit. Quod si Spencero assentiri velimus affirmanti eum prius extitisse,<sup>2</sup> nequaquam concedendum est Judæos Ethnicorum, a quorum abhorrebant moribus, ritum mutuatos esse. Quum lotiones plurimæ lege præscriberentur, inde ritus baptizandi proselytas, si quidem extiterit, repetendus est, ut scilicet munditiem illis commendarent.

(1) Eph. iv. 5.

(2) Spencerus de legibus Hebræorum ritualibus, l. iv. c. xiii.

Cæterum Apostoli Christum habuerunt magistrum, ejusque obsecuti sunt mandato.

59. *Obj.* 27. Apostoli circumcisionem legisque ritus commendarunt, et servarunt, quin ideo eorum sequi cogamur exemplum.

*Resp.* Immane est discrimen, Judæis quippe legis rituum observantiam Apostolis permiserunt, Ethnicos ab illo onere immunes facientes, quibus ad fidem conversis ne circumciderentur dissuasit Paulus,<sup>1</sup> qui plurimis verbis legis finem advenisse sæpissime urgebat. E contra baptismum unicuique injunxerunt, tamquam rationem qua peccata remittuntur, et gratia Spiritus Sancti confertur.

#### ANIMADVERSIO.

60. Aquam prorsus necessariam esse baptismo probavimus, adeo ut nullis in rerum adjunctis, vel gravissima quacumque urgente necessitate, liquor alius adhiberi queat, quum adhibitus nil prosit. Turpiter igitur erravit Lutherus, dicens quidquid balnei loco esse potest, baptismo idoneum esse.<sup>2</sup> Quævis autem aqua, seu fluminis, seu fontis, seu e cælo imbribus delapsa, idonea est Sacramento, quamvis nisi urgeat necessitas, precibus sit sacrandæ, ut sanctitas usus pateat, uti postea, dum de baptismi ritibus agendum fuerit, dicetur.

(1) Vide epist. ad Galatas, et epist. ad Hebræos.

(2) In coll. sympos. c. xvii.

## CAPUT II.

## DE MODO BAPTIZANDI.

61. Quum ex hactenus dictis constet aquam in baptismo necessario adhibendam, jam occurrit gravis controversia in his regionibus admodum agitata, qua scilicet ratione baptismus sit ministrandus. Id quidem pro explorato habendum est immersionis totius corporis in aquam ritum ab initio rei christianæ per plura sæcula viguisse, nec aliam plerumque adhibitam rationem baptizandi, nisi urgente necessitate. Constat etiam morem infundendi aquam, vel ea aspergendi corpus, caput verò præsertim, utpote præcipuum membrum, obtinuisse, primum quidem, necessitate urgente, deinceps ob infantium teneram conditionem, et septentrionalium regionum frigus, universe, adeo ut per plura sæcula omnes vel fere omnes ita fuerint baptizati.

62. Sæculo decimo septimo *Baptistarum* secta orta est anno circiter 1637, tunc enim quidam ex asseclis Uke Wallis, rustici Frieslandia oriundi, qui inter Anabaptistas Gröningenistæ a loco, *Dompelers*, scilicet *Immersores*, a ritu mergendi audiebant, hanc inter suos induxerunt consuetudinem.<sup>1</sup> In Anglia paulo antea quidam Baptistarum nomine innotuerunt.<sup>2</sup> In fœderatis his provinciis haud parvo numero reperiuntur. Ab Anabaptistis decimi sexti sæculi distinguendi omnino sunt, quamvis cum iis conveniant in impugnando parvulorum baptismo, ab aliis eorum principiis omnino abhorrentes. Contendunt Baptistæ baptismum nonnisi immer-

(1) "In 1637, he (*Uke Wallis, a Friesland peasant*) collected a party of individuals. The Uke-Wallists, or *Groningenists*, so called because the sect arose in the territory of Gröningen, received the malcontents of the united parties, and therefore called themselves emphatically the *ancient Flemings*, or the ancient Frieslanders; but by their adversaries, they were denominated the *Dompelers*, i. e. *Dippers*, because some of their churches used, in baptism, the three-fold immersion of the whole body. The other Anabaptists, on the contrary, regarded the sprinkling of the head as sufficient." *Encyclopædia Americana, article Anabaptists*.

(2) "The Anabaptists are not, however, to be confounded with the Baptists, by whom their principles were expressly disclaimed. We may date the first public acknowledgement of the Baptists as distinct from the Anabaptists from their petition to Parliament in 1620." The whole number of Baptist churches in the United States was, in 1824, about 5600; that of the communicants about 407,684. *Encyclopædia Americana, art. Baptists*.

sione conferri posse.<sup>1</sup> Presbyteriani<sup>2</sup> e contra, et Episcopaliani, et Methodistæ alias quoque baptizandi rationes agnoscunt.

63. Catholica Ecclesia omnem probat baptizandi rationem, seu immersione, seu infusione, seu aspersione, quæ scilicet haberi possit corporis ablutio; sed ordinis causa, eum servari præcipit ritum qui invaluit. Ideo infusione plerumque baptizatur, immergendi ritu in Ecclesia Mediolanensi, et apud Græcos retento, quamvis apud hos non totum submergatur corpus, sed puero in fonte magna ex parte demerso, capiti ejus infundatur aqua: quæ ratio baptizandi apud veteres sæpe obtinuit. Orientales etiam immersione plerumque utuntur; infusione vel aspersione nonnumquam.<sup>3</sup>

64. De valore baptismi infusione seu aspersione collati non habetur specialis definitio, quia controversia hæc recentior est; sed ex ritualibus et ex consuetudine Ecclesiæ, liquet utramque valere. "Baptismus," verba sunt Ritualis Romani, "licet fieri possit aut per infusionem aquæ, aut per immersionem, aut per aspersionem; primus tamen, vel secundus modus, qui magis sunt in usu, pro Ecclesiarum consuetudine retineantur; ita ut trina ablutione caput baptizandi perfundatur, vel immergatur in modum crucis uno et eodem tempore quo verba proferuntur, et idem sit aquam adhibens et verba pronuntians."<sup>4</sup> Porro concilium Tridentinum quæ obtinet in Ecclesia Romana de Baptismo doctrinam veram esse, solemni lato canone, definivit: "Si quis dixerit, in Ecclesia Romana, quæ omnium Ecclesiarum mater est et magistra, non esse veram de baptismi sacramento doctrinam; anathema sit."<sup>5</sup>

#### PROPOSITIO.

*Valet baptismus infusione vel aspersione collatus.*

*Probatur I. ex Scripturis.*

65. Christus dum baptizandi munus Apostolis demandaret, illis se adfuturum pollicitus est ad finem usque mundi, quod sane de eorum successoribus, eodem fungentibus munere, necessariò intelligendum est.<sup>6</sup> Ergo fieri numquam poterit ut obtineat apud Apostolorum successores, iisque probeatur baptizandi ratio a Christi instituto aliena. Attamen omni sæculo bap-

(1) "Immersion, or dipping of the person in water, is necessary to the due administration of this ordinance" Baptist Confession of faith, ch. xxx.

(2) "Dipping of the person into the water is not necessary; but baptism is rightly administered by pouring, or sprinkling water on the person." Presbyterian Confession of Faith, ch. xxviii. n. iii.

(3) Euoplia.

(4) Rituale Rom. De forma bapt.

(5) Sess. vii. Can. iii.

(6) Optime Oxonienses: "Now you will find, (Matt. xxviii. 19, 20,) that our Lord promised to be with His Apostles, in their character of teachers and baptizers of the nations, always, even unto the end of the world." Vol i. Tracts, No. 29.

tismus, saltem necessitate urgente, infusione vel aspersione administrabatur, jamque ritus hi a pluribus sæculis per totam fere obtinuerunt Ecclesiam. Ergo valor baptismi iis rationibus collati agnoscendus est, nisi Christum suis haud stetisse promissis, et Ecclesiam penitus e terris defecisse velimus.

*Probatur II. ex consuetudine Ecclesiæ.*

66. S. Laurentius, qui ante sæculum tertium medium martyr obiit, Lucillum infusione baptizasse legitur, nam accepta aqua, eaque benedicta, "fudit super caput ejus."<sup>1</sup> In Ecclesia S. Laurentii in agro Verano, Romæ, cernitur vetusta imago Laurentii baptizantis Romanum, in pelvi stantem, urceusque exhibetur quem sinistra manu tenens in caput effudit. In actis S. Gratiliani m. Felicissima, ejus opera fidem edocta, legitur urceum. aqua plenum ei obtulisse ut baptismi gratiam consequeretur. In actis S. Bacchi m. præpositus Lauræ S. Sabbæ dicitur effudisse *vivificam urnam* super caput ejus. In actis S. Liudgeri episcopi refertur eum in expulsionem servorum Dei e Frisia, Beruleno homini laico injuuxisse, per domos discurrere, et "persuasis matronis morituros baptizare illorum infantulos, benedicta simpliciter aqua, in nomine Domini intinctos vel superfusos cum invocatione S. Trinitatis."<sup>2</sup> Hinc Strabo, scriptor noni sæculi, dicit: "notandum autem non solum mergendo, verum etiam desuper fundendo, multos fuisse baptizatos, et adhuc posse baptizari, si necessitas sit, sicut in passione beati Laurentii quemdam urceo allato legimus baptizatum."<sup>3</sup>

67. Plurima Patrum scripta, Conciliorum decreta et alia antiqua monumenta testantur baptismum ægrotantibus in lecto decumbentibus administratum infusione, qui *Clinici* idcirco dicebantur. His tamen nemo ausus est baptismum secundò ministrare, quando ex morbo convaluerint, quamvis ob dilatam usque ad mortis periculum baptismi susceptionem, meritò sint a sacris ordinibus prohibiti.

*Probatur III. Patrum auctoritate.*

68. S. CYPRIANUS de clinicis rogatus sententiam, "an habendi sint legitimi Christiani eo quod aqua salutari non loti sint, sed perfusi," respondit: "Nos quantum concipit mediocritas nostra, æstimamus in nullo mutilari, et debilitari posse divina beneficia. . . . Unde apparet aspersionem quoque aquæ instar salutaris lavacri obtinere."<sup>4</sup> Adeo constabat baptismum valere, ut de eo iterando nulla fuerit quæstio, sed utrum paritæ ac juribus eisdem, qui ita fuerant baptizati, fruerentur. Ideo Cyprianus addit: "Si autem baptizari non possunt, qui jam baptismo ecclesias-

(1) Tem. iv. in Actis S. Laurentii p. 612.

(2) Vide apud Martene de antiquis Eccl. rit. l. 1. c. 1. art. xiv.

(3) In lib. de rebus Eccles. c. xxvi.

(4) Ep. ad Magnum.

tico sanctificati sunt, cur in fide sua et Domini indulgentia scandalizentur? An consecuti sunt quidem gratiam Dominicam, sed brevior et minor mensura muneris divini ac Spiritus Sancti, ut habeantur quidem Christiani, non sint tamen cæteris adæquandi?" Id veluti absurdum meritò rejicit.

69. S. AUGUSTINUS ait: "Hoc verbum fidei tantum valet in Ecclesia Dei, ut per ipsam credentem, offerentem, benedicientem, tingentem etiam tantillum mundet infantem."<sup>1</sup> Ergo, judice Augustino, tinctio qualiscumque per fidei verbum, invocationem scilicet Trinitatis, infantem mundat, quia est verus baptismus.

Consonum equidem erat divinæ pietati Sacramentum adeo necessarium ita instituere ut facile possit suscipi, præsertim in mortis discrimine. Innumera autem sunt rerum adjuncta in quibus immersio fieri non valet etiam extra mortis periculum.

#### OBJECTIONES DILUUNTUR.

70. *Obj. 1.* Aspersio et infusio absque ulla Scripturarum auctoritate inductæ sunt.

*Resp.* Quando agitur de ritu a Christo instituto, satis est ostendere quæ sit consuetudo et mens totius Ecclesiæ, hanc enim nobis commendant Scripturæ veluti columnam et firmamentum veritatis. In Scripturis nullibi perspicuis verbis traditur Apostolos infusione vel aspersione baptizasse. Cæterum non inverosimiliter conjicitur carceris custodem cum suis ita baptizatum, nam "in illa hora noctis," in qua expergefactus est, post concionem a Paulo, "baptizatus est ipse et omnis domus ejus continuo."<sup>2</sup> Hæc adjuncta non suadent eos fuisse immersos. De tribus millibus hominum, qui Petri concione ad baptismum quærendum moti sunt, licet etiam conjicere eos non fuisse immersos: "qui ergo receperunt sermonem ejus baptizati sunt, et appositæ sunt in die illa animæ circiter tria millia."<sup>3</sup> Cæterum nihil certi affirmare, silente Scriptura, volumus; idque satis homini christiano esse duximus, infusionem et aspersionem adhibitam vetustis temporibus tandem invaluisse, probante Ecclesia, præsulibus Apostolorum successoribus annuentibus, quibus se Christus adfuturum promisit baptizandi munere fungentibus usque ad consummationem sæculi. Cum Augustino itaque dicimus: "Insolentissimæ insanix est disputare an faciendum sit quod tota per orbem frequentat Ecclesia."<sup>4</sup>

71. *Obj. 2.* *Baptizandi* vox βαπτίζω mersionem significat, juxta usum

(1) Tract lxxx. in Joan.

(2) Act. xvi. 33.

(3) Ibid. ii. 41.

(4) Ep. c. xviii.

scriptorum, tum profanorum, tum sacrorum. Ergo Ecclesia nihil potuit innovare in eo quod Christus faciendum jussit.

*Resp.* Vox βαπτω a qua derivatur *tingere* significat, quæ plerumque fit mergendo: βαπτίζω significatione, et usu frequentiori *mergere* est; sed et lotiones alias ex judaicorum scriptorum usu, qui præcipue attendendus est, complectebatur. Apud Ecclesiasticum legimus: βαπτίζόμενος ἀπὸ νεκροῦ καὶ πάλιν ἀπτόμενος αὐτοῦ, τί ὄφελος ἐν τῷ λουτρῷ αὐτοῦ.<sup>1</sup> “Qui baptizatur a mortuo, et iterum tangit eum, quid proficit lavatio illius?” Lotio autem quæ lege præscripta est, his enuntiatur verbis: “Qui tetigerit cadaver hominis, et propter hoc septem diebus fuerit immundus: aspergetur ex hac aqua die tertio et septimo, et sic mundabitur.”<sup>2</sup> Aspersio hæc plane baptismus ab auctore Ecclesiastici designatur. Sic manuum usque ad ulnas lotio quæ fiebat a Pharisæis antequam mensæ accumberent, baptismus dicebatur.<sup>3</sup> Quum Christus hanc negligeret consuetudinem, ad prandium apud Pharisæum invitatus, “Pharisæus cœpit intra se reputans dicere, quare non baptizatus esset ante prandium.”<sup>4</sup> Baptismata calicum, et urceolorum, et æraamentorum, et lectorum non necessariò fiebant mergendo, sed lotiones quacumque ratione ita vocabantur. Baptismata Apostolus vocavit generatim Judæorum lustrationes, quarum aliquæ fiebant aspersione. Constat igitur vocem latiori sensu apud Judæos sumi, omnemque ablutionem complecti.<sup>5</sup>

72. *Obj.* 3. Vis vocis, prout in mandato Christi usurpatur, ex usu novi Testamenti definienda est. Liquet autem eam de immersione intelligi, nam “baptizatus Jesus, confestim ascendit de aqua:”<sup>6</sup> et alias: “descenderunt uterque in aquam, Phillippus et eunuchus, et baptizavit eum.”<sup>7</sup>

*Resp.* Illa testimonia non probant immersionem designari, quum fieri potuisset, ut descenderit in aquam Jesus, eique in alveo fluminis stanti manu infuderit aquam Joannes, prout in vetustis picturis exhibetur. Cæterum esto, immersionem ibi indicari; quid vetat vocem aliquando sensu latiori sumi, prout plerisque vocibus contingit?

73. *Obj.* 4. Apostoli munus sibi demandatum optime intellexisse censendi sunt, qui tamen numquam alia ratione præter immersionem usi noscuntur: Paulus quippe ait: “An ignoratis quia quicumque baptizati sumus in

(1) Eccli. xxxiv. 30.

(2) Num. xix. 12.

(3) “Judæis solemne erat nunc χερνίπτειν, aqua affusa manus abluere, nunc βαπτίζειν, manus carpo tenus, aquis emergere.” Spencerus De legibus Hebræorum ritualibus l. iv. c. xii § ii.

(4) Luc. xi. 38.

(5) Marc. vii. 4.

(6) Mat. iii. 16.

(7) Act. viii. 38.



Christo Jesu, in morte ipsius baptizati sumus? Consepulti enim sumus cum illo per baptismum in mortem: ut quomodo Christus surrexit a mortuis per gloriam Patris, ita et nos in novitate vitæ ambulemus.”<sup>1</sup> Sepulturæ imago in immersione tantum reperitur.

*Resp.* Utique Apostoli Christi voluntatis in sacris instituendis ritibus optimi sunt interpretes, quorum tamen res gestas vel documenta omnia Scripturæ non exhibent. Quod de tribus millibus baptizatis die Pentecostes refertur, infusionem vel aspersionem adhibitam verosimilem facit. Fatemur consuetum et solemnem modum immersione fuisse, ad quam commode refertur quam Paulus recenset sepulturæ imaginem. Cæterum in baptismo, quacumque conferatur ratione, imago quædam mortis Christi et sepulturæ habetur, saltem quatenus cum baptismo illa significatio ex christianis institutis connectitur. Hac ratione dicit Apostolus, “quia vetus homo noster simul crucifixus est, ut destruat corpus peccati, et ultra non serviamus peccato.”<sup>2</sup> Equidem ex allusionibus haud firmum derivatur argumentum: quod si placeat iis insistere, licebit illud Pauli proferre, quod infusioni favere videatur: “salvos nos fecit per lavacrum regenerationis et renovationis Spiritus Sancti, quem effudit in nos abunde per Jesum Christum Salvatorem nostrum.”<sup>3</sup> Respondet aptissime vaticinio: “Effundam super vos aquam mundam, et mundabimini ab omnibus inquinamentis vestris.”<sup>4</sup> Aspersionem indicat Paulus alio loco: “aspersi corda a conscientia mala, et abluti corpus aqua munda.”<sup>5</sup>

74. *Obj.* 5. Baptismus, prout a Christo institutus est, omnibus fatentibus, fuit immersione: ergo Ecclesiæ non licuit aliam baptizandi rationem inducere, vel sancire.

*Resp.* Christus rationem qua baptismus conferretur certa lege non definivit, sed baptizare jussit Apostolos, quod, juxta vocabuli usum latiorrem, fit lotionem quacumque. Igitur mandatum Christi quo immersio præcipiatur non extat. Quod autem aliæ rationes baptizandi obtinuerint, non contigit Ecclesiæ sanctione vel actu, sed ex rerum necessitate. Sensim sine sensu, prout multiplicabantur occasiones minus solemniter administrandi Sacramentum, factum est ut baptizarentur infantes aliique plurimi infusione ob periculum: unde nullo Ecclesiæ decreto, ipsa tamen haud improbane, obtinuit mos ita baptizandi, quod nonnullis in casibus semper fieri consuevit.

75. *Obj.* 6. Ex Justini aliorumque veterum scriptorum testimoniis, ipsis adversariis fatentibus, constat immersionem adhibitam per plurima

(1) Rom. vi. 3.

(2) Ibidem 6.

(3) Tit. iii. 5.

(4) Ezech. xxxvi. 25.

(5) Heb. x. 22.

sæcula: infusionem, in extremo vitæ discrimine, tentatam, timide et dubitanter, adeo ut de ejus valore dubie plerique loquerentur. Cornelius Papa de Novatiano scripsit: "in ipso in quo jacebat lectulo perfusus baptismum suscepit, si hujuscemodi baptismum suscepisse dicendus est." *ἐν τῇ ᾧ λέγειν τοῦ τοιούτου ἐλάβηται.*<sup>1</sup>

*Resp.* In solempni baptismo utique immersio fiebat; urgente mortis periculo, vel alia gravi necessitate, infusio, vel aspersio. De his rationibus baptizandi non videtur dubitatio fuisse, quamvis dubitaretur a nonnullis tempore Cypriani, utrum par gratia iis conferretur. Quæ Cornelii tempore orta est controversia, Novatiano summum pontificatum sibi perperam usurpante, occasionem præbuit opportunam huic investigandæ quæstioni, si gravis foret dubitandi ratio. Quum constaret eum ita baptizatum, vix ulla fuisset ei species tituli ad pontificatum, si ipse baptismus foret dubii valoris; nec omisissent ejus adversarii id objicere. Quod citatur testimonium Cornelii nullam injicit dubitationem de baptismi valore, sed vix *suscipisse* baptismum innuit, animo scilicet libenti, qui nonnisi mortis metu ad eum petendum motus est: "dum jamjam moriturus creditur." Ei autem præcipue exprobrat quod sanitati restitutus ritus omissos supplendos haud curaverit, et chrismate liniri neglexerit: "Sed neque postquam liberatus est morbo, reliqua percepit, quæ juxta Ecclesiasticam regulam percipi debent: neque ab episcopo consignatus est."<sup>2</sup>

76. *Obj.* 7. Canones dicti apostolici, qui priorum sæculorum referunt ritus et doctrinam, deponendos jubent episcopos et presbyteros trinam immersionem non servantes.<sup>3</sup> Constantinopolitanum I. concilium Eunomianos, trina immersione haud ablutos, iterum baptizari jubet.<sup>4</sup> Pelagius II. Bonosianos eadem de causa baptismalibus aquis iterum ablui vult, ob Evangelicum præceptum: "Evangelicum verò præceptum, ipso Deo et Domino Salvatore nostro Jesu Christo tradente, nos admonet, in nomine Trinitatis trina etiam mersione sanctum baptismum unicuique tribuere."<sup>5</sup>

*Resp.* Vis illorum decretorum in numero immersionum ponitur, quatenus tribus personis divinis respondent. Canon ille pseudo-apostolicus eos percellit qui unica immersione in mortis Domini memoriam utebantur: "Si quis episcopus aut presbyter in una initiatione non tres immersiones, sed unam dumtaxat, quæ in mortem Domini detur, peregerit, deponitor. Non enim dixit Dominus: In mortem meam baptizate; sed profecti docete omnes gentes, baptizantes eos in nomine Patris, et Filii, et Spiritus Sancti." Eunomiani pari ratione vitiabant baptismum, Eunomius enim, uti refert Theodoretus, dicebat "non oportere ter illum immergere qui

(1) Apud Euseb. hist. Eccl. l. vi. c. 43.

(2) Ibidem.

(3) Canon v.

(4) Canon vii.

(5) Rescripto ad Gaudentium.

See 16

baptizatur, nec invocare Trinitatem, sed semel baptizare in Christi mortem."<sup>1</sup> Bonosiani "baptizabant solummodo in mortem Christi;" ut refert Pelagius. De ritu immersionis, uti patet, non agebatur in illis decretis, quum illa ab omnibus in solemni baptismo adhiberetur.

77. *Obj.* 8. Qui obtinuit usus per duodecim saltem sæcula per totam Christi Ecclesiam, quique adhuc apud Orientales servatur, est optimum argumentum ritus a Christo instituti.

*Resp.* Usus ille optime probat immersionem esse baptizandi modum validum et legitimum; sed exempla baptismi aliis rationibus collati, quæ passim occurrunt, etiam primis sæculis, quæque per plura abhinc sæcula fere sola obtinuerunt, ostendunt mergendi ritum ad essentiam haud pertinere. Orientales aspersione aliquando uti ex testimonio Fausti Naironi Banensis Maronitæ constat, de Chaldæis enim id diserte affirmat.<sup>2</sup> Christi promissio, se baptizantibus adfuturum ad finem usque mundi, non sinit ut existimemus modos baptizandi solemniter adhibitos esse et probatos per totam Ecclesiam, qui nullius sunt valoris.

78. *Obj.* 9. Saltem tutius foret mergendo baptizare, quum in re Sacramentaria, fatentibus Catholicis, tutior omnino anteferenda sit sententia, dum de Sacramenti valore agitur.

*Resp.* Tutissimum est receptum et probatum Ecclesiæ morem sequi; nec licet singulis suo arbitrio aliquid innovare. Qui mergeret baptizandos contra disciplinam vigentem reus violati ordinis habendus foret, et suspicionem haud levem erroris contra fidem præberet, quippe qui veterem ritum affectando, videretur dubitare de doctrina quam Romana tenet Ecclesia de baptismo, juxta quam valet qui infusione vel aspersione confertur.

#### ANIMADVERSIONES.

79. Quæ obtinet apud Baptistas in his regionibus consuetudo in fluminibus et rivulis suos immergendi, quamvis Apostolicæ ætatis exempla quædam jactent, probanda non est, constat enim necessitate primorum illorum temporum, in quibus deerant christianis sacra ædificia, cessante, ad consulendum pudori, et Sacramenti reverentiæ Baptisteria erecta fuisse, in quibus administrabatur.

80. Illa quam sectarii plurimi suis relinquunt libertatem baptismum suscipiendi ea quam voluerint ratione, recto rerum ordini repugnat, et errori patrocinator, quum illi qui immersionem petunt, eam solam valere existiment. Utraque de causa, scilicet ut ordinem servet, et præsertim ad errorem eliminandum, ne quis sibi de valore baptismi, quacumque ex probatis rationibus collati, dubitare licere existimet, Ecclesia suis ministris injungit ut receptam ubique disciplinam omnino sequantur.

(1) L. iv. hæc. fab. c. iii.

(2) Euoplia, Romæ 1694.

81. Quamvis valeat infusione vel aspersione baptismus, aliquando dubius evadit ex levi ratione qua baptizandos aspergunt sectarum ministri, præsertim Presbyteriani vel Methodistæ. Magna aquæ copia non quidem requiritur, sed necesse est ut ablutio dici possit: ideo pellem contingere debet et fluere. Hinc fit ut conversis ad fidem plerumque repetatur *sub conditione*, dicendo: "Si non es baptizatus, ego te baptizo in nomine Patris, et Filii, et Spiritus Sancti." Id fit passim in Anglia, Galliis, Germania, et etiam Romæ, testante Perrone.<sup>1</sup> Quod si ex certo testimonio constet ablutionem rite factam verbis prolatis, cavendum ne iteretur: nefas enim est baptismum semel rite a quocumque collatum iterare.

82. Quum Baptistarum mos nullam de aquæ copia dubitandi locum relinquat, et debitam proferant formulam, nonnullis verbis præmissis quæ eam non vitiant: "Ut obediam Domino Jesu Christo," vel "ut tuo mandato obediam;" sola ratio dubitandi de valore baptismi ab iis collati, desumeretur ex separatione ablutionis a forma, hæc enim integra profertur ante immersionem, vel ex intentionis defectu, quod scilicet credant baptismum eundem esse ac illum quo Joannes Christum abluit. Cæterum neutra ex parte videtur satis gravis ratio dubitandi, nam moralis apparet unio inter formam et materiam, quum verbis vix prolatis immersio fiat; et intentio enuntiatur faciendi quod jussit Christus, quamvis errore credatur idem esse ac illud quod fecit Joannes. Ergo conversis ab illa secta, qui omnes in adultate ætate baptismum susceperunt, ideoque certum ferre possunt testimonium de eo suscepto, non videtur, nequidem conditione adjecta, iterandus baptismus. Cæterum arcta omnino debet esse formæ cum materia conjunctio, qua de causa rem sapientiorum judicio relinquimus.

83. Quum de *forma* baptismi apud nos controversia haud moveatur, de ea agendum non duximus. Omnes qui Sacramentum hoc agnoscunt, in nomine Patris, et Filii et Spiritus Sancti esse ministrandum fatentur.<sup>2</sup> Baptizantis actus necessariò exprimendus est, ideoque integra est formula: "Ego te baptizo in nomine Patris, et Filii, et Spiritus Sancti."<sup>3</sup> Utrum aliquando solo nomine Jesu invocato baptismus collatus fuerit, inter eruditos scriptores disceptatum est, plerisque consentibus baptismum a Jesu institutum iis vocibus in Apostolorum actis designari: quod nobis omnino videtur.<sup>4</sup>

84. Perpetuum Ecclesiæ morem patres testantur. S. JUSTINUS M. ait: "In nomine rerum cunctarum Parentis, et Domini Dei et Salvatoris nostri

(1) Tract. de Bapt. c. v. n. 133. Nota.

(2) "The outward element to be used in this ordinance is water, wherein the party is to be baptized, in the name of the Father, and of the Son, and of the Holy Spirit." Baptist Confession of Faith, ch. xxx.

(3) Vide Prop. 27 damnatam ab Alexandro viii. anno 1690.

(4) Vide Drouenii dissert. contra Orsi in appendice lib. de Bapt.

Jesu Christi, et Spiritus Sancti in aqua tunc lavantur.”<sup>1</sup> **TERTULLIANUS** : “Lex tinguendi imposita est, et forma præscripta: Ite, inquit, **docete** nationes, tinguentes eas in nomen Patris, et Filii, et Spiritus Sancti.”<sup>2</sup> **S. BASILIUS** : “Sicut enim credimus in Patrem, et Filium, et Spiritum Sanctum, sic et baptizamur in nomine Patris, et Filii, et Spiritus Sancti.”<sup>3</sup> Hac regula discreverunt concilia inter baptismum valide ab hæreticis administratum, et eum qui irritus foret, formæ defectu, scilicet omissa trium personarum distincta invocatione.<sup>4</sup> Vehementer tamen falluntur qui discrimen ex fide Trinitatis repetendum censent,<sup>5</sup> nam mentis error, seu pravam dogma non afficit baptizantis actum, nisi formæ mutationem inducat.

(1) Apol. i. pro Christianis, n. 61.

(2) L. de Baptismo, c. xiii.

(3) L. de Spiritu Sancto, c. xii.

(4) Conc. Arel. can. viii.

(5) Burnet, Analysis, p. 238.

## CAPUT III.

## DE BAPTISMI EFFECTIBUS.

85. Ablutio aqua facta, invocatis tribus personis divinis, vim habet ex Christi auctoris sui meritis derivatam, qua peccatum tollitur, et gratia confertur iis qui obicem, prava sua voluntate, non objiciunt.<sup>1</sup> Ita docet Catholica Ecclesia in concilio Tridentino: "Si quis per Jesu Christi Domini nostri gratiam, quæ in baptismo confertur, reatum originalis peccati remitti negat, aut etiam asserit non tolli totum id quod veram et propriam peccati rationem habet: sed illud dicit tantum radi, aut non imputari; anathema sit: in renatis enim nihil odit Deus; quia nihil est damnationis iis qui vere consepulti sunt cum Christo per baptismum in mortem, qui non secundum carnem ambulant; sed veterem hominem exuentes, et novum qui secundum Deum creatus est, induentes, innocentes, immaculati, puri, innoxii, ac Deo dilecti effecti sunt, hæredes quidem Dei, cohæredes autem Christi, ita ut nihil prorsus eos ab ingressu cœli remoretur. Manere autem in baptizatis concupiscentiam, vel fomitem, hæc sancta synodus fatetur, et sentit, quæ cum ad agonem relicta sit, nocere non consentientibus, sed viriliter per Christi Jesu gratiam repugnantibus non valet: quinimo qui legitime certaverit, coronabitur. Hanc concupiscentiam, quam aliquando Apostolus peccatum appellat, sancta synodus declarat Ecclesiam catholicam numquam intellexisse peccatum appellari, quod vere et proprie in renatis peccatum sit, sed quia ex peccato est, et ad peccatum inclinat. Si quis autem contrarium senserit, anathema sit."<sup>2</sup>

86. Fuerunt inter veteres hæreticos qui omnem vim baptismo denegarent. Manichæi, Messaliani, alique variis erroribus de eo laborabant. Lutherus fidei totum tribuens, baptismi vim necessariò sustulit. Calvinus pariter eum habet veluti signum tantum ac documentum purgationis, virtutem tollendi peccatum ei denegans: "Baptismus," inquit, "signum est initiationis, quo in Ecclesiæ cooptamur societatem, ut Christo insiti inter filios Dei censeamur. . . . "A Domino nobis proponitur, ut symbolum

(1) Hæc Sacramenti notio Oxoniensibus plane arridet, de Ecclesia enim loquentes, quæ dispensat, Sacramenta intelligunt: "The notion of the church as the storehouse and direct channel of grace, as a divine Ordinance, . . . which conveys secret strength and life to every one who shares in it, unless there be some actual moral impediment in his own mind,—this is a doctrine which as yet is but faintly understood among us." Oxford Tracts, vol. ii. Advertisement.

(2) Sess. v. Can. v. in decreto de pec. orig.

sit nostræ purgationis ac documentum : vel (ut melius explicem quod volo) instar signati cujusdam diplomatis, quo nobis confirmet, peccata nostra omnia sic deleta, inducta, oblitterata esse, ne unquam in conspectum suum veniant, ne commemorentur, ne imputentur.”<sup>1</sup> Amplissima hæc verba eo redeunt ut non imputentur quæ vere manent peccata : “ Manet vere peccatum in nobis,” inquit, “ neque per baptismum statim uno die extinguitur : sed quia deletur reatus, imputatione nullum est.”<sup>2</sup> Ab hisce placitis non recesserunt Presbyteriani hodierni :<sup>3</sup> quibus pro more concinunt Baptistæ. Zuinglius baptismum dixit merum esse symbolum externum, cujus vis ad salutem nulla sit.<sup>4</sup> Anglicani ad Catholicam doctrinam aliquatenus accedunt, baptismum signum regenerationis, et instrumentum quo in Ecclesiam cooptantur dicentes : sed nonnisi benigniori Oxoniensium interpretatione possunt eorum verba ad sanum reduci sensum.<sup>5</sup> Apud Unitarios et turbam sectariorum jam omnis evanuit de virtute baptismi notio.

## PROPOSITIO.

*In baptismo gratia Jesu Christi Domini nostri confertur, per quam tollitur totum id quod veram et propriam peccati rationem habet, et Deo renascimur.*

*Probatur I. ex Scripturis.*

87. Christus Dominus, de baptismo loquens, dixit : “ Nisi quis renatus fuerit ex aqua et Spiritu Sancto, non potest introire in regnum Dei.”<sup>6</sup> Nova ergo nativitas, qua regno cœlesti adipiscendo quisque fiat idoneus, contingit aqua ; Spiritu Sancto hominem filium Dei constituyente. Tollitur idcirco peccatum, inquinatus enim nemo in regnum illud intrabit.

88. Petrus a Judæis interrogatus, quid sibi faciendum esset ut veniam Christi mortis impetrarent : “ Pœnitentiam (inquit) agite, et baptizetur

(1) Inst. l. iv. c. xv. n. i.

(2) In antidoto Conc. Trid. ad Sess. v.

(3) Dicunt baptismum esse suscipienti : “ a sign and seal of the covenant of grace, of his ingrafting into Christ, of regeneration, of the remission of sins, and of his giving up unto God, through Jesus Christ, to walk in newness of life.” Presbyterian Confession of faith, ch. xxxviii. n. i.

(4) Lib. de vera et falsa Relig.

(5) Queruntur Oxonienses de suis : “ We have almost embraced the doctrine, that God conveys grace only through the instrumentality [of the mental energies, that is, through faith, prayer, actual spiritual contemplations, or (what is called) communion with God, in contradiction to the primitive view, according to which the church and her Sacraments are the ordained and direct visible means of conveying to the soul what is in itself supernatural and unseen. . . . And does not this account for the prevailing indisposition to admit that Baptism conveys regeneration ?” Oxford tracts. Advertisement to vol. ii.

(6) Joan. iii. 5.

unusquisque vestrum in nomine Jesu Christi in remissionem peccatorum vestrorum, et accipietis donum Spiritus Sancti.”<sup>1</sup> Baptismus igitur, Christi auctoritate poenitentibus collatus, in remissionem peccatorum prodest, imo ad donum Spiritus Sancti assequendum: divinus scilicet Spiritus remittit ipse baptizatis hominibus peccata, eosque Deo gratos, suo dono auctos, efficit.

89. Ananias divinitus missus ut Saulum baptizaret, peccatorum veniam ablutioni tribuit; sic enim Saulum allocutus refertur: “Exurge, et baptizare, et ablue peccata tua.”<sup>2</sup> Ergo baptismo abluuntur peccata.

90. Paulus ipse baptismo tribuit peccatorum ablutionem, una cum sanctitate et justitia; recensitis enim vitiis quibus inquinati olim fuerant Corinthii, subjungit: “Et hæc quidem fuistis: sed abluti estis, sed sanctificati estis, sed justificati estis, in nomine Domini nostri Jesu Christi, et in Spiritu Dei nostri.”<sup>3</sup> Ablutio de qua loquitur ad baptismum refertur, quo abluuntur peccata, virtute et meritis Christi; Spiritu Sancto, suæ gratiæ dono, animam sanctam et justam efficiente.

91. Ad Galatas Paulus scribit: “Omnes enim filii Dei estis per fidem, quæ est in Christo Jesu. Quicumque enim in Christo baptizati estis, Christum induistis.”<sup>4</sup> Baptismo Christum induimus, meritis scilicet ejus cooperimur, et filii Dei efficimur, ejus causa ad tantam dignitatem evecti.

92. Ephesios ita hortatur: “Viri diligite uxores vestras, sicut et Christus dilexit Ecclesiam, et seipsum tradidit pro ea. Ut illam sanctificaret, mundans lavacro aquæ in verbo vitæ. Ut exhiberet ipse sibi gloriosam Ecclesiam, non habentem maculam, aut rugam, aut aliquid hujusmodi, sed ut sit sancta et immaculata.” Lavacro aquæ in verbo, baptismo scilicet, mundatur Ecclesia, et fit gloriosa, sancta, et immaculata. Tolluntur ergo baptismo peccata, adeo ut baptizati e lavacro prodeant, omni macula immunes.

93. Ad Titum scribit, Salvatoris nostri Dei commendans clementiam: “secundum suam misericordiam salvos nos fecit, per LAVACRUM REGENERATIONIS ET RENOVATIONIS SPIRITUS SANCTI, quem effudit in nos abunde per Jesum Christum Salvatorem nostrum; ut justificati gratia ipsius, hæredes simus secundum spem vitæ æternæ.”<sup>5</sup> Lavacrum de quo loquitur Apostolus baptismus est, nec enim aliud norunt Christi discipuli. Eo regeneramur et renovamur, Spiritu Sancto in nos effuso, quam gratiam adipiscimur, Christi Jesu Salvatoris nostri intuitu. Justi igitur efficimur,

(1) Act. ii. 38.

(2) Act. xxii. 16.

(3) I. Cor. vi. 11.

(4) Gal. iii. 25.

(5) Tit. iii. 5.



et hæredes vitæ æternæ. Verbis clarioribus baptismi effectus enuntiari non possent.

*Probatur II. Patrum testimoniis.*

94. In Barnabæ epistola, quam jam laudavimus, dicitur ; “ descendimus quidem in aquam pleni peccatis ac sordibus, inde autem emergimus, fructum afferentes in corde, timorem et spem in Jesum habentes ex spiritu.”<sup>1</sup>

95. S. JUSTINUS de baptizandis ait : “ Eo ducuntur a nobis, ubi aqua est : et eodem regenerationis modo regenerantur, quo et ipsi sumus regenerati.”<sup>2</sup>

96. S. IRENÆUS ait : “ Potestatem regenerationis (in Deum) demandans discipulis, dicebat eis : Euntes docete omnes gentes, baptizantes eos in nomine Patris et Filii et Spiritus Sancti.”<sup>3</sup>

97. TERTULLIANUS ait : “ Felix sacramentum aquæ nostræ, qua abluti delictis pristinae cæcitatibus, in vitam æternam liberamur.” . . . . “ Quid ergo ?” ait inferius, “ nonne mirandum et lavacro dilui mortem ? Atquin eo magis credendum, si quia mirandum est, idcirco non creditur : qualia enim decet esse opera divina, nisi super omnem admirationem ? Nos quoque miramur, sed quia credimus : cæterum incredulitas miratur, non credit. Miratur enim simplicia quasi vana, magnifica quasi impossibilia.” . . . . “ Ipsius baptismi carnalis actus quod in aqua mergimur, spiritalis effectus delictis liberamur.”<sup>4</sup>

98. ORIGENES Christum novam nativitatem seu regenerationem introduxisse ait : “ Mittens etenim ad hoc opus discipulos suos, non dixit tantum : Ite, baptizate omnes gentes ; sed ait : ‘ Ite, docete omnes gentes, baptizantes eos in nomine Patris, et Filii, et Spiritus Sancti.’ Sciens igitur utrumque esse in culpa, utrique remedium dedit, ut generatio mortalis regeneratione baptismi mutaretur, et impietatis doctrinam doctrina pietatis excluderet.”<sup>5</sup>

99. S. CYPRIANUS, ad Donatum scribens, mutationem quæ baptismo ei contigit refert. Quibus antea tenebatur vitiis indicatis, ait : “ Sed postquam undæ genitalis auxilio superioris ævi labe deteresa, in expiatum pectus ac purum desuper se lumen infudit. Postquam cælitus spiritu hausto in novum me hominem nativitas secunda reparavit, mirum in modum propius confirmare se dubia, patere clausa, lucere tenebrosa, facultatem dare quod prius difficile videbatur, geri posse quod impossibile putabatur, ut esset agnoscere terrenum fuisse, quod prius carnaliter natum delictis obnoxium vixisset, Dei esse cœpisse, quod jam Spiritus Sanctus animaret.”<sup>6</sup>

(1) Ep. § xi. n. 12.

(2) Apol. i. n. 61.

(3) L. iii. adv. hæ. c. xix.

(4) Lib. de Baptismo.

(5) L. v. in ep. ad Rom. n. 2.

(6) L. ii. ep. 11. ed Basil. an. MDXXI.

100. CLEMENS ALEXANDRINUS ait: “βαπτίζομενοι, φωτίζομεθα· φωτίζομενοι υψοοῦμεθα· υἱοποιούμενοι, τελειοῦμεθα· τελειοῦμενοι, ἀπαθανάτιζομεθα. Baptizati, illuminamur, illuminati, in filios adoptamur: adoptati, perficimur: perfecti immortales reddimur.” Pergit id probare et explicare: “Ego, *inquit*, dixi, Dii estis, et filii excelsi omnes.” Multis autem modis vocatur hoc opus, gratia, illuminatio, perfectum et lavacrum. Lavacrum quidem, per quod peccata abstergimus. Gratia autem, qua remittuntur pœnæ, quæ peccatis debentur. Illuminatio autem, per quam sanctam illam et salutarem lucem intuemur, hoc est, per quam Deum perspicimus. Perfectum autem dicimus, cui nihil deest.”<sup>1</sup>

101. S. GREGORIUS NAZIANZENSUS: “Hæc baptismi gratia et facultas est non orbem terrarum, ut olim, aquis obruens, sed uniuscujusque hominis peccatum purgans, easque obstructions vel maculas quæ vitio contrahuntur, prorsus abstergens.”<sup>2</sup>

102. S. AMBROSIIUS baptismi typum qui in arca præcessit explicans, ait: “Vides aquam, vides lignum, columbam aspicias, et dubitas de mysterio? Aqua est ergo qua caro mergitur, ut omne abluatur peccatum. Sepelitur illic omne vitium. Lignum est in quo suffixus est dominus Jesus, cum pateretur pro nobis. Columba est in cujus specie descendit Spiritus Sanctus, sicut didicisti in novo Testamento, qui tibi pacem animæ tranquillitatemque mentis inspirat.”<sup>3</sup>

103. S. HIERONYMUS colloquium cum quodam habitum refert, in quo disputabatur utrum qui post baptismum duxerat uxorem, quum antea etiam uxoratus fuisset, bigamus habendus foret, adeo ut Apostoli vetito comprehenderetur, ne bigamus fieret episcopus. De baptismo ex utraque parte convenit, eo hominem novum fieri, omnibus deletis delictis: “Si baptismus novum hominem facit, et ex toto novum creat, nihilque in eo veteris hominis reservatur, non potest novo imputari, quod in veteri quondam fuit.” . . . . “Omnia (*inquit*) nobis in baptismo condonata sunt crimina: nec post indulgentiam, judicis est metuenda severitas, dicente Apostolo: ‘Et hæc quidem fuistis, sed abluti estis: sed sanctificati estis, sed justificati estis in nomine Domini Jesu Christi, et in Spiritu Dei nostri.’ Omnia peccata donata sunt, bene et fideliter.”<sup>4</sup>

## OBJECTIONES DILUUNTUR.

104. *Obj.* 1. Testimonia allata non probant aquæ vim inesse: “non enim significare voluit ille (*Paulus*) ablutionem et salutem nostram aqua perfici, aut aquam purgandi, regenerandi, renovandi virtutem in se conti-

(1) Pædag. l. i. c. vi.

(2) Orat. xl.

(3) L. de his qui initiantur c. iii.

(4) Hieronymus Oceano fol 145, tom. iii. edit. Basil. an. MDXVI.

donari, dum aqua ablueremur, tribus divinis personis invocatis.<sup>1</sup> Regeneratio hæc divino proposito tribuenda est, non quidem absolute illi decreto quod statuit Calvinus, quo homines in interitum, vel vitam, summo Dei arbitrio, nulla habita meritorum ratione, destinantur; sed benefico consilio, quo gratiæ dona omnibus in baptismo largiri decrevit, si obex non apponeretur. Tota illius novæ nativitatis gloria Deo danda est, cujus misericordiam erga baptizatos mirari, justitiam erga alios, qui tanto carent beneficio, adorare oportet.

#### ANIMADVERSIONES.

111. Omnia quæ ad Sacramentum Novi Testamenti necessaria sunt, in baptismo reperiuntur, externus scilicet ritus, divinitus institutus, cui gratia adnectitur. Hac tamen sua culpa privatur, qui absque fide et dolore de peccatis, cum vitæ novæ proposito, sacramentum suscipit. Ideo consuevit in veteri Ecclesiæ *Catechumenatus* haberi, candidati scilicet per tempus diuturnum in pietatis exercitiis occupabantur, edocebantur munera christiana, et virtutibus sedulo navabant operam. Aliquibus in locis peccatorum peragebant confessionem, quæ tamen consuetudo non ubique obtinuit; nec impræsentiarum est suadenda, ne difficultates ingressuris Ecclesiam multiplicentur, vel falsa inducatur sententia peccata ante baptismum admissa Ecclesiæ potestati subjacere. Cæterum explorandus est candidatorum animus, ne imparati tantum Sacramentum suscipiant. Quæ olim facta sunt juvabit præ oculis habere, ut majus accendatur studium ad animum rite parandum. Audiatur Tertullianus secundi sæculi disciplinam referens: “Ingressuros baptismum, orationibus crebris, jejuniis et geniculationibus, et pervigiliis orare oportet, et cum confessione omnium retro delictorum, ut exponant etiam baptismum Joannis: Tinguebantur, inquit, confitentes delicta sua. Nobis gratulandum est, si non publice confitemur iniquitates aut turpitudines nostras. Simul etiam et de pristinis satisfacimus conflictatione carnis et spiritus, et subsecuturis tentationibus munimenta præstruimus.”<sup>2</sup>

112. Qui absque debita animi dispositione baptizatur, characterem quidem Sacramentalem, de quo postea dicemus, recipit, sed gratia qua anima Deo sit cara, vacuus manet; immo sacrilegii crimine adstringitur. Hoc ut luat debet illud deinceps confiteri et plorare, veniam et gratiam in Sacramento Pœnitentiæ tandem recepturus.

(1) Utrum physice, tamquam Dei instrumentum, aqua virtutem abluendi animam habeat, vel *moraliter* tantum, quatenus ea occasione Deus animam abluit, salva fide inter Theologos quæritur: res tamen eodem redit, tota enim virtus a Deo derivatur.

(2) L. de Baptismo.

## CAPUT IV.

## DE JOANNIS BAPTISMO.

113. Licet de Sacramentis quæ Christus Dominus instituit nobis sit disserendum, de baptismo quem Joannes contulit aliqua opus est dicere, hunc scilicet cum Christi baptismo confuderunt plures. Sæculo quinto Petilianus, in Africa episcopus, qui Donatistis accensebatur, eundem ritum Christo et Joanni communem censuit. Lutherus magnum inter utrumque agnovit discrimen;<sup>1</sup> sed Calvinus nullum, præter quam “quod in eum qui venturus erat, Joannes baptizabat: Apostoli in eum, qui jam se exhibuerat.”<sup>2</sup> “Quo etiam,” dixerat supra, “certissimum fit, idem fuisse prorsus Joannis ministerium, quod Apostolis postea delegatum est. Non enim alium baptismum faciunt diversæ manus quibus administratur: sed eundem esse eadem doctrina ostendit.”<sup>3</sup> *Baptistæ* hodierni hoc laborant errore.

114. Concilium Tridentinum canonem hunc edidit: “Si quis dixerit baptismum Joannis habuisse eandem vim cum baptismo Christi, anathema sit.”<sup>4</sup>

## PROPOSITIO.

*Baptismus Joannis non habuit eandem vim ac Christi baptismus.  
Probatur I. ex Scripturis.*

115. Joannes ipse profitetur: “Ego baptizavi vos aqua, ille verò baptizabit vos Spiritu Sancto.”<sup>5</sup> Liqueat inde baptismi utriusque discrimen, a virtute scilicet et effectu petitum: nullam enim vim suæ ablutioni inesse agnovit Baptista, ea utens in indicium et occasionem poenitentiae, qua cor mundaretur: sed Spiritum Sanctum Christi baptismo dandum prædixit, quippe quo, Christo ipso docente, ex aqua et Spiritu Sancto quis renasceretur.

116. Liqueat etiam Christi baptismum ab illo quem administravit Joannes diversum esse, et vis longe majoris, ex eo quod quotquot in Christum crediderint baptizati fuerint, nulla habita ratione baptismi quem plurimi a Joanne receperant. “Egredebantur ad eum omnis Judææ regio, et Hierosolymitæ universi, et baptizabantur ab eo.”<sup>6</sup> Attamen singulis qui

(1) Disp. de Bapt. legis, Joannis, et Christi anno 1520.

(2) Inst. l. iv. c. xv. n. 7.

(3) Ibidem.

(4) Sess. vii. Can. i. de Bapt.

(5) Marc. i. 8.

(6) Ibidem 5.

salutem per Christum quærebant, et delictorum veniam, injunxit Petrus, ut baptizarentur Christi baptismo: “Pœnitentiam (inquit) agite, et baptizetur unusquisque vestrum in nomine Jesu Christi, in remissionem peccatorum vestrorum, et accipietis donum Spiritus Sancti.”<sup>1</sup>

117. Narrat sacer scriptor aliquos qui Joannis baptismum receperant, Paulo jubente, iterum Christi nomine baptizatos esse: “Factum est autem, cum Apollo esset Corinthi, ut Paulus, peragratis superioribus partibus veniret Ephesum, et inveniret quosdam discipulos, dixitque ad eos: Si Spiritum Sanctum accepistis credentes? At illi dixerunt ad eum: Sed neque si Spiritus Sanctus est, audivimus. Ille verò ait: In quo ergo baptizati estis? Qui dixerunt: In Joannis baptismo. Dixit autem Paulus: Joannes baptizavit baptismum pœnitentiæ populum, dicens: In eum, qui venturus esset post ipsum, ut crederent, hoc est, in Jesum. His auditis, baptizati sunt in nomine Domini Jesu.”<sup>2</sup> Discrimen utriusque baptismatis hic maxime patet, quum Spiritus Sanctus non invocaretur a Joanne, nec Jesu discipulus efficeretur qui baptismum præcursoris susceperat, quamvis ad eum expectandum excitaretur. Hinc factum ut nova indigeret ablutione, qua, Spiritus Sancti invocatione, una cum Patre et Filio, meritorum Jesu fieret particeps.

*Probatur II. ex Patribus.*

118. TERTULLIANUS: “Baptismus ab Joanne denuntiatus jam tunc habuit quæstionem, ab ipso quidem Domino propositam Pharisæis, cœlestisne is baptismus esset, an verò terrenus? De quo illi non valuerunt constanter respondere, utpote non intelligentes, quia nec credentes. Nos porrò, quantula fide sumus, tantulo et intellectu possumus æstimare, divinum quidem eum baptismum fuisse, mandato tamen non et potestate, quod et Joannem a Domino missum legimus in hoc munus, cæterum humanum conditione. Nihil enim cæleste præstabat, sed cælestibus præministrabat, pœnitentiæ scilicet præpositus, quæ est in hominis potestate. Denique egis doctores et Pharisæi, qui credere noluerunt, nec pœnitentiam egere. Quod si pœnitentia humanum est, et baptismus ipsius ejusdem conditionis fuerit necesse est: aut daret et Spiritum Sanctum et remissionem delictorum, si cœlestis fuisset. Sed neque peccatum dimittit, neque Spiritum indulget nisi Deus solus.”<sup>3</sup>

119. ORIGENES ait: “Quin et hoc insuper notandum, quod Joannis baptismus Jesu baptismo, quod dabatur per discipulos ejus, inferior erat. Qui ergo in Actis baptizati erant in Joannis baptismo, et neque, an Spiritus Sanctus esset, audierant, denuo ab Apostolo baptizantur, quia regeneratio non apud Joannem, sed apud Jesum per Apostolos suos fiebat, atque etiam

(1) Act. ii. 38.

(2) Act. xix. 1.

(3) De baptismo c. x.

regenerationis quod dicitur lavacrum, quod fiebat cum renovatione Spiritus." —το γὰρ τῆς ἀναγεννησεως δὲ παρὰ τῷ Ἰωάννῃ, ἀλλὰ παρὰ τῷ Ἰησοῦ διὰ τῶν μαθητῶν αὐτοῦ ἐγένετο, καὶ παλιγγενεσίας ὀνομαζόμενον λουτρον, μετὰ ἀνακαινώσεως γινόμενον πνεύματος.

120. S. BASILIUS M.: "Baptisma illud (*Joannis*) vim habebat introdu-  
cendi: hoc (*Christi*) perficiendi. Illud erat secessus a peccato: hoc con-  
junctio est cum Deo."<sup>2</sup>

121. S. CHRYSOSTOMUS: "Spiritus Sancti gratia in Christi baptismo  
est: Joannes verò baptisma hac donatione privatur."<sup>3</sup>

122. S. HIERONYMUS: "Audi quid Scripturæ doceant: Joannis baptis-  
ma non tam peccata dimisit, quam baptisma pœnitentiæ fuit in remissionem  
peccatorum, id est, futuram remissionem, quæ esset postea per sanctifica-  
tionem Christi subsecutura."<sup>4</sup> Patrum hac in re consensus est in confesso:  
Calvinus enim ait: "Neminem perturbet, quod alterum ab altero discer-  
nere veteres contendunt."<sup>5</sup>

123. Accedit ratio theologica. Joannis baptisma nulla verborum formula  
administratum noscitur, nec gratiam impertiebatur, nec Trinitatis invoca-  
tionem seu fidem exigebat. Baptisma Christi e contra Trinitatis nomine  
confertur, et gratiæ instrumentum est, novæ scilicet nativitatis. Hoc  
igitur ab illo differt re et virtute.

#### OBJECTIONES DILUUNTUR.

124. *Obj.* 1. "In unam doctrinam Joannes et Apostoli consenserunt:  
utrique in pœnitentiam, utrique in remissionem peccatorum, utrique in  
nomen Christi, a quo pœnitentia et peccatorum remissio esset, baptiza-  
runt."<sup>6</sup> Ita Calvinus.

*Resp.* Joannes baptizavit in pœnitentiam, qua peccatorum remissio  
impetraretur. Ideo refertur "prædicans baptismum pœnitentiæ in  
remissionem peccatorum."<sup>7</sup> Christi baptismus, quem administrarunt  
Apostoli, fuit in remissionem peccatorum, adeo ut peccata remitteret pœni-  
tentibus, juxta illud Petri: "Pœnitentiam agite (inquit) et baptizetur unus-  
quisque vestrum in remissionem peccatorum vestrorum."<sup>8</sup> Ritus præcur-  
saris excitabat homines ad pœnitentiam; ideoque eos hortabatur Joannes  
ad dignos fructus pœnitentiæ facerent, "Joannes," inquit Paulus, "bap-  
tizavit baptismo pœnitentiæ populum."<sup>9</sup> Baptismus Christi nonnisi pœni-

(1) Comment. in Joan. t. vi. n. 17. Vide et Comm. in ep. ad Rom. l. v. n. 8.

(2) Exhort ad Bapt.

(3) Hom. xi. in c. iii. Matt.

(4) Dialog. adv. Lucifer.

(5) Inst. l. iv. c. xv. n. 7.

(6) Ibidem.

(7) Marc. i. 4.

(8) Act. ii. 38.

(9) Act. xix. 4.

tentibus administrandus est, quoties scilicet de iis qui propria voluntate peccarunt, agitur. Est igitur discrimen manifestum, ut de adoptione filios Dei impræsentiarum sileamus, sicut et de trium personarum invocatione.

125. *Obj. 2.* Iterum baptizati non sunt illi de quibus loquitur Luca “Ego,” inquit Calvinas, “concedo fuisse illud verum Joannis baptismum et unum idemque cum Christi baptismo : sed rebaptizatos nego. Quia igitur sibi volunt verba : ‘ baptizati sunt in nomine Jesu ? ’ Quidam interpretantur, tantum sincera doctrina eruditos a Paulo fuisse : sed simpliciter intelligere malim, baptismum Spiritus Sancti, hoc est, gratias Spiritus visibiles per manuum impositionem datas : quas baptismi nomine signari non novum est.”<sup>1</sup>

*Resp.* Clarissimæ sacri scriptoris relationi vim infert manifestam, quod negat Christi baptismum collatum iis qui jam a Joanne baptizati fuerant prout in loco de quo agitur narratur. Equidem contra obvium *baptizari* sensum, qui est aqua abluere, pro eruditione et institutione sincera explicatur a nonnullis, quos sequi Calvinum ipsum pudit. Quod autem : manuum impositionem velit vocem illam referre, pugnat cum orationis serie ; nam nulla ratio sinit ut vocem alio excipiamus sensu, quam quod pluries in contextu sumitur, quando nullum datur indicium transitus : sensum translatum. Præterea sacer scriptor pergit referre manibus impositis Spiritus Sancti præsentiam manifestis patuisse argumentis : “ Hauditis,” dixerat, “ baptizati sunt in nomine Domini Jesu. Et cum imposuisset illis manus Paulus, venit Spiritus Sanctus super eos, et loquebantur linguis, et prophetabant.”<sup>2</sup> Ex ipsa orationis simplicitate liquet manuum impositionem diversam esse a baptismo de quo mox fuerat sermo sicut et ex locis omnibus *parallelis*, uti aiunt, constat *baptizari in nomine Jesu* referri ad aqua baptismum quem Jesus instituit. Frustra labor Calvinus in re adeo manifesta.

126. *Obj. 3.* Si detur baptizatos a Joanne iterum fuisse Paulo jubentur baptizatos, id factum censendum est, quod “ in eum qui venturus esset post ipsum ut crederent, hoc est, in Jesum,”<sup>3</sup> baptizaverit Joannes. Optabat autem eos iterum baptizare in cultum Domini Jesu, quem hactenus ignorabant : ritus quippe baptizandi a Judæis adhiberi consuevit ut initiarentur homines, et cultum susciperent.

*Resp.* Ea ratio a sacro scriptore non indicatur, quamvis enim Paulus dicatur ea protulisse verba, eo consilio prolata manifestò sunt ut hominibus illis ostenderet Joannis ritum Christi baptismo eos præparasse, quem Baptista Salvatorem mox venturum prædiceret. Petrus autem unumquemque baptizandum in remissionem peccatorum dixit. Igitur non habend

(1) Inst. l. iv. c. xv. n. 18.

(2) Act. xix. 5. 6.

(3) Act. xix. 5.



est Christi baptismus veluti merus initiationis ritus, sed lavacrum quo abluuntur peccata, et homines renascuntur Deo. Quod ad Judæorum mores attinet, dicuntur quidem consuevisse Ethnicos ad sua sacra excipere, et proselytos facere, abluto prius aqua corpore: sed baptismi Christi ratio ab ejus jussione petenda est, et vis ab ejus voluntate. Optime Augustinus animadvertit: “Baptizatos a Paulo eos qui jam baptismo Joannis baptizati fuissent legimus in Actibus Apostolorum, non ob aliud, nisi quia baptismus Joannis non fuit Christi baptismus.”<sup>1</sup>

127. *Obj.* 4. Baptizato Christo cœlestia data sunt indicia ritum illum Deo maxime probatum, Spiritu ipso Sancto in Christi caput, columbæ specie, illapso. Ergo ritu eodem omnes Christi discipuli abluendi sunt.

*Resp.* Utique Deo probatus est baptismus quem contulit Joannes, quamvis quæ data sunt signa cœlestia, Christo Dei Filio testando idonea sint, potius quam ritus efficaciz demonstrandæ. In exemplum aliorum Christus eum suscepit, ut qui tunc vivebant Judæi Joannem agnoscerent divinitus missum, eique ad pœnitentiam hortanti obaudirent. Nobis baptismo Joannis opus non est, ritus enim prævius fuit, qui adveniente Salvatore desiit; baptizandi tamen sumus, ut Christo obtemperemus jubenti. Igitur quem instituit baptismus suscipiendus est, non quem ipse suscepit.

128. *Obj.* 5. Apollo, referente Luca, “erat edoctus viam Domini: et fervens spiritu loquebatur, et docebat diligenter ea quæ sunt Jesu, sciens tantum baptisma Joannis.”<sup>2</sup> Non aliud videntur suscepisse Apostoli: “his nimirum,” animadvertit Rosenmüller, “iterato baptismate non erat opus qui statim ab initio edocti erant, *Jesum* esse Messiam.”<sup>3</sup>

*Resp.* Id notat Lucas, ut ostendat scire oportere insuper Jesu baptisma, quapropter subjungit: “Quem cum audissent Priscilla et Aquila, assumpserunt eum, et diligentius exposuerunt ei viam Domini.” Igitur dubitandum non est eum deinceps baptizatum, ita enim actum deinceps refert sacer scriptor aliis qui baptisma Joannis tantum susceperunt. Apostolos baptizatos fuisse Christi sacramento temere negatur, ob Scripturarum silentium, quum numquam id sibi proposuerint auctores sacri ut res omnes gestas referrent. Constat Paulum, licet divinitus vocatum, baptismo opus habuisse, quare dubitandum non est cæteros pariter sacris undis mundatos. Ratio autem quam adsignat Rosenmüller inutilis est, et nullo testimonio nixa. Liquet universis hominibus legem a Christo impositam, et a Petro promulgatam, nullo facto discrimine eorum qui notitia hujusmodi imbuti a Joanne baptizati fuissent, et aliorum qui ea caruerunt.

*Obj.* 6. Tertullianus ait: “Neque quidquam refert inter eos quos Joannes in Jordane, et quos Petrus in Tyberi tinxit.”<sup>4</sup>

(1) L. v. de Bapt. c. ix.

(2) Act. xviii. 25.

(3) In Act. xix. 5.

(4) L. de baptismo c. iv.



*Resp.* Tertullianus magnum ponit discrimen inter Joannis baptismum, et eum quem, Christi auctoritate, Apostoli contulerunt, uti ex testimonio ejus jam laudato liquet. Verbis quæ objiciuntur aquam omnem idoneam esse Sacramento docet: “ nulla distinctio est mari quis an stagno, flumine an fonte, lacu an alveo diluatur: neque quidquam refert inter eos quos Joannes in Jordane, et quos Petrus in Tyberi tinxit: nisi et ille spado, quem Phillippus inter vias fortuita aqua tinxit, plus salutis aut minus retulit. Igitur omnes aquæ de pristina originis prærogativa sacramentum sanctificationis consequuntur, invocato Deo. Supervenit enim statim Spiritus de cœlis, et aquis superest, sanctificans eas de semetipso, et ita sanctificatæ vim sanctificandi combibunt.”

## CAPUT V.

## DE BAPTISMI NECESSITATE.

130. Pelagiani baptismum necessarium esse fatebantur ad regnum cœlorum assequendum, ad beatitudinem scilicet et gloriam cœlestem : quum autem peccatum originis negarent, eum necessarium non putabant ad maculam aliquam tollendam, vel ad beatitudinem quandam extra cœlorum regnum adipiscendam. Inter decimi sexti sæculi novatores Bucerus docuit prædestinatos adipisci salutem, sive baptismum susceperint, vel eo careant.<sup>1</sup> Calvinus ait : “Jam explodendum esse eorum commentum palam est, qui omnes non baptizatos æternæ morti adjudicant. Clara est Domini promissio : Quicumque in Filium credidit, non visurum mortem, nec in iudicium venturum, sed transiisse a morte in vitam (Jo. 5, 24) : nondum baptizatum nullibi damnasse comperitur. Quod in eam a me partem accipi nolo, perinde ac si baptismum contemni impune posse innuerem (quo contemptu violatum iri Domini fœdus affirmo : tantum abest, ut excusare sustineam) : tantum evincere sufficit, non esse adeo necessarium, ut periisse protinus existimetur cui ejus obtinendi adempta fuerit facultas.”<sup>2</sup> Patrem suum sequuntur Presbyteriani hodierni.<sup>3</sup> Unitarii nullam baptismi vel necessitatem, vel fructum agnoscunt, sed eum habent veluti symbolum quoddam professionis christianæ in primordiis Ecclesiæ usurpatum. Baptismi necessitatem absolutam non admittunt Baptistæ, nec enim a salute excludunt eos qui fidei non sunt, ratione ætatis, capaces, nec infantibus eum administrant. Eum tamen vocant una cum cœna Christi Domini instituta et mandata.<sup>4</sup> Ex tot erroribus derivata est illa baptismi negligentia, in his regionibus plerisque sectariis communis. Episcopaliani *præcepti* necessitatem, non *medii* admittunt :<sup>5</sup> quin diffiteantur in veteri Ecclesia necessitatem *medii* agnitam.

131. Necessitatem baptismi omnes agnoscunt Catholici : doctores autem Scholastici duplicem illam quam mox indicavimus, distinguere solent necessitatem, *præcepti* scilicet et *medii*. Illa oritur ex lege quam

(1) In c. iii. Mat.

(2) Inst. l. iv. c. xvi. n. 26.

(3) “Although it be a great sin to condemn or neglect this ordinance, yet grace and salvation are not so inseparably annexed unto it, as that no person can be regenerated or saved without it.” Presbyterian confession of faith, ch. xxviii. 5.

(4) “Baptism and the Lord’s Supper are ordinances of positive and sovereign institution, appointed by the Lord Jesus, the only Lawgiver, to be continued in his church to the end of the world.” Baptist confession of faith, ch. xxix.

(5) Burnet’s Analysis, Art. xxvii. p. 474.

servare oportet, quam tamen si quis absque sua culpa ignoraverit, vel non impleverit, impedimento aliquo detentus, non ideo periclitabitur salute. Necessitas autem *medii* tanta est, ut seu culpa seu forte aliqua res deficiat, salus obtineri nequit. Baptismum hac ratione necessarium esse censent.

132. Concilium Tridentinum simpliciter definivit Baptismum esse ad salutem necessarium, errorem contrarium proscribendo: “ Si quis dixerit baptismum liberum esse, hoc est, non necessarium ad salutem, anathema sit.”<sup>1</sup>

#### PROPOSITIO.

*Baptismus est necessarius ad salutem.*

*Probatur I. ex Scripturis.*

133. Christus Nicodemo dixit absque nova nativitate neminem posse regnum Dei ingredi; eamque contingere nemini nisi aqua et Spiritu Sancto: “ Amen, amen dico tibi, nisi quis renatus fuerit ex aqua et Spiritu Sancto, non potest introire in regnum Dei.”<sup>2</sup> Conditio igitur est a Christo statuta, qua non impleta, regni cœlestis non patet introitus. Verbis perspicuis, singulos homines complectentibus, enuntiatur illa gloriæ assequendæ conditio.

134. Apostolos mittens Christus baptismum omnibus iussit administrari: “ Euntes ergo docete omnes gentes, baptizantes eos.”<sup>3</sup> Ergo tenentur omnes baptismum suscipere. Eam conditionem esse salutis significavit: “ qui crediderit, et baptizatus fuerit, salvus erit.”<sup>4</sup> Frustra igitur sibi blanditur quisque de fide, nisi baptismum suscipiat. Hoc adultis, quibus prædicatum fuerit Evangelium, baptismum ad salutem necessarium esse manifestò probat. Ad infantes quod pertinet, quum fides et baptismus salutis conditiones statuuntur, fidem autem ob ætatem ipsi nequeant habere, baptismum saltem illis esse necessarium haud temere concluditur, ne omni ad salutem conditione carere videantur.

*Probatur II. ex Patrum traditione.*

135. IRENÆUS de lavacro et Spiritus gratia dicit: “ Utraque necessaria, cum utraque proficiunt in vitam Dei.”<sup>5</sup>

136. TERTULLIANUS ait: “ Fuerit salus retro per fidem nudam ante Domini passionem et resurrectionem: at ubi fides aucta est credendi in nativitatem, passionem, resurrectionemque ejus, addita est ampliatio sacramento, obsignatio baptismi, vestimentum quodammodo fidei, quæ retro erat nuda, nec potest jam sine sua lege. Lex enim tinguendi imposita est, et

(1) Sess. vii. Can. v. de Baptismo.

(2) Joan. iii. 5.

(3) Mat. xxviii, 19.

(4) Marc. xvi. 16.

(5) L. iii. adv. hæ. c. xix.

forma præscripta: ‘Itē,’ inquit, ‘docete nationes, tingentes eas in nomen Patris et Filii et Spiritus Sancti. Huic legi collata definitio illa: ‘Nisi quis renatus fuerit ex aqua et Spiritu, non intrabit in regnum cœlorum;’ obstrinxit fidem ad baptismi necessitatem. Itaque omnes exinde credentes tinguebantur.”<sup>1</sup> Excusat baptismi a laico administrationem ob periclitantis conditionem: “Tunc enim constantia succurrentis excipitur, cum urget circumstantia periclitantis: quoniam reus erit periti hominis si supersederit præstare quod potuit.”<sup>2</sup>

137. S. CYRILLUS HIEROSOLYMITANUS ait: “Si quis non baptizatur, salutem non habet, præter solos martyres, qui sine aqua regno cœlesti potiuntur.”<sup>3</sup>

138. S. AMBROSIVS circumcisionis mysterium in baptismate impleri docet: “Et domesticus, et alienigena, et justus et peccator circumcidatur remissione peccatorum, ut peccatum non operetur amplius, quia nemo ascendit in regnum cœlorum, nisi per sacramentum baptismatis.” Inferius de peccatore dicit: “mentis suæ ascribere debet infantiae, quod incautus fuit et intemperans, vel remissionem peccatorum nec acquisivit: ‘Nisi enim quis renatus fuerit ex aqua et Spiritu Sancto, non potest introire in regnum Dei.’ Utique nullum excipit, non infantem, non aliqua præventum necessitate.”<sup>4</sup>

139. S. AUGUSTINUS majorum suorum fidem enuntians, dicit: “Noli credere, nec dicere, nec docere, infantes, antequam baptizentur, morte præventos, pervenire posse ad originalium indulgentiam peccatorum, si vis esse Catholicus.”<sup>5</sup>

*Probatur III. ex perpetua consuetudine Ecclesiæ.*

140. Verbis præclari vindicis hujus Sacramenti Augustini, argumentum proponere juvat: “Quisquis dixerit, quod in Christo vivificabuntur etiam parvuli, qui sine Sacramenti ejus participatione de vita exeunt, profectò et contra Apostolicam prædicationem venit, et totam condemnat Ecclesiam, ubi propterea cum baptizandis parvulis festinatur et curritur, quia sine dubio creditur, aliter eos in Christo omnino vivificari non posse.”<sup>6</sup>

*Probatur IV. Conciliorum auctoritate.*

141. Pelagianos in pluribus conciliis quinto sæculo damnatos constat, Summis Pontificibus probantibus, ob necessitatem denegatam baptizandi parvulos in remissionem peccatorum, et salutem. “Concilium Carthaginense, anno 416 habitum, de eis ait: “Parvulos etiam propter salutem

(1) L. de Baptismo c. xiii.

(2) Ibidem c. xvii.

(3) Catech. iii.

(4) L. de his qui initiantur c. xi.

(5) Lib. iii. de anima et ejus origine c. ix.

(6) Ep. clxvi. alias xxviii ad Hieronym. c. vii.

quæ per Salvatorem Christum datur, baptizandos negant, ac sic eos mortifera ista doctrina in æternum necant.”<sup>1</sup>

#### OBJECTIONES SOLVUNTUR.

142. *Obj.* 1. Illud apud Joannem testimonium ad baptismum non refertur. “In eo falluntur,” inquit Calvinus, “quod baptismi mentionem fieri hoc loco putant, quia aquæ nomen audiunt. Postquam enim naturæ corruptionem Nicodemo exposuit Christus, ac renasci oportere docuit: quia ille renascentiam corporalem somniabat, modum hic indicat quo regenerat nos Deus, nempe per aquam et Spiritum: quasi diceret, per Spiritum, qui purgando et irrigando fideles animas, vice aquæ fungitur. Aquam ergo et Spiritum simpliciter accipio pro Spiritu, qui aqua est. Neque hæc nova est loquutio: prorsus enim cum illa quæ tertio Matthæi capite habetur convenit: ‘Qui sequitur me, ille est qui baptizat in Spiritu Sancto et igni.’ Quemadmodum ergo Spiritu Sancto et igni baptizare, est Spiritum Sanctum conferre, qui in regeneratione ignis officium naturamque habet: ita renasci aqua et Spiritu nihil aliud est, quam vim illam Spiritus recipere, quæ in anima facit quod aqua in corpore.”<sup>2</sup>

*Resp.* Hæc ingeniose dicuntur, sed contra obvium textus sensum, nam ea protulit Christus, explicans Nicodemo quomodo renasci oporteret; interrogaverat scilicet hic: “Quomodo potest homo nasci, cum sit senex?”<sup>3</sup> Locus igitur non erat figuræ, nisi quæ ex communi usu vel ex sermonis contextu omnino pateret. Præterea si Spiritus effectus designandus foret, Spiritus prius nominaretur, sicut quando Spiritus et ignis nominantur: nec aqua veluti res quædam præcipua priorem occuparet locum. Licet igitur Calvinus ipsius verbis, alio prorsus consilio prolatis, in rem nostram uti: “Non enim nos ex Spiritu et aqua, sed ex aqua et Spiritu regenerandos docet Christus.”<sup>4</sup> Aqua meritò primo in loco ponitur, eo quod res sit Sacramenti, cui Spiritus adjungitur, qui virtutem suam aquæ adjiciens, facit ut homines denuo nascantur.

143. *Obj.* 2. Etsi ad baptismum illa Christi verba referantur, non absolutam necessitatem probant, quamvis enim aqua regenerationis signum adhibenda sit, tamen ipsa regeneratio, quæ fit divino Spiritu, hominem regno idoneum efficit. “Omissis cavillis,” inquit Calvinus, “tenenda simplex est interpretatio quam attuli, neminem, donec renovatus fuerit aqua viva, hoc est, Spiritu, posse ingredi in regnum Dei.”<sup>5</sup>

(1) Epist. synodica ad Innoc. I. quæ inter Augustinianas clxxv. aliàs ix. Vide Conc. Milevit: eodem anno.

(2) Instit. l. iv. c. xvi. n. 25.

(3) Joan. iii. 4.

(4) Instit. l. iv. c. xvi. n. 27.

(5) Ibidem n. 25.

*Resp.* Omnimodam necessitatem novæ nativitatis tradiderat Christus, eamque ex aqua et Spiritu Sancto necessariò pendere deinceps docuit. Gratis igitur, imo contra Christi Domini auctoritatem, nativitas fingitur Spiritu absque aqua effecta. Verba autem universos respiciunt, quos proinde baptismo oportet renasci.

144. *Obj.* 3. Illis verbis Christus innuit neminem posse in visibilem Ecclesiam ingredi, nisi baptismo: "regnum enim cœlorum in novo Testamento hanc sæpius designat. Non ideo tamen ab electorum cœtu excluduntur omnes haud baptizati, uti fatentur Catholici, catechumenos morte præreptos non omni spe salutis carere dicentes.

*Resp.* Regnum cœlorum aliquando Ecclesiam quæ in terris est designat, sed et regnum cœleste, in quo Deus se suis manifestat. De hoc agi liquet, Nicodemus enim eum divinitus datum magistrum agnoscens, de sua salute sollicitus, quid sibi faciendum foret quæsiisse censendus est. Præterea visibilis Ecclesia ideo statuta est ut homines regno cœlesti fierent idonei, ideoque ejus membræ fiant necesse est qui cœli gaudia comparare velint. Hinc salvandos Ecclesiæ additos in dies testatur Evangelista, res gestas Apostolorum narrans: " Dominus autem augebat qui salvi fierent quotidie in id ipsum." Vel ut clarius habet textus receptus: 'Ο δὲ κύριος προσετίθει τοῖς σωζομένοις καὶ ἡμέραν τῇ ἐκκλησίᾳ. Catechumeni autem qui sincero desiderio baptismum petunt, ad Ecclesiam voto et animo pertinent, ideoque non sunt a spe salutis alieni.

145. *Obj.* 4. Exceptionem admittunt catholici quoad eos qui martyrium subierunt, vel qui baptismum, quem cupiunt, nequeunt suscipere. Ergo verba illa non probant omnimodam necessitatem.

*Resp.* Universalis est sententia, nec exceptionem pati dicenda est, nam meritò censentur ex aqua nasci qui animo cupiunt ablui, vel qui sanguinem fundunt in testimonium Jesu, cujus lege jubetur ut baptismus suscipiatur. Cæterum si exceptionem placeat eam vocare, fit Christo auctore, et testimonii vis in cæteris omnibus casibus agnoscitur.

146. *Obj.* 5. Christus ad prædicandum mittens Apostolos, jussit quidem ut baptizarent, hoc ritu homines visibili Ecclesiæ adscituri: non tamen interitum minatus est iis qui baptismum haud susciperent, dummodo crederent.

*Resp.* Christus baptismum cum fide ad salutem exegit: " qui crediderit et baptizatus fuerit, salvus erit:" haud credenti minatus est interitum: " qui verò non crediderit damnabitur;" siluit autem de baptismi incuria, quia qui non crediderit non esset petiturus baptismum. Opus non erat ut de iis ageret, qui credentes differrent vel negligerent hunc ritum, quum jam indicasset eum ad salutem requiri.

147. *Obj.* 6. Conditio illa salutis universos homines obligans, etiam qui de ea numquam audierunt, sed nec audire potuerunt, infantes scilicet,

temere statuitur, quum nullo claro Scripturæ testimonio nitatur, et aliena sit a divina pietate.

*Resp.* Non temere illam declaramus salutis conditionem, sed Christo auctore, cujus verba de baptismi necessitate tota retro intellexit antiquitas. Quum homines nullum jus habeant ad gloriam supernaturalem, et peccato primorum parentum filii sint iræ, penes Christum erat eam statuere conditionem, licet plurimi eam implere nequeant : nulla enim eis fit injuria dum bono privantur indebito.

148. *Obj.* 7. Abhorret animus dum cogitatur universos qui baptismum haud susceperunt cruciatibus æternis puniri, tum parvulos nulla sui culpa, tum cæteros quibus divina baptismi institutio certò innotuit. Id autem omnino dicendum, si salus absque baptismo comparari nequeat, Scriptura enim nullum alium locum præter gehennam et regnum cœlorum tradit. Idcirco Augustinus ait : “Non baptizatis parvulis nemo promittat inter damnationem regnumque cœlorum quietis vel felicitatis cujuslibet atque quolibet, quasi medium locum : hoc enim eis hæresis Pelagiana promisit.”<sup>1</sup>

*Resp.* Fides Catholica aliud non exigit quam ut credatur neminem posse regnum cœleste ingredi, beatitudine scilicet aliqua supernaturali frui, nisi baptizatus fuerit, saltem animi voto. Qui adulta in ætate discesserint, vel rei sunt baptismatis sua culpa neglecti, vel alia peccata luere debent. Nemo ob solum baptismatis defectum qui absque culpa contigit, cruciandus censetur, nam parvuli baptismate carentes, juxta receptam sententiam, nulla supplicia patiuntur. Hæc placuit sententia D. Thomæ Aquinati, qui Augustini fidelissimus discipulus, ejus verba ita interpretatus est, ut Pelagianum errorem de beatitudine supernaturali excluderet, quin cruciatus ullos manere infantes censeret. “Dicendum,” inquit, “quod nomen tormenti, supplicii, gehennæ et cruciatus, vel si quid simile in dictis sanctorum patrum inveniatur, est large accipiendum pro pœna, ita ut ponatur species pro genere. Ideo autem Sancti tali modo loquendi usi sunt, ut detestabilem redderent errorem Pelagianorum, qui asserebant in parvulis nullum peccatum esse, nec eis aliquam pœnam deberi.”<sup>2</sup> Liceat nobis benigniorem hanc rationem Augustini mentem explicandi sequi. Id fidenter dicimus ex dogmate Catholico non necessariò inferri cruciandos esse parvulos baptismato carentes, quum id fere omnes Theologi per tot sæcula denegent, Ecclesia haud contradicente. Cæterum cum Augustino dicimus : “Nulla igitur ex nostro arbitrio præter baptismum Christi, salus æterna promittatur infantibus, quam non promittit Scriptura divina, humanis omnibus ingeniis præferenda.”<sup>3</sup>

(1) L. de origine animæ c. ix.

(2) D. Thom. qu. 5 de malo art. 2. ad i.

(3) L. i. de pecc. merit et remiss. c. xxiii.

## ANIMADVERSIONES.

149. Baptismum ad salutem esse necessarium ex fidei doctrina novimus : nec tamen, uti ex mox dictis patet, jubemur credere omnes suppliciis cruciari æternis qui absque baptismo e vivis discesserint. *Baptismo sanguinis* expiari dicuntur omnes qui fidei causa, Deum super omnia diligentes, mortem obeunt, qui et votum habent baptismi suscipiendi, vel *explicitum*, si de eo audierint, vel *implicitum*, si de eo non fuerint edocti. Infantes autem fidei causa interfecti eadem ratione palmam acquirere et regnum haud immeritò creduntur, æquum enim est et Christi consonum promissionibus, ut qui propter ipsum vitam amittunt, licet haud suæ voluntatis, actu, eam cum gloria sempiterna inveniant. Ita de innocentibus ab Herode occisis censet Ecclesia ; quod de omnibus infantibus propter Christum interfectis sentiendum pariter videtur. *Implicitum* votum baptismi ab insignibus Theologis censetur posse haberi ab iis qui fide præcones audiendi nullam unquam habuerunt facultatem, quique ex interiori gratiæ motu ad Deum, creatorem et rerum arbitrum, toto corde se converterint, illi in omnibus placere cupientes.

150. Quæ sit conditio parvulorum absque baptismo decedentium fide non constat. S. Thomas Aquinas, cum Theologorum turba, censet eos nullam pati pœnam sensus, sed tantum Dei visione non frui ; nam quum perversa voluntate non fuerint ad creaturas contra Dei legem conversi, æquum non videtur ut cruciatus inde patiantur. “ Ideo,” inquit, “ peccato originali non debetur pœna sensus, sed solum pœna damni, scilicet carentia visionis divinæ.”<sup>(1)</sup> Quum eam suo actu parvuli non amiserint, non putat illis inde dolendi esse occasionem : “ nihil omnino dolebunt de carentia visionis divinæ.”<sup>(2)</sup> Fuerunt qui beatitudine quadam naturali eos donandos opinarentur ; sed nobis de eorum conditione nihil divinando conjicere placet.

(1) Quæst. v. de malo art. 2. in corp.

(2) 2 dist. 83, quæst. 2 art. 2.



## CAPUT VI.

## DE INFANTUM BAPTISMO.

151. Ex illa quam probavimus baptismi necessitate facile deducitur eum omnibus, etiam parvulis, administrari posse: quod Ecclesiastica probat consuetudo. Attamen sæculo duodecimo plurimi hanc impugnarunt, Petrobusiani scilicet, Henriciani, Waldenses, alique varie nuncupati. Sæculo decimo sexto, post turbas Lutheri, Nicolaus Storkius, Balthasar Pacimontanus, et Thomas Munzerus contenderunt nihil valere infantum baptismum, ideoque iterato baptizarunt in adulta ætate qui in infantia baptizati fuerant: quapropter *Anabaptistæ* dicti sunt. Qui apud nos Baptistæ audiunt in eo errore cum illis conveniunt, alioquin plurimis capitibus discrepantes. Episcopaliani, Presbyteriani, et Methodistæ parvulos baptizari posse fatentur; sed plurimi negligunt eos afferre baptizandos, præsertim in provinciis Occidentalibus.

152. Plures edidit concilium Tridentinum canones, veterum conciliorum decretis admodum consonos, ut Anabaptistarum profligaret errores. "Si quis parvulos recentes ab uteris matrum baptizandos negat, etiam si fuerint a baptizatis parentibus orti, aut dicit in remissionem quidem peccatorum eos baptizari, sed nihil ex Adam trahere originalis peccati, quod regenerationis lavacro necesse sit expiari ad vitam æternam consequendam; unde fit consequens ut in eis forma baptismatis in remissionem peccatorum non vera, sed falsa intelligatur, anathema sit."<sup>1</sup> Si quis dixerit neminem esse baptizandum, nisi ea ætate qua Christus baptizatus est, vel in ipso mortis articulo, anathema sit." "Si quis dixerit parvulos, eo quod ætatem credendi non habent, suscepto baptismo inter fideles computandos non esse, ac propterea cum ad annos discretionis pervenerint esse rebaptizandos, aut præstare omitti eorum baptismum, quam eos non actu proprio credentes baptizari in sola fide Ecclesiæ; anathema sit. Si quis dixerit huiusmodi parvulos baptizatos, cum adoleverint, interrogandos esse, an ratum habere velint quod patrini eorum nomine, dum baptizarentur, polliciti sunt, et ubi se nolle responderint, suo esse arbitrio relinquendos, nec alia interim pœna ad christianam vitam cogendos, nisi ut ab Eucharistiæ, aliorumque sacramentorum perceptione arceantur, donec resipiscant; anathema sit."<sup>2</sup>

(1) Sess. v. Can. iv.

(2) Sess. vii. de Bapt. Can. xii. xiii. xiv.

## PROPOSITIO.

*Infantes baptizari possunt et debent.*

*Probat I. ex Scriptura.*

153. Christus dixit: "Nisi quis renatus fuerit ex aqua et Spiritu Sancto, non potest introire in regnum Dei."<sup>1</sup> Conditionem ad salutem assequendam necessariam his verbis statutam ostendimus, parvulos autem omnes a salute excludere, nullo iis dato subsidio quo eam assequantur, a divina pietate est alienum: quum Christus infantes magna benignitate complexus fuerit, regnumque cœlorum nonnisi hujusmodi tribuendum dixerit: "Sinite parvulos et nolite eos prohibere ad me venire; talium est enim regnum cœlorum."<sup>2</sup>

154. Præterea Evangelium lætus est nuntius omni creaturæ, bona scilicet universis hominibus offert; et baptizandi data est facultas, nullo appposito limite: ergo omnes censendi sunt baptismi et salutis capaces, qui sua culpa sese indignos haud præbuerint. Infantes autem nullum obicem objicere valent.

155. Postquam Petrus hortatus est Judæos ut baptismum susciperent in remissionem peccatorum, rationem adsignans addidit: "Vobis enim est repromissio et filiis vestris."<sup>3</sup> Nulla occurrit ratio cur infantes excludantur ab hujus promissionis beneficio, vel eo gaudeant absque baptismo, qui gratiæ et salutis est subsidium.

156. Pluries refertur Apostolos integras baptizasse familias, nullo ætatis discrimine indicato. De Lydia, purpuraria, dicitur: "Cum autem baptizata esset, et domus ejus."<sup>4</sup> Carceris custos "baptizatus est ipse, et omnis domus ejus."<sup>5</sup> "Baptizavi autem," inquit Paulus, "et Stephanæ domum."<sup>6</sup>

156. Tradit Paulus circumcisionis locum baptismi Christi tenere, eo scilicet ritu fœdus inibatur cum Abrahæ posteris, hoc quisque Christiani fœderis fit particeps: "In quo" (*Christo*) "et circumcisi estis circumcisione non manu facta in expoliatione corporis carnis, sed in circumcisione Christi: consepulti ei in baptismo."<sup>7</sup> Æquum igitur est parvulos habere baptismi capaces, sicut circumcisionis, ne dicantur peiori conditione sub novo fœdere, quam sub veteri.

(1) Joan. iii. 5.

(2) Mat. xix. 14. *παιδια* a Matthæo et Marco, *βρεφοι* a Luca vocantur, Luc. xviii.

15. Tenella eorum ætas indicatur.

(3) Act. ii. 39.

(4) Act. xvi. 15.

(5) Ibidem 33.

(6) I. Cor. i. 16.

(7) Col. ii. 11.

*Probatur II. ex perpetua Ecclesiæ consuetudine.*

157. S. IRENÆUS dicit regenerationis potestatem Apostolis demandatam illis Christi verbis de munere baptizandi, et alibi infantes in Christo renasci affirmat: “ Dominus omnes venit per semetipsum salvare: omnes, inquam, qui per eum renascuntur in Deum, infantes et parvulos, juvenes et seniores. Ideo per omnem venit ætatem, et infantibus infans factus, sanctificans infantes: in parvulis parvulus, sanctificans hanc ipsam habentes ætatem.”<sup>1</sup>

158. ORIGENES ait: “ Ecclesia traditionem ab Apostolis suscepit etiam parvulis baptismum dare. Sciebant enim illi quibus mysteriorum secreta commissæ sunt divinorum, quod essent in omnibus genuinæ sordes peccati, quæ per aquam et Spiritum ablui deberent.”<sup>2</sup> “ Parvuli baptizantur in remissionem peccatorum? Quorum peccatorum? vel quo tempore peccaverunt? aut quomodo potest ulla lavacri in parvulis ratio subsistere, nisi juxta illum sensum de quo ante diximus: ‘ Nullus mundus a sorde, nec si unius diei quidem fuerit vita ejus super terram?’ Et quia per baptismi sacramentum nativitatis sordes deponuntur, propterea baptizantur et parvuli. ‘ Nisi enim quis renatus fuerit ex aqua et Spiritu, non poterit intrare in regnum cœlorum.’”<sup>3</sup>

159. S. CYPRIANUS sententiam concilii Carthaginensis, cui sexaginta sex episcopi interfuerant anno 253, litteris ad Fidum, qui eos consuluerat, exposuit: “ Quantum verò ad causam infantum pertinet, quos dixisti intra secundum vel tertium diem quo nati sunt constitutos baptizari non oportere, et considerandam esse legem circumcisionis antiquæ, ut intra octavum diem eum qui natus est, baptizandum et sanctificandum non putares: longe aliud in concilio nostro omnibus visum est; in hoc enim quod tu putabas esse faciendum nemo consensit, sed universi potius judicavimus, nulli hominum nato misericordiam Dei et gratiam esse denegandam.”<sup>4</sup> Liquet inde pro re explorata apud omnes haberi, infantes posse et debere baptizari, adeo ut paucorum dierum dilatio nemini probaretur.

160. S. JOANNES CHRYSOSTOMUS Græcorum consuetudinem testatur: “ Etiam infantulos baptizamus, ut non sint coinquinati peccato, ut eis addatur sanctitas, justitia, adoptio, hæreditas, fraternitas Christi, ut ejus membra sint omnes, ut Spiritus habitatio fiant.”<sup>5</sup>

161. S. AMBROSIIUS de circumcisione agens, quam baptismi typum esse declarat, ait: “ Nec senex proselytus, nec infans vernaculus excipitur, quia omnis ætas peccato obnoxia, et ideo omnis ætas Sacramento idonea.” Hæc certe ratio baptismi infantum suffragatur.

(1) L. ii. adv. hæ. c. xx. alias xxxix.

(2) L. v. in ep. ad Rom. n. 9. p. 264, ed. Wirceb.

(3) Hom. xiv.

(4) Ep. lix. ad Fidum, alias l. iii. ep. viii.

(5) Hom. ad Neophytos.

162. S. SIRICIUS Papa : “ Sicut ergo sacram Paschalem reverentiam in nullo discimus esse minuendam, ita infantibus qui necdum loqui poterunt per ætatem, vel his quibus in qualibet necessitate opus fuerit sacri unda baptismatis, omni volumus celeritate succurri, ne adstrarum perniciem tendat animarum, si negato desiderantibus fonte salutari, exiens unusquisque de sæculo et regnum perdat et vitam.”<sup>1</sup>

163. S. AUGUSTINUS noscitur parvulorum baptismatis necessitatem ad peccatum originis tollendum contra Pelagianos propugnasse, qui baptizandos haud negabant, quin maculam peccati agnoscerent. “ Porro,” inquit ipse, “ quia parvulos baptizandos esse concedunt, qui contra auctoritatem universæ Ecclesiæ, procul dubio per Dominum, et Apostolos traditam, venire non possunt ; concedant oportet eos egere illis beneficiis Mediatoris, ut abluti per Sacramentum charitatemque fidelium, ac sic incorporati Christi corpori, quod est Ecclesia, reconcilientur Deo, ut in illo vivi, ut salvi, ut redempti, ut illuminati fiant.”<sup>2</sup> Absque fide eos salutem assequi, quum per ætatem eam habere nequeant, docet : “ Quod traditum tenet universitas Ecclesiæ, cum parvuli infantes baptizantur, qui certe nondum possunt corde credere ad justitiam, et ore confiteri ad salutem, quod latro potuit : quin etiam flendo et vagiendo, cum in eis mysterium celebratur, ipsis mysticis vocibus obstrepunt ; et tamen nullus Christianorum dixerit eos inaniter baptizari. Et si quisquam in hac re auctoritatem divinam quærat : quamquam quod universa tenet Ecclesia, nec conciliis institutum, sed semper retentum est, non nisi auctoritate Apostolica traditum rectissime creditur, tamen veraciter conjicere possumus quid valeat in parvulis Baptismi Sacramentum ex circumcisione carnis, quam prior populus accepit.”<sup>3</sup>

*Probatur III. judicio et auctoritate conciliorum.*

164. Carthaginense, seu Milevitanum II., utroque enim nomine designatur, anno 418, hunc tulit canonem : “ Placuit, ut quicumque parvulos recentes ab uteris matrum baptizandos negat, aut dicit, in remissionem quidem peccatorum eos baptizari ; sed nihil ex Adam trahere originalis peccati, quod lavacro regenerationis expiatur . . . anathema sit.”<sup>4</sup> Decreta hujus concilii et alterius in eadem Pelagianorum causa, Summo Pontifici probata, per totam Ecclesiam vim obtinuerunt.

#### OBJECTIONES DILUUNTUR.

165. *Obj.* 1. Pædobaptismus absque ulla Scripturarum auctoritate inductus est, tertio a Christo sæculo. Christus jussit discipulos faciendos antequam baptizarentur : μαθητεύσατε πάντα τὰ ἔθνη, βαπτίζοντες αὐτοὺς : “ Do-

(1) Ep. ad Himerium Tarracon, c. ii.

(2) L. i. de pec. mer. et rem. c. xxvi.

(3) L. iv. de Bapt. c. xxiii.

(4) Can. ii.

cete omnes gentes, baptizantes eos.”<sup>1</sup> Fidem baptismo præire oportere innuit: “Qui crediderit et baptizatus fuerit, salvus erit.”<sup>2</sup>

*Resp.* Episcopi cum Cypriano non novum induxerunt usum sæculo tertio, sed veterem traditionem contra cujusdam nova consilia propugnauerunt. Fatemur Scripturam tot verbis haud commendare parvulorum baptisma; sed Sacramentum omnibus necessarium esse tradit, quum absque eo non pateat aditus ad cœlorum regnum; et Christi benignam erga parvulos voluntatem testatur: quæ cum aliis non levia sunt argumenta eos esse baptismo, et ideo saluti, idoneos. Præterea quæ viguit consuetudo tertio ineunte sæculo, tanto consensu probata, ab Apostolorum ætate derivata agnoscenda est: si enim postea inducta fuisset, vestigia aliqua originis ejus reperirentur. Ad mandatum quod pertinet prædicandi et docendi, eos respicit, qui per ætatem Evangelium audire, et fidem excipere possunt, qui nonnisi credentes et pœnitentiam agentes idonei sunt baptismo suscipiendo. Cæterum baptizandi facultas, quamvis post docendi munus declarata, non necessariò ad edoctos et credentes arctatur, quum vi sua omnes complectatur qui ablutione indigent.

166. *Obj.* 2. Christus Dominus nonnisi adultus baptizari voluit, nec ullum legitur exemplum, inter Apostolorum res gestas, infantis baptizati: quod enim de familiis integris baptizatis dicitur, intelligitur de iis qui per ætatem suscipere baptismum possent. Gratis præterea asseritur fuisse in illis familiis parvulos. Sic de centurione refertur, quod crediderit cum domo ejus tota; nec tamen inde inferre licet parvulos ejus filios, si quos habuerit, credidisse.

*Resp.* Christi Domini exemplum, si legem non statuerit, nos non obligat ad ea facienda in iisdem rerum adjunctis, quæ libera reliquit. Equidem baptismus pœnitentiæ quem administrabat Joannes adultis conferebatur, ut ritu ipso moniti ad dolorem, quo mundarentur corda, excitarentur. Christus innocens sanctusque eum suscepit, ut aliis esset exemplo, Joanni testimonium perhiberet, et aquas, sui corporis contactu, sublimi muneri mundandi animas pararet. Ætatem autem qua suscipiendus esset baptismus quem ipse instituit, nullibi definiisse legitur: ideoque jure optimo inferitur licere omnibus absque ætatis discrimine eum conferre. Quod Apostoli non legantur infantes baptizasse, non obstat, nam res eorum gestas paucas recensuerunt sacri scriptores. Cæterum haud temere conjicitur parvulos aliquos vocibus illis comprehendendi, quæ integras respiciunt familias. Non *parallelus* est locus qui objicitur, credendi enim vox necessariò intelligitur de iis qui per ætatem fidem concipere valent; baptizandi e contra vocabulum alienam actionem designat, nullumque limitem exigit. Quotquot ablutionis sunt capaces eo comprehenduntur.

167. *Obj.* 3. Quum quidam superstitione quadam ducti parvulos bapti-

(1) Mat. xxviii. 19.

(2) Marc. xvi. 16.

zandos offerrent Tertulliani ætate, eos vehementer redarguit. “Itaque,” inquit, “pro cujusque personæ conditione ac dispositione, etiam ætate, cunctatio baptismi utilior est: præcipue tamen circa parvulos. Quid enim necesse est sponsores etiam periculo ingeri? quia et ipsi per mortalitatem destituere promissiones possunt, et proventu malæ indolis falli. Ait quidem Dominus. ‘Nolite illos prohibere ad me venire? Veniant ergo, dum adolescunt; veniant dum discunt; dum quo veniunt, docentur: fiant Christiani cum Christum nosse potuerint. Quid festinat innocens ætas ad remissionem peccatorum? Cautius agitur in sæcularibus, ut cui substantia terrena non creditur, divina credatur: norint petere salutem, ut petenti dedisse videaris.”<sup>1</sup>

*Resp.* Ex ipsis Tertulliani verbis liquet eum velle immutare consuetudinem, non tunc primum inductam, sed vigentem jam, et stabilitam, utpote ab Apostolorum ætate derivatam. Suo indulgens ingenio severiori, opinatus est præstare ut baptismus differretur, donec edoceri possint baptizandi quantum suscepturi forent munus. Singularis hæc sententia non obtinuit, sed post medium sæculum adeo immota perstitit vetus consuetudo, ut ne quidem octo dierum dilatio opportuna episcoporum concilio visa sit. Equidem quas objecit difficultates non ejusmodi sunt, quas Pædo-baptismi hodierni adversarii urgent, petebantur enim imprimis ex sponsorum periculo, parvulorum nomine pollicentium quod ipsi, morte forsitan prærepti, non possent curare adimplendum, quodque mala puerorum indoles, sponsoribus superstitibus, et sollicitis, posset frustrari: deinde ex Sacramenti divina præstantia. Novatores baptismum vi carere e contra dicunt, nihil proinde divinum continere; et sponsorum munus negligunt. Quod autem de parvulorum baptismate differendo arrisit Tertulliano, de virginibus et viduis etiam visum est, quas tamen nemo dixerit ex lege Christi haud idoneas Sacramento. Pergit ipse: “Non minore de causa innupti quoque procrastinandi, in quibus tentatio præparata est tam virginibus per maturitatem, quam viduis per vacationem, donec aut nubant, aut continentiae corroborantur. Si qui pondus intelligant baptismi, magis timebunt consecutionem, quam dilationem: fides integra secure est de salute.” Qui severiora placita de parvulis miratur, hæc quoque pari ratione probet oportet.

168. *Obj.* 4. Gregorius Nazianzenus infantes baptizandos esse haud censuit.<sup>2</sup>

*Resp.* Censuit omnino Gregorius infantes baptizandos esse, quamvis opinaretur oportere expectare triennium, si nullum immineret periculum, ut aliqualem notitiam muneris haberent. “Infans tibi est?” ait in sanctum baptismum disserens: “Ne occasionem improbitas arripiat: ab infantia sanc-

(1) L. de baptismo c. xviii.

(2) Orat. xl. in S. Baptisma.

tificetur, ab ipsis unguiculis Spiritui consecratur.” . . . . “ Quid de iis dices, qui adhuc tenera ætate sunt nec aut damnum aut gratiam sentiunt? An eos quoque baptizabimus? Ita prorsus, si quod periculum urgeat. Præstat enim absque sensu sanctificari, quam sine sigillo et initiatione abscedere. Atque hujus rei ratio nobis est circumcisio die octavo peragi solita, quæ baptismi figuram quodammodo gerebat, atque iis qui rationio adhuc expertes erant, offerebatur.” . . . . “ De reliquis ita censeo, ut trienni expectato, aut aliquanto breviori vel longiori temporis spatio, (nam tum et mystici quiddam audire et respondere possunt, ac si minus plene et exacte intelligunt, imbuuntur tamen et informantur,) ita demum per magni baptismi Sacramentum et animos et corpora sanctificent. . . . . At propter inopinatos et repentinos periculorum impetus, quique nulla ope atque auxilio propulsari queant, lavacro communiri omnino conducibilius est.” Hæc visa sunt insigni illi præsuli, cujus tamen consilium de triennii dilatione cæteris non arrisit, consuetudoque antiqua constitit immutata. Quam autem longe distent ejus placita a Baptistarum errore nemo non videt.

169. *Obj.* 5. Baptizandi infantes consuetudo ex falsa sententia de baptismi necessitate et efficacia orta est: duplicem idcirco errorem conjunctum habet, quod scilicet haud baptizati infantes in æternum pereant, baptizati verò cælesti gloriæ sint idonei, ablutione illa potius quam Christi sanguine.

*Resp.* Consuetudo illa ab Apostolis derivata est, uti veteres scriptores testantur, et iis fulcitur principiis quæ ipsi prædicarunt. Necessarius quidem est baptismus, uti Christo docente didicimus, et efficax etiam, quia eo quisque renascitur quum lavacrum sit regenerationis. Parvulos absque baptismo decedentes ad salutem haud pervenire cum tota antiquitate christiana fateri cogimur, quin eos in æternum cruciandos credere jubeamur. Ex sanguine Christi derivari profitemur baptismi virtutem, quam instrumentum tantum, non causam sanctitatis munerum, quibus augentur baptizati, agnoscimus.

#### ANIMADVERSIONES.

170. Licet Calvinus fateatur parvulos esse baptizandos, non nititur præcipue summa baptismi necessitate, sed jure potius filiorum fidelium, quos parentum ergo ad fœdus divinum pertinere censet. “ Quamobrem et Judæorum liberi, quod ejus fœderis hæredes facti ab impiorum liberis discernerentur, semen sanctum vocabantur, eadem etiamnum ratione sancti censentur Christianorum liberi, vel altero duntaxat fidei parente geniti: et Apostoli testimonio differunt ab immundo idolatrarum semine.”<sup>1</sup> Totum hujus rei fructum explicat juxta sua placita Calvinus: “ Siquidem Dei signum puero communicatum, velut impresso sigillo, promissionem pio parenti datam confirmat, ac ratum esse declarat quod Dominus non illi

(1) Inst. l. iv. c. xvi. n. 6.



modo, sed semini ejus in Deum sit futurus.”<sup>1</sup> “Quare,” dicit postea, “nihil plus in pædobaptismo præsentis efficacæ requirendum est, quam ut fœdus cum illis a Domino percussum obfirmet et sanciat.”<sup>2</sup> Tota Calvini doctrina eo redit, ut electis tribuatur gratia, et ideo baptismo obsignandi sunt filii fidelium qui electi censentur; quum cæteris nihil prosit. Magistri in verba jurarunt Presbyteriani.<sup>3</sup>

171. Quod Apostolus sanctos dicat filios fidelium, licet alter parens infidelis fuerit, intelligendum est eos legitimos esse, et sanctitatis veluti candidatos. Rogatus fuerat sententiam de iis qui matrimonio cum infidelibus conjuncti erant, eosque monuit ne a conjugibus discederent, si hi vellent cum iis tranquillam degere vitam: “si quis frater uxorem habet infidelem, et hæc consentit habitare cum illo, non dimittat illam. Et si qua mulier fidelis habet virum infidelem, et hic consentit habitare cum illa, non dimittat virum: sanctificatus est enim vir infidelis per mulierem fidelem, et sanctificata est mulier infidelis per virum fidelem: alioquin filii vestri immundi essent, nunc autem sancti sunt.”<sup>4</sup> Eximit Apostolus fidelibus scrupulum quoangebantur aliqui de juribus matrimonii erga ethnicos conjuges servandis, eaque docet sancta fieri et legitima, ex fidelis conjugis consortio, quo etiam sæpe contigit ut infidelis ad fidem traduceretur. Filios eorum legitimos et sanctos dicit, ex thoro nuptiali procreatos, et fidelis genitoris studio institutis sanctis imbuendos.

172. Liceat obiter adnotare non temere, absque discrimine, pueros A catholicorum, quos parentes forsitan obtulerint, baptizandos esse: sed probabili spe habita eos catholice educandos, præsertim sponsoribus catholicis id in se suscipientibus. Ita ferunt Romanorum tribunalium decreta, quibus consonat concilii provincialis Baltimorensis primi canon decimus septimus.

173. Id etiam diligenter curandum est, ut Catholici filios suos quamprimum afferant baptizandos, juxta morem ubique in Ecclesia per omnia sæcula commendatum et servatum, plurima enim pericula infantiam obsident. Ideo sanctionibus gravissimis cautum est, in plerisque Europæ diocesisibus, ut id intra paucos dies a nativitate fiat; nec gravi carent culpa qui temere rem adeo necessariam differunt.

(1) Inst. l. iv. c. xvi. n. 9.

(2) Ibidem n. 24.

(3) “The infants of one or both believing parents are to be baptized.” “The efficacy of baptism is not tied to that moment of time wherein it is administered; yet notwithstanding, by the right use of this ordinance the grace promised is not only offered, but really exhibited and conferred by the Holy Ghost, to such (whether of age, or infants,) as that grace belongeth unto, according to the counsel of God’s own will in his appointed time.” Confession of Faith, ch. xxviii. n. 4. 6.

(4) I. Cor. vii. 12.



## CAPUT VII.

## DE MINISTRO BAPTISMI.

174. Baptismum collatum ab hæreticis nihil valere censuit Tertullianus, nisi placeat ejus verba de iis intelligere, qui, mysterio Trinitatis haud agnito, invocationem trium personarum baptizando negligebant. “Hæretici autem,” inquit, “nullum habent consortium nostræ disciplinæ, quos extraneos utique testatur ipsa ademptio communicationis. Non debeo in illis cognoscere quod mihi est præceptum, quia non idem Deus est nobis et illis, nec unus Christus, id est, idem, ideoque nec baptismus unus quia non idem : quem quum rite non habeant, sine dubio non habent.”<sup>1</sup> Agrippinus, Carthaginensis episcopus, ineunte tertio sæculo, iterum baptizandos censuit qui ab hæreticis baptizati fuerant; quæ invaluit in Africa consuetudo, et a S. Cypriano et collegis suis, in pluribus conciliis, decretis firmata est, annis 255, et 256. Re ad Pontificem Romanum delata, S. Stephanus illas conciliorum sanctiones, universalis Ecclesiæ moribus et traditioni adversas, vehementer improbavit, minatus præsules illos sese abstenturum, Ecclesiæ scilicet communione privaturum, si in novitate tuenda perseverarent. Decreti ejus summa in S. Cypriani epistola ad Pompeium exhibetur his verbis : “Si quis ergo a quacumque hæresi venerit ad nos, nihil innovetur, nisi quod traditum est, ut manus illi imponatur ad poenitentiam.”<sup>2</sup> Firmilianus, Cæsareæ in Cappadocia episcopus, eandem ac Cyprianus sententiam tuitus est, acrioribus in Stephanum dictis prolatis. Sunt qui utriusque litteras hac de re supposititias habent, et conciliorum acta, et totam controversiam in quæstionem vocant. Nobis tamen persuasum est Cyprianum, fidei studio, et hæresis odio, in eam sententiam perductum fuisse, ut baptismum ab hæreticis collatum non valere censeret, quamvis scripta ejus Donatistarum fraude vitiata fuisse non possimus non suspicari : licet enim pro humana conditione errore laboraret de re antea haud definita, vix nobis persuadere possumus sanctissimum et mansuetissimum præsulem ea omnia scripsisse quæ illi in hac causa tribuuntur. Liceat igitur nobis cum Augustino hypothetice loqui, quoties de scriptis illis agitur : “illud concilium, vel illa scripta, si vere ipsius sunt, et non, sicut aliqui putant, sub ejus nomine conscripta atque conficta.”<sup>3</sup> Res ad extrema fere devenit :

(1) Lib. de Baptismo. c. xv.

(2) Ep. lxxiv.

(3) Ep. cviii. Argumenta quæ controversiæ et scriptorum authenticæ favent dilucide exposuit nuperrime vir doctissimus Joannes Baptista Palma, in opere cui titulus : “Prælectiones Historiæ Ecclesiasticæ Romæ mdcccxxxviii. Cap. xxviii.

“ vicit tamen pax Christi in cordibus eorum, ut in tali disceptatione nullum inter eos schismatis malum oriretur.”<sup>1</sup> Id animadvertit Augustinus, qui glorioso Cypriani martyrio commemorato, id contigisse dicit, “ ut si qua in ejus lucidam mentem ex humana conditione nebula irrepserat, gloriosa serenitate fulgentis sanguinis fugaretur.”<sup>2</sup>

175. Quamquam Stephanus vetuerit ne baptismus iteraretur, nulla fidei definitio ab ipso edita noscitur, adeo ut controversia nonnisi post ejus mortem fuerit sopita. “ Nondum erat,” inquit Augustinus, “ diligenter illa baptismi quæstio pertractata, sed tamen saluberrimam consuetudinem tenebat Ecclesia, in ipsis quoque schismaticis et hæreticis corrigere quod pravum est, non iterare quod datum est, sanare quod vulneratum est, non curare quod sanum est. Quam consuetudinem, credo, ex Apostolica traditione venientem, sicut multa quæ non inveniuntur in litteris eorum, neque in conciliis posteriorum, et tamen, quia per universam custodiuntur Ecclesiam, nonnisi ab ipsis tradita et commendata creduntur.”<sup>3</sup> Hanc traditionem secuti Arelatensis concilii, anno 314 habiti, patres censuerunt: “ De Afris quod propria lege sua utuntur ut rebaptizent, placuit ut si ad Ecclesiam aliquis de hæresi venerit, interrogent eum symbolum, et si perviderint eum in Patre, et Filio, et Spiritu Sancto esse baptizatum, manus ei tantum imponatur ut accipiat Spiritum Sanctum. Quod si interrogatus non responderit hanc Trinitatem, baptizetur.”<sup>4</sup> Nicænum Concilium Catharos sola manuum impositione suscipiendos decrevit, “ secus de Paulianistis,”<sup>5</sup> quia, uti certiores nos facit Innocentius I., “ Paulianistæ in nomine Patris, et Filii, et Spiritus Sancti minime baptizabant.”<sup>6</sup> Hæc igitur norma est, juxta quam de valore baptismi ab hæreticis collati judicandum erit. Decretis horum conciliorum inhærens, censuit concilium Tridentinum: “ Si quis dixerit baptismum qui etiam datur ab hæreticis in nomine Patris, et Filii, et Spiritus Sancti, cum intentione faciendi quod facit Ecclesia, non esse verum baptismum ; anathema sit.”<sup>7</sup>

176. Fidem Trinitatis non esse necessariam ad valorem baptismi omnino tenendum est, quum Ecclesia semper agnoverit baptismum, dummodo invocatio trium personarum facta sit, consuetis verbis, qua omissa, vel vitiata, verbis quæ sensum mutant, baptismus non fit. Egregius est error Burneti, qui baptismum nullum dicit, ubi christianæ religionis essentia non servatur ; e contra valere si fides articulorum fundamentalium in secta vigeat.<sup>8</sup>

(1) Aug. l. v. de Bapt. contra Donatistas c. xxv.

(2) Ibidem L. i. c. xviii.

(3) Ibidem Lib. II. c. vii.

(4) Can. viii.

(5) Can. xix.

(6) Ep. xxii. ad episcopos Macedoniæ.

(7) Sess. vii. can. iv. de Baptismo.

(8) “ Hence it follows that faith as to the essentials of christianity renders the baptism of the person receiving it valid.” Art. xix. p. 283.

177. Quum a plerisque sectariis baptismus valere censeatur, a quocumque fuerit collatus, saltem si fuerit *ordinatus*, necessarium non videtur principium illud explicatius propugnare, quod quidem totum ad Ecclesiae traditionem et auctoritatem referendum est. Cæterum quædam difficultates solvendæ sunt, ne quis hac in re hæreat.

178. Mandatum baptizandi Apostolis quidem datum est; nec aliis nisi eorum successoribus legitimis, episcopis scilicet catholicis, vel qui ab iis ad sacerdotium evecti sunt, licet illud aggredi munus, extra necessitatem, adeo ut peccent hæretici præcones illud sibi usurpantes. Attamen valet baptismus a quocumque collatus, quia ob ejus summam necessitatem Christus ita statuit, uti ex consuetudine et traditione Ecclesiae didicimus. “Proinde,” uti animadvertit Augustinus, “quamvis hujus rei certe de Scripturis canonicis non proferatur exemplum, earumdem tamen Scripturarum etiam in hac re a nobis tenetur veritas, cum hoc facimus quod universæ jam placuit Ecclesiae, quam ipsarum Scripturarum commendat autoritas; ut quoniam sancta Scriptura fallere non potest, quisquis falli metuit hujus obscuritate quæstionis, eandem Ecclesiam de illa consulat, quam sine ulla ambiguitate sancta Scriptura demonstrat.”<sup>1</sup>

179. Quod ad canones dictos Apostolicos attinet, qui rejiciunt hæreticorum baptismum, Apostolos non habent auctores et hac saltem ex parte nihil valent, quippe qui cum antiqua disciplina et doctrina pugnant. Patres autem nonnulli, ante Ecclesiae definitionem, hæresis odio, baptismo ab iis collato repugnarunt, non satis perspectam habentes totius Ecclesiae consuetudinem. Qui postea scripserunt, vel loquuntur de hæreticis qui *formam* verborum immutarunt, vel de effectibus, gratiæ scilicet donis, quæ prava voluntate hæresi adhærentibus non conferuntur, “quia,” ut ait Augustinus, “ejus effectus atque usus in liberatione a peccatis, et cordis rectitudine apud hæreticos non inveniebatur.”<sup>2</sup>

180. Quæ gratia tribuitur infantibus ab hæreticis baptizatis, vi baptismi, qui Christi est, conceditur: “Est quidem,” ipse loquitur Augustinus, “Christi baptisma, quod ubique sanctum est, et quamvis apud hæreticos, vel schismaticos, ipsius tamen hæresis vel schismatis non est, et ideo nec ad ipsam Catholicam inde venientes oportet denuo baptizare.”<sup>3</sup> Adulti autem suæ voluntatis actu hæresi consentientes, et usurpationi ministerii, nullam gratiam consequuntur, quum pravus eorum animus obstat. Ideo quamvis baptismus haud iterato suscipiendus sit, vehementer tamen doleant necesse est hæreseos quod inierunt consortio; et humili amplectantur animo ea quæ pœnitentibus offert remedia Christi Ecclesia. In ejus gremium olim recipiebantur, ejurata hæresi, manuum impositione quæ

(1) L. i. contra Cresconium c. xxxiii.

(2) L. vi. de Baptismo contra Donat.

(3) Ibidem, l. i. c. xix.

confirmandi ritum quodammodo imitabatur:<sup>1</sup> sicut etiamnum fit apud Græcos: apud nos verò recipiuntur post abjuratam hæresim, emissa fidei professione, et soluto excommunicationis vinculo, quo hæretici et eorum fautores obstringuntur. Hoc specialiter notavimus ne quis sibi licere putet eos excipere ad Sacramentorum consortium, absque prævia absolutione a censuris, eo scilicet prætextu quod *formales* hæretici non fuerint, nam, quum Ecclesia non judicet de occultis, in foro externo nulla habetur ratio theologicæ illius distinctionis, sed omnes habentur hæretici qui in eorum communione versantur.<sup>2</sup> Iis igitur pace Ecclesiæ donatis baptismi gratia datur, absque iteratione sacramenti, adeo ut “idem ipse (*baptismus*) qui propter discordiam foris operabatur mortem, propter pacem intus operetur salutem;” uti de hæreticorum baptismo agens adnotat Augustinus.<sup>3</sup>

181. In Tridentino canone de valore baptismi ab hæreticis collati verba illa, “cum intentione faciendi quod facit Ecclesia,” cuiquam difficultatem facere possent, cæterum “Pius V. definivit verum esse baptisma, quo uterentur Calvinistæ adhibentes formam et materiam institutam a Christo, cum intentione generali faciendi quod Christus instituit; licet errarent in particulari interpretatione, et singulari intentione, ut alii fere omnes hæretici errarunt, vel circa intelligentiam formæ baptismalis, vel circa aliquem ejus effectum: ob id baptizatos ab ipsis Calvinistis, non iterum tingendos sub conditione.” Verba sunt concilii Ebroicensis relata a Benedicto XIV.<sup>4</sup>

182. Cur intentio baptizantis, vel aliud conficientis Sacramentum, requiratur obvia est ratio, ut actus sacramentalis sit, et Christi nomine perficiatur, secus a communibus actibus haud discernendus. Qui parvulum ablueret, dicendo ex pio animi affectu: “abluo te in nomine Patris, et Filii, et Spiritus Sancti;” quin de baptismo cogitaret, haud censendus foret baptizasse. Cæterum satis gravis in scholis agitur controversia, utrum valeat baptismus a ministro collatus, qui exterius se gerens tamquam Christi et Ecclesiæ ministrum, interius sibi proponat adstantibus illudere, et quod Ecclesia facit facere haud velit. Ex Tridentina definitione contra Lutheri errorem, constat intentionem ministri requiri ut valeant Sacramenta; nec enim quæ irrisorie fiunt, et joco, possunt Christi nomine peracta haberi. Sed quando fraus non se prodit, et ex adjunctis, v. g. ex petitione fidelium, actus determinatur, adeo ut nomine Ecclesiæ agere serio videatur, sunt qui cum Juenino censent animum ejus et intentionem, quam

(1) Vide Trombellium de Confirm. dissert. iv. c. ii.

(2) Rejecta est illa distinctio, quatenus forum externum spectat, a supremæ inquisitionis tribunali decreto 19 die Aprilis 1645, quo correptus est quidam, qui ea nixus distinctione quendam e secta Calvinii absolvisset, eo quod “ignarus hæresum et errorum Calvinii non posset dici hæreticus formalis, sed tantum materialis.” Vide adnotationem P. Philippi a Carboneano in Theolog. P. Antoine Tract. de virtutibus Theologicis c. iii. qu. vii.

(3) L. iii. de Bapt. contra Donatistas c. xiii.

(4) De Synodo Diocesana, l. vii. c. vi. § 9.

dicunt *internam* non posse Sacramentum frustrari. Equidem inter damnatas propositiones hæc reperitur: “ Valet baptismus collatus a ministro, qui omnem ritum externum, formamque baptizandi observat, intus verò in corde suo apud se resolvit: non intendo facere, quod facit Ecclesia.”<sup>1</sup> Suam sententiam defendi tamen posse contendit Jueninus, quia potest illa propositio de eo intelligi qui ita agit iis in rerum adjunctis in quibus se Ecclesiæ nomine agere non simulat. “ Ea de causa,” inquit, “ valide non baptizat, qui a nemine postulatus, domi cum expressa SS. Trinitatis invocatione infantem abluit, si intra se resolvat id quod fert propositio de qua agitur, Non intendo facere quod facit Ecclesia.”<sup>2</sup> Cæterum dissimulare non possumus propositionem damnatam iis concipi verbis quæ sententiæ Theologorum, qui *externam* tuentur intentionem, quæ scilicet actu se prodit, simillima sunt; cui proinde grave vulnus illatum Benedictus XIV. meritò dicit.<sup>3</sup> Quum autem hæc insignes habeat vindices,<sup>4</sup> et, Summis Pontificibus consciis, sustineatur, nostrum non est eam improbare; ei scilicet gravissimæ rationes favent, sed auctoritatis pondus aliò inclinat.

183. Episcopi, utpote Apostolorum successores, proprio suo jure sibi munus baptizandi vindicant: sed et presbyteri ad id exercendum, vi suæ ordinationis sunt idonei, quamvis venia seu auctoritate episcopi indigeant. “ Dandi quidem (*baptismum*) habet jus summus sacerdos, qui est episcopus: dehinc presbyteri et diaconi; non tamen sine episcopi autoritate, propter Ecclesiæ honorem, quo salvo, salva pax est.”<sup>5</sup> Ita Tertullianus. Diaconos baptizasse ab ipsis primordiis Ecclesiæ constat, Philippi enim ex primis septem diaconis operâ, Samaritani et eunuchus salutari lavacro renati sunt. Cæterum, ordinis causa, Gelasius Papa, veteri mori inhærens de iis censuit: “ Absque episcopo, vel presbytero, baptizare non audeant.”<sup>6</sup> Hinc diaconis jam non licet baptizare, nisi jubente episcopo, vel parocho, ob magnam necessitatem vel Ecclesiæ utilitatem, uti monet S. Alphonsus de Ligorio. Quandocumque autem diaconis conceditur baptismi administratio, solemni utuntur ritu.

184. Laici urgente necessitate licite baptizant, valide etiam extra necessitatem. Ita juxta Apostolicam traditionem docuit Tertullianus; quum enim episcopis jus vindicasset, honoris causa, subjunxit: “ alioquin etiam laicis jus est: Quod enim ex æquo accipitur, ex æquo dari potest. . . .

(1) Prop. xxviii. inter damnatas ab Alexandro VIII. anno 1690.

(2) Diss. i. de Sacramentis in genere, qu. v. obj. 4. Drouen dicit “ Non nostra, sed prava Lutheri doctrina, quam imprudenter Belgæ quidam Theologi in hæreticarum provinciarum vicinia renovaverant, Romanæ inquisitionis decreto petita est.” De Re Sacramentaria l. i. c. iii. § ii. prob. quinta.

(3) L. vii. de Synodo c. iv.

(4) Plurimos recenset Drouen in opere supra laudato: *De Re Sacramentaria*, l. i. c. iii. § 2.

(5) Tertullianus Lib. de Baptismo c. xvii.

(6) Ep. ad Episcopos per Lucaniam et Brutios et Siciliam constitutos.

Baptismus æque Dei census ab omnibus exerceri potest.”<sup>1</sup> Monet tamen ne id extra necessitatem fiat: “Sufficiat scilicet in necessitatibus utaris, sicubi aut loci, aut temporis, aut personæ conditio compellit. Tunc enim constantia succurrentis excipitur, cum urget circumstantia periclitantis: quoniam reus erit perditioni hominis si supersederit præstare quod potuit.”<sup>2</sup> Mulieribus negare videtur hanc facultatem;<sup>3</sup> sed intelligendus est extra necessitatis casum, illas scilicet plerumque minus decet munus hoc sacrum. Hieronymus ei concinit: “Baptizare, si necessitas cogat, scimus etiam licere laicis.”<sup>4</sup> Concilium Eliberitanum censuit: “Peregre navigantes, aut si Ecclesia in proximo non fuerit, posse fidelem, qui lavacrum suum integrum habet, nec sit bigamus, baptizare in necessitate infirmitatis positum catechumenum.”<sup>5</sup> Quas dotes exegit concilium in baptizante, scilicet ut lavacrum suum integrum haberet, nullo maculatus crimine quod pœnitentia luendum esset, et ut plusquam semel matrimonium non inierit, hujusmodi præ cæteris, qui forsitan adessent, debere sacro munere fungi indicat, quin neget quemcumque, si talis præsto non foret, posse id facere, uti recte adnotat Alaspinaeus.”<sup>6</sup> Gelasius Pontifex agnovit laicis id licere: “quod et laicis Christianis facere plerumque conceditur.”<sup>7</sup> Imo baptisma “a quocumque rite collatum proficit ad salutem,” uti docuit Nicolaus I. respondens ad consulta Bulgarorum, et constat ex Lateranensis IV. concilii decreto, cui consonat Eugenii instructio: “etiam paganus et hæreticus baptizare potest.”

185. Antiquissimum esse morem agnovit Calvinus: “Quod autem multis ab hinc sæculis adeoque ab ipso fere Ecclesiae exordio, usu receptum fuit, ut in periculo mortis laici baptizarent, si minister in tempore non adesset, non video quam firma ratione defendi queat.”<sup>8</sup> Presbyteriani Calvinum sequi, quam totam antiquitatem venerandam maluerunt, et baptismum æque ac cœnam nonnisi a ministris verbi divini rite ordinatis ministrari posse contendunt;<sup>9</sup> sibi de sua ordinatione illudentes. Episcopaliani in contrarias abeunt sententias.<sup>10</sup>

(1) Lib. de Baptismo c. xvii.

(2) Ibidem.

(3) Id absolute affirmatur in opere: “A Compendium of Christian Antiquities, by Rev. C. S. Henry; Philadelphia, 1837.” Burnetus fatetur in antiqua Ecclesia mulieribus in necessitate baptizare permissum. Analysis article xxvii. p. 477.

(4) Contra Luciferianos.

(5) Can. xxxviii.

(6) Cit. a Juenino Diss. ii. de Baptismo, qu. vi. c. ii. art. ii.

(7) Ep. ad universos episcopos c. vii.

(8) In Antidoto adv. Conc. Trid. Sess. vii. can. x.

(9) Confession of faith, ch. xxvii. n. iv. “neither of which may be dispensed by any, but by a minister of the word lawfully ordained.”

(10) Vide A dictionary of the Church, by Rev. Wm. Staunton, New York, 1839, art. Lay Baptism.

## CAPUT VIII.

## DE CHARACTERE.

186. Cum illa quam de baptismo ab hæreticis collato controversia retulimus, connexa est alia de charactere baptizatis impresso, ideo quippe iterandus baptismus non erat quia anima charactere quodam insignita erat, qui deleri non poterat. Quum anima partibus careat, charactere de quo loquimur “spirituale quoddam signum,” intelligendum est, prout docet Eugenius Pontifex, “a cæteris distinctivum et indelebile,”<sup>1</sup> scilicet quo baptizatus ab eo qui non recipit baptismum, reipsa, et coram Deo distinguitur, quodque maneat, numquam delendum. Tribus Sacramentis characterem hunc imprimi docet Ecclesia, anathemate in contra dicentes lato: “Si quis dixerit in tribus Sacramentis, baptismo scilicet, confirmatione, et ordine non imprimi characterem in anima, hoc est, signum quoddam spirituale et indelebile, unde ea iterari non possunt, anathema sit.”<sup>2</sup>

187. Character baptismo impressus a Patribus Ecclesiæ prædicatur, utique juxta traditionem ab Apostolis derivatam. “Nemo te,” inquit S. BASILIUS, “quarum,strarum, an adversarii, partium sis, noverit, nisi mysticis signis familiaritatem præteferas, nisi signatum sit super te lumen vultus Domini. Nisi characterem in te agnoscat angelus, quonam modo pro te pugnabit, aut ab inimicis vindicabit?”<sup>3</sup> S. AUGUSTINUS confert baptismi characterem cum nota corporibus militum olim inusta: “An forte minus hærent sacramenta christiana quam corporalis hæc nota, cum videamus nec apostatas carere baptismo, quibus utique per pœnitentiam redeuntibus non restituitur, et ideo amitti non posse judicatur?”<sup>4</sup> Alio in loco dicit: “Satis eluxit pastoribus Ecclesiæ catholicæ toto orbe diffusæ, per quos postea, plenarii concilii autoritate, originalis consuetudo firmata est, et ovem quæ foris errabat, et Dominicum characterem a fallacibus deprædatoribus suis foris acceperat, venientem ad christianæ unitatis salutem, ab errore corrigi, a captivitate liberari, a vulnere sanari, characterem tamen Dominicum in ea agnosci potius quam improbari: quandoquidem ipsum characterem multi et lupi et lupis infigunt.”<sup>5</sup>

188. Hujus characteris insigne argumentum est perpetua Ecclesiæ universalis consuetudo, pluribus conciliorum decretis firmata, juxta quam

(1) Decrete ad Armenos.

(2) Sess. vii. can. ix.

(3) Hom. xiii. in S. Baptisma.

(4) L. ii. contra epist. Parmeniani c. xiii.

(5) L. vi. de Baptismo contra Donat. c. i.



baptismus numquam iteratur: nulla enim alia idonea hujus consuetudinis ratio adsignari potest, quum videretur oportere iterum abluere qui peccati sordibus se inquinaverat. Dicit Burnetus, Anglicanus, ideo non iterari baptismum, quia semel Deo dicatus homo, debet semper eadem conditione æstimari, donec totali apostasia defecerit.<sup>1</sup> Sed si valeat ratio, saltem iterum baptizandus foret qui ad Mahumetanos, vel Ethnicos defecisset, et deinceps facti pœnitens, consortium Christianorum et jura peteret: quem tamen nefas est undis lavacri tingere.

189. Patet igitur temere et falso characteris notionem ab Innocentio III., qui nonnisi ineunte decimo tertio sæculo cathedram Petri tenuit, primum excogitatam dici: nec enim rem novam tradidit Pontifex, sed notissimam Ecclesiæ doctrinam singulari accommodavit casui. Quærebatur utrum qui in amentia, aut lethargo correpti, abluti fuerint ritu baptismali, habendi essent baptizati. Respondit nihil valere ritum si præviam non habuerint voluntatem baptismi suscipiendi, dum sui essent compotes; valere si jam desideraverint baptismum: “Tunc ergo,” inquit, “characterem sacramentalis imprimit operatio, cum obicem voluntatis contrariæ non invenit obsistentem.”<sup>2</sup> Ex quo Pontificis responso colligitur baptizandos non esse, etiam in mortis discrimine, eos qui nullum suæ voluntatis indicium præbere possunt, si contraria voluntas ex prævia eorum agendi et loquendi ratione colligatur: baptizandos e contra, eos quorum prævia voluntas fuerit declarata. Quoties autem de voluntate non constat, ex indiciis verosimile judicium efficitur, et benignior plerumque in extremo vitæ periculo anteferenda est sententia, ut quantum possumus periclitanti salute subveniamus. Qui autem nullo vitæ suæ tempore fuerunt sui compotes, infantium instar habentur, ideoque recte abluuntur aqua, ut sanguine Christi ab originis labe mudentur.

(1) Analysis Art. xxv. p. 417.

(2) Cap. Majores, l. iii. Decret. tit. xlii.



## CAPUT IX.

## DE CÆREMONIIS.

190. Tota Baptismi essentia in actu baptizantis est, ablutione facta in nomine trium personarum divinarum. Attamen consue plurimi adhiberi ritus prævii, nonnulli etiam postea, qui magnæ sui quitatis, et plurima præbent adstantibus documenta.

191. Tertulliani ætate, sæculo secundo exeunte, Paschatis et costes tempora solemni baptismi administrationi dicata sunt, quem ab Apostolis derivatum esse Leo Magnus testatus est. “Diem baptismi solemniorem,” inquit Tertullianus, “Pascha præstat; cum et Domini, in quam tinguimur, adimpleta est.” . . . “Exinde Pen ordinandis lavacris latissimum spatium est. . . . Cæterum omni Domini est, omnis hora, omne tempus habile baptismi: si de soler interest, de gratia nihil refert.”<sup>1</sup> Orientales in Epiphania etiam sole baptizabant. Morem hunc in adultorum baptismate retineri, vel non omnino prætermitti, præcipue in Metropolitanis aut cathedralibus Ecclesiis, cupit Rituale Romanum.

192. Ubique ab initio baptismus administrabatur, sed fide jam erecta sunt Baptisteria prope Ecclesias cathedrales, postea etiam parochiales, ut ibi baptismus conferretur. Romæ prope Ecclesiam ranensem Baptisterium adhuc extat. Monet Rituale Romanum: “sitate excepta, in privatis locis nemo baptizari debet.”

193. Aqua ab antiquissimis temporibus solemni ritu consuevit consecrari, ut sanctitas Sacramenti, et gratia significaretur. “Consecramus,” Basilii, “aquam baptismatis et oleum unctionis, præterea ipsum qui baptismum accipit: ex quibus scriptis? nonne a tacita secretaque traditione? Hinc Augustinus contra Donatistas vindicans Sacramenta quæ ab in ministris contigerit ministrari, ait: “Quomodo aquam mundat et sanctificat homicida? Quomodo benedicunt oleum tenebræ? Si autem adest Sacramentis et verbis suis, per qualeslibet administrantur, et sacramenta Dei ubique recta sunt.”<sup>2</sup> Et inferius: “Si ergo ad hoc valde dictum est in Evangelio, ‘*Deus peccatores non audit,*’ ut per peccatores

(1) Lib. de Baptismo c. xix.

(2) Lib. de Spiritu Sancto c. xxvii.

(3) L. v. de Bapt. contra Donatistas c. xx.

sacramenta non celebrentur: quomodo exaudit homicidam deprecantem, vel super aquam baptismi, vel super oleum, vel super Eucharistiam, vel super capita eorum quibus manus imponitur? Quæ omnia et fiunt, et valent, etiam per homicidas, id est per eos qui oderunt fratres, etiam in ipsa intus Ecclesia.”<sup>1</sup> In Apostolicis constitutionibus, quæ veterem exhibent disciplinam, habetur ritus aquam consecrandi.<sup>2</sup> Cæterum ipsa aquæ consecratio ad sollemnitatem ritus pertinet, quæ graviter quidem iungitur, quamvis ad substantiam Sacramenti non spectet.

194. Dum consecratur aqua solemniter, eam tangit Sacerdos, et in modum crucis dividens, ut virtutem a Christo crucifixo derivari significet, in quatuor partes effundit, ut gratiam quam Christus nobis promeritus est, in universum orbem diffundi declaret. Mergit cereum, ut Spiritus Sancti virtutem aquis communicari ex eo quod Christus in Jordanem descenderit, innuat. Insufflat, ritu pervetusto, cujus in Christo Domino Apostolis aspirante, exemplum videre est; qua ratione significatur divinum Spiritum, Satanæ potestate compressa, vim mundandi animam aquis impertiri. Chrismatis admixtio fit, ut Spiritus Sancti gratia indicetur:<sup>3</sup> qui finis totius est ritus, ut intelligatur aquas natura sua non habere virtutem sanctitatem impertiendi, sed eam a Christo derivare, cujus meritis et instituto fit ut ex aqua et Spiritu Sancto renascamur. Gnostici, referente Irenæo, ritum quemdam haud absimilem suis asseclis peragebant; sed “profanis dictionibus,” a quibus abhorremus.<sup>4</sup>

195. Sponsores a Tertulliano memorantur, adeo ut mos antiquissimus sit. Ii adultorum dotes testabantur, ut ad baptismum admitterentur, et eos edocendi, iisque invigilandi munus suscipiebant: quod adhuc viget; sed falluntur Episcopaliani nonnulli, illud ad valorem baptismi spectare putantes.

196. Ante fores Ecclesiæ sistebant se baptizandi, veluti ingressus facultatem petentes. Dabant suum nomen,<sup>5</sup> *competentes* inde vocati quod baptismum peterent. In baptismo nomina “sanctorum virorum qui virtutibus fulserunt,”<sup>6</sup> suscipiebant, pro nominibus Ethnicis: qui mos nobis imitandus omnino proponitur in Rituali Romano.

197. Scrutinia plura fiebant baptizandorum statis diebus, ut eorum exploraretur voluntas. Ante baptismum Paschalem septem habebantur scr-

(1) L. v. de Bapt. contra Donatistas c. xx.

(2) Id fatetur Staunton in compendio antiquitatum christianarum, quod jam citavimus. Book 4, ch. i. § 148.

(3) Ridendos se præbuerunt Presbyteriani, ante paucos annos, in cœtu generali de baptismi valore a Catholicis collati dubitare se profitentes, eo quod oleo baptizemus.

(4) L. i. adv. hæc. c. xviii.

(5) Conc. Carthag. iv. an 398. Aug. in lib. de cura pro mortuis.

(6) S. Joannes Chrysostom. hom. xxi. in Gen.

tinia, tria feriis secunda, quarta, et Sabbato primæ hebdomadis Quadragessimæ, tria alia iisdem feriis quartæ hebdomadæ, et ultimum Sabbato Sancto. Tria tantum præcedebant baptismo, qui in Vigilia Pentecostes administrabatur.<sup>1</sup> Hæc jam non servantur, quum propagata fide christiana fere, omnes in infantia baptizentur. Ministrorum igitur prudenti arbitrio permittitur, ut privatis documentis et pietatis exercitiis candidatos parent.

198. Vetustissima est consuetudo Satanæ et angelis ejus ante baptismum renuntiandi, et fidem profitendi, quæ plerumque fiebant scrutiniorum occasione. Jam Tertulliani ætate mos erat receptus, ex traditione Apostolica, uti testatur, derivatus: “aquam adituri . . . aliquanto prius in Ecclesia sub antistitis manu contestamur nos renuntiare diabolo, et pompæ, et angelis ejus.”<sup>2</sup> De fidei professione constat ex documentis antiquissimis, eamque a sponsoribus nomine parvulorum fieri testatur Augustinus: “respondetur fidem habere propter fidei Sacramentum, quia et ipsa responsio ad celebrationem pertinet Sacramenti.”<sup>3</sup> Hæc adhuc vigent.

199. De exsufflationibus agit S. Cyrillus Hierosolymitanus;<sup>4</sup> et ex iis contra Pelagianos argumentum derivavit Augustinus, adeo receptus erat ritus in tota Ecclesia, a prima antiquitate christiana. Quum Pelagius Manicheismi incusaret doctrinam de originis peccato, questus est Augustinus quod “antiquissimam Ecclesiæ traditionem isto nefario crimine aspergat, qua exorcizantur, et exsufflantur parvuli, ut in regnum Christi a potestate tenebrarum, hoc est, diaboli et angelorum ejus, eruti transferantur.”<sup>5</sup>

200. Signo crucis pluries signabantur catechumeni, iisque manus imponebatur, prout testatur Augustinus, quos ritus haud sine fructu peragi merito dixit. “Non unius modi est sanctificatio: nam et catechumenos secundum quemdam modum suum per signum Christi, et orationem manus impositionis puto sanctificari: et quod accipiunt, quamvis non sit corpus Christi, sanctum est tamen, et sanctius, quam cibi quibus alimur, quoniam sacramentum est.”<sup>6</sup> Latius hac voce utitur, de sale, quod veluti sapientiæ symbolum catechumenis dabatur, loquens, prout de se catechumeno alias testatur: “signabar jam signo crucis ejus, et condiebar ejus sale.”<sup>7</sup>

201. Pulchre explicat auctor libri de Sacramentis, qui diu adscriptus

(1) Vide Trombelli tom. i. de bapt. diss. v. p. 244.

(2) Lib. de corona militis c. iv. Vide etiam lib. de spectaculis.

(3) Ep. olim xxiii. nunc xcvi. ad Bonif.

(4) Catech. ii. n. 3.

(5) L. ii. de nuptiis et conc. c. xix.

(6) L. ii. de pecc. meritis et remiss. c. xxvi. n. 42.

(7) Confess. l. i. c. xi.

est, Ambrosio ritum signandi saliva aures et nares, qui licet haud usurpatus apud Græcos in Latina Ecclesia perantiquus est: “ Quid egimus sabbato? nempe apertionem: quæ mysteria celebrata sunt? apertionis, quando tibi aures Sacerdos tetigit et nares: quod significat in Evangelio Dominus, dum ei oblatus esset surdus et mutus, et tetigit aures et os ejus; aures quia surdus erat, et os quia mutus, et ait. ΕΡΗΡΗΤΑ, quod Hebraicum verbum est, et dicitur, ‘ adaperire;’ ideo ergo tibi sacerdos aures tetigit . . . quare nares? ut bonum odorem accipias pietatis æternæ, ut dicas, Christi bonus odor sumus, quemadmodum dicit sanctus Apostolus, et sit in te fidei et devotionis plena fragrantia.”<sup>1</sup> Vides quantam habeat significationem ritus quem vulgò irrident Protestantes.

202. Ungebantur toto corpore catechumeni apud Græcos et Orientales, prout constat ex Cyrillo Hierosolymitano,<sup>2</sup> et Chrysostomo,<sup>3</sup> et ex Græcorum Euchologiis. In Sacramentario quod dicitur S. Gregorii M., scapularum et pectoris, prout nunc fit apud nos, unctio præscribitur. Significationem hujus ritus explicat Innocentius III: “ baptizandus in pectore inungitur, ut per Sancti Spiritus donum, abjiciat errorem et ignorantiam, fidem rectam suscipiat, quia justus ex fide vivit; inter scapulas autem inungitur, ut per Spiritus Sancti gratiam excutiat negligentiam et torporem, et bonam operationem exerceat; quia fides sine operibus mortua est; ut per fidei Sacramentum sit munditia cogitationum in pectore, et per operis exercitium fortitudo laborum in scapulis, ut per dilectionem operetur.”<sup>4</sup> Constat unctionem, in Scripturis Spiritus Sancti gratiam designare: “ Et vos unctionem quam accepistis ab eo maneat in vobis.”<sup>5</sup>

203. Chrismate post baptismum in capitis vertice unctio antiquus est ritus, qui in vetusto Sacramentario Romanæ Ecclesiæ reperitur,<sup>6</sup> et ab Ambrosio in libro de Sacramentis commemoratur.<sup>7</sup> Videtur inductus quando episcopo haud præsentem, impositio manuum cum chrismatis unctione in fronte fieri non poterat. Retinetur autem adhuc apud Catholicos.

204. Candida veste induebantur neophyti in puritatis indicium, prout memorat Ambrosius.<sup>8</sup> Linteolum candidum ejus loco capiti nunc imponitur.

(1) L. i. de Sacr. c. i.

(2) Catech. myst. ii.

(3) Hom. vi. in ep. ad Coloss.

(4) Cit. a S. Thoma Aquin. iii. p. qu. 66. art. 10 ad 2.

(5) I. Joan. ii. 27.

(6) III. lib. Sacr. Rom. Eccl. l. i. § 44 apud Thomasium t. vi. operum.

(7) L. ii. de Sac. c. vii. p. 24.

(8) L. de his qui initiantur, c. vii.

205. *Cereus ardens* ponebatur in manibus, cujus significationem pulchre declarat S. Gregorius Nazianzenus: “Lampades quas accendes,” inquit, illius luminum gestationis figuram gerunt, cum qua splendidæ et virgines animæ splendidis fidei lampadibus Christo sponso obviam prodibimus.”<sup>1</sup> Ritus apud nos viget.

206. Lac et mel Neophytis dabantur in Latina Ecclesia, testante Tertulliano: “inde suscepti lactis et mellis concordiam prægustamus.”<sup>2</sup> Quædam Ecclesiæ alios ritus moresque his adjiciebant, sed hi fere omnes per totam servabantur Ecclesiam.

207. Rituum quos recensuimus veluti compendium in Rituali Romano exhibetur, scilicet quæ diversis temporibus fiebant, in scrutiniis, simul collecta adhuc peraguntur, minus solemni tamen ratione. In hac igitur re venerandam antiquitatem sequimur, sectis plerisque ne umbram quidem solemnioris illius ritus retinentibus. Jactant Episcopaliani se esse antiquitatis cultores; sed qui velit eorum ritus cum veteribus conferre, videbit eos toto distare cælo. Ipsum crucis signum de quo scribit Augustinus: “non sine causa signum suum Christus in fronte nobis figi voluit . . . ne Christi opprobrio Christianus erubescat,”<sup>3</sup> vix ausi sunt Anglicani ex omnibus ritibus retinere, semel tantum post baptismum faciendum, magno studio conantes suis eximere ea de re scrupulum;<sup>4</sup> qui autem Anglicanis adhærent Episcopaliani harum provinciarum unicum illum ritum eorum qui baptizandos offerrent pueros permiserunt arbitrio!<sup>5</sup>

208. Ex his quæ retulimus liquet baptismi ritus esse vetustissimos, et plerosque ab Apostolica ætate derivatos. Eos etiam eo fine peragi liquet ut Christi Domini res gestæ, et fidei mysteria una cum christiani hominis officiis memoriæ adstantium commendentur, et mentibus altius infigantur: quamobrem curandum est sacerdotibus ut eos accurate expleant, et data occasione explicant, nec enim absque piaculo prætermittuntur, vel a baptismo separantur, nisi gravis admodum urgeat causa. Oxonienses jam plorant suorum temeritatem, qua omnes fere ritus sacri derelicti sunt, magnumque

(1) Orat. in S. bapt.

(2) L. de corona militis c. iii.

(3) In Ps. xxx. conc. 3.

(4) “To take away all scruple concerning the use of the sign of the cross in Baptism, the true explication thereof; and the just reasons for the retaining it, may be seen in the xxxth canon, first published in the year mdciv. Rubric of the Book of Common Prayer of the Church of England.”

(5) “If those who present the infant shall desire the sign of the cross to be omitted, although the church knows no worthy cause of scruple concerning the same, yet, in that case, the Minister may omit that part of the above which follows the immersion.” Rubric of American Book of Common Prayer.

in eo ponunt studium ut antiquitatem et utilitatem Ritualis Catholici vindicent.<sup>1</sup>

(1) Ne hæc gratis affirmare videamur, legatur tractatus 34, vol. i. Rites and customs of the Church. Plurimos fuisse ritus Ecclesiæ primitivæ dicit: "the multitude of rites, which were in use in the Primitive Church." Quæ ex Scriptura adducit testimonia in quibus ad ritus fit allusio, sufficere censet ut totam rituum disciplinam, qualis in scriptis veterum reperitur, amplectamur: "These instances . . . are surely sufficient to reconcile us to the complete ritual system which breaks upon us in the writings of the Fathers." Si quid scripturis manifesto adversum occurrat, rejiciendum fatetur, secus cum magna veneratione suspiciendum: "till this is shown, we are bound to venerate what is certainly primitive, and probably is apostolic." Addit ritus plerosque eo destinari, ut scripturæ testimonia veluti referantur: "It will be remarked, moreover, that many of the religious observances of the early Church are expressly built upon words of Scripture, and intended to be a visible memorial of them." . . . "Accordingly, from the frequent mention of *oil* in Scripture as the emblem of spiritual gifts, (Is. lxi. 1—3, &c.) it was actually used in the Primitive Church in the ceremony of admitting Catechumens, and in baptizing. . . . And so from the figurative mention of *salt* as the necessary preparation of every religious sacrifice, it was in use in the Western Church, in the ceremony of admitting converts into the rank of catechumens." . . . "As a whole the Catholic ritual was a precious possession."



# TRACTATUS X.

## DE CONFIRMATIONE.

---

### PRÆNOTANDA.

1. Secundum Sacramentum dicitur *confirmatio*, quia eo roborantur fideles virtute et gratia Spiritus Sancti, ut fidem firmiter teneant, et intrepide profiteantur, omnia pati parati potius quam Christo vel ejus doctrinæ renuntiare. Definiri solet Sacramentum novæ legis a Jesu Christo Domino nostro institutum, in quo impositione manuum episcopi cum oratione, Spiritum Sanctum accipimus, ut fortes perfectique Christi discipuli efficiamur. De illa manuum impositione imprimis agendum duximus, deinceps de chrismate inunctione, quæ fit in hujus Sacramenti administratione, sermonem habituri. Nomen *confirmationis* apud S. Ambrosium reperitur,<sup>1</sup> et in Sacramentario quod Gregorii Magni vocatur, ideoque satis antiquum est. De aliis ejus nominibus ex dicendis sat innotescet.

2. Novatiani, sui ducis exemplum secuti, signari chrismate, scilicet confirmari neglexerunt. Ex Arianis qui Apollinarium magistrum errorum habuerunt, Spiritus Sancti impugnantes honorem, dona ejus in Sacramento haud agnoverunt. Albigenses errasse hac de re a nonnemine censentur : ab aliis vindicati. Waldenses veteres professi sunt istud observatum fuisse temporibus Apostolorum : posteriores assensi sunt Protestantibus, fœdere cum iis, anno 1532, inito. Wickleffus minus recte de eo sensit : Lutherus palam impugnavit. Calvinus ejus pressit<sup>4</sup> vestigia : attamen ritus vetusti ut redderet rationem, nec enim diffitetur eum viguisse in Ecclesia, ait : " Qui baptizati erant infantes, quia fidei confessione apud Ecclesiam tunc defuncti non erant, sub finem pueritiæ, aut ineunte adolescentia repræsen-

(1) In lib. de *Mysteriis* c. vii.



tabantur iterum a parentibus, ab episcopo examinabantur secundum formulam catechismi, quam tunc habebant certam ac communem. Quo autem hæc actio, quæ alioqui gravis sanctaque merito esse debebat, plus reverentiæ haberet ac dignitatis, cæremonia quoque adhibebatur manuum impositionis. Ita puer ille, fide sua approbata, cum solemnibus benedictionibus dimittebatur.<sup>1</sup> Hæc præ oculis habuisse videntur Anglicani, dum ritum confirmationis præscriberent. Pueros aliosve fidei præcipua mysteria edoctos episcopo sistendos jubent, qui ei interroganti respondent se sua sponte renovare sponsiones suo nomine in baptismo factas. Deinceps episcopus orationem fundit, quæ ex Pontificali Romano, aliquibus mutatis et adjectis, desumpta est. Manus singulis deinceps imponit, precans ut Dominus hunc puerum suum gratia cœlesti defendat, ut in perpetuum illius sit, et quotidie Sancto Spiritu augeatur. Orationem Dominicam cum duabus aliis orationibus postea recitat, et illis benedicit. Attamen scriptores aliqui Anglicani et qui eos in hac regione sequuntur Episcopaliani, Catholicorum fere more, de hoc Sacramento loquuntur.<sup>2</sup> Leibnitius Catholicis hac in re assensus est: Daub et Fessler inter recentiores scriptores Protestanticos illud agnoscunt. Rosenmüller post Eichhornum Apostolorum res gestas explicat ratione quæ Catholicis favet. Baptistæ manuum impositionem inter Christi instituta recensent, eamque fieri docent ad gratiam Spiritus Sancti communicandam.<sup>3</sup>

(1) Inst. l. iv. c. xix, n. 4.

(2) "Confirmation is the perfection of baptism. The HOLY GHOST descends invisibly upon such as are rightly prepared to receive such a blessing, as at the first He came visibly upon those that had been baptized." Bishop Wilson's Meditations on his sacred office; Oxford Tracts, Vol. 1. No. 62. Oxonienses insinuant fidem de gratia hujus ritus, sicut et de absolutione et ordinatione, in sua secta orali traditione servatam! "Some (*doctrines*) have been retained by oral tradition, and maintained by her uniform spirit of deference to the early Church, whose hallowed lamp she carries on, and whose handmaid she is. Such, for instance, is her view of the spiritual benefits of absolution and confirmation, or the spiritual gifts in ordination, which are assumed to be great and real where these ordinances are duly and worthily received; but what they are, is not dogmatically enunciated, being presupposed as already known, through the successive teaching of her Ministers." Oxford Tracts, Vol. IV. No. 81.

(3) In fidei confessione quam adoptarunt Baptistæ in cœtu generali, Philadelphiæ, Sept. 25, 1742, cap. 31 hæc reperiuntur—"We believe that *laying on of hands* (with prayer,) upon baptised believers as such, is an Ordinance of Christ, and ought to be submitted unto by all such persons that are admitted to partake of the Lord's Supper, and that the end of this ordinance is not for the extraordinary gifts of the Spirit, but for a farther reception of the Holy Spirit of promise, or for the addition of the graces of the Spirit, and the influences thereof; to confirm, strengthen and comfort them in Christ Jesus; it being ratified and established by the extraordinary gifts of the Spirit in the primitive times, to abide in the Church as meeting together on the first day of the week was that being the day of worship, or Christian Sabbath, under the Gospel, and as preaching the word was, and as baptism was, and prayer was, and sing-

3. Concilium Tridentinum Sacramentum hoc contra novatorum argutias ut defenderet, hunc edidit canonem : “ Si quis dixerit confirmationem baptizatorum otiosam cæremoniam esse, et non potius verum et proprium Sacramentum, aut olim nihil aliud fuisse, quam catechesim quamdam qua adolescentiæ proximi fidei suæ rationem coram Ecclesia exponebant, anathema sit.”<sup>1</sup>

ing psalms &c. was, so this of laying on of hands was. For as the whole gospel *was confirmed by signs and wonders, and divers miracles and gifts of the Holy Ghost in general, so was every ordinance in the like manner confirmed in particular.*”

(1) Sess. vii. Can. i. de Confirm.

## CAPUT I.

## DE SACRAMENTO.

## PROPOSITIO.

*Confirmatio est verum ac proprium Sacramentum.*

*Probatur I. ex Scripturis.*

4. Post relatam Samaritarum ad fidem conversionem pergit Lucas : “ cum autem audissent Apostoli, qui erant Jerosolymis, quod recepisset Samaria verbum Dei, miserunt ad eos Petrum et Joannem. Qui cum venissent, oraverunt pro ipsis, ut acciperent Spiritum Sanctum : nondum enim in quemquam illorum venerat, sed baptizati tantum erant in nomine Domini Jesu. Tunc imponebant manus super illos, et accipiebant Spiritum Sanctum.”<sup>1</sup> Liquet illam manuum impositionem fuisse Apostolici ministerii munus, quod Philippus peragere non valebat ; quo tamen indigebant fideles, ut Spiritu Sancto roborarentur, ejusque augerentur donis. Nisi de munere Apostolico ageretur, nulla fuit ratio cur Apostoli iter susciperent, ut illud obirent, nec potuerunt tanta cum fiducia manus imponere et orare, veluti Spiritus Sancti dona eo ritu certò impetraturi. Quod autem suo veluti arbitrio, nulla accepta a Christo Domino potestate, et jussione, id sibi proposuerint, ut manuum impositione cum prece conjuncta Spiritum Sanctum fidelibus impetrarent, nemo poterit cogitare absque gravi ipsorum injuria. De gratia divini illius Spiritus, qua homines christiani justitiæ et sanctitatis majoribus donis augentur, eo loci agi constat ; nam charitas, imprimis in cordibus nostris diffunditur per Spiritum Sanctum, cujus templum efficiuntur in quibus habitat. Renati quidem erant fideles illi baptismo ex aqua et Spiritu Sancto, sed nondum in quemquam illorum venerat, præsentiam suam muneribus amplioribus et donis manifestaturus.

5. Habentur eo loci omnia quæ ad Sacramenti essentiam requiruntur ; est enim ritus externus, manuum scilicet impositio cum oratione : gratia Spiritus Sancti eo confertur : qui effectus ritui illi non potuit sola Apostolorum voluntate alligari ; alligatum tamen fuisse constat, tum ex certa fiducia qua eum peregerunt Apostoli, ut Spiritum Sanctum fidelibus communicarent, tum ex itinere, eo consilio, suscepto, Apostolis omnibus, qui Hierosolymis tunc forte aderant, auctoribus.<sup>2</sup> Igitur res erat omnibus

(1) Act viii. 14.

(2) “ Licet id eis in itinere suscipiendo consilii fuisse diserte non affirmetur, legimus tamen, eosdem post adventum statim preces Deo adhibuisse, ut Spiritus Sancti dona impertiret Samaritanis. Tum ad transitum in cœtum christianorum non solum baptisma

explorata Spiritus Sancti gratiam sic dari, eamque fidelibus omnibus, baptismo renatis, esse communicandam. Christus igitur ita statuuisse censendus est; nec enim alius quisquam potuit tantam virtutem ritui alicui indere.

6. Insigne etiam exemplum alio loco refertur. Paulus cum Ephesum venisset, quosdam invenit discipulos: "dixitque ad eos: Si Spiritum Sanctum accepistis credentes?"<sup>1</sup> Liquet igitur fidelibus omnibus illud muneris dari consuevisse, et Apostolum maxime sollicitum fuisse, ne quis eo careret. Quomodo autem daretur, postea declaratur: postquam scilicet baptismum Christi nomine susceperant, antea enim nonnisi Joannis baptismo abluti fuerant, "cum imposuisset illis manus Paulus, venit Spiritus Sanctus super eos, et loquebantur linguis, et prophetabant."<sup>2</sup> Manuum igitur impositione dabatur Spiritus Sanctus, nec forte fortuna, sed certo rei effectum: nam ideo eum peregit ritum Paulus, tamquam effectum indubitata fiducia expectans. Quod autem linguarum dono et prophetia Spiritus Sancti præsentia adstantibus facta sit manifesta, contigit benignissimo Dei consilio, ut ritus effectus interiores, in rei christianæ exordiis, innotescerent, externis illis donis comprobati. Spiritus Sanctus datus est imprimis procul dubio ad animam Deo gratiorem reddendam, et firmiorem contra dæmonis impetus, sed adstantibus innotuit, miris quæ omnibus patuerunt donis.<sup>3</sup> Res illæ gestæ plane denotant munus ministerii, quod peregerunt Apostoli Christi nomine, quodque susceperunt fideles universi, gratia Spiritus Sancti ea ratione aucti et roborati.

7. Dubitari non potest munus illud quod obierunt Apostoli erga fideles omnes absque discrimine, ad Apostolicum ministerium spectare, ideoque

requirebatur, sed (observante Eichhornio in Allg. Bibl. T. iii. p. 409 et seq.) Apostoli rem jam sic instituisse videntur, ut baptismum et institutionem sequeretur sollemnis manuum impositio. Vib. Heb. vi. 2. Rosenmüller in loc.

(1) Act. xix. 2.

(2) Ibidem 6.

(3) In dialogo quem Oxonienses ediderunt, colloquii instar inter Joannem Evans et Doctorem Spencerum, parochum suum, ut dicunt, res feliciter exhibetur. Hic ait: "When the doctrine of the HOLY GHOST, and of his inward influence, was new to the world, it pleased God to confirm it, and to show that the influence was real, by permitting, in some cases, those on whom it descended to perform works which they could not have done, had not God been with them. Thus the real importance, even then, of these miraculous gifts consisted in their bearing witness to the inward and unseen ones which God still showers upon his Church." Reponit Joannes; "And which we dare not suppose to have ceased, merely because the outward signs of them did, when God himself had promised that they should last for ever." Subjungit doctor, seu Parochus Anglicanus: "Well; the promise of support to the Apostles, in the performance of their ministerial duties, was equally perpetual; CHRIST was to be with them, we have seen, as the teachers and baptizers of all nations, 'always, even unto the end of the world.' The reality of their powers, and among others, of their power of conferring the HOLY GHOST on others, was attested at first by miracles." (Acts viii. 17, 18.) Oxford Tracts, Vol. 1. No. 30.

Christum habere auctorem, et esse in Ecclesia perpetuum; quæ enim ministerii sunt a Christo derivantur perpetuo servanda. Quum autem ea ratione Spiritus Sanctus daretur certo et universe, eum adhuc dari eodem ritu necesse est; et proinde agnoscendum est novi Testamenti Sacramentum, quo, impositis manibus, et fusa prece ab Apostolorum successoribus, Spiritus Sanctus fidelibus absque sexus vel conditionis discrimine datur, utique ut divinis donis perficiantur.

8. Apostolus Paulus profectò impositionem manuum cum baptismo conjungit, veluti primarium ritum, de quo edocere jam non oportebat fideles sacris imbutos: “Quapropter intermittentes inchoationis Christi sermonem, ad perfectiora feramur, non rursum jacentes fundamentum pœnitentiæ ab operibus mortuis, et fidei ad Deum; baptismatum doctrinæ, impositionis quoque manuum.”<sup>1</sup> Hæc manuum impositio baptismum sequens inter fidei rudimenta ritusque quibus fideles initiabantur, recenseatur, ideoque habenda est omnibus communis, utpote omnium ergo a præsulis Ecclesiæ peragenda.

*Probatur II. ex Patribus.*

9. S. CYPRIANUS, loquens de Samaritis, dicit: “quia legitimum et ecclesiasticum baptismum consecuti fuerant, baptizari eos ultra non oportebat, sed tantummodo quod deerat, id a Petro et Joanne factum est, ut oratione pro eis habita, et manu imposita, invocaretur et infunderetur super eos Spiritus Sanctus. Quod nunc quoque apud nos geritur, ut qui in Ecclesia baptizantur, præpositis Ecclesiæ offerantur, et per nostram orationem æ manus impositionem Spiritum Sanctum consequantur, et signaculo dominico consummentur.”<sup>2</sup> Agnovit igitur Cyprianus illam manuum impositionem cum oratione baptizatis deesse, utpote rem quæ ad eorum perfectionem spectabat: ritumque esse post Apostolorum ætatem in Ecclesia adhuc vigentem, quo Spiritus Sanctus conferebatur. Eum Sacramentum vocat una cum baptismo: “Parum est eis manus imponere ad accipiendum Spiritum Sanctum, nisi recipiant et Ecclesiæ baptismum. Tunc enim plene sanctificari, et esse filii Dei possunt, si utroque Sacramento nascantur.”<sup>3</sup>

10. S. AUGUSTINUS Christum esse Deum probat ex eo quod Apostolorum ministerio dederit Spiritum Sanctum: “Neque enim,” inquit, “aliquis discipulorum ejus dedit Spiritum Sanctum. Orabant quippe ut veniret in eos quibus manus imponebant, non ipsi eum dabant; quem morem in suis præpositis etiam nunc servat Ecclesia.”<sup>4</sup> Quod fiebat igitur ab Apostolis, in Ecclesia servari perrexit, qua scilicet erat ministerii Apostolici actus, et proinde eorum successoribus communis. Gratiam autem

(1) Heb. vi. 1.

(2) Ep. ad Jubajan.

(3) Ep. lxxii. ad Stephanum.

(4) L. xv. de Trinitate c. xxvi.

Spiritus Sancti eo ritu conferri, etiam parvulis, testatur Augustinus, miraculorum indicia haud necessaria esse affirmans, quæ in exordiis Ecclesiæ “signa erant temporis opportuna.” . . . . “Numquid,” inquit, “modo quibus imponitur manus ut accipiant Spiritum Sanctum, hoc expectatur ut linguis loquantur? aut quando imposuimus manum istis infantibus, attendit unusquisque vestrum utrum linguis loquerentur? Et cum videret eos linguis non loqui, ita perverso corde aliquis fuit, ut diceret: Non acceperunt isti Spiritum Sanctum? Nam si accepissent, linguis loquerentur, quemadmodum tunc factum est. Si ergo per hæc miracula modo testimonium præsentiae Spiritus Sancti non sit, unde cognoscit quisque accepisse se Spiritum Sanctum? Interroget cor suum. Si diligit fratrem, manet Spiritus Dei in illo.”<sup>1</sup>

11. S. HIERONYMUS inducit heterodoxum interlocutorem sic loquentem: “An nescis Ecclesiarum hunc esse morem, ut baptizatis postea manus imponantur, et ita invocetur Spiritus Sanctus? Exigis ubi scriptum sit? In Actibus Apostolorum. Etiam si Scripturæ auctoritas non subesset, totius orbis in hanc partem consensus instar præcepti obtineret.” Hæc confirmat Hieronymus: “Non quidem abnuo, hanc esse Ecclesiarum consuetudinem, ut ad eos qui longe in minoribus urbibus, per presbyteros et diaconos baptizati sunt, episcopus ad invocationem Sancti Spiritus manuum impositurus excurrat.”<sup>2</sup>

12. S. ISIDORUS HISPALENSIS ait: “Sed quoniam post baptismum per episcopos datur Spiritus Sanctus cum manuum impositione, hoc in Actibus Apostolorum fecisse meminimus Apostolos.”<sup>3</sup>

13. Constat patres hos venerandos, quibus cæteri concinunt, Scripturam ita intellexisse, ut ministerii Apostolici munus, quo Spiritus Sanctus detur, in Actis Apostolorum tradi crederent, eosque testari eundem servari morem, quo eadem gratia conferatur.

*Probatur III. Conciliorum auctoritate.*

14. Concilium Eliberitanum de baptizato in infirmitate statuit: “Si supervixerit ad episcopum eum perducatur, ut per manus impositionem proficere<sup>4</sup> queat.”<sup>5</sup> Hispalense concilium, an. 619, censuit non licere presbyteris “Ecclesiam vel altarium consecrare, nec per impositionem manus fidelibus baptizatis, vel conversis ex hæresi Paracletum Spiritum tradere, nec chrisma conficere, nec chrismate baptizatorum frontem signare.”<sup>6</sup> Sarumense in Anglia (*Salisbury*) anno 1230 celebratum, testante Ricardo Poore, ejus Ecclesiæ episcopo, tradidit: “Secundum Sacramen-

(1) Tract. vi. in Joan.

(2) Dial. adv. Lucifer.

(3) L. de officiis Eccl. c. xxvi.

(4) Alias *perficere*.

(5) Can. xxxviii.

(6) Can. vii.

tum est impositio manus, quæ fit ab episcopo, quæ *Confirmatio* dicitur, et quæ ingressos jam in mundum, sanctificatos per baptismum armat, et roborat contra diabolum, et est sacramentum pugnantium.”<sup>1</sup>

*Probatur IV. perpetuo Ecclesiæ totius usu.*

15. Res fuit frequentioris et solemnioris observantiæ, quæ in Liturgiis seu Euchologiis universe reperitur. In quotidiano fere usu fuit posita, quum episcopi ubique ritum illum perficerent, sui ordinis privilegium et decus. Constans adeo et solemnis mos, cujus origo ad Apostolorum ætatem retrahitur, debet necessariò inter munia ministerii recenseri, proinde inter Christi instituta, agitur enim de ritu quo gratia Spiritus Sancti confertur.

16. Conveniunt Græci schismatici qui ritum hunc in suis habent Euchologiis, et suis fidei confessionibus inseruerunt, uti liquet inter cætera ex Hierosolymitana Synodo anno 1670 habita, sub Dositheo patriarcha. De Chaldæis aliisque sectis Orientalibus idem constat.<sup>2</sup>

#### OBJECTIONES.

17. *Obj. 1.* “Visibiles illas et admirabiles Spiritus Sancti gratias, quas tunc in populum suum effundebat, voluit Dominus a suis Apostolis per manuum impositionem administrari et distribui. Hinc autem impositioni manuum non altius subesse mysterium cogito; sed hujusmodi ceremoniam adhibitam ab illis interpretor, ut ipso gestu significarent, se Deo commendare et velut offerre eum, cui manus imponebant.”<sup>3</sup> Ita Calvinus de rebus gestis Apostolorum ratiocinatur.

*Resp.* Abhorret a consueta divinæ sapientiæ œconomia, in ipsis Ecclesiæ primordiis servata, ut manuum impositione, veluti certo quodam ritu, visibiles Spiritus gratiæ tribuerentur: ea scilicet dona, prout Spiritus ipse pro supremo suo arbitrio statuebat, dabantur, iis in occasionibus quibus ipsi placuit, nulla certa lege. Concionante Petro, Cornelius cum suis ea accepit, nondum baptizatus. Extra omnem sacrum ritum iis aucti sunt fideles, et mira quidem varietate. Cæterum iter ideo ab Apostolis susceptum, tanta cum sollicitudine, visibiles illas gratias ut experirentur novi illi fideles, et quidem universi, nemo facile suadebit. Singula narrationis adjuncta suadent ministerii munus referri, et ritum ideo peractum esse, ut Spiritus Sanctus ipse fidelibus illaberetur. Quod autem Calvinus asserit de manuum impositionis significatione, gratis fingitur, quum postea ex prece simul effusa definitur ad vim Spiritus Sancti animæ illabentis indicandam.

18. *Obj. 2.* “Apostoli manus imponebant pro eo tempore, quo visibiles Spiritus Sancti gratias ad eorum preces administrari Domino placebat, non

(1) Tom. xiii. Concil. col. 1402.

(2) Vide Euopliam a Naïrono p. 127.

(3) Inst. l. iv. c. xix. n. 6.



ut posteri vacuum et frigidum signum (quod simiæ istæ faciunt) mimitice tantum et sine re efficerent.”<sup>1</sup> Calvinus ita, ex eo quod visibiles illæ gratiæ impræsentiarum haud sequantur manuum impositionem, hanc omittendam, utpote vacuum effectum, contendit.

*Resp.* Apostoli imponebant manus ut fideles eorum ministerio acciperent Spiritum Sanctum, cujus præsentiae indicia illa externa, primordiis Ecclesiæ, aliquando prodibant. Cæterum haud liquet, mira illa dona semper data fuisse: quæ præterea charitate, quam Spiritus ipse in cordibus diffundit, præstantiora non sunt. Idem semper consuevit a præsulibus Ecclesiæ invocari Spiritus, eodem peracto ritu; quod argumentum est invictum illud munus esse Apostolici ministerii, ab ipsa Apostolorum ætate ubique in Ecclesia celebratum. Illud fieri frustra nemo pius, nemo fidelis dixerit, testante Augustino, perversi enim est cordis id asserere.

19. *Obj.* 3. Totum illud quod a Luca refertur de Spiritu Sancto iis illapso quibus Apostoli imposuerunt manus, ad mira Spiritus dona spectat, quorum copiam in Ecclesia futuram, in suis primordiis scilicet, prædixerat Joel. “Et erit in novissimis diebus, dicit Dominus, effundam de Spiritu meo super omnem carnem.”<sup>2</sup>

*Resp.* Mira illa dona possunt vaticinio designari, sed ea argumenta potius et indicia Spiritus cordibus fidelium illabentis habenda sunt. Spiritus ipse Sanctus adhuc se communicat, ut virtute cœlesti nos muniat contra dæmonis impetus, et dulcedine charitatis cordibus infusa triumphum de hostibus facilem det reportare. Pulchre, pro more, discrimen temporum hac in re indicat Augustinus: “Neque enim,” ait, “temporalibus et sensibilibus miraculis attestantibus per manus impositionem modo datur Spiritus Sanctus, sicut antea dabatur ad commendationem rudis fidei, et Ecclesiæ primordia dilatanda. Quis enim nunc hoc expectat, ut ii quibus manus ad accipiendum Spiritum Sanctum imponitur, repente incipiant linguis loqui? Sed invisibiliter et latenter intelligitur per vinculum pacis eorum cordibus divina charitas inspirari, ut possint dicere: quoniam charitas Dei diffusa est in cordibus nostris per Spiritum Sanctum qui datus est nobis.”<sup>3</sup>

20. *Obj.* 4. Simon Magus, oblata pecunia, petiit ut ipsi etiam facultas foret dandi Spiritum Sanctum, manuum impositione: ipsum autem haud gratiam largiendi facultatem, sed dona illa mira communicandi quæsiisse liquet. Ergo hæc, non illa, Spiritus Sancti nomine intelligebatur.

*Resp.* Perditus ille homo mira faciendi facultate, arte sua nefanda, celebris, potestatem quæsivit ut ipse, manibus impositis, posset aliis mira dona concedere. Attamen non constat eum hæc cum Spiritu ipso divino confudisse; facile enim explicantur ejus verba, donis pro indiciis vel effectibus

(1) Inst. l. iv. c. xix.

(2) Joel ii. 28. Act. ii. 17.

(3) L. iii. de Bapt. contra Donat. c. xvi.



externis sumptis. Cæterum quidquid sit, juxta pravam ejus mentem de vocum illarum “Spiritus Sanctus” vi non est judicandum; sed charitas quam in eorde diffundit imprimis intelligenda est, effectus scilicet præcipuus divini illius Spiritus in corde habitantis. Præclare Augustinus: “Spiritus autem Sanctus quod in sola Catholica per manus impositionem dari dicitur, nimirum hoc intelligi majores nostri voluerunt, quod Apostolus ait: ‘quia charitas Dei diffusa est in cordibus nostris per Spiritum Sanctum qui datus est nobis.’”<sup>1</sup>

21. *Obj.* 5. Gratiam Spiritus Sancti Samaritæ jam acceperant, credentes enim fuerant baptizati. Dona igitur alia quæ in Religionis profectum cessura erant, prophetia, linguarum scientia, et alia hujusmodi, occasione manuum impositionis eis concessa sunt.

*Resp.* Utique censendi sunt Samaritæ jam baptismo Deo nati, filii ejus dilecti et hæredes regni constituti. Attamen Spiritus Sanctus dari dicitur, quando intimius et largius sese communicat, charitatem suam in cordibus diffundens. Cætera illa dona ad aliorum utilitatem concessa, non sunt omnibus fidelibus necessaria, vel opportuna; sed animæ profectus imprimis in omnibus Ecclesiæ muneribus spectatur. Non alia certe de causa festinarunt Petrus et Paulus Samariam, quam ut fidelibus suo ministerio majora suppeditarent subsidia, quibus in via Domini pergere et perseverare possent. Pulchre hos impositionis manuum fructus S. Eucherius Lugdunensis recenset: “Paracletus regeneratis in Christo custos, et consolator, et tutor est. . . . Ergo Spiritus Sanctus, qui super aquas baptismi salutifero descendit illapsu, in fonte plenitudinem tribuit ad innocentiam, in confirmatione augmentum præstat ad gratiam: quia in hoc mundo tota ætate victuris inter visibiles hostes et pericula gradiendum est; in baptismo regeneramur ad vitam, post baptismum confirmamur ad pugnam; in baptismo abluimur, post baptismum roboramur. Ac sic continuo transituris sufficiunt regenerationis beneficia; victuris autem necessaria sunt confirmationis auxilia.”<sup>2</sup>

22. *Obj.* 6. “Quod si manuum impositione Apostolos se imitari evincant,” ait Calvinus, de Catholicis præsulibus loquens, “unde tamen oleum, quod vocant, salutis? Quis eos in oleo salutem quærere docuit? quis vim roborandi illi attribuere? An Paulus (Gal. 4, 9. Col. 2. 20.), qui nos ab elementis hujus mundi longe abstrahit, qui nihil magis damnat, quam talibus observatiunculis hærerere?”<sup>3</sup>

*Resp.* Si constet manuum impositionem cum prece quam adhibuerunt Apostoli ut fideles acciperent Spiritum Sanctum, semper adhibitam eodem consilio in Ecclesia Catholica, vicimus Calvinianos, quidquid sit de olei unctione quæ eam sequitur, vel comitatur. Ut enim concedamus hanc

(1) L. iii. de Bapt. contra Donatistas c. xvi.

(2) Hom. Pentecost. in Bibliothec. Patrum t. vi.

(3) Inst. l. iv. c. xix. 7.

auctoritate Apostolorum et exemplo non niti, non ideo quidquam læditur ritus alter plane Apostolicus. Cæterum gratis asseritur Apostolos haud unxisse et signasse chrismate recens baptizatos, dum illis imponerent manus, nam videtur Apostolus ad ritum hunc referre vel alludere dicendo: “Qui autem confirmat nos vobiscum in Christo, et qui unxit nos Deus: qui et signavit nos, et dedit pignus spiritus in cordibus nostris.”<sup>1</sup> Tota retro antiquitas christiana, ab ipsis primordiis, hoc ritu usa esse noscitur: quod contingere vix potuit absque Apostolorum exemplo et sanctione. Quod ad Lucæ silentium attinet, eum res gestas breviter retulisse liquet, nec rituum explicationem sibi proposuisse scribendam: quapropter mirum non est si singuli enucleatius expositi in ejus libro haud reperiuntur. Sed quum Apostoli alias oleo, jubente Christo, usi sint, infirmos ungendo, nil velat existimare eos symboli instar illud cum manuum impositione adhibuisse. Id porro indubitatum fit ex universali et antiquissima consuetudine eo utendi. In oleo autem non quærimus salutem, nec vim roborandi illi attribuimus, nisi quatenus instrumentum sit Spiritus Sancti, nobis Christi salvatoris nostri et Dei misericordia datum. Quæ sint chrismatis partes in hoc ritu de fide quidem non constat; sed qui ei virtutem aliquam tribuunt, tanquam Sacramenti *materiæ*, uti plurimis placet, nullam certe Spiritui Sancto irrogant injuriam. Merito idcirco Tridentinum concilium censuit: “Si quis dixerit, injurios esse Spiritui Sancto, qui sacro confirmationis chrismati virtutem aliquam tribuunt; anathema sit.”<sup>2</sup>

23. *Obj.* 7. Patres Sacramenti nomen latiori adhibent sensu de Confirmatione agentes, Cyprianus enim postquam utrumque Sacramentum commemoraverat, baptismum scilicet, et manuum impositionem, adduxit testimonium Christi de nova nativitate ex aqua et Spiritu Sancto. “Quæ verba perspicue ostendunt, quod per duo Sacramenta nihil intelligant amplius, quàm duas principes cærimonias ad completum et perfectum baptismum requisitas, quia homines utroque Sacramento renasci dicit.” Ita Binghamus.<sup>3</sup>

*Resp.* Non sola voce nitimur, sed proprietatibus Sacramenti quas Patres agnoverunt, impositione scilicet manuum tradi Spiritum Sanctum magno consensu declarant. Cæterum ipsa Sacramenti vox vim habet magnam, quando de baptismo, et manuum impositione simul adhibetur, nam sicut obvio sumenda est sensu de baptismo, eodem sensu dicta de impositione manuum censenda est. Quod autem id probare voluerit Cyprianus, adducto illo Christi testimonio, ostendit eum peculiarem interpretationem ejus loci præbuisse: quod haud insuetum est patribus, qui certis notissimis fidei dogmatibus quædam loca, pro occasione, accommodant, de vi probandi rem utrinque in confesso haud semper solliciti.

(1) II. Cor. i. 21.

(2) Sess. vii. Can. ii.

(3) Origin. Eccles. l. xii. c. i. § 4.

24. *Obj.* 8. Patres Apostolici et qui eos secuti sunt de confirmatione siluerunt.

*Resp.* Ex paucis quæ supersunt tantæ vetustatis documentis mirum non est perspicua non haberi testimonia quæ hoc Sacramentum respiciunt: nam non semper se offert scriptori occasio ut singula exponat et evolvat. Cæterum unctionis oleo Dei, quam acceperunt christiani, meminit Theophilus Antiochenus. De impositione manuum ab Apostolis loquitur Irenæus, eamque numquam caruisse effectum tradit: “quibuscumque enim imponebant Apostoli manum, accipiebant Spiritum Sanctum, qui est esca vitæ.”<sup>1</sup> Intellexit ergo venerandus hic pater gratiam hoc ritu fuisse ab Apostolis communicatam, nec enim mira illa dona *esca vitæ* dici possunt. Tertullianus unctionis post baptismum meminit: “dehinc,” subjungit, “manus imponitur per benedictionem, advocans et invitans Spiritum Sanctum.”<sup>2</sup> Alias dicit: “caro manus impositione adumbratur, ut et anima Spiritu illuminetur.”<sup>3</sup> Hic auctor sat antiquus profecto est.

25. *Obj.* 9. Alexander de Ales censuit confirmationis Sacramentum fuisse in concilio Meldensi institutum.

*Resp.* Agnovit ipse Apostolos confirmasse, dicit enim: “Sacramentum vero confirmationis et extremæ unctionis dedit (*Christus*) per Apostolos.”<sup>4</sup> Dicit quidem alibi: “ipsi confirmabant sine sacramento,”<sup>5</sup> hoc nomine intelligens eo loci inunctionem chrismate cum verborum forma: sed vehementer eum fefellit sententia de illa in concilio a Meldensi orta, uti liquet ex allatis testimoniis.

26. *Obj.* 10. Cum injuria baptismi novum inducitur Sacramentum eo præstantius, quo perficiatur quod cœptum est, Divinæ autem institutionis ne umbra quidem est.

*Resp.* Nihil baptismo detrahitur, quem fatemur omnes abluere sordes peccati, et novam efficere nativitatem, adeo ut nihil prorsus baptizatum hominem ab ingressu cœli remoretur, quamdiu gratiam sibi in lavacro donatam integram servaverit. Quod ampliora gratiæ munera impositione manuum tribuantur, divitias et munificentiam Redemptoris commendat: nec nostrum est alterutri Sacramento derogare. Voluntas Christi Domini norma nobis datur, juxta quam de singulis judicandum. Apostolorum res gestæ perspicuo sane sunt argumento eum statuuisse Spiritus Sancti gratiam manuum impositionis ritu tribuere.

27. *Obj.* 11. Hærent Theologi quanam in re Sacramenti hujus essentia sit constituenda: sunt enim qui eam in unctione chrismatis reponunt, de qua silet Scriptura; aliis eam in manuum extensione, quam perperam vocant impositionem, statuentibus; aliis in digiti contactu, dum fit

(1) L. iv. c. lxxv.

(2) L. de Bapt. c. vi.

(3) L. de resur. carn. c. viii.

(4) Summ. Theol. p. iv. qu. v. membro ii. art. 1.

(5) Ibid. qu. ix. membro i.

unctio; aliis hos omnes ritus conjungentibus. Ergo tota res incerta habenda est.

*Resp.* Manuum impositio facta est ab Apostolis, et adhuc fit a præsulis Ecclesiae, quæ proinde ad Sacramenti essentiam spectare merito censetur: de cæteris ritibus salva fide dubitari potest. Novimus quidem quæri quænam sit manuum impositio, utrum scilicet ea quam facit episcopus, ambas manus super universos tenens extensas, dum septem dona Spiritus Sancti illis apprecatur, an alia quæ fit frontem inungendo: utraque enim potest ita designari: sed constat ritu præscripto contineri Sacramentum, eumque integre perficiendum, ut obtemperetur Ecclesiae; nec refert accurato judicio decernere quamnam vim singulæ ejus partes habeant. Manet igitur Sacramenti certitudo, quidquid sit de Theologorum quæstionibus.

28. *Obj.* 12. "Ecclesia omnibus hæreticis ad Ecclesiam reversis manuum impositionem tribuebat, et hoc . . . . ad ea spectabat supplenda, quæ in externa forma baptismi defuerant, quæ gratiam Spiritus eis conferre non poterat, quoad in hæresi, vel in schismate perseverabant." Ita Binghamus.<sup>1</sup> Sicut Leo M. jussit: "per manus impositionem invocata virtute Spiritus Sancti, quam ab hæreticis accipere non potuerunt, Catholicis copulandi sunt."<sup>2</sup>

*Resp.* Fatetur ipse Binghamus unctionem chrismatis non semper adhibitam dum hæc fieret manuum impositio, specialiter in partibus Occidentibus. Igitur tunc saltem satis discernebatur ab ea quæ fiebat dum Sacramentum confirmationis daretur. Optimo quidem consilio, et aptissimo ritu imponebantur manus, et oratio fundebatur ut illis daretur Spiritus Sancti lumen et gratia, quam in hæresi consequi non poterant, licet signaculum ejus confirmati suscepissent. Manus impositio ad veniam et pacem Ecclesiae significandam, similitudinem gerebat cum illa quæ fiebat in confirmatione, et eundem in finem destinata est, quamvis ejus effectus totus penderet ex piis Ecclesiae precibus, et devoto pœnitentium affectu. Aliquando ipsa confirmatio dabatur, plurimi enim eam suscipere antea neglexerant, quod de Novatianis constat. Exemplum precum nobis suppeditat codex Gelonensis, temporibus Caroli Magni exaratus, qui sic habet: "Benedictio super eos, qui de diversis hæresibus veniunt: 'Sancte Pater omnipotens, qui famulum tuum ab errore hæreseos dignatus es eruere, et ad sanctam Ecclesiam revocare, quæsumus te Domine, immitte in eum Paraclitum Spiritum tuum septiformem, Spiritum sapientiæ et intellectus, spiritum consilii et fortitudinis,'" &c.<sup>3</sup>

29. *Obj.* 13. Orientales et Græci confirmationis Sacramento, quale agnoscunt Pontificii, carent: quamvis enim et ipsi unguento quodam verticem liniant, unctio hæc inter baptismi ritus reponenda est, fit enim statim post baptismum, et a Sacerdotibus: quæ disciplinæ ei quam refert Tertul-

(1) Scholastic history of lay baptism, c. i. n. xxi.

(2) Ep. ii. ad Rustic. Narbon. Inquis. xviii.

(3) Consule Constant col. 238. Tom. i. epist. Rom. Pontif.

lianus simillima videtur. Apud Latinos igitur ritus hic a baptismo sejungi cœpit posteriori ætate, et Episcopis reservata est ad dignitatis ostentationem : “ ad honorem potius sacerdotii, quam ad legem necessitatis ” prout dicit Hieronymus.

*Resp.* Res est explorata Græcos et Orientales hoc agnoscere Sacramentum,<sup>1</sup> et a baptismi ritibus omnino discernere : sed veteri disciplinæ inhærentes, tria Sacramenta eodem die administrant, eucharistiam una cum baptismo et chrismate, unde factum videtur ut Sacerdotibus permitteretur facultas chrismate verticem ungendi, qui mos antiquissimus apud eos est. Tertulliani tempore simul administrari consueverunt, sed non videtur licuisse aliis præter episcopos. Cæterum ex consuetudine quæ apud Orientales invaluit, et ex facultate nonnumquam apud Latinos sacerdotibus data, videtur reservatio episcopis facta spectare “ ad honorem potius sacerdotii,” quam ad rei ipsius naturam ; nisi enim Sacerdotes simplices ex Christi instituto essent huic facultati suscipiendæ idonei, numquam eis ea permitti potuisset.

#### ANIMADVERSIO.

30. Divina confirmationis institutio ex Apostolorum rebus gestis et Ecclesiæ traditione probatur, ideoque a Christo Domino nostro instituta certo credenda est, eum enim omnium Sacramentorum novæ legis auctorem esse definivit Concilium Tridentinum. *Immediata*, uti dicunt, institutio a plerisque Theologis propugnatur, quamvis Dominicus a Soto doceat eam non esse omnino fidei dogma : dicit scilicet “ hæreticum esse, negare hæc omnia (*Sacramenta*) instituta fuisse a Christo.” . . . “ Non usque adeo constat hæreticum esse negare Sacramenta confirmationis et extremæ unctionis fuisse ore Christi proprio instituta : esse tamen hæreticum negare esse de jure divino.”<sup>2</sup> Tempus quo instituta est a Christo confirmatio frustra definire quis vellet, silente Scriptura ; sed satis est nosse ex Apostolorum agendi ratione eam Christum habere auctorem. Multi censent documenta de sacris muneribus hujusmodi eum tradidisse quadraginta illos dies qui inter resurrectionem et ascensionem lapsi sunt, de regno enim Dei cum Apostolis locutus dicitur, quo nomine Ecclesiæ in terris conditio persæpe designatur. “ Ii dies,” ait S. Leo magnus, “ qui inter resurrectionem et ascensionem fluxerunt, non otioso transiere decursu ; sed magna in eis confirmata Sacramenta, magna sunt revelata mysteria.”<sup>3</sup>

(1) De Chaldæis Syrisque vide Euopliam a Nairono p. 128. Vide etiam Natalem Alex. hist, Eccl. t. v. diss. x. § 22. De Æthiopibus vide ordinem illud ministrandi in t. vi. *Bibliothecæ Patrum* relatum. De Ægyptiis vide professionem fidei quam Mathæus Alex. patriarcha ad Ludovicum xiv. misit, t. iii. de perpetua Eccl. fide circa Eucharistiam l. viii. c. xix.

(2) In iv. Sentent. q. 5, ar. 2.

(3) Serm. i. in Ascensione n. 2.

## CAPUT II.

## DE CHRISMATE.

31. Ut omnem evitarem<sup>1</sup>us litem in re quæ salva fide agitari queat, de sola manuum impositione egimus, ut quod ab Apostolis factum narratur, adhuc fieri pateat, et Sacramentum agnoscatur, cui et Scripturæ et Patres adeo perspicuum ferunt testimonium. Cæterum qua antiquitate gaudeat chrismatis in hoc Sacramento conferendo usus facile demonstratur. Pluribus videtur Apostolus ad hunc ritum alludere, in loco supra laudato: "Qui confirmat nos vobiscum in Christo, et qui unxit nos Deus, qui et signavit nos, et dedit pignus Spiritus in cordibus nostris."<sup>2</sup>

32. THEOPHILUS ANTIOCHENUS, secundi sæculi scriptor, dicit: "Nos enim ideo Christiani vocamur, quod oleo Dei ungamur."<sup>3</sup>

33. TERTULLIANUS, post baptismum relatum, dicit: "Exinde egressi de lavacro perungimur benedicta unctione. . . . Sic et in nobis carnaliter currit unctio, sed spiritualiter proficit, quomodo et ipsius baptismi carnalis actus quod in aqua mergimur, spiritualis effectus quod delictis liberamur. Dehinc manus imponitur per benedictionem, advocans et invitans Spiritum Sanctum."<sup>4</sup> Unctio hæc videtur potius ad manuum impositionem referri, quam ad baptismum cum quo comparatio instituitur ut profectus spiritualis ex ea oriri intelligatur. Aliàs de unctione pariter loquitur: "Caro abluatur, ut anima emaculetur: caro ungitur ut anima consecretur: caro signatur ut et anima muniatur: caro manus impositione adumbratur, ut et anima Spiritu illuminetur: caro corpore et sanguine Christi vescitur, ut et anima de Deo saginetur."<sup>5</sup>

34. S. CYPRIANUS ait: "Ungi quoque necesse est eum qui baptizatus sit, ut accepto chrismate, id est, unctione, esse unctus Dei, et habere in se gratiam Christi possit."<sup>5</sup>

35. S. CYRILLUS HIEROSOLYMITANUS sic edocuit Neophytos: "Et vobis postquam similiter ex aquis sacri lavacri ascendistis, datum est chrisma, quod imaginem gerit illius quo unctus est Christus: hoc autem est Spiritus Sanctus. . . . Cæterum vide ne illud esse putes unguentum merum ac simplex. Quemadmodum enim panis eucharistiæ post Sancti Spiritus invocationem non amplius est panis communis, sed est corpus Christi: sic

(1) II. Cor. i. 21.

(2) L. i. ad Autolycum n. xii.

(3) L. de Bapt. c. vii.

(4) L. de resur. carnis c. viii.

(5) Ep. lxx. ad Januar.

et sanctum hoc unguentum non amplius est unguentum nudum neque commune, postquam jam consecratum est, sed est chrisma Christi, et Spiritus Sancti præsentia, per ipsius divinitatem energiam habet.”<sup>1</sup>

36. Auctor antiquus quem multi adhuc putant esse Ambrosium, ait : “ Sequitur spirituale signaculum quod audistis hodie legi : quia post fontem superest ut perfectio fiat, quando ad invocationem sacerdotis Spiritus Sanctus infunditur.”<sup>2</sup>

37. S. AUGUSTINUS de unguento Aaronis apud Psaltem loquens. “ Et in hoc unguento Sacramentum chrismatis vultis interpretari, quod quidem in genere visibilium signaculorum sacrosanctum est, sicut et ipse baptismus.”<sup>3</sup>

38. S. PACIANUS dicit : “ lavacro enim peccata purgantur, chrismate Sanctus Spiritus superfunditur.”<sup>4</sup>

39. Laodicenum concilium, quod anno 372 a nonnemine adsignatur, censuit : “ Oportet eos qui baptizantur, post lavacrum chrisma Ecclesiæ accipere, et regni Christi participes inveniri.”<sup>5</sup>

40. Nobis aliquando exprobrarunt Protestantes Gnosticos, referente Irenæo, unguento hujusmodi usos esse : “ ungunt autem et ipsi opobalsamo.”<sup>6</sup> Verum non hos imitamus, sed venerandos Ecclesiæ præsules, quorum adduximus testimonia, eos autem Catholicorum ritum imitatos esse verosimile est. Cæterum non interest utrum aliquando sit rerum quarumdem similitudo, dum alias tota rituum serie omnino ab illis discernimur.<sup>7</sup>

41. Chrisma ex oleo cum balsamo fit, solemnī episcopi benedictione, feria quinta in cœna Domini. De eo dicit Venerabilis Beda : “ In vineis Engaddi balsamum gignitur, quod in chrismatis confectione liquori olivæ admisceri, ac Pontificali benedictione solet consecrari, quatenus fideles omnes cum impositione manus Sacerdotalis qua Spiritus Sanctus accipitur, hac unctione signentur.”<sup>8</sup> Balsamum in hac regione adhibetur Peruanum, vel Indicum, quod sufficere ex declaratione Pauli III. et Pii IV. constat utrum balsami admixtio ad essentiam chrismatis pertineat inquirunt Theologi, quorum nonnulli iudicio et eruditione graves negant. Quæritur etiam utrum benedictio, seu consecratio, chrismatis sit ad Sacramenti essentiam necessaria, quod plerique affirmant. Utrum illa consecratio simplici Sacerdoti committi possit, et cujus auctoritate, quæsitum est. His tamen

(1) Catech. iii. Mystagog.

(2) L. iii. de Sacr. c. ii.

(3) L. ii. contra litt. Petiliani c. civ.

(4) Monita Paciani t. vii. Biblioth. PP. Galland. p. 275.

(5) Can. xlviii.

(6) L. i. adv. hæres. c. xviii.

(7) Plura de chrismate videsis apud Trombellium de conf. diss. v. Sect. iii. c. i.

(8) L. ii. expos. in Cant. Cant.



questionibus de decore, gravissimæ quæ nos urgent controversiæ de fidei summa cōtineant: ideoque pro instituto nostro satis decimus affirmare, ex lege Ecclesiæ, cui cōtemperare oportet, chrisma conficiendum ex oleo et balsamo, nec aliā rē mittere. Quod si contigerit summum Pontificem facultatem sacri sacerdoti facere illud consecrandi, sicut nonnumquam, quamvis rursus, fecisse dicitur, non audemus in questionem vocare quod ipse de sacro mittere jussit.

42. Græci ex plurimis aromatibus et oleo ~~per~~ conficiunt quo nomine hoc designant Sacramentum. Eorum sana sententia Catholice Ecclesiæ hac in re conveniens liquet ex plurimis documentis: quorum unum appellamus. *In Orthodoxa confessione Catholice et Apostolicæ Ecclesiæ Orientalis a Patriarcha Hierosolymitano Nectario, anno Christi 1662, composita, et a quatuor sedium, quas Græci Apostolicas vocant, successoribus approbata*, dicunt: “secundum mysterium, *Unguentum chris-matis*, sive confirmationis est.” . . . “Quando sacerdos oleo sacro recens baptizatum inungit, desuper idem Spiritus Sancti donis perfunditur, quod manifeste arguunt verba, Sacerdoti mysterium hoc peragenti de more pronucianda: *Signaculum muneris Spiritus Sancti. Amen.* Quasi si dicat, in unctione sacri hujus unguenti obsignaris, confirmarisque in Spiritus Sancti donis, quæ in confirmationem christianæ fidei tuæ accipis.”

43. Unctio, quæ fit chrismate, aptissime indicat, juxta Scripturarum usum, gratiam Spiritus Sancti, quapropter *chrisma salutis* vocatur, instrumentum scilicet, vel saltem indicium gratiæ salutaris. Balsami admixtio bonum Christi odorem, quem discipuli ejus diffundere debent, significat. Verba hæc ea occasione ab episcopo proferuntur: “signo te signo crucis, et confirmo te chrismate salutis, in nomine Patris, et Filii, et Spiritus Sancti.” Hæc a plerisque *forma* Sacramenti habentur, quamvis quæ funditur oratio, dum manibus extensis super confirmandos episcopus orat, ut mittat in eos Deus Spiritum Sanctum paraclitum de cœlis, septemque ejus dona, haud levem ob rationem ad *formam* referatur. Græci aliis utuntur verbis:—σφραγὶς δωρεᾶς πνεύματος ἁγίου—“Signaculum doni Spiritus Sancti. Amen.” Non consueverunt olim verba quibus Sacramenta conficiebantur scripto tradi, sed innotuerunt orali, uti dicitur, ministrorum traditione; quapropter *disciplinam arcani*, qua scilicet sacra non vulgabantur, ne infidelibus essent irrisui, servare volens Innocentius I., quinto ineunte sæculo, noluit *formam* confirmationis scripto consignare: “Verba vero dicere non possum, ne magis prodere videar, quam ad consultationem respondere.”<sup>1</sup>

44. Gratia hujus Sacramenti fidelem roborat ut quam animo fovet fidem, intrepide profiteatur, omnia detrimenta, et supplicia pati paratus, potius quam Christum deserere.<sup>2</sup> Spiritus Sanctus est veritatis doctor, qui

(1) Ep. ad Decentium Eugub.

(2) “In locis Novi Testamenti qui tradunt, quosdam, suscepta fide Christiana, per



mentem illustrat, et cor divina induit virtute, cujus præsentiæ eximia in Apostolis data sunt argumenta, et in singulis fidelibus, quibus imponuntur manus, idonea etiam indicia dantur.

#### ANIMADVERSIO.

45. Quum quæstiones inter Theologos impune agitentur de forma et materia hujus Sacramenti, omnia quæ præscribit Pontificale Romanum diligenter peragenda sunt, præsertim manuum erga confirmandos extensio, quæ et impositio dicitur, et inunctio frontis chrismate, cum verbis quæ utrique actioni respondent. Si quid omissum fuerit, “non est aliquid iterandum, sed caute supplendum, quod incaute fuerat prætermisum.” Ita respondit Innocentius III. de eo qui errore non chrismate, sed oleo delinitus fuerat.

Apostolos, impositis manibus, quamquam et adhibita invocatione Dei, accuratiore in doctrina christiana institutione, *Spiritu Sancto* imbutos fuisse, in universum intelligi debet effecta his omnibus singularis animorum concitatio, qua tamquam divini Numinis afflatu se senserunt impulsos, ut illam doctrinam læti ac imperterriti profiterentur. Interdum, si Deo sic visum fuerit, ad illam Spiritus Sancti impertitionem accedebat et vis linguis peregrinis loquendi.” Hæc Rosenmuller in Act. viii. 15. quæ quidem non abhorrent a catholica doctrina, gratiam qua in fide firmamur hoc tribui Sacramento.

(1) In decret. Gregorii ix. l. i. tit. xvi. de Sacramentis non iterandis. Cap. *Pastoralis*.

## CAPUT III.

## DE MINISTRO CONFIRMATIONIS.

46. Ex Actis Apostolorum colligitur Sacramentum hoc conferendi munus ad rectores Ecclesiæ spectare, Petrus enim et Joannes ideo iter suscepisse censendi sunt, quod Philippo illud peragendi nulla esset facultas : et Paulus legitur imposuisse manus discipulis Ephesiis, quos tamen ab inferiore ministro baptizatos esse verosimile fit ex ratione qua baptismus eorum narratur. Patres quorum adduximus testimonia de ritu hoc loquentes eum a præsulibus Ecclesiæ perfici constanter tradunt. A veteri traditione ne hilum quidem recessit Innocentius I. ita docens : “De consignandis infantibus manifestum est non ab alio quam ab episcopo fieri licere. Nam presbyteri, licet secundi sint sacerdotes, pontificatus tamen apicem non habent. Hæc autem pontificibus solis deberi, ut vel consignent, vel Paracletum Spiritum tradant, non solum consuetudo ecclesiastica demonstrat, verum et illa lectio Actuum Apostolorum, quæ asserit Petrum et Joannem esse directos, qui jam baptizatis traderent Spiritum Sanctum.”<sup>1</sup> S. Gregorius Magnus, his inhærens censuit : “Presbyteri baptizatos infantes signare sacro in frontibus chrismate non præsumant ; sed presbyteri baptizatos ungant in pectore, ut episcopi postmodum ungere debeant in fronte.”<sup>2</sup>

47. Cæterum dissimulari non potest a vetusta satis ætate presbyteros simplices hoc administrasse sacramentum, præsertim apud Græcos et Orientales : quapropter sunt qui censent, ecclesiastico potius quam divino jure, id muneris in Occidentali patriarchatu præsertim reservatum esse episcopis ; quo sensu intelligunt Hieronymum locutum esse : “Quod si hoc loco quæris quare in Ecclesia baptizatus, nisi per manus episcopi non accipiat Spiritum Sanctum, quem nos asserimus in vero baptismo tribui, discite hanc observationem ex ea auctoritate descendere, quod post ascensum Domini Spiritus Sanctus ad Apostolos descendit, et multis in locis idem factitatum reperimus, ad honorem potius Sacerdotii, quam ad legis necessitatem.”<sup>3</sup> Ob morem contrarium nonnullis in locis jam vigentem idem præclarus doctor scripsit : “Quid facit, excepta ordinatione, episcopus quod non faciat presbyter ?”<sup>4</sup> Ipse Gregorius Magnus, quum decretum ejus, quo vetabatur presbyteris chrismate frontem linire, turbis occasionem præbuisset, illud mitigavit : “Nos quidem secundum usum veterem Ecclesiæ nostræ fecimus ; sed si omnino hac de re aliqui contristantur, ubi

(1) In ep. ad Decentium Eugub. c. iii.

(2) L. iv. ep. ix. alias l. iii. ep. ix. ad Januarium Calarit.

(3) Dial. adv. Lucifer.

(4) Ep. lxxxv. ad Evagrium.

episcopi desunt, ut presbyteri etiam in frontibus baptizatos chrismate ungere debeant concedimus.”<sup>1</sup>

48. Id igitur ex testimoniis patrum quæ retulimus, et ex variis Ecclesiæ moribus, pro explorato haberi debet, episcopum esse *ordinarium* confirmationis ministrum, sacerdotes verò id muneris exercere posse, ea ab Ecclesiæ præsulibus facta potestate. Prius docuit Eugenius IV. in celebri instructione pro Armenis, definivit vero concilium Tridentinum: “ Si quis dixerit, sanctæ confirmationis ordinarium ministrum non esse solum episcopum, sed quemvis simplicem sacerdotem; anathema sit.”<sup>2</sup> Alterum ex consuetudine apud Græcos vigente patet, nec enim in Florentino concilio confirmatio ab iis administrata improbata est; sed nec a Summorum Pontificum constitutionibus petita, quæ enim allegantur, eos respiciunt quibus adempta est facultas prævio decreto, vel qui intra fines patriarchatus Occidentalis versabantur.<sup>3</sup> Ipsi Pontifices sæpius noscuntur delegasse sacerdotibus confirmandi munus, quod vir memoriæ venerandæ, Joannes Carroll, noscitur obiisse, antequam ad episcopatum evectus, Baltimorensis primus antistes constitutus fuerit. Absque hujusmodi pontificia delegatione irritus foret in Occidentali patriarchatu actus sacerdotalis, etiam consentiente episcopo, quum Pontifex facultatem delegandi sibi reservaverit.

49. Necesse non est ut diutius in his explicandis immoremur, quum sectarii hujus regionis vel confirmandi ritum penitus rejiciant, vel eum ab episcopo peragi velint, vanam nominis umbram apud se intelligentes. Nec operæ pretium ducimus quæ afferri solent rationes scrutari, ut potestatem confirmandi ecclesiastico potius quam divino jure episcopis servatam ostendatur: ad rem enim nostram quæ dubitationem patiuntur, vel impune agitantur apud scholas, plerumque vix pertinere judicavimus. Qui eas ventilatas videre cupiat adeat Trombellium.<sup>4</sup>

(1) L. iv. epist. xxvi.

(2) Sess. vii. can. iii.

(3) Vide Benedict. xiv. l. vii. de Synodo Diœces. c. vii. viii. ix.

(4) Diss. de Ministro confirm. sectio i. qu. ii. § vi.

## CAPUT IV.

## DE CONFIRMANDIS.

50. Omnibus et solis baptizatis conferri posse confirmationem ex Actis Apostolorum colligitur, Samaritis enim, et iis quos Paulus Ephesi reperit discipulos, post baptismum collata est. Id liquet etiam ex Ecclesiae constanti consuetudine ab antiquissima usque ætate. Statim post baptismum solemnem, qui ab episcopo plerumque ministrabatur, imponebantur manus, et chrismate ungebantur Neophyti, ut divino Spiritus Sancti dono munirentur: quod etiam infantibus contigit per plura sæcula. Cæterum recentior disciplina est ut septennium expectetur, nisi urgeat mortis periculum, vel gravis suadeat ratio, episcopo forsitan diu absfuturo.<sup>1</sup> Mora illa id habet commodi ut pueri fidei rudimenta edoceantur, et pio animi affectu ad divina suscipienda dona parentur. Edocendi sunt autem pro ratione ætatis, præsertim de præcipuis fidei mysteriis.

51. Ut quis Sacramentum hoc recipiat, debet animam habere a peccato gravi immunem, nam Spiritui Sancto inferret injuriam, qui, peccato addictus, eum hospitem excipere se velle fingeret. Hinc pia obtinet consuetudo confessionis peragendæ antequam quis confirmandum se sistat, quam suadet Pontificale Romanum.

52. Optandum ut jejuni ad confirmationem accedant, quod Pontificale commendat, et vetus per duodecim sæcula consuetudo habuit: sed lege non jubetur.

53. Utrum gravis sit culpa negligere confirmationis susceptionem, quin spernatur sacramentum, inter Theologos quæritur. Affirmanti sententiæ favere videtur constitutio Benedicti XIV., quæ declarat eos qui a presbyteris Græcis fuerant chrismate liniti, in iis regionibus in quibus facultas confirmandi iis est denegata, "gravis peccati reatu teneri, si (cum possint) ad confirmationem accedere renuunt ac negligunt."<sup>2</sup> Sed pertinacia quædam videtur cum neglectu iis in rerum adjunctis connexa. In Instructione a Sacra Congregatione de Propaganda Fide edita dicitur: "sine gravis peccati reatu respui non potest ac negligi, cum illud suscipiendi opportuna adest occasio. Porro hæc doctrina, si pro omnibus qui sunt undique Christifidelibus vera est, multo magis locum habet in illis qui in terris degunt hæreticorum."

54. Qui animo rite parato confirmanter augmentum gratiæ cum robore

(1) Vide Benedict. XIV. de Syn. Dioces. l. vii. c. x. § 3, 5.

(2) Constit. Etsi Pastoralis, § 3. n. 4. Bull. Tom. i.

animi ad fidem profitendam recipiunt, et caractere quodam signantur, qui numquam deleri potest. Recte igitur illis dicitur verbis Apostoli : “ signati estis Spiritu promissionis sancto.”<sup>1</sup> “ Nolite contristare Spiritum Sanctum Dei : in quo signati estis in diem redemptionis.”<sup>2</sup> De caractere patres passim loquuntur. S. CYPRIANUS dicit quod impositionem manuum recipientes : “ signaculo Dominico consummentur.”<sup>3</sup> THEODORETUS illud vocat “ velut sigillum quoddam regium ;”<sup>4</sup> S. LEO MAGNUS “ signaculum vitæ æternæ,”<sup>5</sup> S. GREGORIUS NAZIANZENSIS dicit eos “ sigillum suscipere quod sepulturam ipsam comitetur, et post mortem maneat ;”<sup>6</sup> S. AMBROSIIUS : “ accepisti signaculum spiritale, spiritum sapientiæ, et intellectus, spiritum consilii atque virtutis, spiritum cognitionis, atque pietatis, spiritum sancti timoris : et serva quod accepisti. Signavit te Deus Pater, confirmavit te Christus.”<sup>7</sup> S. AUGUSTINI vetustus discipulus, tria indicans sacramenta quæ simul conferabantur, dicit : “ baptizatus es, signatus es regio caractere, cœpisti consequi annonam de mensa regis tui.”<sup>8</sup> Hæc testimonia satis probant traditionem de caractere hoc Sacramento impresso. Ideo decretum est ut : “ si de facto baptismi, confirmationis, consecrationis dubitetur, nec possit ulla probatio, inquisitione facta, succurrere, perinde agendum est ac si nihil horum factum fuisset.”<sup>9</sup> Ita concilii Carthaginensis V. patres. Quod autem Ecclesiæ consecratio eodem comprehendatur decreto non obstat, nam a Sacramentis ad eam regula traducta est, ob quandam similitudinem, quum homo gratia templum sit Spiritus Sancti. Semel dixit Augustinus manuum impositionem repeti posse : “ manus autem impositio non sicut baptismus repeti non potest : quid est enim aliud nisi oratio super hominem ?”<sup>10</sup> Sed quamvis de confirmatione mox egisset, quæ de manuum impositione hic dicit, necessario sunt latiori sensu explicanda : nec enim sibi constaret si eam quæ cum chrismate adhibetur meram orationem esse diceret, vel iterandam : nam eam sacrosanctam instar baptismi esse aliàs tradidit.

55. De ritu confirmandi pauca dicemus. Oratio quam fundit Pontifex manibus extensis in confirmandos, reperitur in libro I. Sacramentorum Romanæ Ecclesiæ, qui ad Gelasii refertur tempora, plurimorum iudicio. Ea recitata Pontifex signabat eos in fronte de chrismate, dicens : *Signum Christi in vitam æternam. Amen. Pax tecum. R. Et cum Spiritu tuo.*

(1) Eph. i. 13.

(2) Ibidem iv. 30.

(3) Ep. lxxv.

(4) L. iv. in Cantic.

(5) Serm. iv. de Nativ.

(6) Exhort. ad s. lavac.

(7) De mysteriis c. vii. n. 42.

(8) Serm. de Cataclysmo c. i. Inter Augustini sermones olim recensebatur.

(9) Can. vi.

(10) L. iii. de baptismo contra Donat. c. xvi.

In vetustissimo Ordine Romano, quem edidit Hittorpius, verba sunt: "Confirmo te in nomine Patris, et Filii, et Spiritus Sancti." Integra forma, totusque ritus, prout nunc fit, reperitur in codice undecimi, uti Mabillonius existimat, sæculi.<sup>1</sup> Excipere tamen oportet alapam, cujus in vetustis monumentis nulla fit mentio; ejus tamen meminit Durandus, episcopus Mimatensis, qui sæculo decimo tertio floruit. Percutitur leviter maxilla, ut confirmatus ritum memoria teneat, et simul recordetur eorum quæ sui causa passus est Christus. Græci et Orientales plures corporis partes ungunt.<sup>2</sup>

Breviter de Sacramento hoc egimus, sed quæ magis scitu sunt necessaria præ oculis lectorum posuimus. Studium autem sacerdotum Dei in eo ponendum erit, ut fideles divinis muneribus suscipiendis faciant idoneos, doctrina et virtutum exercitio, eosque virtute ex alto indutos fortes et invictos in fidei certamine præstent, duces quidem in acie, socii verò triumphi et gloriæ futuri.

(1) In admonit. in seq. lib. p. 95. Tom. ii. Musei Italici.

(2) Vide apud Trombellium diss. v. c. iii. qu. iii. de Confirm.



# TRACTATUS XI.

## DE EUCHARISTIA.

---

### PROŒMIUM.

1. Præ cæteris sacramentis EUCHARISTIA diligenter tractanda est, tum ob summam ejus dignitatem, tum ob vehementiores hostium in eam impetus. *Eucharistia* vox Græca est, quæ *gratiarum actio* reddi potest, quod nomen datum est Sacramento quod Christus post ultimam cœnam instituit, eo quod gratias suo Patri egisse—*εὐχαρισήσας*,—antequam Sacramentum Apostolis distribueret, legatur. *Eulogia* interdum, præsertim a Græcis, vocatur, a benedictione seu consecratione, qua conficitur, quapropter a Paulo *calix benedictionis*—*τὸ ποτήριον τῆς ἐνλογίας* nominatur.<sup>1</sup> *Cæna Dominica* nonnumquam dictum est, quia occasione ultimæ cœnæ, quam cum Apostolis celebravit Christus, institutum est, quamvis nonnisi post cœnam, uti refert Lucas. Hoc nomen plerisque novatoribus mire placuit. Aliis nominibus aliquando designatum est, quæ singula explicare haud pretium operæ videtur. Duplici ratione spectari potest eucharistia, tamquam Sacrificium quo Deus colitur, et tamquam Sacramentum, quo reficiuntur fideles, sacrificii facti participes. Placet imprimis de ea tamquam Sacramento agere, quum de veritate præsentiae Christi Domini maxima sit controversia, ex qua pendet tota Sacrificii tractatio.

(1) Oxonienses fatentur consecrationis ritum hac significari voce. Oxford Tracts, vol. 1. No. 34. Præiverat Calvinus: "*Benedicere ergo calicem* significat in hunc usum consecrare etc." *In locum.*



## PARS I.

## DE EUCHARISTIÆ SACRAMENTO.

## CAPUT I.

## DE RITU EUCHARISTICO.

2. Quakeri sectariis cæteris longius progressi ritum Eucharisticum prorsus rejecerunt, asserentes Christum nullum instituisse hujusmodi ritum, sed pane et vino, pro Judæorum more, post agni esum usum esse, indeque sumpsisse occasionem Apostolorum mentes evehendi ad corpus suum verum et sanguinem, haud illud quod foris videbatur, sed cœleste prorsus et spiritale, quo animæ reficiuntur. Quod alias vocant *semen, lumen, vitam*, ipsum est quod corpus spirituale hoc loco designant. Apostolos, vel alios fideles quid simile aliquando egisse ei quod Christus cœnando peregerat, haud gravantur fateri; sed ritum æstimant judaicum, ad tempus servatum, eorum causa qui spirituales illum cibum manducare haud didicerant. Sententia hæc adeo repugnat scripturæ, antiquitatis consensui, et ipsi sensui christiano, ut vix sit qui eam seriò refellendam censeat: attamen quum Quakeri numero, opibus, et plurimis bonorum civium dotibus spectabiles sint, in hac præsertim urbe, liceat nobis, nullo viæ duce, rem aggredi. Ne statim cum cæteris sectariis ineamus certamen, ritum eucharisticum a Christo institutum, perpetuò in Ecclesia servandum, ostendemus; postea ipsius naturam, et quod latet sub speciebus arcanum, contra reliquos novatores propugnaturi.

## PROPOSITIO.

*Christus Dominus ritum instituit eucharisticum sub panis et vini speciebus perpetuo in Ecclesia sua servandum.*

*Probatur I. ex Scripturis.*

3. Præter Matthæum, Marcum, et Lucam, Paulus refert quid Christus pridie suæ mortis egerit, et præceptum datum Apostolis ut id ipsi in sui memoriam peragerent. “Ego enim accepi a Domino, quod et tradidi vobis, quoniam Dominus Jesus, in qua nocte tradebatur, accepit panem, et gratias agens fregit, et dixit: accipite et manducate: hoc est corpus meum,

quod pro vobis tradetur : hoc facite in meam commemorationem. Similiter et calicem, postquam cœnavit, dicens : Hic calix novum Testamentum est in meo sanguine. Hoc facite, quotiescumque bibetis, in meam commemorationem.”<sup>1</sup> Quod igitur Jesum facientem viderant, ipsi jussi sunt facere, in ejus memoriam. Illud autem præceptum non eos tantum spectare, sed alios sui ministerii consortes, liquet ex eo quod, Apostolo auctore, ritus ille apud Corinthios inductus esset, quem et retinendum innuit, docens qua animi munditie esse oporteat, qui cibi illius particeps esse velit. Imo ritum hunc ad secundum usque Christi adventum plane dicit duraturum, postquam enim, verbis supra recitatis, retulerat Christi actum, jussumque, statim subjunxit : “Quotiescumque enim manducabitis panem hunc et calicem bibetis : mortem Domini annuntiabitis donec veniat.”<sup>2</sup> Hæ voces de secundo adventu Domini plane intelligendæ sunt, juxta illud Apocalypsis : “tamen id, quod habetis, tenete donec veniam :”<sup>3</sup> et illud Pauli : “expectantes beatam spem, et adventum gloriæ magni Dei, et Salvatoris nostri Jesu Christi.”<sup>4</sup>

*Probatur II. ex omnium sæculorum a Christo sensu et usu.*

4. In re adeo manifesta superfluum videtur specialia afferre documenta, Liturgiæ scilicet omnes, patrum scripta, et quotque supersunt christianæ vetustatis argumenta testantur fidem de ritu illo semper et ubique celebrato, qui etiam præcipuum Religionis munus habebatur. Hæc deinceps adducendi plurima erit occasio.

#### OBJECTIONES SOLVUNTUR.

5. *Obj.* 1. Mos erat Judæis, ut convivii Paschalis magister convivis panem vinumque porrigeret post agni esum :<sup>5</sup> Ergo nihil singulare egit Christus, sed ex more illo occasionem sumpsit ad cœleste suum corpus mentes evehendi.

*Resp.* Si quid hujusmodi fieri consueverit, omnino distat ab illa Christi actione, qua corpus suum et sanguinem se dare affirmavit. De cœlesti et spiritali corpore ejus quod dicunt Quakeri, animi ægri somniis simillima sunt, et nullo idoneo probantur testimonio. Unicum ejus corpus novimus, illud quod pro nobis datum est—τὸ ὑπὲρ ὑμῶν διδόμενον,<sup>6</sup>—sanguinem etiam pro multis fusum in peccatorum remissionem—τὸ περὶ πολλῶν ἐκχυνόμενον εἰς ἄφεσιν ἁμαρτιῶν.<sup>7</sup>

6. *Obj.* 2. Christus illis verbis : “hoc facite in meam commemoratio-

(1) I. Cor. xi. 23.

(2) Ibidem 27.

(3) Apoc. ii. 25.

(4) Titum ii. 13.

(5) Barclay Prop. xiii. § vi.

(6) Luc. xxvi. 26.

(7) Mat. xxvi. 28.

nem," tantum indicavit se velle ut Apostoli dum ederent, biberentve, illius meminerint, quo cum tunc ultima vice convivabantur.<sup>1</sup>

*Resp.* Obvia vis verborum est ipsos facere debere quod fecerat, et eum in finem ut illius memoriam celebrarent, iis prolatis verbis quæ protulerat: proinde non possunt de quolibet convivio explicari. Equidem Apostolus Paulus ea ad ritum in quo panis et vinum adhibentur, adjecta benedictione, retulit: "Calix benedictionis, cui benedicimus, nonne communicatio sanguinis Christi est? et panis, quem frangimus, nonne participatio corporis Domini est?"<sup>2</sup>

7. *Obj.* 3. De conviviis communibus christianorum, quæ quidam ex animi superstitione cœnam Dominicam vocabant, agit Apostolus, in iis quippe ebrii erant quidam, vel sese cibis ingurgitabant. Eos igitur ut emendat, dicit plane non esse cœnam huiusmodi, quam falso sibi fingeant: nam cœna vera spiritalis est, et mysterium.

*Resp.* Celebrantur quidem a Christianis convivia, quæ *Agapæ* utpote dilectionis fraternæ indicia, vocabantur, quæ tamen apud Corinthios gravia, quæ plorat Apostolus, habuit incommoda. Ut eos ab excessibus deterreret, qui cum indigna eucharistiæ sumptione erat conjuncti, quippe ad eam convivæ etiam accedebant, in memoriam iis revocavit quam tradiderat huius Sacramenti originem sibi divinitus revelatam. Hoc cœnam Dominicam designatum esse non constat, quum convivio nomen potius datum censendum sit. Meritò negat huiusmodi convivium dici posse cœnam Domini, quum jam non fieret ad instar illius cœnæ quam ante institutum Sacramentum cum discipulis fecit. Cæterum omnino affirmavit sacramentum celebrandum esse, sed magna animi puritate, ad diem usque adventus Domini.

8. *Obj.* 4. Voces illæ "donec veniat" intelligendæ sunt de adventu Christi in corda hominum, Corinthiis quippe adhuc infirmis permitti potuit, *ad tempus*, ut signis illis uterentur, quæ aliis cum Christo jam resuscitatis, et in cœlestibus consistens, mentis cogitatione et affectu cordis, sunt superflua.

*Resp.* Parallela loca quæ adduximus ostendunt de Domini adventu exteriori, in fine sæculi, esse sermonem. Igitur haud ad tempus, sed semper data est facultas mortem Domini Sacramenti celebratione commemorandi. Nec infirmis tantum ita consultum, quum Apostolus omnibus injungat ut corde mundato ad cibum illum cœlestem degustandum accedant.

9. *Obj.* 5. Quæ Christus lavando Apostolorum pedes dixit, præceptum potius sonant, quam quæ de pane et vino protulit: attamen nemo se ad eum imitandum ea in re teneri censet.

*Resp.* Ex tota rei gestæ relatione satis colligitur humilitatem nobis commendari, quin actus ipse pedes lavandi districte præcipiatur. Cæterum si qua inde oriri posset dubitatio, ex Apostolorum rebus gestis et documentis, et ex totius antiquitatis christianæ sensu et usu facile excuteretur.

(1) Barclay Prop. xiii. § vi.

(2) I. Cor. x. 16.

10. *Obj.* 6. Joannes, qui spiritalis erat discipulus, utpote sinus Dominici arcanorum conscius, de pane et vino in cœna siluit, plurima alia referens.

*Resp.* Siluit quidem Joannes de eucharistiæ institutione, quam jam retulerant alii scriptores sacri. Hæc idonea silentii ratio, præterquam quod ipse pollicitationem Christi de pane cœlesti dando retulisset.

11. *Obj.* 7. Quæ sexto capite sui Evangelii refert Joannes a versiculo 32 ad finem usque, de corpore Christi cœlesti, nempe de semine vitæ, intelligenda sunt, dicit enim: “Pater meus dat vobis panem de cœlo verum.” <sup>⁂</sup> Ego sum panis qui de cœlo descendi.” Nemo autem dixerit corpus suum externum quod in terris habuit e cœlo esse delapsum.

*Resp.* De se loquitur Christus, seque a cœlo descendisse, et esse in cœlo dicit, ut suam originem a Patre, et intimam naturæ conjunctionem cum Patre insinuet. Se nominat panem, animæ cibum, qui cœlitus veluti delapsus est, ipse enim qui in terris versabatur, erat idem qui in cœlis cum Patre ab ævo regnabat. Pater dare hunc cibum dicitur, quia Filium humanam carnem indui voluit. Hanc carnem, ipsam quæ pro mundi salute danda erat, se daturum pollicitus est. Nullum hic indicium corporis illius fictitii quod cœleste vocant Quakeri.

## CAPUT II.

## DE RE EUCHARISTIÆ.

12. Fuerunt tempore martyris Ignatii qui Eucharistiam “esse carnem Salvatoris nostri Jesu Christi” negarent, prout ipse testatur, Menandriani scilicet qui veram ab eo assumptam esse carnem inficientes, in alium, necessaria consequentia, inciderunt errorem. Iconomachi, octavo sæculo, dum sacrarum imaginum venerationem impugnarent, Eucharistiam unicam imaginem, quæ colenda foret, utpote ipsum Dominum speciebus Sacramentalibus, tamquam velo quodam, obtectum dicebant: quorum temeraria loquendi ratio secundi Nicæni concilii Patribus gravissime displicuit, quamvis de re Sacramenti nullus esset error. Sæculo nono Joannes Scotus haud satis accurate de hoc Sacramento disseruit, ab Adrevaldo monacho Floriacensi abunde refutatus.

13. Sæculo undecimo, anno circiter 1047, Berengarius Turonensis, Ecclesiæ Andegavensis in Galliis Archidiaconus, primus omnium cœpit docere Eucharistiam esse dumtaxat figuram et imaginem corporis et sanguinis Christi. Errorem statim scriptis perstrinxerunt eruditi quique avitæ fidei vindices, præsertim præsules egregii Adelmanus Brixienis, Hugo Lingonensis, Guitmundus Aversanus, Deoduinus Leodiensis, quibuscum pro Ecclesia militarunt Lantfrancus, tunc Beccensis monasterii Prior, paulo post Archiepiscopus Cantuariensis, Durandus Abbas Troarnensis, et Algerus Cluniacensis scholasticus, deinde monachus. Concilia plurima et Pontifices damnarunt novum dogma; scilicet Romanum sub S. Leone IX., anno 1050, eodemque anno Vercellense, ac Parisiense; Turo-nense ac Florentinum sub Victore II., anno 1055; Romanum sub Nicolao II. anno 1059; Rothomagense anno 1063; Pictaviense anno 1075; Romanum sub S. Gregorio VII. anno 1078; et alterum Romanum anno 1079. Dogma Catholicum agnovit, et hæresim iterum damnavit concilium plurimorum episcoporum Placentiæ anno 1095, sub Urbano II.

14. Auctoritati cessit Berengarius, quamvis ob mysterii difficultatem in errorem plus semel sit lapsus, tandem aliquando in fidei doctrina humili poenitentique animo conquiescens. Pluribus fidei formulis subscripsit, quarum unam recitare juvat, quam in concilio Romano, anno 1079, Gregorio VII. præside, palam fecit: “Ego Berengarius, corde credo et ore confiteor, panem et vinum quæ ponuntur in altari, per mysterium sacræ orationis et verba nostri Redemptoris, substantialiter converti in veram et propriam ac vivificam carnem et sanguinem Jesu Christi Domini nostri; et post consecrationem esse verum Christi corpus, quod natum

est de Virgine, et quod pro salute mundi oblatum in cruce pependit, et quod sedet ad dexteram Patris: et verum sanguinem Christi, qui de latere ejus effusus est, non tantum per signum et virtutem Sacramenti, sed in proprietate naturæ, et veritate substantiæ. Sicut in hoc Brevi continetur, et ego legi, et vos intelligitis, sic credo, nec contra hanc fidem ulterius docebo. Sic me Deus adjuvet, et hæc sancta Dei Evangelia.”<sup>1</sup>

15. Sæculo duodecimo Petrus de Bruis negavit quemquam jam eam conversionem panis et vini in corpus et sanguinem Christi efficere valere, quam ipse Christus in cœna effecit.<sup>2</sup> Albigenses sequenti sæculo, Manichæorum errores renovantes, Sacramentum Eucharistiæ denegarunt. Wickleff sæculo decimo quarto panem et vinum in Christi corpus et sanguinem converti inficiatus est; quem tamen Huss non est hac in re imitatus, semel deserto magistro.

16. Sæculo decimo sexto, Andreas Carolostadius, Archidiaconus Wittenbergensis, Lutheri discipulus, magistro repugnavit de mysterio Eucharistiæ, verba Christi de corpore suo veluti digito monstrato interpretans. Ulricus Zuinglius, Tigurinus Pastor, panem intellexit corpus dici, tamquam illius signum; et quum Catholici eum urgerent, moris non esse in institutis novis rem cum signo commutare loquendo, nullo indicio dato, spiritus, (“ater an albus fuerit” se haud meminisse dicebat) ei in memoriam revocavit vetus Phase; de victima quippe dictum est: “Est enim Phase, id est transitus Domini.”<sup>3</sup> Cæterum feliciter ei exemplum haud cessit, vocabantur enim victimæ nomine finis ob quem immolabantur, adeo ut *Pecatum* diceretur hostia pro peccato expiando oblata; sic et *Phase* dicebatur victima transitus occasione immolata. Inde autem nihil sequebatur, quo vis obvia sententiæ Dominicæ infirmari posset, nec enim panis Christi corporis victima habebatur. Lutherus viriliter pro reali Christi Domini in Eucharistia præsentia pugnavit, contra Carolostadium, aliosque *Sacramentarios* nuncupatos, quia illud nudum Sacramentum, seu signum corporis Christi habebant. Quemque ad fidem tanti mysterii verbis hujusmodi hortatus est: “Tu dic: Nolo deliberare an sit verum, vel non, sed simpliciter credam sicut Christus dicit: ‘Hoc est corpus meum.’ Si sum idololatra, fit culpa et periculo Christi, cujus verba sic sonant: ipse igitur me bene defendet.”<sup>4</sup> Cæterum et panem et vinum adesse una cum corpore et sanguine Christi censuit Lutherus, Zuinglianos alioquin summe detestans: “Hæreticos censemus et alienos ab Ecclesia Dei Zuinglianos et omnes Sacramentarios qui negant corpus et sanguinem Christi ore carnali sumi in venerabili eucharistia.”<sup>5</sup>

17. Calvinus discordes partes ad concordiam ut traheret, vel utrasque

(1) Vide apud Baronium Annal. Eccl. t. xi. ad annum 1079.

(2) Vide ep. i. Ven. Petri Cluniac. adv. Petrobusian.

(3) Exod. xii.

(4) Enarr. in Ps. xlv. fol. 491 tom. 3. Op. edit. Jenæ.

(5) Colloq. Isl. de Verbo Dei.

sibi adscisceret, novam adinvenit rationem rem explicandi ; sed verbis licet amplissimis usus, a Zuinglii mente non recessit. “ Primo,” inquit “ signa sunt panis et vinum, quæ invisibile alimentum, quod percipimus ex carne et sanguine Christi nobis repræsentant.” . . . Jam ergo habemus, in quem finem spectet mystica hæc benedictio : nempe quo nobis confirmet, corpus Domini sic pro nobis semel esse immolatum, ut nunc eo vescamur, ac vescendo unici illius sacrificii efficaciam in nobis sentiamus : sanguinem ejus sic pro nobis semel fustum, ut sit nobis perpetuus potus.”<sup>1</sup> Liquet nullam realem corporis et sanguinis Christi præsentiam hac sententia haberi in Eucharistia.

18. Lutherani, ducem secuti, in Augustana confessione, “ de cœna Domini docent quod corpus et sanguis Christi vere adsint, et distribuantur vescentibus in cœna Domini.” Attamen Melanchton verba hæc mitigavit, dum prælo mandaret illam quam ipse exaraverat confessionem, substituendo : “ vere exhibeantur vescentibus ;” de qua mutatione in documento jam publici juris facto, meritò queritur Walchius suorum nomine.<sup>2</sup> “ Primum delevit verbum *adsint*, quo vera ac realis præsentia corporis et sanguinis Jesu Christi in sacra cœna significata fuerat ; deinde expunxit vocem *distribuantur*, atque substituit vocabulum *exhibeantur*, ut inde oriretur licentia non credendi distributionem corporis et sanguinis Christi manu ministri factam, vel ratione manducantium et bibentium, sive sint digni, sive indigni, oralem participationem. Atqui hæc sunt imprimis momenta, de quibus in doctrina de sacra cœna inter nos ac reformatos disputatur, nimirum de vera, reali, substantiali præsentia corporis et sanguinis Jesu Christi in sacra cœna : de orali manducatione ac bibitione, deque indignorum participatione.”<sup>3</sup> Hæc Lutheranus theologus. Attamen anno 1817 prodiit edictum Gulielmi III. regis Borussiae, quo sectæ illæ discordes amico junguntur foedere, in unum coalescentes, relicta libertate sentiendi de eucharistia prout libuerit !

19. Calvini obtinuit apud plerosque sectarios sententia, qui verborum involucris vix student eam obtegere. Anglicani fere soli eum antiquitatis venerandæ pudorem servant, ut verbis speciosis de *reali* præsentia et communione Christi nobiscum disserant, quamvis revera corpus et sanguis substantialiter adesse, et a ministro distribui, et ore suscipi a fidelibus vel negent, vel se credere frustra sibi blandiantur ; ex ipsa enim eorum explicatione satis patet signa tantum et symbola haberi, quæ a ministro ad repræsentandum Christi corpus et sanguinem precibus destinata, fiunt susipientibus, ex fide et animi affectu, occasio virtutis et efficacæ Christi passionis experiendæ.<sup>4</sup> Manet panis cum vino, nec quid in iis mutatur,

(1) Inst. l. iv. c. xvii. n. 1.

(2) Introd. ad lib. symbol. Luth. l. i. c. iii. § xii. p. 186.

(3) Ibidem.

(4) “ I begin with the Church of England. . . . It teacheth therefore, ‘ that in the



nisi *symbolice et repræsentative*; ideoque corpus et sanguis Christi non adsunt, quamvis quis mentis quodam conatu ea adesse, sibi communicari, seque sic refici et refocillari concipiat. Quas subierit vices *Liturgia Anglicana*, ut novatorum accommodaretur placitis, Oxonienses dolenter narrant.<sup>1</sup> Eduardo puero solium occupante semel iterumque mutata est Cranmero auctore, qui consiliis usus Bucerii, Petri Martyris, et aliorum, in secunda emendatione adeo profecit, ut Rubrica contra realem Christi præsentiam insereretur. Elizabeth Liturgiam novæ subiecit correctioni, et Rubrica illa sublata, et conjunctis formulis verborum quibus Sacramentum dabatur, res ita composuit, ut præsentia realis haud plane denegaretur. Quos Episcopalianos vocamus, Anglicanis scilicet adhærentes, suam Liturgiam immutarunt, postquam civili rerum conversione ab Anglicanorum auctoritate in rebus religionis immunes evaserunt: sed quamvis invocationem Spiritus Sancti adoptaverint, iis utuntur vocibus quæ Calvinii placitis sunt accommodata. Ipsi qui apud nos dicuntur Lutherani plerique Lutheri dogma hac de re vel penitus deseruerunt, vel vocibus tantum retinent, in partes scilicet scissi diversas propugnant sententias. Unitarii verborum ambagibus remotis, profitentur eucharistiam mera esse symbola Christi mortis, nulla efficacia prædita, sed serias et utiles cogitationes excitandi causa instituta.<sup>2</sup>

20. Catholicam de eucharistia doctrinam concilium Tridentinum, anathemate in contra dicentes lato, vindicavit: "Si quis negaverit in sanctissimæ eucharistiæ Sacramento contineri vere, realiter, et substantialiter corpus et sanguinem, una cum anima et divinitate Domini nostri Jesu Christi, et proinde totum Christum; sed dixerit tantummodo esse in eo,

Blessed Sacrament, the Body of CHRIST is given, taken, and eaten; so that to the worthy receivers the consecrated and broken bread is the communication of the Body of CHRIST; and likewise the consecrated Cup the communication of His Blood." Hæc Joannes Cosin Episcopus quondam Durham, quem sequuntur Oxonienses. Vol. i. tract. 27. Alius episcopus Anglicanus L. Andrews, quem Cosinus citat, respondens Bellarmino scripsit: "CHRIST said, This is my Body; in this, the object, we are agreed with you, the manner only is controverted. We hold by a firm belief, that it is the Body of Christ." Explicat Cosinus Anglicanam sententiam: "We believe a presence and union of Christ with our soul and body, which we know not how to call better than sacramental, that is, effected by eating; that while we eat and drink the consecrated Bread and Wine, we eat and drink therewithal the Body and Blood of CHRIST, not in a corporal manner, but in some other way, incomprehensible, known only to God, which we call spiritual." Ibidem.

(1) "It makes, in truth, a man's 'eyes gush out with water' to see in these notices, how the glory of our church, the days of her youth, and her first love are departed: and to think what she might have been had she stood in the old paths. 'The virgin daughter of my people is broken with a great breach, with a very grievous blow.'" Oxford Tracts, No. 81. Vol. iv.

(2) Unitarian Miscellany, Vol. i. p. 146.



ut in signo, vel figura, aut virtute, anathema sit.”<sup>1</sup> Zuinglii errorem una cum Calviniano percellit hic canon, adeoque Anglicanos, ipsi enim nonnisi virtutem et efficaciam corporis et sanguinis Christi percipi revera credunt, quamvis ipsum corpus et sanguinem quandoque, verborum licentia usi, se recipere affirment. In eo autem fallunt et falluntur quod de re ipsa nobiscum convenire se aliquando profiteantur, de modo tantum disceptantes: agitur enim de veritate præsentiae corporis et sanguinis Christi. Fallaciam verborum quibus utuntur, et sententiae quam propugnant, feliciter exponit Hallam, celebris scriptor acatholicus.<sup>2</sup> Ad modum præsentiae quod attinet, nihil ab Ecclesia reperitur definitum, nisi quod vocibus illis Tridentinis enuntietur, scilicet quod *vere* adsit corpus et sanguis Christi, non signo tantum et figura; quod *realiter*, non fide tantum adesse censeatur; quod *substantialiter*, non mera virtute et efficacia. Cæterum modus ipse prorsus ineffabilis est, nec enim naturali sua conditione præsens est Christus, sed ratione mysterii plena, quam adorare potius quam scrutari vel explicare præstat. *Transubstantiatio* ad merum modum præsentiae non potest referri, prout a plerisque Anglicanis fit, est enim ratio qua fit præsens, vel qua substantia panis et vini in corpus et sanguinem convertitur.

Quum gravissima sit hæc controversia, singula Scripturarum testimonia perpendere, adjecta veterum interpretatione, juvat. De promissionis verbis quæ Joannes refert, imprimis agendum est.

(1) Sess. xiii. Can. i.

(2) “This middle system (*Anglican*,) (if indeed it is to be considered a genuine opinion, and not rather a political device,)\* had no advantage but in the disguise of unmeaning terms; while it had the peculiar infelicity of departing as much from the literal sense of the words of institution, wherein the former triumphed, as the Zuinglian interpretation itself. I know not whether I can state, in language tolerably perspicuous, this jargon of bad metaphysical theology. . . . It can hardly fail to strike every unprejudiced reader, that a material substance can only in a very figurative sense be said to be received through faith; that there can be no real presence of such a body, consistently with the proper use of language, but by its local occupation of space; and that as the Romish tenet of Transubstantiation is the best, so this of the Calvinists is the worst imagined of the three, that have been opposed to the simplicity of the Helvetic explanations.” Hallam’s Constitutional Hist. England, Vol. i.

\*“The truth is, that there were but two opinions at bottom as to this main point of controversy; nor in the nature of things was it possible that there should be more: for what can be predicated concerning a body, in its relation to a given space, but presence and absence?”

## CAPUT III.

## DE SEXTO JOANNIS CAPITE.

## PROPOSITIO.

*Vera, realis, et substantialis præsentia corporis et sanguinis Domini nostri Jesu Christi in eucharistia invicte probatur ex promissionis verbis relatis apud Joannem.*

*Probatur I. ex Christi Domini verbis.*

21. Quum Christus panibus multiplicatis, ita ut plura millia hominum satiarentur, omnium in se admirationem provocasset, secuti sunt eum pluri, par prodigium videndi spe illecti, eumque Capharnai invenerunt. Huic curiositati et ciborum desiderio mederi voluit, occasione inde accepta eos ad cælestis cibi esuriem excitandi. Ex iis quidam cibum cœlitus dandum postularunt prout Moyses majoribus eorum manna dederat. Se cibum esse qui e cœlo descenderat dixit, suamque carnem illis se daturum manducandam. “Panis quem ego dabo, caro mea est pro mundi vita.”<sup>1</sup> Vix enuntiaverat se carnem suam in cibum daturum, panis quippe nomine apud Hebræos omnis cibus intelligebatur, quando grave ortum est contradicentium murmur, et auditores in duas scissi sunt partes, nonnullis negantibus id fieri posse, aliis affirmantibus: “Litigabant ergo Judæi ad invicem, dicentes: Quomodo potest hic nobis carnem suam dare ad manducandum?” Dum inter se contenderent de rei possibilitate Christus iteravit propositionem, minans interitum iis qui oblato cibo vesci nollent: “Dixit ergo eis Jesus: Amen, Amen, dico vobis: nisi manducaveritis carnem filii hominis, et biberitis ejus sanguinem, non habebitis vitam in vobis.” Eodem spiritu dicere perrexit: “Qui manducat meam carnem, et bibit meum sanguinem, habet vitam æternam, et ego resuscitabo eum in novissimo die. Caro enim mea vere est cibus, et sanguis meus vere est potus. Qui manducat meam carnem, et bibit meum sanguinem, in me manet, et ego in illo. Sicut misit me vivens Pater, et ego vivo propter Patrem, et qui manducat me, et ipse vivet propter me. Hic est panis, qui de cœlo descendit. Non sicut manducaverunt patres vestri manna, et mortui sunt. Qui manducat hunc panem vivet in æternum. Hæc dixit in synagoga docens, in Capharnaum.”

22. Ex tota narratione liquet de cibo esse sermonem, panem dederat Christus; panem quæsierunt Judæi, sed veluti parvi facientes eum qui præ manibus multiplicatus fuerat, e cœlo dandum desiderarunt, prout Moysis tempore cœlo deciderat manna. Christus panem e cœlo a Patre

(1) Joan. vi. 52.

suo dari affirmavit, seque panem illum esse, suamque carnem, ipsam quæ pro mundi salute inter supplicia daretur, se etiam in cibum daturum. Illis de tanta promissione inter se contendentibus, quomodo fieri posset, idonea oblata est occasio suam explicandi mentem, et offensionis causam tollendi, si de vera suæ carnis manducatione haud fuisset locutus. Attamen verbis maxime vehementibus, et minis adjectis dirissimis, ipsam carnem manducandam et sanguinem bibendum dixit: et magna verborum copia iterum iterumque manducationem illam inculcavit. Sicut recusantibus intentavit pœnas, susipientibus vitæ æternæ præmia, et intimam hac in vita cum illo conjunctionem pollicitus est, se verum cibum animæ affirmans. Orationem clausit, nulla data explicatione, nam quæ postea ab ipso dicta referuntur, ab iis quæ in synagoga palam protulit, haud sine causa, ab Evangelista discernuntur,<sup>1</sup> ut intelligamus integram esse concionem; et promissionem, licet durius exceptam et in quæstionem vocatam a Judæis, nulla voce fuisse mitigatam, et ad sensum auditoribus accommodatum reductam.

23. Soluta concione, quæ dixerat Jesus adeo vehementer, inter discipulorum turbam animo revolvebantur, qui nec acquieverunt tanto mysterio. “Multi ergo audientes ex discipulis ejus dixerunt: Durus est hic sermo, et quis potest eum audire?” Res erat, uti liquet, maxime captu difficilis, quam plurimi qui se discipulos hactenus profitebantur, noluerunt amplecti. Argumento est validissimo Christi sermonem multitudini universæ, et ipsi qui eum audire consuevit discipulorum cœtui, sensum veræ manducationis ingessisse. Jam verò Christus vix potuit absque injuria auditorum doctrinam involvere verborum ambagibus, quæ simplicius explicata, nemini foret offensioni, quum prout sonabat accepta universos fere devios ageret a salutis semita. Sed nec discipulis suis privatim eam explicationem præbuit, qua tolleretur difficultas. “Sciens autem Jesus apud semetipsum quia murmurarent de hoc discipuli ejus, dixit eis: Hoc vos scandalizat? Si ergo videritis Filium hominis ascendentem ubi erat prius? Spiritus est qui vivificat: caro non prodest quidquam. Verba quæ ego locutus sum vobis, Spiritus et vita sunt. Sed sunt quidam ex vobis qui non credunt. Sciebat enim ab initio Jesus, qui essent non credentes, et quis traditurus esset eum. Et dicebat: Propterea dixi vobis, quia nemo potest venire ad me, nisi fuerit ei datum a Patre meo.” Hæc Christi oratio ad discipulos diligenter perpendenda est, ut animus ejus innotescat. Quum ægre ferrent eum de carne sua danda locutum esse, quæsivit quid illis videretur si eum ascendentem ad summos cœlos, unde venit, conspicerent. Hoc veluti argumentum veritatis indicat, ut sibi credatur. Spiritus,—το πνευμα—divinus Paracletus est qui vitam animæ impertitur, fidei largiendo donum, et cordis affectus sibi charitate devinciendo: caro, humanus scilicet sensus

(1) “In this and the following verses, (spoken not in the Synagogue, but elsewhere, and, no doubt, in private,) our Lord condescends,” &c. Pergit Bloomfield Protestantico more testimonia explicare, sed, quod nostri interest, locorum discrimen admittit.

et cogitatio, nil prodest in fidei mysteriis scrutandis. Quæ protulerat, spiritum—*πνεῦμα*—esse et vitam dixit, spiritualia et vivifica, a divino Spiritu profecta, et veritates divinas spectantia, quarum fides spiritum et vitam afferret.<sup>1</sup> Sed esse ex illis qui animo non fovebant fidem, novit ipse, cordium quum esset scrutator. Fidei igitur necessitatem his verbis inculcavit, nam absque ea tantum arcanum nemo potuit amplecti, quam Dei donum esse, magnis precibus expetendum, magnis desideriis exoptandum tandem innuit.

24. Jam verò si quid in nostra hujus sermonis explicatione obscurum vel ambiguum videatur, eventus attendendus est ut noscamus utrum interpretationi nostræ conveniat: scilicet si post Christi explicationem discipuli pertinaces inventi sint, et magistrum deseruerint, meritò inferimus eum suæ sententiæ duritiem haud emollivisse. Ita autem revera contigit: “Ex hoc multi discipulorum ejus abierunt retro: et jam non cum illo ambulabant.” Ergo illis persuasum est Christum perstitisse in ea affirmanda suæ carnis manducatione, a qua illos abhorrere noverat. Numquid infeliciter Christo cessit suam mentem aperire volenti? numquid omisisset omnem conatum ad discipulos retinendos, claris et apertis verbis, si male intellexissent ejus verba, quum ipse de sola fide ageret, vel de symbolis et signis?

25. Ad Apostolos nunc oculos convertere oportet, ut quid ipsi senserint noscamus, nam credendum eos saltem verum verborum sensum aliquatenus intellexisse. “Dixit ergo Jesus ad duodecim: Numquid et vos vultis abire? Respondit ergo ei Simon Petrus: Domine, ad quem ibimus? verba vitæ æternæ habes. Et nos credidimus, et cognovimus, quia tu es Christus Filius Dei. Respondit ei Jesus: Nonne ego vos duodecim elegi: et ex vobis unus diabolus est? Dicebat autem Judam Simonis Iscariotem: hic enim erat traditurus eum, cum esset unus ex duodecim.” Liquet Apostolos non alia conditione invitari ut maneant, nisi humiliter assensu excipiendo quæ Christus dixerat; eaque de causa Petrum nomine cæterorum integrum profiteri obsequium. Non allegat discedentium errorem, quo verba magistri perperam interpretati sunt, sed hujus auctoritatem, cui aliam anteferre nefas foret. Eloquia et documenta ejus vitam afferre credentibus agnovit, et omnium nomine fidem professus est, noverant enim divinam ejus originem et naturam ex iis quæ patrata viderant prodigiis. Unus tamen inter illos latuit perditionis filius, quem notavit Christus, ne quis se falsa pietatis specie decipi putaret.

26. Ex tota illa narratione invictum veræ carnis Christi in Sacramento dandæ, substantialiter et realiter, habetur argumentum: quum cibum animæ cœlestem se daturum promiserit, eumque suam carnem fore affirmaverit, nec murmurantibus Judæis, nec discedentibus discipulis mitigaverit ejus verba, sed Apostolis significaverit, iis etiam discedere per se licere, nisi vellent arcanum quod proposuit toto mentis obsequio adorare.

(1) Vide Rom. viii. 4. ubi carnis et spiritus sensus evolvitur.

*Probatur II. ex patrum interpretatione.*

27. S. CYPRIANUS explicans petitionem “panem nostrum,” ait: “Hunc autem panem dari nobis quotidie postulamus, ne qui in Christo sumus, et eucharistiam quotidie ad cibum salutis accipimus, intercedente aliquo graviore delicto, dum abstenti et non communicantes a cœlesti pane prohibemur, a Christi corpore separemur, ipso prædicante et monente: Ego sum panis vitæ qui de cœlo descendi. Si quis ederit de meo pane, vivet in æternum. Panis autem quem ego dederò, caro mea est pro sæculi vita. Quando ergo dicit in æternum vivere, si quis ederit de ejus pane, ut manifestum est eos vivere qui corpus ejus attingunt, et eucharistiam jure communicationis accipiunt: ita contra timendum est et orandum, ne dum quis abstentus separatur a Christi corpore, procul remaneat a salute, comminante ipso et dicente: Nisi ederitis carnem filii hominis, et biberitis sanguinem ejus, non habebitis vitam in vobis. Et ideo panem nostrum, id est, Christum dari nobis quotidie petimus, ut qui in Christo manemus et vivimus, a sanctificatione ejus et corpore non recedamus.”<sup>1</sup>

28. S. HILARIUS Patrem et Filium natura unum esse, non voluntatis tantum consensu, probat ex eo quod et nos naturaliter in Sacramento Christo jungamur. “Eos qui inter Patrem et Filium voluntatis ingerunt unitatem, interrogo, utrumne per naturæ veritatem hodie Christus in nobis sit, an per concordiam voluntatis? Si enim vere Verbum caro factum est, et nos vere Verbum carnem cibo Dominico sumimus, quomodo non naturaliter manere in nobis existimandus est, qui et naturam carnis nostræ jam inseparabilem sibi homo natus assumpsit; et naturam carnis sic ad naturam æternitatis sub Sacramento nobis communicandæ carnis admiscuit? Ita enim omnes unum sumus; quia et in Christo Pater est, et Christus in nobis est. Quisquis ergo naturaliter Patrem in Christo negabit, neget prius non naturaliter vel se in Christo, vel Christum sibi inesse; quia in Christo Pater, et Christus in nobis, unum in his esse nos faciunt. Si vere igitur carnem corporis nostri Christus assumpsit, et vere homo ille, qui ex Maria natus fuit, Christus est, nosque vere sub mysterio carnem corporis sui sumimus, et per hoc unum erimus, quia Pater in eo est, et ille in nobis: quomodo voluntatis unitas asseritur, cum naturalis per Sacramentum proprietas perfectæ Sacramentum sit unitatis? Non est humano aut sæculi sensu in Dei rebus loquendum, neque per violentam atque imprudentem prædicationem cælestium dictorum sanitati, alienæ atque impiæ intelligentiæ extorquenda perversitas est. Quæ scripta sunt legamus, et quæ legerimus intelligamus, et tunc perfectæ fidei officio fungemur. De naturali enim in nobis Christi veritate quæ dicimus, nisi ab eo didicimus, stulte atque impie dicimus. Ipse enim ait: ‘Caro mea vere est esca, et sanguis meus vere est potus. Qui edit carnem, et bibit sanguinem meum, in me manet, et ego in eo.’ De veritate carnis et sanguinis non relictus est ambigendi

(1) Lib. de Orat. Dominica p. 237 edit. Basil.

locus: nunc enim et ipsius Domini professione, et fide nostra, vere caro est, et vere sanguis est: et hæc accepta atque hausta id efficiunt, ut et nos in Christo, et Christus in nobis sit. Anne hoc veritas non est? Contingat plane his verum non esse, qui Christum Jesum verum esse Deum dene-gant."<sup>1</sup> Hoc argumentum nihil valuisset, si fide tantum Christi corpus et sanguis in Eucharistia sumerentur.

29. S. JOANNES CHRYSOSTOMUS, rationem reddit cur Christus post panes multiplicatos de mysterio eucharistiæ locutus sit: "Si quis percontaretur, cur mysteriorum sermonem adduxerit, respondebimus quod horum nunc maxime tempus erat. . . . Propterea illud prius fecit miraculum, ut per illud non essent amplius increduli his quæ postmodum diceret. . . . Quare necessario dicendum quam admiranda mysteria, et cur data sint, et quæ-nam eorum utilitas. Unum corpus sumus, et membra ex carne et ossibus ejus. Ut autem non solum per dilectionem, sed reipsa, in illam carnem convertamur, per cibum id efficitur, quem nobis largitus est. Cum enim suum in nos amorem indicare vellet, per corpus se nobis commiscuit, et in unum nobiscum redegit, ut corpus cum capite uniretur: hoc enim aman-tium maxime est. Hoc Job significabat de servis a quibus maxime ama-batur, qui suum amorem præferentes, dicebant: Quis daret nobis, ut ejus carnibus impleremur? Quod Christus fecit, ut majori nos caritate adstrin-geret; et ut suum in nos ostenderet desiderium, non se tantum videri per-mittens desiderantibus, sed et tangi, et manducari, et dentes carni suæ infigi, et desiderio sui omnes impleri."<sup>2</sup> Hæc non tantum exhibent inter-pretationem sacri textus ab insigni doctore, qui celebratur ob "inhærentem sententiæ sacrorum librorum explanationem," sed realem Christi præsen-tiam iis vehementioribus verbis enuntiant, quæ de perceptione fide nulla-tenus explicari possunt. Merito autem quæ speciebus contingunt, carni ipsi quæ iis velatur tribuuntur, ad veritatem substantialis præsentiae designan-dam, quamvis nihil jam pati possit caro illa, gloriosi corporis proprietati-bus prædita.

30. S. CYRILLUS ALEXANDRINUS: "Servator ipse: 'Qui manducat meam carnem,' inquit, 'et bibit meum sanguinem, in me manet, et ego in illo.' Hic enim animadvertere est operæ pretium, Christum non dicere se dumtaxat in nobis futurum secundum relationem quandam affectualem, sed et per participationem naturalem. Ut enim si quis ceram ceræ commix-tam igne simul liquaverit, unum quid ex ambabus efficit, ita per corporis Christi et pretiosi sanguinis participationem, ipse quidem in nobis, nos autem rursus in eo simul unimur. Nec enim aliter vivificari potest quod natura sua est corruptibile, quam si corporaliter unitum sit corpori ejus, qui secundum naturam suam est vita, hoc est, Unigeniti. Quid si meis verbis persuaderi te non sinis, ipsi Christo clamanti fidem adhibe: 'Amen,

(1) L. viii. de Trinit. n. 13.

(2) Hom. xlv. in Joan.

amen dico vobis: nisi manducaveritis carnem filii hominis, et biberitis ejus sanguinem non habebitis vitam in vobis. Qui enim manducat meam carnem, et bibit meum sanguinem, habet vitam æternam: et ego resuscitabo eum in novissimo die.' Audis eum aperte prædicantem, quod nisi carnem ejus manducaverimus, et biberimus ejus sanguinem, non habituri simus in nobis, hoc est, in propria carne vitam æternam? Æterna autem vita jure censebitur caro vitæ, hoc est, Unigeniti."<sup>1</sup>

31. S. LEO MAGNUS: "Dicente Domino: 'Nisi manducaveritis carnem Filii hominis, et biberitis ejus sanguinem, non habebitis vitam in vobis,' sic sacræ mensæ, fratres, communicare debetis, ut nihil prorsus de veritate corporis et sanguinis Christi ambigatis."<sup>2</sup>

#### OBJECTIONES.

32. *Obj.* 1. Christus sexto Joannis capite de cibo animæ agit, de se scilicet fide percipiendo. Judæos panem quærentes monuit, ut cibum qui in vitam æternam maneret potius quærerent: "Operamini non cibum qui perit, sed qui permanet in vitam æternam, quem filius hominis dabit vobis. . . . Hoc est opus Dei, ut credatis in eum quem misit ille."<sup>3</sup> Sicut Samaritanæ mulieri aquam vivam petendam dixit, doctrinam salutis ea intelligens; ita et cibum vitæ Judæis quærendum indicavit, alia imagine eam designans.

*Resp.* Utique a pane, quem quærebant Judæi, sumpsit occasionem Christus eos de cibo animæ alloquendi, eosque hortatus est ut hunc præ illo quærerent. Quum illi deinceps interrogarent quid sibi foret faciendum, quod opus peragendum, ut Deo forent grati, respondit illud imprimis esse necessarium, ut sibi divinitus misso, et claris indiciis designato, plenam adhiberent fidem. Ausi sunt argumentum divinæ illius missionis postulare, non qualem mox dederat, multiplicatis panibus, sed e cælo veluti depromptum, panem inde deducendo, majoribus enim suis illud suæ missionis indicium a Moyse datum objiciebant. Tunc animadvertit manna e cælo vere non delapsum, nec eas habere proprietates quæ cœlestem cibum denotant: eum enim panem vere cœlestem dicendum, qui a Patre cælo demittitur, vitam daturus mundo. Hac ratione vehemens in iis accendit desiderium cœlestem hunc cibum gustandi. Petentibus ut semper illis panem hunc daret, respondit se esse panem vitæ, nec esuriem passurum, nec sitim, quicumque ad eum accederet. Objurgavit eos deinceps eo quod illi hæc tradenti non crederent, et ad excitandam eorum æmulationem, præ oculis proposuit præmia quæ fideles ejus discipulos manebant. "Murmurabant ergo Judæi de illo, quia dixisset: Ego sum panis vivus, qui de cælo descendi."<sup>4</sup>

(1) L. x. in Joannem.

(2) Serm. lxxxix. de jejunio septimi mensis.

(3) Joan. vi. 27. 29.

(4) V. 41.



Murmur hoc cohibuit Christus, eosque ideo haud credere dixit, quia Patri docenti interius non obaudiebant. Iterum se panem vitæ esse affirmavit, et facta sui cum manna collatione, ostendit morti subjacuisse qui hoc olim vescebantur, se verò e cœlo descendisse, ut qui ex eo manducaret, vita frueretur æterna. Suam ipsius carnem comedendam in animæ cibum tandem perspicuis verbis enuntiavit. Verissime igitur dicitur occasione panis, quo reficiuntur corpora, usus esse, ut de cibo animæ loqueretur; sed qualis sit ille cibus ipso docente discimus. Profectò si de doctrina fide excipienda voluerit loqui, absque ulla causa figuris, a quibus adeo abhorrebant auditores, usus fuisse videbitur.<sup>1</sup>

*Obj. 2.* De fide prius locutus est Christus: igitur transitus ad oralem manducationem non est admittendus, præsertim quum panis ipse dicatur eo loci, in quo de fide plane agitur, et e cœlo descendisse, quum caro ejus ex utero Virginis sit derivata.

*Resp.* Totius concionis Christi materies fuit animæ cibus, occasione sumpta ex corporis nutrimento. De fide egit, tamquam conditione et subsidio ad illum percipiendum cibum. Quum primum se panem dixerit, intelligendus videtur de se in cibum animæ sumendo, quamvis qua ratione id fieret non statim aperuerit. Cæterum progrediendo illud manifestò declaravit. Constat igitur sibi tota oratio, quæ de cibo eucharistico est, sub involucris primum, deinceps clare promisso. Vere dicitur panis cœlo delapsus, quamvis enim caro Christi ex utero matris desumpta sit, divina dignitas personæ, cum qua conjungitur, facit, ut de ea prædicetur cœlestis illa origo: proprietates enim utriusque naturæ de persona rite prædicantur, et de naturis *in concreto*, juxta scholasticorum sermonem.

*Obj. 3.* Tota illa de cibo cœlesti oratio figurata plane est, uti ex iis verbis patet, quibus promissionem contineri maxime jactant Catholici; “panis quem ego dabo, caro mea est pro mundi vita:”<sup>2</sup> vel ut habet textus Græcus: ἡν ἐγὼ δώσω ὑπὲρ τῆς τοῦ κόσμου ζωῆς. His verbis, uti bene adnotat Rosenmüller, indigitat mortem suam; “fore, ut ex morte sua maxima generi humano orirentur beneficia.”<sup>3</sup>

*Resp.* Figuratam illam orationem, quam Rationalista post Protestantes adeo manifestam censet, agnoscere non possumus, Christo tanta cum asseveratione carnem suam se daturum profitente. Si in sermone de pane constitisset, interpretatio figurata verosimilitudine non careret; sed quum carnem nominet, et repugnantibus Judæis, interitum eam non manducanti minetur, ignoscant nobis Protestantes et Rationalistæ, credentibus nullo pacto contingere potuisse ut auditoribus offensionis et perditionis causam

(1) “It must be owned, that if our Saviour, by men’s eating his flesh, and drinking his blood, meant nothing but so obvious a thing as receiving him and his doctrine by faith and obedience, he clothed his thoughts in most unnatural language.” Dr. Johnson cit. a Moore, Travels of an Irish Gentleman, c. xiii.

(2) V. 52.

(3) In locum.



ipse daret, figurata locutione adeo inusitata, et cujus nullum idoneum suppetebat indicium.

35. *Obj.* 4. Christus spirituales suorum verborum sensum aperuit, et errorem Capharnaitarum corrigere studuit; nam se ascensurum in cœlum dixit, adeo ut non possent ultra sibi fingere se carnem ejus manducatuos: “Hoc vos scandalizat? Si ergo videritis Filium hominis ascendentem ubi erat prius? Spiritus est qui vivificat: caro non prodest quidquam. Verba quæ ego locutus sum vobis, spiritus et vita sunt.”<sup>1</sup>

*Resp.* Quicumque sit horum verborum sensus, non possunt efficere ut Christus non videatur publica concione auditoribus gravissimi erroris præbuisse occasionem et causam, si figurata admittenda sit interpretatio: adnotat enim diligenter Evangelista hæc alia occasione prolata, coram discipulis, quum oratio in Synagoga absoluta sit, plurimis coacervatis asseverationibus vehementioribus, et ne verbo quidem prolato, quo earum vis mitigaretur. Post concionem relatam dicit Joannes: “Hæc dixit in synagoga docens, in Capharnaum.”<sup>2</sup> Deinde refert quæ postea evenerunt, rumore illius concionis ad discipulos plerosque delato, et re eorum judicio perpensa: “Multi ergo audientes ex discipulis ejus, dixerunt: Durus est hic sermo, et quis potest eum audire?”<sup>3</sup> Id fatetur Rosenmüller ipse, in priorem illum versiculum adnotans: “Palam, loco publico, ubi plurimi erant testes sermonis. Quæ proxime sequuntur, post discessum e synagoga dicta videntur.”<sup>4</sup> Bloomfield etiam consentit.

36. *Obj.* 5. Illa Christi verba eo directa sunt, ut quæ dixerat in synagoga explicaret, solebat enim privatim explicare quæ in pœnam Judæis publice obscure proposuerat.

*Resp.* Videntur potius dicta causa inculcandi et urgendi quæ publice dixerat, nam nonnisi murmure inter discipulos orto de duritie doctrinæ, ea protulit. Nihil dicitur quod ad conciliandos eorum animos natum sit, sed objurgantur, eo quod offensionis occasionem ex promissione facta sumpserint. Ascensio ejus futura, et cœlestis origo allegantur, ad eorum incredulitatem domandam. Effertur spiritus divini effectus in anima fidei, spiritus scilicet est qui vitam animæ impertitur, fidei lumen gratiamque qua justi efficimur concedendo. Caro, sensus humanus a Spiritu non illustratus nihil prodest; homo nempe, humano illo sensu innixus, de divinis mysteriis judicans in errorem et interitum ruit; est enim hæc loquendi ratio *μελωδία*, qua mitioribus verbis funesti effectus superbiæ humanæ enuntiantur. Verba quæ Christus dixerat, spiritus et vita erant, cœlestia et divino Spiritu profecta, et vitam animæ datura, quæ proinde ex Spiritu

(1) V. 62, 63, 64.

(2) V. 60.

(3) V. 61.

(4) In locum.

lumine fideles amplectuntur;<sup>1</sup> “sed sunt quidam ex vobis,” pergit dicere, “qui non credunt.” Hæc obvia est verborum objectorum interpretatio, seriei totius orationis consona, et usui scripturarum, in quibus caro passim pro humano et vitioso sensu et affectu sumitur. Ipse Rosenmüller ea sic reddit: “Sublimior sentiendi ratio salutem affert, humilis (infirmā) sentiendi ratio nihil juvat; doctrinæ quas ego vobis propono, efficiunt illam sublimiorem sentiendi rationem, et salutem.”—“πνεῦμα [πᾶς] in N. T. in genere dicitur, quicquid est perfectum, subtile, sublime, divinum; σὰρξ [πᾶς], quicquid est imperfectum, vile, humanum.”<sup>2</sup> Ita Apostolus ad Galatas scribens voces illas adhibet: “Sic stulti estis, ut cum spiritu cœperitis, nunc carne consummemini.”<sup>3</sup> Ex eventu satis intelligitur Christum nihil mitigasse, sed ea quæ dixerat inculcasse credenda, nam discipuli multi, eo audito, discesserunt, numquam reversuri. Quod autem asseritur de obscura locutione in pœnam, impietatem sapit, quamvis enim Christus haud semper perspicuis verbis mysterium regni omnibus pandent, illud Apostolis privatim dans nosse; non ideo potuit, illæsa veritate et bonitate sua, ita loqui ut necessario inducerentur in errorem auditores, et e concione discedere, nullo dato sui sensus indicio.

37. *Obj.* 6. “Ipsi auditores Jesu facile intelligere poterant, eum improprio dicendi genere usum esse, ut hoc monere non fuerit opus.” Ita Rosenmüller, fatens verbis quæ versiculo 63 continentur nullam dari publicæ concionis explicationem.

*Resp.* Minime poterant id intelligere, quum ipsis murmurantibus et quærentibus, quomodo Christus dare posset suam carnem manducandam, minatus sit iis mortem nisi eam manducarent, et perrexerit loqui de esus illius utilitatibus. Equidem si figuram aliquam adhiberi cogitassent, ex usu suæ gentis ejus vim definiissent, quum ex ejus sermone non pateret. Jam vero apud illos manducare alicujus carnem, et bibere ejus sanguinem translato sensu significabat *petere calumniis, opprimere, persequi, interficere*, prout ad rem animadvertit eruditissimus vir, Nicolaus Wiseman. Pates de hostibus queritur: “appropiant super me nocentes, ut edant carnes meas.”<sup>4</sup> Job de calumniatoribus ait: “Quare persequimini me sicut Deus, et carnibus meis saturamini?”<sup>5</sup> De principibus populum opprimentibus dicit Deus: “qui comederunt carnem populi mei.”<sup>6</sup> A sanguinis autem potatione quantum abhorrerent Judæi notum est; et plura probant exempla eam pro re horrenda semper usurpari, quando sensu

(1) “That is they are from the Spirit of God, and if received with true faith, will lead to eternal life.” Ita Hornius Introd. Vol. ii. Metonymy of the Cause, p. 590, 5th American edition.

(2) Rosenmüller in locum.

(3) Gal. iii. 3.

(4) Ps. xxvi. (Heb. xxvii.) 2.

(5) Job. xix. 22.

(6) Michæe iii. 3.

translato adhibetur.<sup>1</sup> Nunquam pro animæ nutrimento figura hæc a Judæis, vel Orientalibus aliis gentibus, quarum sermo vel mores judaicis adsimilantur, usurpata noscitur. Ergo contra omnes Hermeneuticæ regulas sensus translatus Christi concioni affigitur, quem ipse non indicavit, nec auditores ex usitata suæ gentis loquendi ratione, poterant detegere.

38. *Obj.* 7. Si obvio sensui inhæreamus, dicendum erit Capharnaitas non potuisse vitam assequi, nisi percepto eucharistiæ Sacramento, quod adhuc non erat institutum. Idem sentiendum de omnibus qui eo caruerint beneficio, saltem per omnia inde decurrentia sæcula : quod tamen nemo sanus dixerit.

*Resp.* Capharnaitis dictum est : “Nisi manducaveritis carnem filii hominis et bibe ritis ejus sanguinem, non habebitis vitam in vobis.” Sed quum Christus se daturum carnem suam promississet, minæ illæ necessariò respiciebant tempus quo reipsa daretur manducanda. Nisi manducarent quum institutum fuerit Sacramentum, iisque manducandum oblatum, nulla illis speranda erat salus. Idem dicendum de omnibus quibus divinum hoc donum innotuerit, ejusque recipiendi facta fuerit copia. Hoc christi-  
anis documentis omnino congruit.

39. *Obj.* 8. Omnibus fatentibus Capharnaitæ Christi mentem non sunt assecuti, putarunt enim eum de carnis manducatione, naturali modo, agere. Igitur non licet inferre eum de orali aliqua manducatione locutum, ex eo quod Capharnaitas, ita intelligentes ejus verba, haud correxerit.

*Resp.* Si de figurata tantum manducatione egisset Christus, debuit omnino Capharnaitas corrigere, quum eos pernicioso errore laborare videret, cui occasionem et causam ipse dederat. Cæterum de vera et substantiali manducatione agens, errorem de modo quo fieret opus non erat ut emendaret, quum ejus non esset auctor, Capharnaitæ enim sibi tribuere debuerunt, quod suum sensum secuti de modo cogitantes erraverint, quum oportuerit promissionem plena fide excipere, et modi quo adimpleretur revelationem expectare.

40. *Obj.* 9. Christus sæpius neglexit corrigere errores eorum qui sua verba perperam intellexerunt. Sic petentibus Pharisæis signum ejus auctoritatis, dixit : “Solvite *templum hoc*, et in tribus diebus excitabo illud. Dixerunt ergo Judæi : Quadraginta et sex annis ædificatum est templum hoc, et tu in diebus tribus excitabis illud. Ille autem dicebat de templo corporis sui.”<sup>2</sup> Sic etiam quum dixisset : “Non quod intrat in os, coinquinat hominem ;<sup>3</sup> et Pharisæi dicto illo male intellecto scandalum paterentur, nullam rationem eorum erroris haberi voluit, sed discipulis cupientibus ut offensionis tolleretur occasio, respondit : “Sinite illos : cæci sunt, et duces

(1) Vide Lectures on the Eucharist, Lecture ii. and iii. by Nicholas Wiseman, D. D. Rector of the English College at Rome.

(2) Joan. ii. 20.

(3) Mat. xv. 11.

cæcorum ;” nec nisi precibus specialibus Petri indulgit, ut mentem suam explicaret.

*Resp.* Necesse non erat ut Christus auditorum corrigeret errores qui ex perversa suorum verborum interpretatione oriebantur, quando ex adjunctis mens ejus facile colligebatur, nec verba nata sunt ad errorem ingerendum. Loquens de suo corpore, vocavit illud templum, haud inusitata figura, anima scilicet in corpore veluti templo habitat, et Deus animam justi intime replens, corpus etiam suum templum facit; et quod ad Christum ipsum attinet, Deus ipse, secunda Trinitatis persona, in corpore, veluti templo sibi electo, hypostatica tamen unione, habitabat. Quod Judæi verba ejus ad templum in quo prolata sunt retulerint, eorum errore contigit, quum non satis animum ad eum attenderint: nec oportebat eos corrigere, quum resurrectionem ejus e mortuis indicare, potius quam perspicuè prædicere præstaret. Cæterum non omnino eos latuit ejus mens, nam ex hujusmodi dictis sumpserunt occasionem a Pilato postulandi custodiam, ne tertia die resurgere crederetur. Discipuli autem post resurrectionem horum verborum recordati, in fide firmati sunt; quod ostendit eos saltem vel vim verborum, quum dicerentur, animadvertisse, vel iis quid arcanum enuntiari intellexisse. Præterea liquet nullum perniciosum errorem ex illis Christi verbis auditoribus oriri potuisse, et omnem errandi occasionem posteris ademptam explicatione quam sacri scriptores præbent. Non ita dicendum de concione relata in sexto Joannis capite, nam verba nata sunt ad notionem oralis manducationis ingerendam, et Christus ea plurimis vehementioribus confirmavit, et nihil a sacro scriptore adnotatum est ut lectores sensum translatum detegere valeant. Alio loco objecto sensus facile colligi poterat ex occasione dicendi, nam Scribæ et Pharisei murmurabant de discipulis haud lavantibus manus antequam cibum sumerent. Quod igitur dixit Christus: “Non quod intrat in os, coinquinat hominem;” intelligendum erat de cibi immunditia, attactu manuum illotarum; et meritò recusavit amplius suam explicare mentem Phariseis, qui animo maligno dicta ejus omnia et res gestas interpretabantur. Discipulos autem ob tarditatem ingenii quum corripuisset, rem quippe adeo obviam haud intelligebant, dignatus est iis suos revelare sensus. Sed in sexto Joannis capite, occasio dicendi erat miraculum multiplicatorum panum, et postulatum a Judæis signum cœleste, instar mannæ e cœlo decidentis: quorum neutrum minuebat vim promissionis. Judæis haud omnis denegata est explicatio, quum semel murmurassent, sed ea vehementer confirmata est promissio; et quæ privatim discipulis sunt dicta nil mitigant.

41. *Obj.* 10. Origenes de verbis Christi sexto Joannis capite relatis agens, dicit: “Agnosce quia figuræ sunt, quæ in divinis voluminibus scripta sunt, et ideo tamquam spiritales, et non tamquam carnales examine, et intelligite quæ dicuntur. Si enim quasi carnales ista suscipitis, lædunt vos, et non alunt. Est enim et in Evangeliiis litera quæ occidit, non solum in veteri testamento occidens litera deprehenditur. Est et in

novo Testamento litera quæ occidat eum, qui non spiritaliter quæ dicuntur adverterit. Si enim secundum literam sequaris hoc ipsum, quod dictum est: Nisi manducaveritis carnem meam, et biberitis sanguinem meum, occidit hæc litera.”<sup>1</sup> Hæc fidenter objicit Cosinus.<sup>2</sup>

*Resp.* Notissimum est Origenem suo ingenio nimis indulsisse, mysticas præbendo scripturarum interpretationes; cujus exemplum satis manifestum hoc loco præbet, verbum Christi carne ejus designari dicens, et Apostolos cibum nostrum appellans: “Carnibus enim et sanguine verbi sui, tamquam mundo cibo ac potu, potat et reficit omne hominum genus. Secundo in hoc loco post illius carnem, mundus cibus, et Paulus, et omnes Apostoli.” Cæterum quamvis non adstruat eo loci genuinum Christi verborum sensum, non ideo eum prorsus excludere censendus est, litera enim quæ occidit est quæ sanguinis humani fusionem vi et potationem, naturali conditione, exigit. Quidquid autem censuerit de verbis illis, constat eum omnino agnovisse corpus et sanguinem Domini vere in Sacramento adesse, dari et suscipi. “Nostis,” inquit, “qui divinis mysteriis interesse consuevistis, quomodo cum suscipitis corpus Domini, cum omni cautela et veneratione servatis, ne ex eo parum quid decadat, ne consecrati muneris aliquid dilabatur; reos enim vos creditis, et recte creditis, si quid inde per negligentiam decadat.”<sup>3</sup>

42. *Obj.* 11. Augustinus ipse sensu spirituali et figurativo verba illa intelligenda agnoscit: “Caro mea est pro mundi vita. . . . Norunt fideles corpus Christi, si corpus Christi non negligent esse. . . . Non potest vivere corpus Christi, nisi de Spiritu Christi. Inde est quod exponens nobis Apostolus Paulus hunc panem: Unus panis, inquit, unum corpus multi sumus. O Sacramentum pietatis, o signum unitatis, o vinculum charitatis. . . . Hunc itaque cibum et potum societatem vult intelligi corporis et membrorum suorum, quod est sancta Ecclesia in prædestinatis, et vocatis, et justificatis, et glorificatis sanctis et fidelibus ejus: quorum primum jam factum est, id est prædestinatio: secundum et tertium factum est, et fit, et fiet, id est vocatio et justificatio: quartum verò nunc in spe est, in re autem futurum est, id est glorificatio. Hujus rei sacramentum, id est, unitatis corporis et sanguinis Christi alicubi quotidie, alicubi certis intervallis dierum in dominica mensa præparatur, et de mensa dominica sumitur, quibusdam ad vitam, quibusdam ad exitium. Res vero ipsa cujus Sacramentum est, omni homini ad vitam, nulli ad exitium, quicumque ejus particeps fuerit.”<sup>4</sup> Alias ait: “Si præceptiva locutio est aut flagitium aut facinus vetans, aut utilitatem aut beneficium jubens, non est figurata. . . . Si

(1) In Levit. hom. vii. n. 5.

(2) Aliud Origenis testimonium quod objicit Cosinus invenire haud potui, quum locus non indicetur.

(3) Hom. xiii. in Exod.

(4) Tract. xxvi. in Joan.

autem flagitium aut facinus videtur jubere, aut utilitatem aut beneficentiam vetare, figurata est. Nisi manducaveritis, inquit, carnem filii hominis, et sanguinem biberitis, non habebitis vitam in vobis. Facinus vel flagitium videtur jubere: figura est ergo, præcipiens passioni Dominicæ communicandum, et suaviter atque utiliter recondendum in memoria, quod pro nobis caro ejus crucifixæ et vulnerata sit.”<sup>1</sup>

*Resp.* Aliquando Patres ab obvio Scripturæ sensu divertunt ut mysticam ejus significationem explicent, eamque moribus audientium accommodent. Sic Augustinus fideles, qui corpus Christi sacramento accipere solebant, hortatur, ut charitatem erga se invicem servant, cujus symbolum et vinculum arcissimum est divinum illud mysterium. Nec tamen illud inane symbolum habet, sed divinum prorsus et efficax, uti liquet ex tot quæ citavimus ejus testimoniis. Quod autem de Sacramenti natura paulo obscurius nonnunquam loquatur, contigit etiam quia in publicis concionibus noluit enucleatius illud exponere, habita ratione disciplinæ illius temporis qua non sinebat ut Catechumenis aut infidelibus arcanum illud explicaretur. Audi ipsum Augustinum, explicantem illa verba: “Jesus non se credebatur eis.” “Tales sunt omnes Catechumeni: Ipsi jam credunt in nomine Christi, sed Jesus non se credit eis. Intendat et intelligat caritas vestra: si dixerimus Catechumeno, credis in Christo? Respondet, credo, et signat se cruce Christi, portat in fronte, et non erubescit de cruce Domini sui. Ecce credit in nomine ejus. Interrogemus eum: Manducas carnem Filii hominis, et bibis ejus sanguinem? nescit quid dicimus, quia Jesus non se credidit ei. . . . Quo ergo perducit credentes et baptizatos? Ad manna. Ecce dico manna. Notum est quid acceperint Judæi, notum est quid illis pluisset Deus de cælo: et nesciunt Catechumeni quid accipiant Christiani.”<sup>2</sup> Alio loco figuram agnoscit, quæ carnis Christi dilanationem excludat, quin tollat veritatem Sacramenti, communicatio enim illa passioni Domini, de qua loquitur, fit non sola illius memoria, sed corpore ipso et sanguine, sub Sacramenti speciebus, sumptis: “Mediatorem Dei et hominum, hominem Christum Jesum, carnem suam nobis manducandam, bibendumque sanguinem dantem, fideli corde atque ore suscipimus, quamvis horribilius videatur humanam carnem manducare, quam perimere et humanum sanguinem potare, quam fundere.”<sup>3</sup>

43. *Obj.* 12. Augustinus irridet Judæos panem dentibus conterendum expectantes: “Hoc est opus Dei, ut credatis in eum quem misit ille. Hoc est ergo manducare cibum non qui perit, sed qui permanet in vitam æternam. Ut quid paras dentes et ventrem? Crede et manducasti.”<sup>4</sup>

*Resp.* Irridet eos Augustinus qui panem, corporis cibum, manducan-

(1) De doct. Christ. l. iii. c. xvi.

(2) Tract. xi. in Joan.

(3) L. ii. contra advers. legis et proph.

(4) Trac. xxv. in Joan.

dum expectabant, et animæ cibum fide excipiendum promitti docet; eo scilicet loci explicat priorem partem concionis Christi, in qua de cibo animæ verbis generalibus agitur, et fides statuitur necessaria conditio ad eum percipiendum. Ideo dicit: “ crede, et manducasti,” quia tunc fides tantum exigebatur, qua anima veluti nutriretur, haud adhuc dato vel proposito pane cœlesti, de quo postea Christus enucleatius locutus est.<sup>1</sup> Cæterum “ carnem suam nobis manducandam, bibendumque sanguinem dantem fidei corde atque ore suscipimus,” uti jam Augustinus nos docuit.

44. *Obj.* 13. Augustinus arguit Capharnaitas quod verba Christi carnaliter intellexerint: “ Durum illis visum est quod ait: ‘ Nisi quis manducaverit carnem meam, non habebit vitam æternam.’ Acceperunt istud stulte, carnaliter illud cogitaverunt, et putaverunt quod præcisurus erat Dominus particulas quasdam de corpore suo, et daturus illis, et dixerunt: Durus est hic sermo. . . . Ille autem intruxit eos, et ait illis: ‘ Spiritus est qui vivificat; caro autem nihil prodest. Verba quæ locutus sum vobis, spiritus est et vita.’ Spiritualiter intelligite quod locutus sum. Non hoc corpus quod videtis manducaturi estis, et bibitori illum sanguinem, quem fusuri sunt qui me crucifigent. Sacramentum aliquod vobis commendavi; spiritualiter intellectum vivificabit vos.”<sup>2</sup>

*Resp.* Ipse se explicat Augustinus, dum errorem Capharnaitarum in eo reponit, quod crederent Dominum dixisse se præcisurum particulas quasdam de corpore suo, et daturum illis manducandas: “ carnem quippe sic intellexerunt, quomodo in cadavere dilaniatur, aut in macello venditur, non quomodo Spiritu vegetatur.”<sup>3</sup> Sed rei veritatem omnino agnovit, uti ex plurimis ejus testimoniis, quorum quædam laudavimus, quædam supersunt laudanda, constat. Equidem verbis objectis subjungit: “ Et si necesse est illud visibiliter celebrari, oportet tamen invisibiliter intelligi.” Sic et explicans illa verba: “ caro non prodest quicquam, ait: “ caro non prodest quicquam sed sola caro. Accedat Spiritus ad carnem, quomodo accedit charitas ad scientiam, et prodest plurimum, nam si caro nihil prodesset, Verbum caro non fieret, ut inhabitaret in nobis. Si per carnem nobis multum profuit Christus, quomodo caro nihil prodest?”<sup>4</sup>

45. *Obj.* 14. Plures theologi Catholici, inter quos Gabriel Biel, Nicolaus Cusanus, et Cajetanus, negarunt in capite sexto Joannis agi de eucha-

(1) Necesse non esse putamus in duas partes Christi concionem partiri, quod plurimis visum est; veluti de fide primo, deinceps de eucharistia egerit, magis enim omnia cohærent si de cibo supernaturali integra explicetur, qui tamen non statim verbis adeo perspicuis propositus est. Cyrillum Alexandrinum et Theophylactum inter veteres sequimur.

(2) Enarr. in Ps. xcvi.

(3) Tract. xxvii. in Joan.

(4) Ibidem.



ristia ; et quum quidam definitionem ea de re a Tridentino concilio prodire vellent, res caruit successu felici.

*Resp.* Quod pauci quidam Catholici interpretes alias senserint de capite illo Joannis, dogmate illæso contigit; quorum tamen explicationem ne sequamur orationis serie, et Patrum insignium auctoritate retinemur. Equidem ipsum concilium Tridentinum in doctrinæ expositione testimoniis ex illo capite passim usum est,<sup>1</sup> quin voluerit definitione solemni alias interpretationes, quæ dogma haud lædant, proscribere. Eam igitur tuemur quæ juxta Hermeneuticæ ipsius regulas verissima nobis videtur, ex ipsa orationis serie deprompta, et consensu Patrum et Ecclesiæ auctoritate admodum commendata.

(1) Sess. xxi. cap. i



## CAPUT IV.

## DE INSTITUTIONE EUCHARISTIÆ.

46. Illud quidem notatu dignum videtur, Joannem, qui promissionem Christi de carne sua danda solus retulit, de eucharistiæ institutione siluisse, quam cæteri Evangelistæ diligenter persecuti sunt. Id contigisse censendum omnino est, quod quum alia Evangelia jam fuissent edita, de hac necesse non fuit loqui, cui tamen testimonium reddere voluit, solemniter relata promissione tanti muneris dandi. Jam verò verba ipsa Christi Domini hoc instituentis sacramentum perpendenda sunt, quæ, ut mens ejus clarius innotescat, præ oculis ponemus, prout a tribus Evangelistis et a Paulo sunt relata.

## PROPOSITIO.

*Christi Domini eucharistiam instituentis verba simplici et obvio sensu excipienda sunt, ideoque vera realis et substantialis corporis et sanguinis ejus præsentia in hoc sacramento invicte inde probatur.*

*Probatur I. ex ipsis Christi verbis.*

47. Matthæus sic institutionem eucharistiæ refert : “ Cœnantibus autem eis, accepit Jesus panem, et benedixit, ac fregit, deditque discipulis suis, et ait : accipite et comedite : HOC EST CORPUS MEUM. Et accipiens calicem gratias egit, et dedit illis, dicens : bibite ex hoc omnes. HIC EST ENIM SANGUIS MEUS NOVI TESTAMENTI, QUI PRO MULTIS EFFUNDETUR IN REMISSIONEM PECCATORUM. Dico autem vobis : non bibam amodo de hoc genimine vitis, usque in diem illum, cum illud bibam vobiscum novum in regno Patris mei.”<sup>1</sup> Græcus textus verba consecrationis sic refert : τοῦτό ἐστι τὸ σῶμά μου—τοῦτο γάρ ἐστι τὸ αἷμά μου, τὸ τῆς καινῆς διαθήκης, τὸ περὶ πολλῶν ἐκχυνόμενον εἰς ἄφεσιν ἁμαρτιῶν.

48. Marcus dicit : “ Manducantibus illis, accepit Jesus panem, et benedicens fregit, et dedit eis, et ait : Sumite, HOC EST CORPUS MEUM. Et accepto calice, gratias agens, dedit eis : et biberunt ex illo omnes. Et ait illis. HIC EST SANGUIS MEUS NOVI TESTAMENTI, QUI PRO MULTIS EFFUNDETUR. Amen, dico vobis, quia jam non bibam de hoc genimine vitis, usque in diem illum, cum illud bibam novum in regno Dei.”<sup>2</sup> Græcus textus : τοῦτό ἐστι τὸ σῶμά μου—τοῦτό ἐστι τὸ αἷμά μου τῇ καινῇ διαθήκῃ, τὸ περὶ πολλῶν ἐκχυνόμενον.

49. Lucas ait : “ Et cum facta esset hora, discubuit, et duodecim

(1) Matt. xxvi. 26.

(2) Marc. xiv. 22.

Apostoli cum eo. Et ait illis : Desiderio desideravi hoc pascha manducare vobiscum antequam patiar. Dico enim vobis, quia ex hoc non manducabo illud, donec impleatur in regno Dei. Et accepto calice, gratias egit, et dixit : “ Accipite, et dividite inter vos. Dico enim vobis, quod non bibam de generatione vitis, donec regnum Dei veniat. Et accepto pane, gratias egit, et fregit, et dedit eis, dicens : Hoc est corpus meum, quod pro vobis datur : hoc facite in meam commemorationem. Similiter et calicem postquam cœnavit, dicens : Hic est calix novum Testamentum in sanguine meo, qui pro vobis fundetur.”<sup>1</sup> Textus habet : Τοῦτό ἐστι τὸ σῶμά μου, τὸ ὑπὲρ ὑμῶν διδόμενον· Τοῦτο τὸ ποτήριον, ἡ καινὴ διαθήκη ἐν τῷ αἵματι μου τὸ ὑπὲρ ὑμῶν ἐκχυνόμενον·

50. Paulus Corinthios, de divina hujus Sacramenti institutione jam a se edoctos, gravissimis verbis monet : “ Ego enim accepi a Domino, quod et tradidi vobis, quoniam Dominus Jesus, in qua nocte tradebatur, accepit panem, et gratias agens fregit, et dixit : Accipite et manducate : hoc est corpus meum, quod pro vobis tradetur : hoc facite in meam commemorationem. Similiter et calicem postquam cœnavit, dicens : Hic calix novum Testamentum est in meo sanguine. Hoc facite, quotiescumque bibetis, in meam commemorationem.”<sup>2</sup> In textu : τοῦτό μου ἐστὶ τὸ σῶμα τὸ ὑπὲρ ὑμῶν κείμενον· τοῦτο ποιεῖτε εἰς τὴν ἐμὴν ἀνάμνησιν—τοῦτο τὸ ποτήριον, ἡ καινὴ διαθήκη ἐστὶν ἐν τῷ ἐμῷ αἵματι· τοῦτο ποιεῖτε ὡς ἂν πίνητε, εἰς τὴν ἐμὴν ἀνάμνησιν.

51. Illud imprimis occurrit observandum, quatuor scriptores sacros rem retulisse, quod quanti sit momenti indicat, præsertim quum ex speciali revelatione se eam didicisse Paulus testetur. Jam vero ipsa verba perpendamus. Omnes in iisdem referendis verbis de pane eucharistico dictis conveniunt, “ HOC EST CORPUS MEUM.” His adjicit Lucas : “ quod pro vobis datur ;” quod Paulus reddit : “ quod pro vobis frangitur :” sed hæc vim augent verborum aliorum, quum illud declarent corpus eæse quod pro nobis datum est, et immolatum, in cœna quidem *mystice*, deinceps in cruce, sanguine effuso, immolandum. De calice non adeo concordant verba, obvia de causa, quum enim poculum pro eo quod continet, familiari et usitata figura, passim usurpetur, Lucas et Paulus retulerunt calicem dictum esse novum Testamentum in Christi sanguine, Matthæus vero et Marcus simpliciter dixerunt : “ Hic est sanguis meus.” Quod calix dicatur novum Testamentum in Christi sanguine, significat novum fœdus Christi sanguine sanciri, qui eo calice continebatur.

52. Verba Christi, obvio sumpta sensu, corpus et sanguinem suum esse quæ Apostolis tradidit probant : ea autem obvio sumenda esse sensu ostenditur ex sacrorum scriptorum concordia, nullus enim figuram indicavit ; ex emphasi qua Christus locutus est ; ex occasione sermonis, condebat enim novum fœdus, novæque legis præcipuum instituebat Sacramentum ; ex iis

(1) Luc. xxii. 14.

(2) I. Cor. xi. 23.

quos allocutus est, Apostolis scilicet quibus mysterium regni nosse datum est; ex tempore paulo ante mortem; ex omnibus denique adjunctis, quæ nullum figuræ dant indicium.

53. Equidem concordia quatuor sacrorum scriptorum in re gesta narranda iisdem omnino verbis, quod pertinet ad panis consecrationem, vel ea tantum varietate quæ verborum quæ omnes referunt vim obviam declarant et augment, haud leve argumentum est ea obvio sumenda esse sensu. Nam si sensus foret translatus, inverosimile omnino est neminem ex illis eum proditurum, præsertim quum ex varietate verborum quæ adhibent, dum de calice agitur, liqueat eos sensum magis quam verba respexisse. Paulus verborum ordinem mutat, quin sensus mutetur—ΤΟΤΟ ΜΟΤ 'ΕΣΤΙ ΤΟ ΣΩΜΑ—pronomen scilicet cæteri scriptores ultimo ponunt loco. Addit etiam: τὸ ὑπὲρ ὑμῶν κλώμενον—articulo indicante *illud* corpus quod pro vobis frangitur, vel uti Lucas habet—τὸ ὑπὲρ ὑμῶν δίδομενον—*illud* quod pro vobis datur. Emphasis hæc qua Christus locutus est vim habet magnam, ad designandum corpus ipsum esse quod pro nobis immolatum est, sanguinem ipsum, quo novum sancitur fœdus, et peccata expiantur. Id fatentur critici Protestantici.<sup>1</sup>

54. Occasio autem qua Christus hæc protulit verba obvium eorum sensum retinendum esse maxime ostendit. Obtulerat more Judæorum agnum paschalem, sui, uti omnes fatentur, typum; agnus enim est Christus, cujus sanguine mundi peccata tolluntur. Victimam se exhibet illius loco, veritatem typo substituens. Non igitur typum alium et signum quærere oportet, sed rem ipsam, veram victimam qua figura impletur. Vetus aboletur fœdus, novumque substituitur, sanguine etiam firmandum. Adsit necesse sit sanguis, ne tota res ad vanam imaginem redigatur, et fœdus negetur tunc sancitum, Christo id nihilominus affirmante. Omnes agnoscunt præcipuum novæ legis Sacramentum ea occasione institutum: ergo clarissimis verbis ejus natura designanda erat, ne in re summa hæerent Christi discipuli, vel pernicioso errore laborarent. Verba igitur obvio adhibenda erant sensu, vel si qua figura adhiberetur, vis ejus et significatio plane definienda erat, adeo ut nemo facile posset voluntatem Domini sui, et fœderis condiciones ignorare. Alloquebatur Apostolos, quos consuevit familiarius edocere, eis animi sui sensus et arcana cœlestia pandens, illis quippe datum est nosse

(1) "Almost every syllable of the original Greek, especially the articles, is singularly emphatic. It runs thus—Τοῦτο γὰρ ἐστὶ τὸ αἷμα μου, τὸ τῆς καινῆς διαθήκης, τὸ περὶ πολλῶν ἐκχυνόμενον εἰς ἀφεσὶν ἁμαρτιῶν. The following literal translation and paraphrase do not exceed its meaning:—'*For this is THAT blood of mine, which was pointed out by all the sacrifices under the Jewish law, and particularly by the shedding and sprinkling of the blood of the paschal lamb; THAT BLOOD of the sacrifice slain for the ratification of the new covenant; THE blood ready to be poured out for the multitudes, the whole Gentile world as well as the Jews, for the taking away of sins.*'" Horne's Introduction, Vol. ii. p. 508. American edit. citat A. Clarke's Discourse on the Eucharist, pp. 61. 62.

mysterium regni Dei: de re tunc facienda agebatur, cujus naturam eos cognoscere oportebat; ultima jam vice ante mortem proximam eos alloquebatur: verbis igitur perspicuis et obvio sensu usus est.

55. Hæc omnia mire confirmantur ex promissione jam publice facta dandi suam carnem manducandam; quum enim ea moti fuissent plurimorum animi, et Apostoli ei præbuissent assensum, nixi summa ejus veracitate et divina natura, expectanda erat promissionis impletio. Dicente igitur ipso: "Hoc est corpus meum; hic est sanguis meus;" debuerunt verba prout sonabant excipere, et impletum agnoscere quod verbis adeo perspicuis promiserat.

56. Verba obvio sumpta sensu veram, realem, et substantialem præsentiam corporis et sanguinis Christi conficere cuique patet; quod etiam ex eo liquet quod per pleraque sæcula apud omnes gentes christianas ita fuerint excepta, et qui ea alia ratione explicare recentiori ætate voluerunt, in plurimas interpretationum varietates abierint, inani laborantes conatu contra vim verborum manifestam.<sup>1</sup> Innumeras fere paucorum horum verborum explicationes, sibi non cohærentes, protulerunt qui Scripturarum perspicuitatem jactabant.<sup>2</sup>

(1) Quantum hac in re laboraverit Lutherus, ipse fatetur: "Hoc diffiteri nec possum, nec volo, quod si Carolstadius, aut alius quispiam ante quinquennium mihi persuadere potuisset, in Sacramento præter panem et vinum esse nihil, ille magno me beneficio sibi devinctum reddidisset. Gravibus enim curis anxius, et in hac discutienda materia multum desudans, omnibus nervis extensis me extricare et expedire conatus sum, cum ipse perspiciebam hac re papatui in primis me valde incommodare posse. Verum ego me captum video, nulla evadendi via relicta est: textus enim Evangelii nimis apertus est et patens, qui facile convelli non potest, multo minus verbis aut glossis a capite vertiginoso confectis subverti." Ep. ad Argentinenses.

(2) Liceat exscribere in rem nostram quæ scriptor nuperrimus Audin in vita Lutheri adnotat. "En 1527, Luther comptait déjà huit interprétations différentes de ces paroles du Christ: **HOC EST CORPUS MEUM**. Trente ans après, il y en avait quatre-vingt-cinq: voici quelles étaient alors les exégèses les plus répandues. **Hoc est corpus meum**. *Hic sive in hoc loco est corpus meum: Bible de Genève.*—**Corpus meum est hoc, nempé panis: Suenckfield.**—**Corpus meum est hoc, id est cibus spiritalis, ut Joan. 6, dicitur caro mea vere est cibus: Joh. Lang, in comm. ad Apol. 2. Justini.**—**Hic meus est panis: Anabapt.**—**In, cum, sub pane est corpus meum, ut pillula in ovo: Brencius in syntagmate contra Œcolampadium.**—**Circa panem est corpus meum, ut aer circumfusus Suenckfield, citatus à Luthero in confessione Eucharistiæ.**—**Corpus meum est hoc quatenus mensæ accumbit: Karslt. in dialog. de Eucharistia.**—**Hoc significat corpus meum: Zwinglius in subsidio Eucharistiæ: Beza contra Westphalum.**—**Hæc est mea humana natura: Zwinglius, in expositione rei eucharisticæ.**—**Hoc est mors et passio mea: Zwinglius. lib. ii. de instit. Cœnæ.**—**Hæc est commemoratio corporis mei: Œcolampad. ad Theobaldum Bellicanum.**—**Hæc est protestatio et μνημὴν meorum beneficiorum: Bucerus, in apol. de doctrina Cœnæ dominicæ.**—**Hoc est corpus meum, quod do vobis animo edendum, sicut panem ore. Petrus Martyr in tractatu de Eucharistia.**—**Hoc est corpus meum panem: Campanus, a Luthero notatus in confessione de Eucharistia.**—**Hoc est mysticum corpus meum, seu ecclesia sanctorum redempta meo corpore: Bullingerus, in tractatu de Ecclesiæ sacramentis. Calvinus in caput 5 ad Ephes.**—**Hæc cœna est tessera**

57. Accedit argumentum haud leve deductum ex Christi præscientia, quum enim noverit futurum, ut per plurima sæcula plerique per orbem sui discipuli verba illa obvio exciperent sensu, ideoque cultum supremum eucharistiæ tribuerent, non videtur consonum ejus misericordiæ et bonitati ea usurpare, quæ tanto errori occasionem præberent, et causam; quum vocula una addita omnem errandi causam sustulisset: lingua enim Syriaca, seu Syro-Chaldaica, qua usus est, plurimas continet voces rationesque loquendi quæ signum et figuram exprimunt, uti egregie demonstravit linguæ illius peritissimus vir, quem sæpius cum laude nominavimus Wiseman.<sup>1</sup> Hinc Dionysius Barsalibæus, Syrus ipse, et Syriaco scribens idiomate, adnotat: “Vocantur et sunt corpus et sanguis Dei, Domini nostri Jesu Christi, *in veritate, et non symbolice.*”<sup>2</sup> Equidem si ab obvio verborum sensu, tanta cum solemnitate prolatorum, liceat recedere, nulla erit ratio qua divina veritas a libidine figuratæ interpretationis servari queat.

*Probatur II. ex Patrum interpretatione.*

58. S. JUSTINUS, in Apologia quam pro Christianis Antonino Pio imperatori obtulit, quomodo haberentur fidelium cœtus, enarravit. Post preces et osculum sanctum: “ei, qui fratribus præest, panis affertur, et poculum aquæ et vini: quibus ille acceptis laudem et gloriam universorum Parenti per nomen Filii et Spiritus Sancti emittit, et Eucharistiam, sive gratiarum actionem, pro his ab illo acceptis donis prolixè exequitur. Postquam preces et Eucharistiam absolvit; populus omnis acclamat, *Amen.* . . . . Neque enim ut communem panem, neque ut communem potum ista sumimus; sed quemadmodum per Verbum Dei caro factus Jesus Christus Salvator noster et carnem et sanguinem habuit nostræ salutis causa, sic etiam illam, in qua per precem ipsius verba continentem gratiæ actæ sunt, alimoniam, ex qua sanguis et carnes nostræ per mutationem aluntur, incarnati illius Jesu et carnem et sanguinem esse edocti sumus.—την δὲ εὐχῆς λογὲς τὰ παρ’ αὐτῆς εὐχαρισθεῖσαν τροφὴν, ἐξ ἧς αἷμα καὶ σαρκεὶς κατὰ μεταβολὴν τρεφόνται ἡμῶν, ἐκείνῃς τὰ σαρκοποιηθέντος Ἰησοῦ καὶ σαρκα καὶ αἷμα ἐδιδαχθῆμεν εἶναι.—Apostoli enim in commentariis suis, quæ vocantur evangelia, ita sibi mandasse Jesum tradiderunt: eum scilicet accepto pane, cum gratias egisset, dixisse: ‘Hoc facite in meam commemorationem, Hoc est corpus meum,’ et poculo similiter accepto, actisque gratiis dixisse ‘Hic est sanguis meus,’ ipsisque solis tradidisse.”<sup>3</sup> Liqueat Justinum et Ecclesiam

et arrhabo corporis mei: *Stancarus*. Hoc est corpus meum in divinitatem transformatum: *Suenckfield*.—Hoc est corpus meum, si fides adsit, hypothetice. *Melanchthon*. Vide vie de Luther, vol. i. ch. xxii. p. 365. Note.

(1) Horæ Syriacæ. Romæ MDCCLXXVIII. Miro pudoris exemplo, utpote apud Protestantos scriptores perraro, Horneus post *Horas Syriacas* editas, novæ sui operis editioni subduxit quæ de linguæ syriacæ defectu, hac ex parte, tradiderat.

(2) Cit. a Wiseman.

(3) Apol. i. n. 65, 66.

universam suo tempore sacra mysteria celebrasse, ex firma persuasione illam alimoniam qua corpus nutritur, eucharistia facta, solemni scilicet prece, fieri incarnati Jesu carnem et sanguinem, quia Christus dixit: “Hoc est corpus meum,” “Hic est sanguis meus,” et jussit ita fieri in sui commemorationem. Intellexit igitur beata illa ætas, Apostolicæ propinqua, Christi verba obvio sensu; et veram, realem et substantialem ejus præsentiam in Sacramento agnovit.

59. S. IRENÆUS, Marcionem qui phantasticum corpus Christo adscribat, eumque filium esse Dei a rerum conditore diversi, hunc enim non supremum Dominum habebat, repellens, ait: “Quomodo autem juste Dominus, si alterius Patris existit, hujus conditionis, quæ est secundum nos, accipiens panem corpus suum confitebatur, et temperamentum calicis sui sanguinem confirmavit? Et quare se filium hominis confitebatur, si non eam quæ ex homine est, generationem sustinuisset?”<sup>1</sup> Probat igitur Christum esse Filium Dei, rerum creatoris, quia creatas res in Sacramento adhibuit, et panem corpus suum confitebatur, et vinum aqua temperatum suum sanguinem confirmavit. Credidit igitur Irenæus panem vere factum corpus Christi, vinum vere factum esse ejus sanguinem. Sic et sequenti libro: “Eum calicem qui est creatura suum sanguinem qui effusus est, ex quo auget nostrum sanguinem, et eum panem qui est creatura suum corpus confirmavit—τὸν ἀπὸ πίσεως ἄρτον ἰδίον σῶμα διεβεβαύσατο—ex quo nostra auget corpora.”<sup>2</sup> Augmentum hoc de resurgendi virtute videtur intelligendum, de resurrectione enim cum hæreticis Irenæum agere liquet.

60. S. ATHANASIUS ait: “Corpus est cui dicit: Sede a dextris meis. Per quod corpus Pontifex et Apostolus fuit, et dictus est, dicens per illud quod nobis tradidit mysterium: Hoc est corpus meum, quod pro vobis, et sanguis novi Testamenti, non veteris, pro vobis effusus. Divinitas autem neque corpus, neque sanguinem habet, sed ille quem ex Maria gestabat homo.”<sup>3</sup>

61. S. CYRILLUS HIEROSOLYMITANUS: “Quum ergo ipse Christus pronuntiaverit et dixerit de pane: ‘hoc est corpus meum,’ quis audebit deinceps ambigere? et cum ipse adseveraverit, et dixerit: ‘hic est sanguis meus,’ quis unquam dubitaverit, aliens non esse ejus sanguinem?”<sup>4</sup>

62. S. JOANNES CHRYSOSTOMUS ait: “Deo igitur ubique obsequamur, nec contradicamus ei, etiamsi id quod dicit, rationi et intelligentiæ nostræ contrarium videatur: sed prævaleat ejus sermo rationi et intelligentiæ nostræ. Sic etiam in misteriis faciamus, non ea solum quæ sub sensum cadunt respicientes; sed verba ejus retinentes. Verbum quippe ejus fallere nequit, sensus verò noster facile decipitur. Verbum ejus numquam

(1) L. iv. adv. hæ. c. lvii.

(2) L. v. c. ii.

(3) In majori orat. de fide cit. a Theodoro in dialogo ii.

(4) Catechesi xxii.

excidit ; sensus vero sæpe fallitur. Quoniam verò ille dixit, ‘ Hoc est corpus meum, obtemperemus, credamus, et spiritualibus oculis ipsum respiciamus.’<sup>1</sup> Et alio loco : “ Erat olim Pascha Judaicum, sed nunc solutum est, advenitque spirituale Pascha, quod tunc tradidit Christus. Illis enim manducantibus ac bibentibus, inquit, accipiens panem fregit et dixit : **HOC EST CORPUS MEUM, QUOD PRO VOBIS FRANGITUR IN REMISSIONEM PECCATORUM.** Sciunt ii, qui initiati sunt, illa quæ dicuntur. Et rursus calicem, dicens : **HIC EST SANGUIS MEUS, QUI PRO MULTIS EFFUNDETUR IN REMISSIONEM PECCATORUM.** Aderat Judas hæc Christo dicente. **Hoc est corpus, quod vendidisti Juda, triginta argenteis, pro quo nuper pacta impudenter inibas cum improbis Pharisæis. O Christi benignitatem ! O Judæ dementiam et insaniam ! Ille namque vendidit illum triginta denariis : Christus verò postea non recusavit HUNC IPSUM SANGUINEM VENDITUM** vendenti dare in remissionem peccatorum—*αὐτὸ τὸ αἷμα τὸ πρᾶθεν δοῦναι εἰς ἄφεσιν ἁμαρτιῶν τῷ πειραχότι*—si ipse voluisset. Aderat Judas, et sacræ mensæ particeps erat.”<sup>2</sup>

63. Licet has patrum explicationes Ecclesiæ Syriacæ antiquissimis constitutionibus, quas laudat Wiseman, firmare, Arabicam citans versionem factam anno Hegiræ 386 : “ Dedit illud, *scilicet corpus*, (benedicantur nomina illius) in remissionem peccatorum, nec profecto figura in eo ; utique **DIXIT, HOC (EST) CORPUS MEUM, ET NON DIXIT, HÆC FIGURA CORPORIS MEI.**”<sup>3</sup>

#### OBJECTIONES DILUUNTUR.

64. *Obj.* 1. “ Pronuntiat Christus panem esse corpus suum : de Sacramento habetur sermo. Fateri vero necesse est, Sacramentum visibili signo constare, cui res signata conjuncta est, quæ est ejus veritas.” Ita Calvinus :<sup>4</sup> ex eo quod eucharistia sacramentum sit, eam non esse ipsum corpus et sanguinem inferens, quamvis hæc signo conjungi dicat, virtute scilicet et efficacia.

*Resp.* Species panis et vini signi visibilis habent rationem : rei veritas corpus est et sanguis Christi : quod si hæc non adesse et dari intelligat Calvinus, verbis ludit, et Christo contradicit. Sacramenti nomen, quo abutitur, pro mero signo sacro aliquando sumitur, quam significationem ne admittat Zuinglianæ hæreseos crimen veretur : sed ab ea non satis recedere convincitur. Equidem ubicumque in Scripturis de Sacramentis, sive veteris sive novi Testamenti instituendis agitur, verbis obviis et perspicuis eorum

(1) Hom. lxxxii. alias lxxxiii. in Matt.

(2) Hom. de prodit. Judæ.

(3) Horæ Syriacæ p. 59.

(4) In harm. Evang. p. ii. n. 197.



natura declaratur, nullaque adhibetur figura, quæ non sit manifesta ex consuetudine, vel non exponatur.<sup>1</sup>

65. *Obj.* 2. “Jam et hoc satis tritum esse debet, rei signatæ nomen ad signum transferri. Quare nemo in Scriptura mediocriter versatus negabit, quin sacramentalis loquutio metonymice sumenda sit.” Iterum Calvinus.

*Resp.* Quoties de signo constat, nil vetat ut rei signatæ ad signum nomen transferatur: in instituendo autem signo necesse est ut declaretur ejus ad rem relatio; secus haud intelligenda. Sic arcus in nubibus datus est a Deo signum benignæ quam fecit promissionis, se nunquam mundum aquis obruturum: quod nisi declarasset, non potuit intelligi. Circumcisio etiam data est in fœderis cum Abraha initi signum, et declarata est ejus significatio. De pane autem non constabat eum signum esse corporis Christi, nec id declaravit Christus ipse, sed plane dixit: “Hoc est corpus meum.” Metonymiæ nullum præbetur indicium, nec aliud sinit ut quæ in novi Testamenti Sacramentis instituendis prolata sunt, ad figuras referantur.

66. *Obj.* 3. Verba Christi necessariò includunt figuram, per se enim repugnat ut panis sit ejus corpus.

*Resp.* Repugnat quidem ut panis sit corpus Christi, sed non ut desinat substantia panis, et Christi corporis substantia præsens fiat. Cæterum plenum periculi est divina mysteria et opera humano metiri modulo. Mirum profectò foret ipsissima verba a quatuor scriptoribus sacris referri, nullo figuræ dato indicio, quum, uti fatentur Oxonienses, illius concordiæ in tota sacra Scriptura nullum aliud sit exemplum.<sup>2</sup>

67. *Obj.* 4. Ea est verborum Christi satis obvia explicatio: “Quemadmodum hunc panem fractum vobis edendum exhibeo: sic corpus meum mox frangendum, affligendum et interficiendum pro vobis tradam.” Ita Rosenmüller.<sup>3</sup>

*Resp.* Nulla hujusmodi comparatio in sacro textu invenitur. Simpliciter dicit Christus illud esse corpus et sanguinem suum, ipsum corpus pro nobis immolandum, ipsum sanguinem pro peccatis expiandis fundendum. Ab ejus verbis non recedendum est, ut divina mysteria nostro accommodemus intellectui.

68. *Obj.* 5. “Formula est similis ei, qua usus est Moses Exod. xii. ii. et qua Israelitæ epulum paschale celebrantes uti debebant, v. 27, פֶּסַח הוּא לַיהוָה.”<sup>4</sup>

(1) Gen. xvii. Exod. xii. Matt. ult.

(2) “We should form high conceptions of the divine promises and expressions, such, for instance, as ‘this is my body,’ (the only expression, I believe, in the whole of Scripture, used on one single occasion, which has been recorded four distinct times in precisely the same words.)” Vol. iv. Tract. No. 80. p. iii.

(3) Rosenmüller in Mat. xxvi. 26.

(4) Ibidem.



*Resp.* Omnino diversa est formula, voces enim Hebraicæ redduntur ad litteram: “transitus ipse Domino.” Agnus nomen habuit ab occasione qua immolabatur, Israelitis transituris ex Ægypto; et pro more Hebræorum ita vocabatur, sicut *peccatum* Hebraice nuncupabatur victima ad peccatum luendum oblata—חַטָּאת הֵיא.<sup>1</sup> Christus non egit de victima jam designata, panis enim haud habuit victimæ rationem, ideoque eum assumens in manum, non potuit intelligi de fine ob quem offerretur. Locus igitur *parallelus* non est.

69. *Obj.* 6. Hebræi solebant rem vocare nomine alterius rei quam significabat, quod olim notavit Augustinus: “Solet autem res quæ significat, ejus rei nomine quam significat, nuncupari, sicut scriptum est: ‘Septem spicæ septem anni sunt,’ et multa hujusmodi. Hinc est quod dictum est: ‘Petra erat Christus’ Non enim dixit, petra significat Christum, sed tamquam hoc esset, quod utique per substantiam hoc non erat, sed per significationem.”<sup>2</sup>

*Resp.* Ea consuetudo est omnibus gentibus communis, ubi agitur de signis, quæ natura, vel hominum conventionem definita sunt: sed nulla loquendi ratio sinit ut quæ signorum rationem non noscuntur habere, pro rebus aliis usurpentur, nullo dato tantæ licentiæ indicio. Panis profecto signum non fuit Christi corporis, ideoque ejus nomine non potuit vocari, quin signi ratio enuntiaretur. In exemplis adductis sensus est obviu, et loquendi legibus consonus, nam quod ad primum attinet, Josephus a Pharaone interrogatus fuerat quid somnio portenderetur. Quum igitur responderit, septem spicas vel septem vaccas esse septem annos, necessariò intelligebatur de earum significatione loqui. Alterius e Paulo allati testimonii sensus ex serie orationis patet, explicabat enim rerum gestarum majorum suorum relationem ad mysteria christiana, quos baptizatos esse in Moyse mox dixerat, scilicet figuram quandam baptismi præsetulisse, nube obumbratos, et per mare transeuntes. Omnes dicit escæ ejusdem spiritualis fuisse participes, manducabant enim manna e cœlo delapsu, omnes eodem potu spiritali refocillatos, bibebant enim de aqua Moysis virga e rupe educta. Innuit autem eos de petra spiritali, quæ eos comitabatur in toto per desertum itinere, aquas hausisse, de Christo scilicet, cujus providentia, tamquam divinæ personæ, fiebat ut aquæ e petra educerentur, et cujus intuitu, tamquam Salvatoris, gratiæ subsidia tribuebantur. Petra igitur illa spiritalis consequens eos vere erat Christus, ideoque opus non est ut voci “erat” significandi vim hic tribuamus. Cæterum si cui arri-deat ita eam interpretari, ut petra e qua aquæ sitientibus Israelitis fluebant, Christi typus dicta intelligatur, non repugnamus; sed ex tota oratione erroris occasio tollebatur, quum Apostolus de figuris se agere profiteatur =

(1) Levit. iv. 24.

(2) L. iii. qu. super Levit. qu. 57.

“Hæc autem in figura facta sunt nostri.”—“Hæc autem omnia in figura contingebant eis.”<sup>1</sup>

70. *Obj.* 7. Liquet “hanc propositionem : Hoc est corpus meum ; hic est sanguis meus, esse tropicam et figuratam, qui modus loquendi in omnibus linguis est usitatissimus ; quo signatum prædicatur de signo, et nomen illius isti datur, e. g. Ossa dicuntur domus Israel Ezech. 37. 11. Quatuor animalia sunt quatuor regna, et decem cornua sunt decem reges. Dan. 7. 17. 23. 24. et 8. 20. 21. Sic Matth. 13. 38, 39. Ager est mundus, bonum semen sunt filii regni, inimicus est diabolus, messis est finis mundi, messores sunt angeli etc. Et Apoc. i. 20. Septem stellæ sunt septem angeli, septem candelabra sunt septem Ecclesiæ. Et. cap 17. 9. Septem capita sunt septem montes, decem cornua sunt decem reges. V. 12. Mulier quam vidisti est magna civitas. V. 18 etc.” Ita Calvinianus theologus, abbreviator Turrentini. His addunt alii illa Christi verba : “Ego sum vitis vera ;” “ego sum ostium.”

*Resp.* Signatum de signo rite prædicatur, quando signi ratio innotescit ; secus insulsa foret oratio, et contra omnes leges loquendi. In visionibus quibus prophetis Deus futura revelavit, symbolis usus est, quibus illa exhiberet, explicatione plerumque adjecta. Nullus igitur erat errori locus, nam vati innotuit haud res ipsas, sed earum symbola ei exhiberi, quorum vim, Deo docente, didicit. Verbum substantivum in explicatione symbolorum adhibitum necessariò intelligebatur veluti compendium verborum : *sunt signa, seu symbola.* Sic Ezechiel, Daniel, Joannes, quæ sibi revelata sunt facile exceperunt. At in verbis Dominicis non agitur de visione prophetica, nec de signo aliquo jam menti exhibito, sed de eo quod Christus tunc manibus tenebat, quod corpus suum esse affirmavit. Parabolarum apud Judæos usitatarum natura in rerum sub involucris descriptione posita est, ut documenta virtutis et monita suavius insinuarentur animis, ficta persona, vel similitudine mutuata. Auditores idcirco toti erant intenti ut significationem dictorum deprehenderent, rerum similitudinem, non veritatem, in narratione expectantes. Quandocumque explicatus est sensus, rogantibus discipulis, uti contigit de seminis jacti parabola, vox est, vel sunt, significationem, non rem ipsam, declarabat : quod ex orationis natura perspectum auditores habebant. Non ita in vocibus dominicis : “Hoc est corpus meum ;” “hic est sanguis meus ;” nec enim tunc Christus tradebat, vel explicabat parabolam. Allegoria etiam constat imaginum serie continuata, quæ proinde ex tota oratione liquet, adeo ut nemo decipiatur. Sic Christus veram vitem se dicendo, et Apostolos nuncupando palmites, Patrem verò suum agricolam, necessariò intelligebatur translato sensu loqui, quem et ipse exposuit. Sed in sermone illo simpliciori, quo eucharistiam instituens usus est, nullum est allegoriæ indicium. Igitur a vocum obvia

(1) I. Cor. x. 6, 11.

ac insita vi recedere non licet; sed credendum est Christo affirmanti: **Hoc est corpus meum; Hic est sanguis meus.**

71. *Obj.* 8. Christus plures in cœna adhibuit figuras; calicis nomine designavit quod eo continebatur, eumque novum Testamentum vocavit.

*Resp.* Calix pro eo quod eo continebatur usitato prorsus sermone sumptus est, et res verbis perspicuis a Matthæo et Marco declarata, ut nullus foret locus errori. Eum vocare licuit novum fœdus, obvio sensu, quem ipsi sacri scriptores ejus verba varie referentes explicuerunt, quod scilicet sanguis est fœderis, quo hoc obsignatum est, impetrata peccatoribus venia. Equidem apud omnes homines signa exteriora fœderis cum eo directe conjuncta fœdus vocari possunt, qua relatio illa nota est et obvia: sed non ea intercedit relatio manifesta inter panem et corpus Christi.

72. *Obj.* 9. Christus jussit ut in sui commemorationem celebraretur cœna: commemoratio autem fit absentis.

*Resp.* Utique Christus visibilem nobis subduxit præsentiam. Vult igitur ut illius in terris degentis, et cruci pro nobis fixi celebremus memoriam, quapropter mortem Domini annuntiare oportet, donec veniat, uti monet nos Paulus. Cæterum non ideo prorsus abest, sed corpus ejus et sanguis in mysterio in memoriam revocant quæ egit et passus est. Id autem animadvertendum, finem ob quem celebranda est eucharistia eo mandato indicari, ipsam autem rei naturam aliis vocibus: “hoc est corpus meum; hic est sanguis meus.” Juvat verba Calvinii quibus huic occurrit difficultati in medium proferre, depugnat scilicet cum Zuinglianis et Sacramentariis qui nudum signum habent eucharistiam: “Qualem sui memoriam voluerit Christus in cœna reoli mox audiemus. Quod autem hinc nonnulli colligunt, abesse igitur a cœna Christum, quoniam memoria nonnisi rei absentis sit, prompta est responsio, secundum hanc rationem qua cœna est recordatio, Christum ab illa abesse: neque enim adest Christus visibiliter, neque oculis cernitur.”<sup>1</sup> Cæterum nemo hactenus feliciter explicavit quomodo panis et vinum signa sunt corporis et sanguinis Christi, aut quæ Christi mortis memoria in eorum sumptione reperiatur.

73. *Obj.* 10. Christus post verba illa prolata de vino, subjunxit: “Amen, non bibam amodo de hoc genimine vitis:” erat igitur adhuc vinum.

*Resp.* Verba illa dicta sunt in cœna antequam poculum eucharisticum propinaretur, uti refert Lucas, rerum seriem accurate distinguens: post cœnam dicit institutum esse Sacramentum. Matthæus et Marcus silentio pertranseunt calicem fuisse in cœna propinatum, ea tamen retulerunt Christi verba, quæ ad vinum, tum in cœna, tum in Sacramento, adhibere referri poterant: hoc enim ante consecrationem vinum commune, postea eo nomine designari potuit, notissima figura, qua res indicantur juxta externam earum speciem, præsertim habita ratione prioris earum conditionis. Sic Moysis virga in serpentem conversa virga vocatur, “aqua

(1) Comm. in i. ad Corinth.

vinum facta” designatur apud Joannem. Nec sine causa relata sunt illa verba; futuri enim erant qui vinum in conficienda eucharistia omitterent, aqua tantum adhibita;<sup>1</sup> quorum prædamnatus est error vocibus illis Christi, ex quibus genimen vitis in ea conficienda ab eo adhibitum esse colligitur.

74. *Obj.* 11. In Turrentini jam citato compendio argumentum depro-mitur “ex verbis ipsis promissionis, ubi occurrit. 1. *Subjectum*, pronome demonstrativo *Hoc* expressum, quod ad panem necessariò referendum, quia est pronomen demonstrativum, quod demonstrat rem præsentem; jam verò nihil adhuc erat præsens quam substantia panis, quam acceperat, fregerat, discipulis porrigebat, &c. 2. *Prædicatum* enunciationis est *corpus* Christi non vivum, sed mortuum, seu brevi moriturum, *datum*, i. e. morti expositum, vel certò brevi exponendum pro nobis; et sanguis, non qui sit adhuc in venis, sed ut effusus et sparsus extra corpus. 3. *Copula est*, quæ subjectum cum prædicato non potest conjungere proprie, quia disparatum de disparato non potest prædicari proprie. At constat panem, qui demonstratur per *Hoc* et corpus Christi esse disparata, cum nec substantia panis sit dicive possit substantia corporis Christi, nec substantia poculi substantia sanguinis Christi, sed inter se numero, definitione, essentia, et adjunctis vere differant. Quod etiam confirmatur ex eo quod corpus non hic intelligitur vivum, sed mortuum et crucifixum. Jam impossibile et contradictorium est, ut panis vel alia quævis substantia sit proprie et sine figura corpus Christi mortuum, eo tempore, quo Christus non est mortuus. Ad hæc, si panis dicitur proprie corpus Christi, sequeretur omnia Christi attributa pani proprie convenire, ut nasci, mori, resurgere, &c. et omnia attributa panis corpori, ut seri, meti, trituri, coqui &c. sequeretur etiam, Christum, cum de mensa panem sumeret et frangeret, corpus suum sumpsisse et fregisse, et sanguinem fudisse antequam crucifixus esset, et nos jam corpus Christi frangere et sanguinem fundere hodie postquam Christus resurrexit, et est in statu gloriæ, ubi amplius mori non potest.”

*Resp.* Subtiliter quidem et ingeniose illa ratiocinatio contra divinum mysterium composita est, sed facile evertitur. Pronomen *hoc* non potest ad panem referri, quum neutrius sit generis—*τοῦτο*—*panis* vero sit masculini—*ὁ ἄρτος*. Indicat igitur quod manu tenebat Christus porrigendum discipulis, ejusque sensus ex integra sententia pendebat, et suspendebatur, adeo ut obscure et generatim rem indicaret, quam explicatius verba quæ sequebantur declarabant. Præsens erat substantia panis, ad quam si placeat *hoc* referre, ratione illa minus distincta referenda necessario est, ideoque vocibus aliis adjectis ejus sensus explicabatur et definiebatur, adeo ut illud, tunc quidem panis, esset corpus Christi, ipso dicente et faciente, mira substantiæ panis in substantiam corporis Christi conversione. *Prædicatum* enunciationis est corpus Christi simpliciter et absolute, non prout die sequenti

(1) Fuerunt novissime inter *temperantiæ* patronos, in hac regione, qui lac prævino in eucharistia usurpandum contenderent.

immolandum erat, sed prout tunc dabatur, et immolabatur in mysterio, verba enim quæ adjungunt Lucas et Paulus præsentis sunt temporis—το διδόμενον—το κλωμενον—idem tamen corpus quod die postero immolandum erat in cruce. Sanguis erat ille qui adhuc in venis Christi fluebat, qui simul suæ potestatis miro opere in calice erat, sub vini speciebus, qui tunc fundebatur,—το εκχυνόμενον—oblacione ejus Deo facta, et poculo propinato Apostolis ut ex eo biberent; idem ipse sanguis, qui mox manu tortorum erat fundendus. Copula est subjectum cum prædicato optime conjungit, quia subjectum est quod tenebat Christus dandum Apostolis, prædicatum est corpus suum quod reapse dedit: non igitur de pane corpus prædicatur; sed de eo quod fuit panis, verbis tamen Christi et potestate in corpus converso. Sic si Christus de aqua in nuptiis dixisset: “Hoc est vinum,” et dum loqueretur eam in vinum converteret, nemini insulse loqui videretur, ipse enim sensus communis hominum agnosceret verba illa aptissime designare mutationem quam efficerent. Inania igitur sunt quæ de attributorum cum corporis attributis permutatione mutua objiciuntur, nec enim hæc sequuntur ex ejus in corpus conversione. Nulla est contradictio Christum corpus suum fregisse in mysteriò, antequam actu immolaretur, nec enim illa fractio est instar ossium confractionis, sed mystica immolatio speciebus tantum externis panis eam subeuntibus mutationem. Sic nec repugnat ut in mysterio pariter sanguinem suum fuderit, pari oblacione, quæ a fusione violenta omnino distat. Quæ adhuc fit in divinis celebrandis mysteriis immolatio ejusmodi est, quæ idcirco gloriosæ corporis Christi conditioni non repugnat, est enim, uti a patribus consuevit designari, incruenta oblatio, vi scilicet sanguis non funditur, quamvis vere adsit, et offeratur Deo in memoriam fusionis ejus in cruce.

75. *Obj.* 12. Consuevit convivii paschalis magister, seu paterfamilias panem porrigendo dicere: “Hic est panis afflictionis quem comedebant patres nostri in Ægypto.” Igitur Christi verba facile intelligebantur quid panis repræsentaret significare.

*Resp.* De consuetudine illa non constat,<sup>1</sup> nam in veteribus Judæorum libris in quibus paschalis convivii ritus describuntur, omnino de ea siletur, cujus primis meminit Maimonides sæculi duodecimi scriptor.<sup>2</sup> Cæterum verba illa initio hymni dicuntur, haud panis porrigendi occasione, et hunc habent sensum: Panis iste quo nunc vescimur ejusdem est generis ac ille quo patres nostri in Ægypto vescebantur. Recentiores Judæi consuetudines habent plurimas veteribus ignotas, quæ nil valent in Christi Domini dictis vel rebus gestis illustrandis. Profectò actio ejus panem in manus

(1) Ipse Calvinus ait: “Incertum est an ritus qui hodie celebris est inter Judæos, tunc etiam fuerit usitatus: nam pater familias fragmentum a communi pane sumptum sub mappa recondit, cujus partes familiæ distribuat.” In Harmon Evang. p. ii. n. 197. sacræ Coenæ institutio.

(2) Vide Lectures on the Eucharist by Wiseman. Lecture. vii.

summentis, et dicentis : “ Hoc est corpus meum ; ” singularis prorsus est, a veterum et recentiorum Judæorum ritibus et consuetudine toto cœlo distans.

76. *Obj.* 13. Quum Christus mensæ accumberet, Apostoli non poterant verba ejus ita accipere, ut manibus ferret corpus suum, et manducaretur ab ipsis, vivus alioquin et integer.

*Resp.* Noverant Apostoli Christum palam pollicitum esse se carnem suam manducandam daturum : audierunt eum affirmantem illud quod manibus tenebat esse corpus suum. Id igitur humili mentis obsequio excipere debuerunt. Cæterum quum hoc fieret in mysterio, arcano quodam divinæ potestatis consilio, non oportebat id humano sensu scrutari, quomodo qui naturali conditione mensæ accumbebat, suis ipse deferretur manibus, sub velo sacramenti, et ita absque ullo sui detrimento in cibum animæ reciperetur. Divina hæc sunt opera quæ mirari et adorare oportet. Ad rem Augustinus in Psalmum trigesimum tertium scribens : “ *Et ferebatur in manibus suis.* Hoc vero, fratres, quomodo posset fieri in homine, quis intelligat ? Quis enim portatur in manibus suis ? Manibus aliorum portari potest homo, manibus suis nemo portatur. Quomodo intelligatur in ipso David secundum literam non invenimus ; in Christo autem invenimus. Ferebatur enim Christus in manibus suis, quando commendans ipsum corpus suum, ait : ‘ hoc est corpus meum : ’ ferebat enim illud corpus in manibus suis. Ipsa est humanitas Domini nostri Jesu Christi ; ipsa multum commendatur hominibus.”<sup>1</sup>

77. *Obj.* 14. Tertullianus, contra Marcionem disputans, qui Christum meram externam speciem corporis humani habuisse dicebat, et a Creatore rerum esse alienum, veritatem assumptæ naturæ, et eum esse Creatoris Filium vindicat. Hac ex occasione dicit : “ Sed ille usque nunc nec aquam reprobatur Creatoris . . . . nec panem in quo ipsum corpus suum repræsentat.”<sup>2</sup> Alias de ligno crucis ait : “ Hoc lignum et Hieremias tibi insinuat dicturis prædicans Judæis : ‘ Venite, mittamus lignum in panem ejus,’ utique in corpus. Sic enim Deus in Evangelio quoque vestro revelavit, panem corpus suum appellans, ut et hinc jam eum intelligas corporis sui figuram pani dedisse, cujus retro corpus in partem prophetes figuravit, ipso Domino hoc Sacramentum postea interpretaturo.”<sup>3</sup> Et aliàs : “ Acceptum panem et distributum discipulis, corpus suum illum fecit : ‘ Hoc est corpus meum,’ dicendo, id est figura corporis mei. Figura autem non fuisset, nisi veritatis esset corpus.”<sup>4</sup> Ultimum hoc testimonium magna cum fiducia objicit Cosinus.

*Resp.* Tertullianus repræsentandi vocem sensu scriptoribus optimis probato adhibuit, quod scilicet Christus in pane *ipsum corpus suum* iterum

(1) Ennar. in Ps. xxxiii.

(2) L. i. contra Marcion. c. xiv.

(3) Ibidem l. iii. c. xix.

(4) Ibidem l. iv. c. xl.



exhibeat, eo utens ut *corpus ipsum* nobis det; nam in eo est vis argumenti quod Christus Creatoris opera tanti fecerit, quod creatas res in sanctissimum usum assumpserit, panem ad *ipsum corpus* in Sacramento conficiendum usurpans: quod ni voluisset, superflua esset et inanis vox ista, *ipsum*. Sic in eodem opere Pater Filium repræsentasse dicitur, exhibuisse scilicet, et agnovisse: “Itaque jam repræsentans eum: ‘hic est filius meus dilectus.’”<sup>1</sup> Et carnis resurrectionem eadem voce indicavit, dicens: “carnem in ultimo die repræsentandam esse.”<sup>2</sup> Cicero ipse ab hac significatione vocis non abhorruit, ait enim: “Quin etiam corpus libenter obtulerim, si repræsentari morte mea libertas civitatis potest.”<sup>3</sup> Secundo loco Tertullianus interpretatur vaticinium Hieremiæ, quod in Christo dicit impletum, illud enim: “mittamus lignum in panem ejus,” docet de ligno in corpus mittendo intelligendum, corpus autem panis nomine a propheta designari probat ex eo quod ipse panem corpus suum appellaverit. Propheta igitur in figura, panis nomine corpus designavit, quia Dominus reipsa panem suum corpus appellaturus erat, illud utique facturum corpus suum, et sic sacramentum, vaticinii scilicet arcanum, interpretaturus, et patefacturus. “Cur autem,” inquit, “panem corpus suum appellat, et non magis peponem, quem Marcion cordis loco habuit, non intelligens veterem fuisse istam figuram corporis Christi, dicentis per Hieremiam: adversus me cogitaverunt cogitatum dicentes: Venite conjiciamus lignum in panem ejus, scilicet crucem in corpus ejus? Itaque illuminator antiquitatum quid tunc voluerit significasse panem, satis declaravit, corpus suum vocans panem. Sic et in calicis mentione testamentum constituens, sanguine suo obsignatum, substantiam corporis confirmavit. Nullius enim corporis sanguis potest esse nisi carnis.”<sup>4</sup> Pergit figuras veteres explicare, et inter cæteras vaticinium de Juda: “Lavabit, inquit, in vino stolam suam, et in sanguine uvæ amictum suum: stolam et amictum carnem demonstrans, et vinum sanguinem. Ita et nunc sanguinem suum in vino consecravit, qui tunc vinum in sanguine figuravit.”<sup>5</sup> In ultimo testimonio, quo adeo gloriatur Cosinus, est hyperbaton Tertulliano admodum familiare, quo scilicet voces non referuntur ad eas quæ mox præcedunt, sed ad priores.<sup>6</sup> Legendum itaque foret: ‘hoc, id est, figura corporis mei, est corpus meum;’ scilicet panis qui olim figura erat, jam fit corpus meum. Habemus alioquin præclara Tertulliani de Christi præsentia substantiali, et de orali manducatione, et tractatione etiam ab indignis, testimonia: “Caro,” inquit, “corpore et

(1) Ibidem l. iv. c. xxii.

(2) L. de Resur.

(3) II. Philippic.

(4) L. iv. contra Marcion. c. xl.

(5) Ibidem.

(6) Sic: “Dicendo Christus mortuus est, id est unctus.” L. contra Praxeam c. xxiv. Ordo est: “Christus, id est, unctus, mortuus est. Sic etiam l. io. contra Marcionem: “Aperiam in parabolis os meum; id est in similitudinem.”

sanguine Christi vescitur, ut anima de Deo saginetur.”<sup>1</sup> Et alias de iis qui operam impendebant statuis idolorum sculpendis, et postea Sacramentum eucharistiæ audebant recipere: “Tota die ad hanc partem zelus fidei perorabit, ingemens Christianum ab idolis in Ecclesiam venire, de adversaria officina in domum Dei venire, attollere ad Deum Patrem manus matres idolorum, his manibus adorare quæ foris adversus Deum adorantur, eas manus admoveere corpori Domini, quæ dæmoniis corpora conferunt. Nec hoc sufficit. Parum sit si ab aliis manibus accipiant quod contaminant, sed etiam ipsæ tradunt quod aliis contaminaverunt. Adleguntur in ordinem ecclesiasticum artifices idolorum. Pro scelus! Semel Judæi Christo manus intulerunt: isti quotidie corpus ejus lacesunt. O! manus præcidendæ!”<sup>2</sup>

78. *Obj.* 15. Origenes ait: “Panis iste quem Deus Verbum corpus suum fatetur, verbum est nutritorium animarum.”<sup>3</sup>

*Resp.* In more positum est Origeni ad mysticas confugere interpretationes, obvio verborum sensu relicto, quem tamen hoc loco non excludit, nam corpus Domini suscipi in mysteriis aperte confitetur, uti jam ostendimus.

79. *Obj.* 16. Origenes etiam dicit: “Non enim panem illum visibilem, quem tenebat in manibus, corpus suum dicebat Deus Verbum, sed verbum, in cujus mysterio fuerat panis ille frangendus. Nec potum illum visibilem sanguinem suum dicebat, sed verbum, in cujus mysterio potus ille fuerat effundendus. Nam corpus Dei Verbi, aut sanguis, quid aliud esse potest, nisi verbum quod nutrit, et verbum quod lætificat cor?”<sup>4</sup>

*Resp.* Liquet Origenem, pro more, mysticum exquirere sensum, qui tamen a Protestantica interpretatione, de symbolis et signis, et de perceptione fide, longe distat. Cæterum nec obviu sensum exclusit ipse, quum scribat: “Bibere dicimur sanguinem Christi, non solum sacramentorum ritu, sed et cum sermones ejus recipimus, in quibus vita consistit.”<sup>5</sup>

80. *Obj.* 17. Augustinus ait; “Non dubitavit Dominus dicere: ‘Hoc est corpus meum,’ cum signum daret corporis sui.”<sup>6</sup> Et alio loco dicit: “Christus adhibuit Judam ad convivium in quo corporis sui figuram discipulis commendavit.”<sup>7</sup>

*Resp.* Signum priori loco usurpatum videtur ad mentem Manichæorum cum quibus disputabat; sed ne obscuris eorum erroribus lectores detineamus, fatemur panem eucharisticum signum et figuram quodammodo dici posse, ob species externas, quibus velatur corpus Domini: nec enim manifestò

(1) Lib. de resur. car.

(2) Lib. de idololatria.

(3) In c. xxvi. Mat.

(4) Comment. series in Matth. n. 85.

(5) Hom. xvi. in Num.

(6) L. contra Adimantum c. xii.

(7) Comm. in Psal. iii.



nobis traditur. Plurimæ voces, per se innoxæ, jam plenæ periculi sunt ob hæreticorum abusum. Cæterum quid de re eucharistiæ censuerit Augustinus, omnino liquet ex plurimis ejus testimoniis. De Judæis ad fidem conversis, et eucharistia reffectis ait: “Ipsum sanguinem, quem per insaniam fuderunt, per gratiam biberunt.”<sup>1</sup> “Ad mensam Domini accesserunt, et sanguinem quem sævientes fuderunt, credentes biberunt.”<sup>2</sup> De fidelibus loquens: “Nos de cruore Domini pascimur, qui corpus ejus manducamus.”<sup>3</sup> Ad consuetudinem respondendi “Amen” Sacerdoti dicenti, “sanguis Christi,” dum sacrum propinaret calicem, alludens dicit: “Videte: in toto terrarum orbe pretium nostrum accipitur, et ‘Amen’ respondetur.”<sup>4</sup>

(1) In Ps. lxxv. n. 5.

(2) Serm. lxxvii. de verbis Evang.

(3) In Ps. c. n. 9.

(4) In Ps. cxxv.

## CAPUT V.

## DE USU EUCHARISTIÆ.

Placuit Deo plurima præclaraque testimonia in Scripturis de mysterio eucharistico nobis præstare, ut incredulis omnis excusatio tolleretur, præter enim promissionem verbis adeo perspicuis factam, et institutionem a quatuor sacris scriptoribus relatam, habemus illustria Apostoli documenta, quæ usum sacramenti respiciunt. Illa jam nobis perpendenda sunt.

## PROPOSITIO.

*Vera, realis, et substantialis præsentia corporis et sanguinis Domini nostri Jesu Christi in Eucharistia invicte probatur iis Scripturæ testimoniis quæ usum hujus Sacramenti respiciunt.*

*Probat I. ex verbis Apostoli.*

81. Apostolus ad Corinthios scribens, ut eos ab omni idololatriæ cultus consortio avertat, argumento utitur ab eucharistiæ natura desumpto : “Propter quod, charissimi mihi, fugite ab idolorum cultura : ut prudentibus loquor, vos ipsi judicate quod dico. Calix benedictionis, cui benedicimus, nonne communicatio sanguinis Christi est? et panis quem frangimus, nonne participatio corporis Domini est?”<sup>1</sup>—τὸ ποτήριον τῆς εὐλογίας, ὃ ἐλογίζμεν, οὐχὶ κοινωνία τοῦ αἵματος τοῦ Χριστοῦ ἐστὶν; τὸν ἄρτον, ὃν κλῶμεν, οὐχὶ κοινωνία τοῦ σώματος τοῦ Χριστοῦ ἐστὶν;—Illud igitur gravissimum argumentum est quod cum idolis nullam partem habere oporteat, quia Christi sumus consortes, participes facti corporis et sanguinis ejus, eucharistico accepto pane, et poculo degustato. Illa panis eucharistici fractio communicatio est corporis Christi, quia scilicet ipsum corpus est: ille calix communicatio sanguinis Christi est, quia eo continetur ipse sanguis.

82. Altero capite Paulus arguit excessus Corinthiorum in eucharistia celebranda, et revocat in memoriam institutionem sibi revelatam divinitus; ex qua hæc infert : “Itaque quicumque manducaverit panem hunc, vel biberit calicem Domini indigne, reus erit corporis et sanguinis Domini.—ἑνοχος ἔσται τοῦ σώματος καὶ αἵματος τοῦ Κυρίου. Probet autem seipsum homo : et sic de pane illo edat, et de calice bibat. Qui enim manducat et bibit indigne, judicium sibi manducat, et bibit, non dijudicans corpus Domini.”<sup>2</sup> Reus igitur corporis et sanguinis Domini est qui indigne sumit panem

(1) I. Cor. x. 16.

(2) I. Cor. xi. 27.

eucharisticum, vel bibit calicem Domini: quod gravissimum crimen non admitteretur, nisi corpus et sanguis adessent, signa enim et symbola, licet indigne tractata, vix crimen violati corporis et sanguinis, nisi exaggerata quadam locutione, secum ferre dicerentur. Magna idcirco propriæ conscientiae indago singulis ad tantum Sacramentum accessuris injungitur, eo quod indigne sumens, judicium, damnationem scilicet, —*κρίμα*—sibi adsciscat et promereatur, quia non discernit, nec pro rei summa dignitate æstimat, et tractat corpus Domini, *μὴ διακρίνων τὸ σῶμα τοῦ Κυρίου.*

*Probatur II. ex Patrum interpretatione.*

83. S. IRENÆUS, ut Valentinianos refelleret, qui corpus cœleste Christo tribuebant, humanum et naturale denegabant, gravissimum deducit argumentum ex sanguine quo potamur in eucharistia; quod omni careret vi, si vere sanguis poculo non contineretur. Eorum absurdum errorem ostendit: “Sic autem secundum hæc videlicet, nec Dominus sanguine suo redemit nos, neque calix eucharistiæ communicatio sanguinis ejus, neque panis quem frangimus, communicatio corporis ejus est. Sanguis enim non est, nisi a venis et carnibus et a reliqua quæ est secundum hominem substantia, qua vere factum Verbum Dei sanguine suo redemit nos.”<sup>1</sup>

84. S. CYPRIANUS ait: “Idem contumacibus et pervicacibus comminatur et denunciatur dicens: ‘Quicumque ederit panem, aut biberit calicem Domini indigne, reus erit corporis et sanguinis Domini.’ Spretis his omnibus atque contemptis, VIS INFERTUR CORPORI EJUS ET SANGUINI: et plus modo in Dominum manibus atque ore delinquant, quam cum Dominum negaverunt.”<sup>2</sup>

85. S. PACIANUS: “Bene tu peccator intellige: spectaris a Domino; potes illum placare, si velis: sed antiquum sit istud, quod ad mensam Dei accedere non licuit immundis: ‘quicumque manducaverit indigne reus erit corporis et sanguinis Domini.’ Humanæ animæ reus non potest absolvi; DOMINI CORPORIS VIOLATOR EVADIT? ‘Qui manducat et bibit indigne judicium sibi manducat et bibit.’ Evigila peccator: time in visceribus tuis præsens judicium, si quid tale fecisti. . . . Intellige, quantum sceleris admittat, qui ad altare venit indignus, cui pro remedio computatur, cum aut morbis laborat, aut morte dissolvitur.”<sup>3</sup>

86. S. EPHREM SYRUS: “Ad divina frequentanda mysteria studiose concurrите . . . et state cum multo timore ac tremore; cum nemine quidem tunc congradiētes; sed sicut angeli, qui in cœlis sunt, servite Domino in timore, et exultate ei cum tremore; lachrymantes, suspirantes, supplicantes, invocantes ex toto corde, et rogantes ne quis divinorum mysteriorum susceptione reperiatur indignus; sed, quemadmodum ait Apostolus, ‘probet unusquisque seipsum,’ ne sibi ipsi in judicium fiat, et augmentum

(1) L. v. adv. hæer. c. ii.

(2) L. de lapsis.

(3) Parænesi ad pœnit.

peccati: 'qui enim manducaverit, et biberit indigne, judicium sibi manducat et bibit.' . . . Angeli mundi cum tremore ministrant, faciemque obtegentes, non audent respicere; et tu immundus cum sis, et impœnitens, æ impudens, non contremiscis? Hominibus quidem te rite sumere eucharistiam fidem facis, sed cordium scrutatori quid dices?"<sup>1</sup>

87. S. BASILIUS pœnis in veteris Legis violatores recensitis, prosequitur: "Si tales minæ adversus eos positæ sunt, qui temere ad ea sacra accedunt, quæ ab hominibus sanctificantur; quid dicendum est de eo, qui in tantum ac tale mysterium temerarius est? Quanto enim majus aliquid is est templo, secundum Domini vocem, tanto gravius et terribilius est, in animæ impuritate constitutum, CORPUS CHRISTI TEMERE CONTINGERE,—αχ σῶμα τοῦ σωματος τοῦ Χριστοῦ—quam sit accedere ad arietes vel tauros, dicente Apostolo 'etenim qui edit panem, aut bibit poculum Domini indigne, reus erit corporis et sanguinis Domini.' Imo vehementius ac terribilius judicium per repetitionem exprimente, cum dicit: 'probet autem quisque seipsum, et sic de pane hoc edat, et de poculo bibat: quicumque manducat et bibit indigne, judicium sibi manducat et bibit; non dijudicans corpus Domini.'"<sup>2</sup>

88. S. HIERONYMUS pulchre exponit quæ sit in Sacramentorum susceptione fidelium æqualitas: "Nos CHRISTI CORPUS ÆQUALITER ACCIPIMUS: una est in mysteriis sanctificatio Domini et servi, nobilis et ignobilis, regis et militis; quamquam pro excipientium meritis diversum fiat quod unum est. 'Qui enim indigne manducaverit et biberit, reus erit corporis et sanguinis Christi.'"<sup>3</sup>

89. S. AUGUSTINUS fideles graviter monet: "Qui manducant carnem Domini, et bibunt sanguinem ejus, cogitent quid manducent et bibant, ne, sicut Apostolus dicit, judicium sibi manducent et bibant."<sup>4</sup> Alio loco dicit Augustinus: "Indigne sumens Dominicum Sacramentum, non efficit, ut quia ipse malus est, malum sit, aut quia ipse ad salutem non accipit, nihil acceperit: CORPUS ENIM DOMINI, ET SANGUIS DOMINI NIHILOMINUS EST, etiam illis quibus dicebat Apostolus: 'Qui manducat et bibit indigne etc.'"<sup>5</sup> Aliàs: "A malis boni se corde interim et moribus separant, SIMUL MANDUCANTES ET BIBENTES CORPUS ET SANGUINEM DOMINI; sed cum magna distinctione . . ac per hoc quamvis in uno eodemque convivio, ii misericordiam manducant, illi judicium."<sup>6</sup> Alibi: "Quid de ipso corpore et sanguine Domini, unico sacrificio pro salute nostra, quamvis ipse Deus dicat: 'nisi quis manducaverit carnem meam, et biberit sanguinem meum, non habebit in se vitam? Nonne idem Apostolus docet, etiam perniciosum male utentibus fieri?' ait

(1) Tract. de festis diebus, et de dignitate mysteriorum.

(2) L. ii. de Bapt. c. iii.

(3) L. ii. contra Jovinian.

(4) Tract. de Verbis Domini Serm. xlvi.

(5) L. v. de Bapt. contra Donat, c. viii.

(6) Contra Donat. post collat. c. xx. n. 27.

enim: 'Quicumque manducaverit panem vel biberit calicem Domini indigne, reus erit corporis et sanguinis Domini.'"<sup>1</sup>

90. S. PETRUS CHRYSOLOGUS: "O! quam docuit mulier quantum sit corpus Christi, quæ in Christi fimbria tantum esse monstravit. Audiant Christiani QUI QUOTIDIE CORPUS CHRISTI ATTINGUNT, quantam de ipso corpore sumere possunt medicinam, quando mulier totam rapuit de sola Christi fimbria sanitatem. Sed quod nobis flendum est, mulier de fimbria vulneri medicinam tulit, nobis medicina ipsa retorquetur in vulnus. Hinc est quod TANGENTES INDIGNE CORPUS CHRISTI taliter admonet et deplorat, 'qui enim tangit indigne corpus Christi, iudicium sibi sumit.'"<sup>2</sup>

91. THEODORETUS ait: "Illud autem: 'reus erit corporis et sanguinis hoc significat, quod quemadmodum tradidit quidem illum Judas, ipsi autem insultarunt Judæi, ita eum ignominia et dedecore afficiunt qui sanctissimum ejus corpus immundis manibus accipiunt, et in pollutum os immittunt.' . . . Conscientiam præpurgantes, ita simus divinorum Sacramentorum participes, ut horum Dominum in nobis habitantem recipiamus."<sup>3</sup>

92. Hæc patrum insignium testimonia quibus plurima alia adjicere liceret, probant manifesto Apostoli verba ab initio per sæcula in quibus maxime enituit fidei splendor, hunc omnibus præsetulisse sensum; et eucharistiam in Ecclesia frequentatam fuisse ex firma animi persuasione verum corpus et sanguinem Christi adesse, et suscipi ore fidelium, etiam ab indignis, sed ad suam perditionem, quum digne susipientibus forent instrumenta sanctitatis et salutis pignora. Qui his contradicunt, et Scripturas perperam ab exordio Ecclesiæ intellectas, et Sacramenti præcipui naturam et usum penitus depravatum, asserant necesse est; quo pacto se a bonorum omnium consortio separant.

#### OBJECTIONES DILUUNTUR.

93. *Obj.* 1. Paulus loquitur "de spirituali Christi et fidelium unione = ut inde inferat sacrilegium esse non ferendum, ipsos idolorum communionem pollui. Ex circumstantia ergo loci judicare licet, κοινωνίαν sanguinis esse societatem, quæ nobis est cum Christi sanguine, dum simul nos in corpus suum inserit, ut vivat in nobis et nos in ipso." Ita Calvinus in locum.

*Resp.* Agit quidem Paulus de Christi et fidelium unione, sed de ea quæ fit sanguinis sui in mysteriis potatione; unde merito infert sacrilegium esse immane idolorum communionem pollui. Frustra conatur Calvinus hæc de mera societate qua in corpus Christi mysticum inserimur, vel de efficacia et virtute sanguinis, quam sacramentum digne percipientes experiuntur, explicare, nam verba intimum sanguinis consortium denotant, et Apostoli; contra eos qui idolorum cultus aliquatenus fiunt participes, oratio inde

(1) L. i. contra Cresconium Donat. c. v.

(2) Serm. xxxiv. n. 8 et 9.

(3) Comm. in ep. i. ad Cor. c. xi.

maximam derivat vim. Frustra conatur, figurata interpretatione semel data, rem ipsam adesse probare, nam tollit præsentiae hujus fundamentum, et Zuinglianis assentiatur necesse est, qui mera symbola ea esse clamitant. Hæc igitur quæ post objecta verba adjicit, ipsius auctoritate tantum nituntur, haud facile plena fide excipienda post obviam verborum Pauli interpretationem rejectam: “Jam vero,” inquit ille Sacramentariorum objectioni ut eat obviam, “quod vocatur calix *communicatio*, figuratam loquutionem esse fateor: modo non tollatur figuræ veritas, hoc est, modo res quoque ipsa assit, nec minus sanguinis communionem animo percipiat, quam ore vinum bibimus.”<sup>1</sup>

94. *Obj. 2.* Calicem Domini cum calice dæmoniorum Paulus confert: “non potestis calicem Domini bibere, et calicem dæmoniorum:”<sup>2</sup> attamen nemo dixerit dæmonum sanguinem calice, qui eorum dicitur, contineri.

*Resp.* Explicat Paulus cur calix Domini dicatur, quia scilicet de eo dixit Christus: “Hic calix novum testamentum est in meo sanguine;” et quia revera “communicatio sanguinis Christi est.” Necesse non est ut eadem sit ratio calicem utrumque designandi, sed quum calix alter vel sanguinem victimarum dæmoniis oblatarum contineret, vel vinum iis libandum, monuit fideles Apostolus iis non licere de calice Dominico bibere, si ulla ratione sese idololatrici cultus participes facerent.

95. *Obj. 3.* Illius ex decimo capite adducti testimonii “sensus est: Nonne bibitione ejus vini consecrati, quod haurimus e poculo, participes reddimur sanguinis Christi? i. e. profitemur ad alios, nos religione esse Christianos, vel: declaramus, nos esse cultores Christi, qui pro nobis mortuus est.”<sup>3</sup> Ita Rosenmüller.

*Resp.* Nemo non videt Rationalistam frustra fatigari in testimonio clarissimo obscurando, cujus vis ea plane est, ut ipsius poculi degustatione, sanguinis Christi, qui eo continetur, participes simus; quod fere dicit ipse invitus: “Κοινωνία per metonymiam hoc loco est id per quod fit ipsa communio, ut sit sensus: *omnes bibentes ex hoc sacro poculo sunt κοινωνοὶ αἵματος τοῦ Χριστοῦ.*” Inverecunde profectò veterum auctoritatem pro novitiis sua interpretatione jactat, quod enim laudat Theodoreti testimonium, reddendum est: “Sacris fruente mysteriis, nonne ipsi Domino communicamus, cujus et corpus esse et sanguinem dicimus?”—Τῶν ἱερῶν ἐκταλαίωτες μυστηρίων, οὐκ αὐτῷ κοινωνοῦμεν τῷ Δεσπότῃ, οὐ καὶ τὸ σῶμα εἶναι καὶ τὸ αἷμα φαμέν;

96. *Obj. 4.* Quæ sequuntur verba in testimonio illo Pauli hunc ferunt sensum: “Nonne (esu panis sacri) declaramus nos esse membra corporis Christi, i. e. societatis Christianæ?” Ita Rosenmüller.

(1) Comm. in locum. Vide etiam opus sæpius laudatum: “La perpétuité de la Foi, Vol. I. l. I. ch. viii.

(2) I. Cor. x. 20.

(3) In locum.

*Resp.* Eane est interpretandi regula quam recta dictat ratio, ut corporis et sanguinis Christi, eodem spiritu, facta mentione, sanguis, prout sonat, accipiatur, corpus de societate christiana sit intelligendum? Ignoscatur nobis in sacro textu sensum sibi constantem, et arcto nexu conjunctam sententiarum seriem, quando ita proferuntur, quærentibus.

97. *Obj.* 5. Versiculi vigesimi quinti capitis undecimi, de fœdere in sanguine Christi, et de bibendo in ejus memoriam, “sensus est: *Bibere ex hoc calice est ingredi novum fœdus*, associare se novæ religioni, quam sancio meo sanguine, morte cruenta. Dum vos bibitis ex hoc calice, reddo vos participes fœderis novi, et antiquo fœdere solvo.”<sup>1</sup> Rosenmüller.

*Resp.* In sanguine suo Christus dixit fœdus novum constitui, ipsumque esse quem Apostolis propinavit. Bibere ex eo jussit, ut illius fœderis, et sanguinis effusi numquam interiret memoria, et participes ejusdem fierent bibentes, peccatorum venia, et gratiæ muneribus donati. Cæterum non hunc instituit ritum, quo quis sese ejus religioni associaret, baptismo enim initiari jussit credentes, quos deinceps mysteriorum perceptione plurimis ditandos donis voluit. Profectò nihil in Christi verbis, prout a Paulo referuntur, habetur, quo ad initiationis ritum reducatur eucharistia, tanta cum emphasi corpus et sanguis Christi designata.

98. *Obj.* 6. Dicendo percipientes eucharistiam mortem Domini annuntiuros, Paulus id tantum voluit: “Ipsi hujus cœnæ sacræ celebratione publice profitemini, Christum pro vobis esse mortuum.”<sup>2</sup>

*Resp.* Utique id profitemur, quia corpus pro nobis immolatum in mysterio sumimus, sanguine, quo redempti sumus, potamur. Secus non videtur ratio cur panis esus et vini potatio Christi mortem exhiberent. Si in vino imaginem quamdam sanguinis effusi videre placeat, quæ corporis immolati imago in pane est? Ridendum se præbuit Wetstenius dicendo: “Cadaver exangue, quale est hominis in cruce mortui, tam siccum esse quam panis.”<sup>3</sup>

99. *Obj.* 7. Reus corporis et sanguinis Christi indigne sumens eucharistiam dicitur: “pœnas dabit tanti facinoris, quod ipsum Christum quasi ignominia affecerit.”<sup>4</sup> Ita Rosenmüller.

*Resp.* Sed quare panis et vini eucharistici indigna perceptio tantam Christo irroget injuriam, Rosenmüller haud studuit explicare. Ratio est manifesta, ex natura rei desumpta, quia scilicet corpus et sanguis Christi indigne sumuntur.

(1) In locum.

(2) Rosenmüller in locum.

(3) Comm. in Matt. xxvi. 28. p. 519.

(4) In locum.

100. *Obj.* 8. Ideo indigne sumens eucharistiam arguitur, quasi non discernens corpus Christi, “quia non satis æstimat corpus Christi. . . . Summæ est levitatis ac temeritatis, eo ipso tempore, quo laudibus et gratiarum actione memoria mortis Christi celebrari debet, crapulæ dare operam, et alios contemnere.”<sup>1</sup>

*Resp.* Optima ratio quam veluti invitatus tradit Rationalistæ, quod scilicet indigne sumens non satis æstimat corpus Christi; sed frustra hoc ad meram memoriam mortis Christi studet revocare. Obvius est sensus eum non satis æstimare corpus Christi, quod accipit; secus non auderet indignus ad illud accedere.

(1) Idem in locum.



## CAPUT VI.

## PATRUM TESTIMONIA.

101. Id jam alte prædicant Oxonienses in gravissima quaque fidei controversia, et ea imprimis quæ circa eucharistiam versatur, antiquam Ecclesiæ fidem regulam esse tutissimam, juxta quam de scripturarum sensu judicare liceat. Ex iis quæ laudavimus testimoniis res satis constat; patres quippe ita interpretati sunt scripturas, ut veram, realem, et substantialem Christi præsentiam in eucharistia iis tradi agnoscerent, quæ fides totius Ecclesiæ fuit, uti ex loquendi ratione, quam servant, colligitur. Cæterum in re tanti momenti non piget immorari, et testium nubem exhibere, apud omnes enim veros rerum æstimatores pondus habeat necesse est omnium sæculorum a Christo fides.

102. I. SÆCULO. IGNATIUS Martyr qui circa annum nonagesimum a Christo nato floruit, et Antiochenam rexit Ecclesiam, de Menandrianis et Simonianis, qui veram carnem a Christo assumptam esse negabant, agens, notat eos idcirco ab eucharistia sese abstinere: “Ab eucharistia et oratione abstinent, eo quod non confiteantur, eucharistiam carnem esse servatoris nostri Jesu Christi, quæ pro peccatis nostris passa est—*την ευχαριστίαν σάρκα εἶναι του σώτηρος ἡμῶν Ἰησοῦ Χριστοῦ, τὴν υπὲρ ἁμαρτιῶν ἡμῶν παθούσαν*—Qui ergo contradicunt huic dono Dei, altercantes moriuntur.”<sup>1</sup> Ergo eucharistia agnoscebatur a fidelibus caro Jesu Christi, eadem quæ pro nobis est passa.

103. II. SÆCULO. JUSTINUS M., secundo sæculo medio floruit. Insigne ejus testimonium hac de re jam retulimus, juvat tamen præcipua verba iterum recitare. “Illam in qua per precem ipsius (*Christi*) verba continentem gratiæ actæ sunt, alimoniam ex qua sanguis et carnes nostræ per mutationem aluntur, incarnati illius Jesu et carnem et sanguinem esse edocti sumus.”<sup>2</sup> Panis igitur consecratus caro et sanguis Christi ex doctrina fidei habebatur,

104. S. IRENÆUS, Valentinianos, qui Christum esse creatoris Filium negabant, et corporum resurrectionem, sic refellit: “Quomodo autem constabit eis, eum panem, in quo gratiæ actæ sunt, CORPUS ESSE DOMINI SUI, ET CALICEM SANGUINIS EJUS, si non ipsum fabricatoris mundi Filium dicant, id est, Verbum ejus, per quod lignum fructificat, et defluunt fontes, et (terra) dat primum quidem fœnum, post deinde spicam, deinde plenum triticum in spica? Quomodo autem rursus dicunt carnem in corruptionem

(1) Ad Smyrnenses.

(2) Apol. i. n. 66.

devenire, et non percipere vitam, quæ a corpore Domini et sanguine alitur? Ergo aut sententiam mutant, aut abstineant offerendo quæ prædicta sunt. Nostra autem consonans est sententia eucharistiæ, et eucharistia rursus confirmat sententiam nostram. Offerimus enim ei quæ sunt ejus, congruenter communicationem et unitatem prædicantes carnis et Spiritus. Quemadmodum enim qui est a terra panis percipiens invocationem Dei, jam non communis panis est, sed eucharistia, ex duabus rebus constans, terrena et cœlesti: sic et corpora nostra percipientia eucharistiam, jam non sunt corruptibilia, spem resurrectionis habentia. Offerimus autem ei, non quasi indigenti, sed gratias agentes donationi ejus, et sanctificantes creaturam.”<sup>1</sup> Jam verò illa perpendantur verba, habita præ oculis hæresi quam refellebat Irenæus; et fides quæ tunc fovebatur de Christi vera, reali, et substantiali præsentia in Eucharistia patebit. Negabant Valentini Christum, quem Dominum suum agnoscebant, esse Demiurgi, mundi scilicet creatoris, filium; Demiurgum enim inferiorem putabant Æonem, Christum Summi Dei Filium. Eucharistiam nihilominus corpus et sanguinem ejus esse profitebantur æque ac Christiani. Interrogat eos Irenæus quomodo hæc sibi cohæreant, quum Christus pane vinoque in eucharistia conficienda usus sit, rebus a Creatore profectis, ostendit scilicet se ab eo non esse alienum. Igitur aut id faterentur oportebat, aut desinerent panem eucharisticum “corpus esse Domini et calicem sanguinis ejus” profiteri. Quamvis autem argumentari inde licuisset, si in symbola et signa a Christo adhibita fuissent, nec deerant voces quibus sic designari potuissent, simpliciter dicit **CORPUS ESSE ET CALICEM SANGUINIS EJUS**, quæ rei veritatem omnino declarant.

105. Resurrectio corporum humanorum etiam negabatur a Valentini sectatoribus, qui tamen non dissentiebant a Catholicis de re eucharistiæ, carnem enim nostram a corpore Domini et sanguine ali confitebantur. Eos sibi plane non constare contendit Irenæus, nec enim conveniebat carnem corpore Domini veluti saginatam, et sanctificatam, penitus interire. Igitur vel oportebat ab offerendo sacrificio eucharistico abstinere, qua ratione Malachiæ vaticinium haud implere convincerentur, vel sententiam resurrectioni corporum adversam deserere. Catholica sententia, quam propugnabat Irenæus, omnino sibi conveniens erat, nam fides de resurrectione corporum congruebat dogmati de receptione corporis et sanguinis Domini in Sacramento: et hoc vicissim eam confirmabat, et spem fiduciamque magnam fovebat, pignus enim est illustre carnis aliquando resuscitandæ. Offerebant Catholici Deo res illas creatas, panem et vinum, eum agnoscentes conditorem, et datorem; et invocato Deo ut oblati benediceret, divinam inibant communicationem et unitatem, corporis et sanguinis Domini facti participes, ita ut caro pignus haberet resurrectionis, spiritus

(1) L. iv. adv. hæ. c. xviii. alias xxxiv.

augeretur virtute. Quemadmodum enim panis post Dei invocationem qui sacratur, jam non est qualis fuit, sed eucharistia, ex duabus rebus constans scilicet terrena, cujus retinet speciem, cœlestis quam velat, ita et corpori nostra eucharistia refecta cœleste resurrectionis semen habent. Offerimus autem Deo dona ipsius, quæ et sanctificantur ejus benedictione, et sanctitatem nobis impertiuntur, facta corpus et sanguis Christi Domini.

106. Argumentum idem ad probandam corporum resurrectionem aliam versat: “ Quando ergo et mixtus calix et fractus panis percipit Verbum Dei, et fit eucharistia sanguinis et corporis Christi, ex quibus augetur et consistit carnis nostræ substantia; quomodo autem negant capacem esse donationis Dei, quæ est vita æterna, QUÆ SANGUINE ET CORPORE CHRISTI NUTRITUR, et membrum ejus ?”<sup>1</sup> Inferius dicit: “ Quemadmodum lignum vitis, depositum in terra, suo fructificat tempore, et granum tritici decidens in terram et dissolutum multiplex surgit, per Spiritum Dei qui continet omnia quæ deinde per sapientiam in visum hominibus veniunt, et percipientia Verbum Dei, eucharistia fiant, QUOD EST CORPUS ET SANGUIS CHRISTI: sic et nostra corpora ex ea nutrita et reposita in terram, et resoluta in ea resurgent suo tempore, Verbo Dei resurrectionem eis donante, in gloriam Dei Patris.”

107. III. SÆCULO. TERTULLIANUS sub finem secundi, et initium tertii sæculi vixit. Plura ejus testimonia hac de re jam retulimus, quibus unum addere juvat. De iis agens qui stationes peracturi, scilicet publica pœnitentiæ exercitia, religioni ducebant eucharistiam prius accipere, ne læta tristibus admiscerentur, consulit ut eam quidem recipiant manu, ut sacrificii fiant participes, sed, prout illorum temporum disciplina permittebat, reservent post stationes ore percipiendam: “ Accepto corpore Domini et reservato, utrumque salvum est, et participatio sacrificii, et executio officii.”<sup>2</sup> De peccatore ad munus suum redeunte, instar filii prodigi, dicit: “ exinde OPIMITATE DOMINI CORPORIS VESCITUR, Eucharistia scilicet.”<sup>3</sup>

108. S. CYPRIANUS queritur de iis qui in idololatriam lapsi, deinceps ad eucharistiam audebant accedere, ante expiatum crimen congrua pœnitentia: “ A diaboli aris revertentes, ad Sanctum Domini sordidis et infectis nidore manibus accedunt. Mortiferos idolorum cibos adhuc pene ructantes, exhalantibus etiam nunc scelus suum faucibus et contagia funesta redolentibus, DOMINI CORPUS INVADUNT . . . ante expiata delicta . . . ante purgatam conscientiam sacrificio et manu Sacerdotis, ante offensam placatam indignantis Domini et minantis, VIS INFERTUR CORPORI EJUS ET SANGUINI, et plus modo in Dominum manibus et ore delinquent, quam cum Dominum negaverunt.”<sup>4</sup> Manibus et ore delinquere eos dicit, quia juxta veterum disci-

(1) L. v. adv. hæer. c. ii.

(2) Lib. de oratione c. xiv.

(3) De Pudicitia c. ix.

(4) De Lapsis.

plinam Sacramentum manibus fidelium excipiebatur, priusquam ori admo-  
veretur.

109. Lapsis, sed criminis pœnitentiam agentibus, eucharistiam haud  
denegandam, si nova urgeret persecutio, et martyrii idcirco periculum, tra-  
dit: "Quomodo enim docemus, aut provocamus eos in confessione nomi-  
nis Christi sanguinem suum fundere, si eis militaturis Christi sanguinem  
denegamus?"<sup>1</sup> Tibaritanos in discrimine constitutos monuit: "Fide  
robusta se debent milites Christi parare; considerantes idcirco se quotidie  
calicem sanguinis bibere, ut possint et ipsi propter Christum sanguinem  
fundere."<sup>2</sup>

110. De lætitia quam eucharistia parere solet dicit: "Quemadmodum  
vino isto communi mens solvitur, et anima relaxatur, et tristitia omnis exponi-  
tur: ita, **EPOTO SANGUINE DOMINI**, et poculo salutari, exponatur memoria  
veteris hominis, et fiat oblivio conversationis pristinae sæcularis et mœstum  
pectus ac triste, quod prius peccatis agentibus premebatur, divinae indul-  
gentiæ lætitia solvatur. . . . Ebrietas enim dominici calicis et sanguinis  
non est talis, qualis ebrietas vini sæcularis."<sup>3</sup> De iis quos malus impediēbat  
pudor ne ad eucharistiam accederent, dicit: "Quomodo possumus propter  
Christum sanguinem fundere, qui sanguinem Christi erubescimus bibere?"<sup>4</sup>

111. IV. SÆCULO. GREGORIUS NAZIANZENSIS his verbis hortatur ad eu-  
charistiam recipiendam: "Sine pudore ac dubitatione corpus ede, sangui-  
nem bibe si modo vitæ desiderio teneris; nec sermonibus de carne fidem  
abrogans, nec ad eos qui de passione habentur, impingens."—ἀλλ'  
ἐπιποθίντως καὶ ἀνενδοίαστως, φάγε το σῶμα, πίε το αἷμα, εἰ τῆς ζωῆς ἐπιθυμητικῶς  
ἴης, μήτε τοῖς περὶ σαρκὸς ἀπιστῶν λόγοις, μήτε τοῖς περὶ τοῦ παθὸς βλαπτόμενος<sup>5</sup>

112. S. EPHREM SYRUS ait: "Quid ergo inscrutabilia scrutaris, ac imper-  
vestigabilia vestigas? Si enim ista curiose rimaris, non jam fidelis nuncu-  
paberis, sed curiosus. Esto itaque fidelis atque innocens: participa  
immaculatum corpus et sanguinem Domini tui fide plenissima, certus,  
quod agnum ipsum integre comedas. Ignis immortalis sunt mysteria  
Christi: cave ne ea temere scruteris, ne in ipsorum participatione com-  
buraris."<sup>6</sup>

113. S. MARUTHAS, Tangritensis episcopus, qui sub finem sæculi  
hujus floruit, et Syriaco scripsit sermone, insignis est testis vetustæ fidei.  
Verba ejus eo idiomate citantur a Wiseman, et sic redduntur: "Præterea  
etiam privati fuissent communione corporis et sanguinis fideles posteri-  
ores; (*nisi hoc sacramentum instituisset*) sed nunc, quotiescumque ad

(1) Ep. liv. ad Cornelium.

(2) Ep. lvi. ad Tibaritanos.

(3) Ep. lxiii. ad Ceciliū. Alias l. ii. ep. iii.

(4) Ibidem.

(5) Orat. xlv. § 19.

(6) De natura Dei non scrutanda.

corpus et sanguinem accedimus, et super manus nostras accipimus, sic credimus nos corpus amplecti, et nos carnis ejus et ossium ejus (participes fieri,) juxta id quod scriptum est. Enimvero Christus illud non appellavit **TYPUM** aut **FIGURAM**, sed (*dixit*); Vere Hoc est corpus meum, et Hic est sanguis meus.”<sup>1</sup>

114. S. AMBROSIIUS: “Forte dicas: Aliud video: quomodo tu mihi asseris, quod corpus Christi accipiam? Et hoc nobis superest ut probemus. Quantis igitur utimur exemplis ut probemus non hoc esse quod natura formavit, sed quod benedictio consecravit, majoremque vim esse benedictionis, quam naturæ, quia benedictione etiam ipsa natura mutatur? Virgam tenebat Moyses, projecit eam, et facta est serpens.”. . . . Plurima deinde recenset Moysis et Prophetarum miracula. “Quod si tantum valuit humana benedictio ut naturam converteret, quid dicimus de ipsa consecratione divina, ubi verba ipsa Domini Salvatoris operantur? Nam Sacramentum istud quod accipitis, Christi sermone conficitur. Quod si tantum valuit sermo Eliæ ut ignem de cœlo deponeret, non valebit Christi sermo ut species mutet elementorum? De totius mundi operibus legisti: ‘Quia ipse dixit, et facta sunt, ipse mandavit et creata sunt.’ Sermo ergo Christi, qui potuit ex nihilo facere quod non erat, non potest ea quæ sunt in id mutare quod non erant? Non enim minus est novas rebus dare quam mutare naturas. Sed quid argumentis utimur? Suis utamur exemplis, Incarnationisque exemplo adstruamus mysterii veritatem. Numquid naturæ usus præcessit, cum Jesus Dominus ex Maria nasceretur? Si ordinem quærimus, viro mixta fœmina generare consuevit. Liquet igitur quod præter naturæ ordinem Virgo generavit; ET HOC QUOD CONFICIMUS CORPUS, EX VIRGINE EST. Quid hic quæris naturæ ordinem in Christi corpore, cum præter naturam sit ipse Dominus Jesus partus ex Virgine? Vera utique caro Christi quæ crucifixa est, quæ sepulta est: Vere ergo carnis illius Sacramentum est. Ipse clamat Dominus Jesus: ‘Hoc est CORPUS MEUM.’ Ante benedictionem verborum cælestium, alia species nominatur: post consecrationem corpus Christi significatur. Ipse dicit sanguinem suum. Ante consecrationem aliud dicitur: post consecrationem sanguis nuncupatur. Et tu dicis, AMEN: Hoc est, verum est. Quod orloquitur, mens interna fateatur: quod sermo sonat, affectus sentiat.”<sup>2</sup> Quod dixit S. Doctor: “corpus Christi significatur” refertur ad species externas, sub quibus vere adesse corpus ipsum ex toto ratiocinio liquet.

115. S. HIERONYMUS: “Absit ut de his quidquam sinistrum loquar qui Apostolico gradui succedentes, Christi corpus sacro ore conficiunt.”<sup>3</sup>

116. S. JOANNES CHRYSOSTOMUS: “O miraculum! O Dei benignitatem! qui cum Patre sursum sedet, in illo ipso temporis articulo omnium

(1) Comment. ad Evang. apud Wiseman in opere Horæ Syriacæ p. 60.

(2) L. de his qui mysteriis initiantur c. ix.

(3) Ep. i. ad Heliodorum.

manibus pertractatur, ac seipsum tradit omnibus volentibus ipsum recipere et complecti.”<sup>1</sup> Et “Hæc mensa vicem explet præsepis. Nam et hic ponitur corpus dominicum, non quidem fasciis involutum, sed undique Spiritu Sancto vestitum.”<sup>2</sup>

117. S. GAUDENTIUS BRIXIENSIS: “Ipse igitur naturarum Creator et Dominus, qui producit de terra panem; de pane rursus (quia et potest et promisit) efficit corpus; et qui de aqua vinum fecit, facit et de vino sanguinem suum.”<sup>3</sup>

118. V. SÆCULO. S. AUGUSTINUS infantes alloquens, scilicet recens baptizatos, dicit: “Debetis scire quid accepistis, quid accepturi estis, quid quotidie accipere debeatis, panis ille, quem videtis in altari, sanctificatus per verbum Dei, CORPUS EST CHRISTI. Calix ille, immo quod habet calix, sanctificatum per verbum Dei, SANGUIS EST CHRISTI.”<sup>4</sup>

119. S. CYRILLUS ALEXANDRINUS de mystica cœna agens: “Adest magnificentiæ auctor, divina dona sunt proposita, mystica mensa præparata est. Dei ac Patris illa subsistens sapientia corpus suum ut panem distribuit, et vivificum suum sanguinem tamquam vinum propinat. O tremendum mysterium! O divini consilii rationem ineffabilem! O demissionem quæ cogitatione capi non potest! O bonitatem non vestigabilem! Opifex operi sese fruendum proponit: ipsamet vita mortalibus se edendam bibendamque largitur! . . . . Accipiamus corpus ipsiusmet vitæ; . . . . bibamus ejus sanctum sanguinem in remissionem peccatorum nostrorum, et participationem ejus, quæ in ipso est, immortalitatis; credentes simul ipsum manere Sacerdotem, et hostiam, ipsum qui offert, et oblatus est, qui accipit et traditur.”<sup>5</sup> Et: “Quocirca nos corpus et membra Christi appellamur, ut qui per Eulogiam ipsum in nobis suscipiamus Filium. Quemadmodum si quis ceram ceræ conjunxerit, utique alteram in altera videbit; eodem quoque opinor modo, qui recipit carnem Salvatoris, et bibit pretiosum ejus sanguinem, sicut ipse ait, unum quoddam cum eo reperitur commixtus quodam modo et immixtus ei per participationem, et vicissim Christus in ipso.”<sup>6</sup>

120. S. PETRUS CHRYSOLOGUS: “Tetigit vestimentum Christi mulier, et sanata est, et ab antiquo est absoluta languore. Miseri! qui quotidie corpus Christi tractamus et sumimus; et a nostris vulneribus non curamur.”<sup>7</sup>

121. VI. SÆCULO. S. CÆSARIUS ARELATENSIS: “Sacrum Dei tui cor-

(1) L. iii. de Sacerdotio.

(2) Hom. in B. Philogon n. 3.

(3) Sermone ii.

(4) Hom. lxxxiii. de diversis, alias ccxxvii.; sive serm. iv. in die Paschatis ad infantes habito.

(5) Hom. in mysticam cœnam.

(6) L. iv. in Joan. c. xxvi.

(7) Serm. xxxiii. n. 15.

pus, Sacerdote dispensante, tantum est in exiguo, quantum esse constat in toto : quod cum Ecclesia fidelium sumit, sicut plenum in universis, ita integrum esse probatur in singulis. . . . Nec dubitet quisquam . . . creaturas, nutu potentiae, in dominici corporis posse transire naturam ; quando benedicendae verbis caelestibus creaturae sacris altaribus imponuntur, substantia illis est panis et vini ; post verba autem Christi, corpus et sanguis est Christi : quid autem mirum, si ea, quae verbo creare potuit, possit creata convertere ?”<sup>1</sup>

122. S. GREGORIUS TURONENSIS. “Deflemus enim scelera nostra . . . cum nos mundos esse nescimus, et ad ipsum altare Domini accedentes audenter sanctum corpus ejus et sanguinem, cum simus actu polluti, potius ad judicium, quam ut veniam consequamur.”<sup>2</sup>

123. S. GREGORIUS M. “Bonus pastor pro ovibus suis animam suam posuit, ut in Sacramento nostro corpus suum et sanguinem verteret, et oves quas redemerat, carnis suae alimento satiaret.”<sup>3</sup> Et : “Quid enim prodest corpus et sanguinem illius ore percipere, et ei perversis moribus contraire ?”<sup>4</sup>

124. VII. SÆCULO. S. ISIDORUS HISPALENSIS : “Non communicaverunt jejuni Apostoli, quia necesse erat, ut Pascha illud typicum antea impleretur, et sic denuo ad verum Paschae Sacramentum transirent. Hoc enim mysterium tunc factum est, quod primum discipuli corpus et sanguinem Domini nostri non acceperunt jejuni. Ab universa autem Ecclesia nunc a jejunis semper accipitur.”<sup>5</sup>

125. VIII. SÆCULO. S. JOANNES DAMASCENUS : “Nec vero panis et vinum Christi corporis et sanguinis figura sunt ; absit, sed ipsum Domini corpus deitate donatum : cum ipse Dominus dixerit ; hoc est, non figura corporis mei, sed corpus meum : neque figura sanguinis, sed sanguis meus. Et antea Judæis dixerat : caro mea vere est cibus, et sanguis meus vere est potus : et qui manducat me, vivet.”<sup>6</sup>

126. IX. SÆCULO. S. NICEPHORUS CONSTANTINOPOLITANUS Patriarcha, “Nos enim Catholici neque imaginem, neque figuram corporis illius hæc dicimus, licet symbolice conficiantur ; sed ipsum Christi corpus deificatum ; illius enim dicentis vox est : Nisi manducaveritis carnem filii hominis, et biberitis ejus sanguinem, &c. hoc enim Apostolis exhibebat : manducate, hoc est corpus meum, dicens, non imaginem corporis mei.”<sup>7</sup>

127. Paschasius Radbertus Abbas Corbeiensis *de Sacramento corporis et sanguinis Christi* agens : “Nullus moveatur de hoc corpore et

(1) Hom. vii. de Pasch.

(2) L. i. de gloria Martyr. c. lxxxvi.

(3) L. i. in Evang. hom. xiv. n. l.

(4) L. ii. in Ev. hom. xxii.

(5) L. de Eccl. offic. c. xviii.

(6) L. iv. de fide orthodoxa c. xiii.

(7) Antirrhetic ii.



sanguine Christi, quod in mysterio vera sit caro, et verus sanguis, dum sic ille voluit, qui creavit: omnia enim quaecumque Dominus voluit, fecit in cœlo et in terra. Et quia voluit, licet in figura panis et vini, hæc sic esse, omnino nihil aliud, quam caro Christi et sanguis post consecrationem credenda sunt."

127. X. SÆCULO. S. ODO CLUNIACENSIS: "Sed multo plus dolendum de hoc, quod illud sacrosanctum mysterium Dominici videlicet corporis temerare præsumunt. . . . "Contra eos enim, qui exteriorem Ecclesiæ cultum negligunt, Dominus per Malachiam queritur dicens: 'O vos Sacerdotes, qui despicitis nomen meum, effertis super altare meum panem pollutum, et dicitis: mensa Domini polluta est.' Polluunt sacerdotes panem, id est corpus Christi, ut Hieronymus exponit, qui indigne accedunt ad altare.'"¹

128. RATHERIUS EPISCOPUS VERONENSIS, "Crede, frater, quia sicut in Cana Galilææ vinum Dei imperio verum et non figurativum, fuit ex aqua factum; ita istud, Dei benedictione, vinum, verus et non figurativus efficitur sanguis; et caro panis. Quod si sapor idem manet, et color, ita se haberi dissuadeat tibi aliud. . . . Manente colore atque sapore, divina Sapientia operante, veram carnem et sanguinem, quod percipis esse crede."²

Prætereundum non est SS. Cyprianum, Ambrosium, Optatum Milevitanum, Gregorium Turonensem, aliosque plura referre miracula quibus veritas hæc Catholica apertissime confirmatur. Juvat autem Patrum testimoniis Conciliorum auctoritatem adjicere.

129. Concilium Nicænum decrevit: "Neque Canon, neque consuetudo tradidit ut hi, qui offerendi potestatem non habent, (*Diaconi scilicet*) iis qui offerunt, dent corpus Christi."³

130. Concilium Alexandrinum, S. Cyrilli tempore habitum, in epistola ad Nestorium eucharistiæ dogma aperte tradit; et contra Nestorium sic decernit: "Sanctum ac vivificum incruentumque in Ecclesiis Sacrificium peragimus: Corpus quod proponitur, similiter et pretiosum sanguinem, non communis, nobisque similis hominis cujuscumque esse credentes, sed potius tamquam proprium corpus effectum, sanguinem etiam Verbi, quod omnia vivificat, accipientes."⁴

131. Concilium Ephesinum Generale anathematismum hunc inter cæteros probavit, et ita demonstravit hanc fuisse totius orbis fidem.

132. Concilium Nicænum II. Generale reprobavit Iconoclastas Eucharistiam imaginem vocitantes, quamvis nec hi veritatem corporis et sanguinis in Sacramento negarent. Audi Epiphanium diaconum coram Patribus disserentem "Nullus . . . Sanctorum . . . Apostolorum aut illustrium Patrum nostrorum incruentum sacrificium nostrum, quod in

(1) Lib. collat. n. 28.

(2) Ep. vi. de corpore et sanguine Domini.

(3) Can. xviii.

(4) Anathematismo xi.



commemoratione Christi Dei nostri, ac omnis dispensationis ejus efficitur, dixit imaginem corporis ejus; neque enim acceperunt a Domino sic dicere vel confiteri; sed audiant evangelice dicentem eum: ‘nisi manducaveritis carnem Filii hominis:’ et ‘accipite, hoc est corpus meum:’ ‘hic est sanguis meus.’ . . . Non dixit: accipite et manducate imaginem corporis mei: . . . ergo liquido demonstratum est quod nusquam Dominus vel Apostoli, aut patres imaginem dixerunt sacrificium incruentum; . . . sed ipsum corpus, et ipsum sanguinem. . . . Antequam sanctificata fuerint vocata sunt typi; post sanctificationem autem, corpus proprie et sanguis Christi dicuntur, sunt, et creduntur.”—*μετὰ δὲ τὸν ἁγιασμὸν σῶμα κυρίου καὶ αἷμα Χριστοῦ λέγονται, καὶ εἶσι, καὶ πισυνόνται.*<sup>1</sup>

(1) Act. vi.

## CAPUT VII.

## OBJECTIONES CONTRA REALEM PRÆSENTIAM.

133. Quamvis, dum de singulis Scripturæ testimoniis ageremus, plures solverimus difficultates quæ huic mysterio consueverunt objici, ad pleniorē rei illustrationem, speciali capitulo objectiones diluendas duximus. Ab iis quæ ex Scriptura adducuntur initium sumemus.

134. *Obj.* 1. Christus ait: “semper pauperes habetis vobiscum, me autem non semper habetis.”<sup>2</sup> Jam verò si præsens sit in eucharistia, habemus eum semper, et quidem ea ratione qua possimus thesauros nostros in ejus honorem effundere, ornando ejus altaria, et cultus sumptu suppeditando. Rueret igitur ratio quam præbuit Christus cur voluerit ea sibi tribui venerationis indicia a pia muliere, quod scilicet brevi non possent reddi, ipso a terris procul recedente.

*Resp.* Christum non habemus, quo modo tunc erat, naturali conditione, et oculis patens intuentium, cui proinde non possumus ea exhibere obsequia quæ voluit ita accipere. Subsistit idcirco ratio quam allegavit, nec licet aliquid inde contra realem ejus præsentiam in Sacramento inferre. Possumus quidem divitias impendere in ejus honorem; sed jam non est copia eum in terris versantem humana veluti conditione honorandi.

135. *Obj.* 2. Christus “assumptus est in cælum et sedet a dextris Dei.”<sup>3</sup> Eum “oportet quidem cælum suscipere usque in tempora restitutionis omnium.”<sup>4</sup>

*Resp.* Non id nobis fingimus, Christum relinquere cælum ut præsens sit in Sacramento: credimus autem ineffabili potentia sua contingere ut in cæli solio considens, simul adsit in eucharistia: quamvis mysterium id fateamur, quod humana ratio non valet percipere. Ex Actis Apostolorum novimus Christum in via visum esse Paulo eunti Damascum; nec est cur eum reliquisse cælum suspicemur; vel in aere prope terram se exhibuisse denegemus. Cæterum nova ad spatium relatio non repugnat corporis naturæ, nec necesse est ut corpus multiplicetur multiplicatis ejus relationibus ad spatium.

(2) Matt. xxvi. 11.

(3) Marci xvi. 19.

(4) Act. iii. 21.

136. *Obj.* 3. Monuit nos Christus ne credamus eum præsentem apud nos esse : “ Si quis vobis dixerit : Ecce hic est Christus, aut illic : nolite credere.”<sup>1</sup>

*Resp.* Cavere nos voluit a quolibet se verum esse Messiam jactante, plurimi enim pseudo-christi brevi adventuri erant, aliis sub finem mundi etiam venturis. Patet ejus mens ex tota orationis serie, agit enim de Hierosolymorum fati et de extremo judicio. Ipse rationem moniti reddens, dicit : “ surgent enim Pseudo-christi.”<sup>2</sup>

137. *Obj.* 4. Stephanus dicit : “ Sed non excelsus in manufactis habitat, sicut propheta dicit : cœlum mihi sedes est ; terra autem scabellum pedum meorum.”<sup>3</sup>

*Resp.* Excelsus non habitat in ædificiis manu hominum erectis, ita ut iis contineatur, cœlum enim et terram implet. Ejus immensitas a Stephano celebrata est, ut intelligerent Judæi eum templi limitibus nequaquam contineri. Cæterum nil inde contra realem Christi Domini in eucharistia præsentiam, quum tamquam Deus immensus et ubique præsens agnoscatur, tamquam homo in cœlo considens, in Sacramento etiam præsens mirabili prorsus modo prædicetur.

138. *Obj.* 5. Christus redivivus se exhibens Apostolis dixit : “ Palpate et videte ; quia Spiritus carnem et ossa non habet, sicut me videtis habere.”<sup>4</sup> Si juxta hanc normam eucharistiam investigemus, carnem et ossa ibi non esse dicendum erit, quia non videntur nec palpantur. Si rejiciatur regula hæc judicandi, Christus immeritò eam videbitur statuuisse, ut suam a mortuis resurrectionem probaret.

*Resp.* Optime ex carne sua palpanda exhibita Christus se vere adesse confirmavit, quia testimonium sensuum de re iis subjecta valere debet, juxta sapientissimas leges quibus orbem genusque humanum regi voluit Deus. Contingere quidem posset ut Spiritus carne et ossibus indutus appareret, sicut revera angelus Deum repræsentans cum Jacob luctatus est : sed ne ordo a Deo statutus turbetur, vel homines illusionibus pateant, consonum est divinæ sapientiæ et bonitati, ut quoties mirum aliquid hujusmodi contingit, extra consuetum ordinem, dentur indicia quibus noscatur. Christus igitur se palpandum exhibens meritò postulavit fidem, quum nulla ratio sineret suspicari eum velle illis illudere, aut Deum iis species pro re obtulisse ad fraudem sancendam. In eucharistia non agitur de re consueta, sed Sacramentum est a Christo institutum, cujus naturam et vim ab ipso discere oportet, ideoque ipso dicente : ‘ Hoc est corpus meum ; hic est sanguis meus :’ jam non licet sensibus fidere contra ejus testimonium

(1) Mat. xxiv. 23.

(2) Ib. v. 24.

(3) Act. vii. 48.

(4) Lucæ xxiv. 39.

et auctoritatem. Non ideo tamen sensuum testimonium in rebus quæ ad ordinem naturæ pertinent, rejicitur vel infirmatur. In mysteriis Christi verba sunt attendenda: “Beati qui non viderunt, et crediderunt.”<sup>1</sup>

139. *Obj.* 6. Illa substantialis Christi corporis et sanguinis in eucharistia præsentia absurda plane est, nam corpus unicum simul in cœlo et in innumeris terræ locis adesse non potest.

*Resp.* Adversariorum est explicare quomodo Christus visus sit Paulo eunti Damascum, eumque familiariter allocutus sit, cœlo haud relicto. Cæterum arcana Dei non licet humano perpendere iudicio, nec quid possit ipse nostra definire sententia. Corporis ad locum relatio naturalis unica quidem est, sed relatio illa naturæ et essentiæ est quid extrinsecum, ideoque multiplicari potest, divina virtute, quin essentia seu substantia multiplicetur. Præterea gloriosi corporis, quale Christi est, ad locum relatio longe diversa sit oportet a corporum naturali conditione: et sacramentalis præsentia, licet vera, realis, et substantialis, differt omnino a naturali. Præstat igitur mysterium fide simplici amplecti, veramque agnoscere præsentiam, quin divina humanis æstimemus. Ita olim Gregorius Nyssenus, nihil rei difficultate deterritus, divinum contemplatus est opus: “Cum autem solum illud corpus quod Deum suscepit, hanc gratiam acceperit . . . oportet considerare quomodo fieri potuerit, ut unum illud corpus, quod tam multis fidelium millibus in universo orbe terrarum semper distribuit, totum per partem fit in unoquoque, et ipsum in se totum maneat.”<sup>2</sup>

140. *Obj.* 7. Illa corporis Christi præsentia impossibilis plane est, “quia everteret naturam et proprietatem veri corporis, quod, ut quantum et extensum, debet esse visibile et palpabile, locatum, impenetrabile et circumscriptum, quod ita habeat partes extra partes, ut nec illud corpus penetrare queat, nec ab alio corpore penetrari.” Ita Turretini abbreviator.

*Resp.* Humano errore hæc dicuntur, quum naturalis non sit conditio Christi corporis in eucharistia, sed ineffabilis prorsus, quam nec cogitatione assequi valemus. De natura corporum parum novimus, de proprietatibus eorum melius aliquanto edocti; sed plurima exempla suppeditant Scripturæ, in quibus quæ nobis innotuerunt proprietates non apparent, licet verum adfuerit corpus. Sic Christus e sepulchro clauso surrexit, et domum

(1) Joan. xx. 29. Oxonienses de iis qui Sacramentorum virtutem denegant, quia sensuum experimento non subjacet, notant: “To require that such subjects should come to us in a more sensible and palpable way, before we will accept them, betrays the same temper of mind as that of requiring a sign; or at best, it is but that weak belief which says, ‘unless I handle and feel I will not believe,’ and which therefore loses the highest blessing, blessed are they who have not seen, and have believed.” Vol. iv. Tract No. 80. part iii. p. 66. London edition.

(2) Orat. Catech. c. xxxvii.

in qua erant Apostoli ingressus est, januis clausis. Quæ autem ad hæc reponunt Calviniani scriptores impietatem et insipientiam redolent.<sup>1</sup>

141. *Obj.* 8. Corpus Christi haud potest sub parva hostia vel particula contineri, et os ingredi, quin omnes naturæ leges violentur.

*Resp.* Desinant homines carnis dictamina rebus accommodare cœlestibus. Naturalem non esse conditionem corporis Christi in Sacramento plus semel diximus, ideoque quæ naturæ leges spectant, non habent locum in re supra naturam divina potestate posita. Quid possit Deus periculose queritur.<sup>2</sup>

142. *Obj.* 9. S. Cyprianus, ut Aquariorum errorem evelleret, qui aqua tantum in calice utebantur, ad Cæcilium ita scripsit: "Admonitos autem nos scias, ut in calice offerendo dominica traditio servetur, neque aliud fiat a nobis, quam quod pro nobis Dominus prior fecit: ut calix qui in commemorationem ejus offertur, mixtus vino offeratur. Nam cum dicat

(1) Vix potuit credi scriptorem christiano nomine gloriantem hæc scribere potuisse, quæ apud Turretini abbreviatorem leguntur: "Christus potuit ingredi ad discipulos τῶν θυρῶν κεκλεισμένων *januis clausis*, Joan. 20. 19. i. e. eo tempore, quo januas occlusas habebant propter metum Judæorum, sed non δια θυρῶν *per januas clausas*. Quod ad saxum sepulchri, dicendum, potuisse creaturam cedere ultro creatori citra penetrationem dimensionum, licet Angelus Domini, non amovisset saxum, ut factum dicitur Mat. 28. 3. Christus dicitur factus ἀφαντος ἀπ' αὐτῶν, scilicet discipulis Emaunticis. Luc. 24. 31. non evanescendo, sed vel oculos Apostolorum cohibendo, ne se abeuntem viderent, vel se celerrime ipsis subducendo." Locus xvii. de Sacramentis p. 261.

(2) Oxonienses fatentur Rationalismum sapere eam argumentandi rationem quæ plerumque contra eucharistiam adhibetur, desumptam scilicet ex rei natura, sicut etiam contra Trinitatis et Incarnationis mysteria. "The doctrines of the Trinity and Incarnation, form a most distressing subject of discussion, for two reasons; first, as involving the direct contemplation of heavenly things, when one should wish to bow the head and be silent; next as leading to arguments about things possible and impossible with God, that is (practically) to a rationalistic line of thought. How He is Three and yet One, how He could become man, what were the peculiarities of that union, how he could be every where as God, yet locally present as man, in what sense God could be said to suffer, die, and rise again,—all these questions were endured as a burden by the early Christians for our sake, who come after; and with the benefit of their victories over error, as if we had borne the burden and heat of the day, it were perverse indeed in us, to plunge into needless discussions of the same character. This consideration will lead us to put into the back ground the controversy about the Holy Eucharist, which is almost certain to lead to profane and rationalistic thoughts in the minds of the many, and cannot well be discussed in words at all without the sacrifice of 'godly fear,' while it is well nigh anticipated by the ancient statements, and the determinations of the Church concerning the Incarnation. It is true that learned men, such as Stillingfleet, have drawn lines of distinction between the doctrine of transubstantiation and this high mystery; but the question is, whether they are so level to the intelligence of the many, as to secure the Anglican disputant from fostering irreverence, whether in himself or his hearers, if he ventures on such an argument." Oxford Tracts, Vol. iii. No. 71.

**Christus :** ‘ego sum vitis vera ;’ sanguis Christi non aqua est utique, sed vinum. Nec potest videri sanguis ejus, quo redempti et vivificati sumus esse in calice, quando vinum desit calici, quo Christi sanguis ostenditur, qui scripturarum omnium sacramento ac testimonio prædicatur.” . . .

“Videmus in aqua populum intelligi, in vino ostendi sanguinem Christi. Quando autem in calice vino aqua miscetur, Christo populus adunatur, et credentium plebs ei in quem credidit, copulatur et jungitur.”<sup>1</sup> Juxta realis præsentiae patronos nec aqua nec vinum habetur in calice, sed solus Christi sanguis, adeo ut ne quidem illa Christi cum populo fidei conjunctio in Sacramento exhibeatur, ni placeat aquam converti in populum, sicut vinum conversum dicitur in Christi sanguinem. Ita Cosinus, qui tamen Cypriani verba veluti adducens, sensum quem ex iis expressit, suis dat verbis, pessimo exemplo auctoris mentem male interpretans.<sup>2</sup>

*Resp.* Cyprianus duplici ex capite vini et aquæ admixtionem urget, primo quidem, quæ præcipua est ratio, quod Dominus calicem vini aqua temperati adhibuerit, “quod Jesus Christus, Dominus et Deus noster, sacrificii hujus autor, et doctor fecit et docuit ;” deinde quod mystica significatio huic admixtioni inhæreat, vinum quippe Christum exhibet, qui est vera vitis, aqua populum designat. Ex veteribus figuris, sicut et ex novi Testamenti testimoniis ostendit vinum apte Christum exhibere, et contendit illud omnino esse necessarium, quum eo deficiente “nec potest videri sanguis ejus, quo redempti et vivificati sumus esse in calice.” Vinum igitur et aqua sacro poculo admixta fiunt verbis Domini ipse sanguis ejus, quo redempti sumus, licet enim adhibeantur ad conficiendum Sacramentum, non tamen ipsa Sacramenti tanti et sacrificii possunt habere rationem : ideo typum cum rei veritate, Sacrificii materiem cum victima conferens dicit Cyprianus : “Qui magis sacerdos Dei summi quam Dominus noster Jesus Christus qui sacrificium Deo Patri obtulit ? Et obtulit hoc idem quod Melchisedech obtulerat, id est panem et vinum, suum scilicet corpus et sanguinem.” Sic et materiem ex qua conficitur Sacramentum, a Jacob, in vaticinio de Juda lavante in sanguine uvæ amictum suum, enuntiata Cyprianus intellexit : “Quando autem sanguis uvæ dicitur, quid aliud quam vinum calicis Domini sanguinis ostenditur ?” Sic quod apud Isaiam de calcante torcular dicitur, ad sacramentum refertur : “Vini utique mentio est, et ideo ponitur, ut Domini sanguis vino intelligatur. Et quod in calice Dominico postea manifestatum est, prophetis

(1) Ep. ad Cæcilium p. 51. edit. Basil.

(2) “Let that cup which is offered *to the people* (verba hæc quæ Italicis characteribus notavimus mala certe fide inseruntur a Cosino, quum Cyprianus loquatur manifesto de oblatione Deo facta, et de sacrificio) in commemoration of CHRIST be mixt with wine, for it cannot represent the Blood of CHRIST when there is no wine in the cup, because the Blood of CHRIST is expressed by the Wine, as the faithful are understood by the Water.” Hæc Cosinus : non hæc Cyprianus.

annunciantibus prædicatur. Torcularis quoque calcatio et pressura taxatur quia quomodo ad potandum vinum venire non potest nisi botrus calcetur ante et prematur, sic NEC NOS SANGUINEM CHRISTI POSSEMUS BIBERE, nisi Christus calcatus prius fuisset et pressus, et calicem prior biberet quem credentibus propinaret.” Liqueat igitur Cyprianum agnovisse sanguinem Christi calice contineri, et a fidelibus potari: nec quid clarissimis his dictis detrahi, ex eo quod mysticam significationem aquæ cum vino admixtionis urgeat. Profectò quamvis aquam miscendam doceat, solo vino consecrato sanguinem adesse affirmat: “Nam si vinum tantum quis offerat, sanguis Christi incipit esse sine nobis.” Eorum fastidium damnat qui a sacramento suscipiendo abstinebant, ne per saporem vini redolerent sanguinem Christi. “Sic ergo,” inquit, “incipit et a passione Christi in persecutionibus fraternitas retardari, dum in oblationibus discit de sanguine ejus et cruore confundi . . . . Quomodo autem possumus propter Christum sanguinem fundere, qui sanguinem Christi erubescimus bibere!” De mente Cypriani nullus est dubitandi locus. Porro hæc consona sunt Catholicæ fidei, et mori semper in sacrificio celebrando servato. Habetur mystica significatio populi cum Christo conjunctionis, aquæ cum vino admixtione, et temperamentum calicis, mixtio illa, fit Christi sanguis, totum enim convertitur juxta ipsius exemplum et verba.

143. *Obj.* 10. S. Augustinus ait: “Sicut ergo secundum quemdam modum sacramentum corporis Christi corpus Christi est, Sacramentum sanguinis Christi sanguis Christi est, ita Sacramentum fidei fides est.”<sup>1</sup> Alias dicit: “Hæc enim Sacramenta sunt, in quibus, non quid sint, sed quid ostendant semper attenditur: quoniam signa sunt rerum aliud existentia, et aliud significantia.”<sup>2</sup>

*Resp.* S. Anselmus<sup>3</sup> et Lantfrancus<sup>4</sup> testimonium prius a Berengario objectum explicant de modo præsentiae, scilicet quod corpus et sanguis non adsint quo modo in cruce aderant. Possunt etiam verba illa ad species sacramentales referri. Cæterum constat Augustinum agnovisse ipsum corpus et sanguinem Christi vere adesse, et ore percipi. Sic vocat eucharistiam “Sacramentum spei, quo in hoc tempore consociatur Ecclesia, quamdiu blatur quod de Christi latere manavit.”<sup>5</sup>—“Habet enim magnam vocem Christi sanguis in terra; cum eo accepto, ab omnibus gentibus respondetur, Amen. Hæc est clara vox sanguinis, quam sanguis ipse exprimit ex ore fidelium eodem sanguine redemptorum.”<sup>6</sup> Alterum quod objicit Cosinus testimonium, non respicit eucharistiam, vel alia Sacra-

(1) Ep. xcvi. alias xxiii. ad Bonifacium.

(2) Contra Maximin. Arian. l. ii. c. xxii. n. 3.

(3) L. de Sacr. altaris c. xi.

(4) L. de corpore et sanguine Domini c. xiv.

(5) L. xii. contra Faustum c. xx.

(6) Ibidem c. x.



menta, sed Joannis dictum de tribus in terra testibus, spiritu, aqua et sanguine. Quum inde Arianus argumentum contra unitatem divinæ naturæ in Patre et Filio desumeret, hos enim unum dici contendit ea ratione qua illa unum dicta sunt, monuit eum Augustinus illa esse sacramenta, symbola scilicet et signa Patris, et Filii et Spiritus Sancti, ideoque quum hi tres unum sint, illa recte dici unum, quia in signis symbolisque non quid sint, sed quid ostendant semper attenditur. Ex latiori hoc Sacramenti vocis usu, non licet inferre ea quæ a Christo instituta sunt mera esse signa, quapropter perperam illa ad rem suam adhibet Cosinus, vocis ambiguitate ludens. Cæterum externæ species panis Sacramenti nomine intelligi possunt, iisque accommodari possunt quæ de signis sacris generatim dicuntur, ostendunt scilicet et exhibent Christum animæ cibum, panem vitæ æternæ.

144. *Obj.* 11. Si dogma præsentiae Christi substantialis in veteri Ecclesia viguisset, Ethnici illud veluti absurdum Christianis objecissent: scriptores autem christiani illud verbis perspicuis exposuissent, Ethnicorum calumnias ut diluerent.

*Resp.* Viguit profectò illud dogma in Ecclesia, uti ex documentis allatis constat. Cæterum non ita innotuit Ethnicis, ut occasio ipsis foret vel cura de ejus possibilitate disceptandi, nam Christiani plerumque fidei mysteria alto servabant apud se silentio, ne sanctum daretur canibus contra Salvatoris vetitum. *Disciplina arcani* quæ per tria priora sæcula obtinuit, quæque quarto et quinto sæculis haud penitus desierat, fecit ut vix novèrint ipsi candidati baptismum petentes, *catechumeni* dicti, aliud præter Dei unitatem, Christi propter hominum salutem in cruce mortem, et morum principia, altioribus misteriis nonnisi paulo ante baptismum traditis.<sup>1</sup> Hinc Julius I. arguit Arianos, quod de eucharistia palam coram non initiatis egissent:<sup>2</sup> et Augustinum audivimus docentem catechumenum interrogatum de carne Christi manducanda nescire quid ei dicatur quia Jesus non se ei credidit.”<sup>3</sup> Eucharistia idcirco “sanctum Domini” vocatur apud Cyprianum; et ab aliis patribus ita indicatur, ut ab initiatis tantum se intelligi posse affirmant. Sic Chrysostomus post verba Christi relata, adnotat: “Sciunt ii qui initiati sunt illa quæ dicuntur.”<sup>4</sup> Satis inde intelligitur cur Ethnicis non fuerit cum Christianis de mysterii hujus natura et possibilitate concertatio: sed nullo pacto explicari potest cur religionis christianæ vindices non totam rem panderint, ut calumniis Ethnicorum irent obviam, si revera panis et vinum symbola forent et signa, licet efficacia, Christi pro hominum salute mortui: nam facilis erat et omni periculo vacua hujusmodi explicatio. Solus qui noscitur rem explicuisse ad

(1) Vide Cyrillum Hierosolym. n. 12. procatechesis.

(2) Ep. ad Euseb. p. 378. apud Coustantium.

(3) Supra p. 139.

(4) Supra p. 148.



Ethnicos scribens, Justinus est, qui gravi necessitate ad id adactus censendus est, quique ea ratione loquitur quæ fidei Catholicæ omnino est congrua. Cæteri objectioni de epulis thyesteis respondentes de eucharistia siluerunt, magnum subesse arcanum profanis haud revelandum ipso quod servarunt silentio indicantes. Si eucharistia adeo sacrosancta non fuisset, et symbolis Christi mortis tantum constitisset, cum quavis virtute, vel spiritali quam fingunt præsentia, nulla fuisset ratio cur Ethnici et catechumeni ab ejus celebratione arcerentur; quum potius invitandi essent omnes, ad calumnias Christianis impactas penitus dissipandas.

(1) Disciplinam arcani erudite exponit argumentumque inde desumit eruditus præsul Trevern, in opere dicto *Discussion amicale*. Lettre viii. Sed feliciter etiam et accurate Joannes Baptista Palma in opere pluries laudato: *Prælectiones Hist. Eccl. t. i. c. xvi. xvii. xviii.*

## CAPUT VIII.

## DE TRANSUBSTANTIATIONE.

145. *Realem* quam propugnāvimus Christi præsentiā Lutherus, uti jam diximus, admisit, et contra Carolstadium et Zuinglium vindicavit, sed et panem et vinum manere dixit, adeo ut simul adessent corpus et sanguis Christi una cum pane et vino. *Consubstantiatio* vocatum est hoc ejus placitum, quum *transubstantiationis* nomen jam sæculorum plurimum usu, et concilii Lateranensis auctoritate, dogmati Catholico adhæserit. Calvinus *realem* Christi præsentiā se agnoscere professus est, sed quum Catholicum dogma una cum Lutheri placito rejiceret, non aliam quam præsentiā quamdam virtute et efficacia, non re, se admittere satis manifestavit. Hanc *spiritalem* vocavit. Igitur eam tantum agnovit elementorum mutationem qua sacro usui destinantur, ut symbola sint corporis et sanguinis Christi, quæ cum iis adesse et dari, sensu supra indicato, prædicavit. Ut erroribus simul et vaferrimis consiliis hæreticorum occurreret concilium Tridentinum, *transubstantiationis* vocabulum, quod Latini sermonis elegantiam licet non sapiat, dogma tamen aptissime enunciat, veluti tesseram fidei adoptavit. “ Si quis dixerit in sacrosancto eucharistiæ Sacramento remanere substantiam panis et vini, una cum corpore et sanguine Domini nostri Jesu Christi ; negaveritque mirabilem illam et singularem conversionem totius substantiæ panis in corpus, et totius substantiæ vini in sanguinem, manentibus dumtaxat speciebus panis et vini ; quam quidem conversionem Catholica Ecclesia aptissime Transubstantiationem appellat ; anathema sit.”<sup>1</sup>

146. Quo sensu *transubstantiatio* usurpetur ex definitione illa constat, quod scilicet substantia panis et vini non maneat, sed *species* duntaxat, forma, scilicet, color, gustus. Philosophicam quæstionem utrum accidentia a substantia separari queant, Ecclesia haud curat ; sed species agnoscit, quæ scilicet sensibus nostris impressiones faciunt quales ipsa panis vinique substantia, si maneret, faceret, quam tamen superesse negat, Christo simpliciter credens corpus esse et sanguinem suum. Utrum illa conversio fiat *annihilatione*, uti dicunt, substantiæ panis et vini, ut eorum loco adducatur corpus et sanguis Christi ; vel *reproductione*, ita ut ipsa substantia panis et vini transeat in substantiam corporis et sanguinis, inter Scholæ doctores quæritur ; quorum partibus ne nos misceamus, altitudine mysterii terremur. Cum Magistro Sententiarum placet dicere : “ Si quis modum quo id fieri possit quærit, breviter respondeo : Mysterium fidei credi salubriter potest, investigari salubriter non potest.”<sup>2</sup>

(1) Sess. xiii. Can. ii.

(2) L. iv. Dist. ii.

147. Lutherus non tantum corpus et sanguinem Christi in Sacramento adesse profitebatur,<sup>1</sup> sed quoniam paradoxa amabat, ipsum panem corpus Christi esse, rem plane absurdam, se credere dicebat: "Credo firmiter, non modo corpus Christi esse in cœna, sed panem esse corpus Christi."<sup>2</sup> Suis transubstantiationem credendi, mira certe dignatione, reliquit libertatem: "Permitto itaque qui volet utramque opinionem tenere."<sup>3</sup> Postea tamen Henrico VIII. indignatus hanc revocavit licentiam.<sup>4</sup> Ut suam de Christi corporis et sanguinis præsentia tueretur, immani errore excogitavit humanam Christi naturam ex hypostatica unione divinæ naturæ proprietates derivare, ideoque habere omnipræsentiam: quod non puduit Walchium fateri, imo profiteri: "Sacramentariis quum se opposeret Lutherus, primum contra Carolostadium, deinde etiam Zuinglium docuit, humanæ Christi naturæ omnino omnipræsentiam tribuendam; ex ea autem fundamentum præsentiae realis corporis ejus in sacra cœna petendum esse."<sup>5</sup>

148. In Georgia, et duabus Carolinis, aliisque provinciis *Hinkelitæ* sunt, et alii e Lutheranorum secta, qui *consubstantiationis* placitum sequuntur, sed plerique Lutherani licet dicti, Zuinglio assentiuntur, vel Calvinio.<sup>6</sup> Episcopaliani, Anglicanorum insistentes vestigiis, Calvinianum adoptarunt errorem, et de *reali* Christi præsentia verbis amplissimis aliquando loquuntur, de iis vehementer querentes qui *spiritalem* præsentiam figmentum esse affirmant: plerique tamen remotis verborum involucris *realem* præsentiam plane denegant. Omnes verò *transubstantiationem* rejiciunt, nullamque elementorum agnoscunt mutationem, præter symbolicam, qua scilicet panis et vinum fiunt symbola corporis et sanguinis, et adeo pignora quædam et instrumenta quibus corpus et sanguis suscipientibus eucharistiam communicantur. Anglicani præsulis verbis sententiam illam de *reali* præsentia placet exponere.<sup>7</sup>

(1) In tractatu: "Dass die Worte Christi, das ist mein Leib, noch fest stehen," anno MDXXVIII. cit. Walchio.

(2) L. de capt. Babylon. c. de Euch.

(3) Ibidem.

(4) In resp. Henrico VIII.

(5) Walchius Introd. ad lib. symbol. Luth. l. i. c. vii. § xxiii. p. 829.

(6) De Lutheranorum variationibus erudite agit episcopus Carolopolitanus, Joannes England, in litteris editis in ephemeridibus dictis, *Catholic Miscellany*, anno 1838.

(7) "It is not questioned whether the Body of CHRIST be absent from the Sacrament duly administered according to his institution, which we Protestants neither affirm nor believe; for it being given and received in the Communion, it must needs be that it is present, though in some manner veiled under the Sacrament, so that of itself it cannot be seen. Neither is it doubted or disputed whether the Bread and Wine by the power of God and a supernatural virtue, be set apart and fitted for a much nobler use, and raised to a higher dignity than their nature bears; for we confess the necessity of a supernatural and heavenly change, and that the signs cannot become Sacraments but by the infinite power of God, whose proper right it is to introduce Sacraments in His Church, being able alone to endue them with virtue and efficacy." Cosin ch. iv. operis jam citati.

149. *Realis* Christi præsentia, qualem Catholica Ecclesia tradit, *spiritalis* quodammodo dici potest, quatenus corpus et sanguis Christi non adsunt naturali conditione, sed sacramentaliter, vere tamen et substantia sua: adeo ut quæ dantur sacerdotis manu sint ipsum corpus et sanguis Christi. Quod si alio sensu prædicetur spiritalis præsentia, liquet eam *realem* non esse, sed *virtute* tantum, quod ipse Cosinus post speciosa verba prodit.<sup>1</sup>

## PROPOSITIO.

*In Eucharistiæ Sacramento non remanet substantia panis et vini, sed mirabilis et singularis conversio fit totius substantiæ panis in corpus et totius substantiæ vini in sanguinem, manentibus dumtaxat speciebus panis et vini; quæ conversio aptissime transubstantiatio a Catholica Ecclesia appellatur.*

*Probatur I. ex Scripturis.*

150. Christus dixit: "Hoc est corpus meum: hic est enim sanguis meus."—τοῦτό ἐστι τὸ σῶμα μου· τοῦτό γάρ ἐστι τὸ αἷμά μου<sup>2</sup>—Ergo quod dedit Apostolis fuit vere corpus et sanguis ejus, nihilque aliud. Profectò si panis et vinum adessent, alia verborum formula uti oportebat, ut ea signa, pignora, instrumenta corporis et sanguinis simul datorum intelligerentur. Dixisset adverbialiter 'hic,' vel, 'unà cum hoc,' vel certe usus fuisset sacer scriptor pronomine ejusdem generis, ac panis et vinum, masculini scilicet in Græco idiomate—ἄρτος—ὄνος. Nulla scribendi lex, nec ipsa Evangelistarum consuetudo sinit, ut pronomen relativum ab antecedente nomine, quod mox præcessit, genere discrepet: proinde ad panem et vinum referri nequeunt illa pronomina, sed ad id quod manibus tunc tenebat Christus, quodque absoluta sententia, corpus erat suum et sanguis. Ea est verborum vis ut illud quod Christus Apostolis dedit, nihil aliud esse præter corpus et sanguinem suum intelligamus: quod quum fieri non potuisset nisi conversa substantia panis et vini in corporis et sanguinis substantiam, panem enim et vinum præ manibus sumpsit, illa conversio substantiæ panis et vini in substantiam corporis et sanguinis Christi, mirabilis plane et singularis, agnoscenda est. Nil igitur præter species panis et vini superest; et vere adsunt, iis tamquam velo oblecta, corpus et sanguis Christi.

*Probatur II. Patrum testimoniis.*

151. TERTULLIANUS de Christo ait: "acceptum panem, et distributum discipulis, CORPUS ILLUM SUUM FECIT, hoc est corpus meum dicendo, id est

(1) "It is far above philosophy and human reason that CHRIST from Heaven (where alone He is locally,) should reach down to us *the divine virtue of his flesh*, so that we are made one body with Him." Ch. vii. En quo desinunt tot de *reali* præsentia dicta!

(2) Matt. xxvi. 26. 28.

figura corporis mei. Figura autem non fuisset, nisi veritatis esset corpus.”<sup>1</sup>  
Sensum testimonii jam exposuimus, adeo ut jam sufficiat animadvertere Christum a Tertulliano dici panem corpus suum fecisse, quod conversionem plane indicat.

152. S. GREGORIUS NYSSENUS dicit : “ Panis statim per verbum TRANS-  
MUTATUR, sicut dictum est a Verbo: Hoc est corpus meum.”<sup>2</sup>

153. S. CYRILLUS HIEROSOLYMITANUS, post lectionem ex Pauli ad Corinthios epistola : “ Ego enim accepi a Domino, quod et tradidi vobis :” sic disseruit : “ Vel hæc sola beati Pauli institutio abunde sufficiens est, ut certam vobis de divinis mysteriis fidem faciat: quibus digni habiti, concorporei et consanguinei Christi facti estis. Ille enim modo clamabat : ‘ Quod in ea nocte qua tradebatur Dominus noster Jesus Christus, sumpto pane et gratiis actis, fregit, et dedit suis discipulis dicens : Accipite, manducate ; Hoc est corpus meum. Et sumto calice, ac gratiis actis, dixit : Accipite, bibite : Hic est sanguis meus.’ Quum igitur ipse pronuntiaverit, et dixerit de pane, ‘ Hoc corpus est meum,’ quis audebit deinceps ambigere ? Et quum ipse adseveraverit et dixerit, ‘ Hic meus est sanguis :’ quis unquam dubitaverit, aliens non esse ejus sanguinem ? Aquam olim in vinum, quod sanguine affine est, in Cana Galilææ transmutavit : et eum parum dignum existimamus cui credamus, quum vinum in sanguinem transmutavit ?—οὐκ ἀξιόπιστός ἐστιν, ὄνον μεταβαλὼν εἰς αἷμα ;—Ad nuptias corporales vocatus, stupendum hoc miraculum effecit, et non eum multo magis filiis thalami nuptialis corpus suum et sanguinem fruenda donasse confitebimur ? Quare cum omni persuasione tamquam corpus et sanguinem Christi illa sumamus. Nam in figura panis datur tibi corpus, et in figura vini datur tibi sanguis ; ut quum sumpseris corpus et sanguinem Christi, concorporeus et consanguis ipsi efficiaris. Ως ἐ μετὰ πάσης πληροφορίας, ὡς σώματος καὶ αἵματος μεταλαμβάνομεν Χριστον. Ἐν τύπῳ γὰρ ἄρτου, δίδοταί σοι τὸ σῶμα καὶ ἐν τυπῷ ὄνου, δίδοταί σοι τὸ αἷμα ἵνα γένη, μεταλαβὼν σώματος καὶ αἵματος Χριστοῦ, σύνσωμος καὶ σύναιμος αὐτοῦ. . . . Quamobrem ne tamquam nudis pani et vino adtende, sunt enim corpus et sanguis Christi, secundum Domini asseverationem : nam etiam si illud tibi suggerat sensus, fides tamen te certum et firmum efficiat. Ne judices rem ex gustu ; sed ex fide citra ullam dubitationem certus esto, te corporis et sanguinis Christi dono dignatum fuisse. Μὴ πρόσεχε ὄν ὡς φιλοῖς τῷ ἄρτῳ καὶ τῷ ὄνῳ σῶμα γὰρ καὶ αἷμα Χριστοῦ, κατὰ τὴν δεσποτικὴν τυγχάνει ἀποφασιν. εἰ γὰρ καὶ ἡ αἰσθησις τοῦτο ἐποβάλλει, ἀλλὰ ἡ πίστις σε βεβαίῳ. μὴ ἀπὸ τῆς γεύσεως κρίνης τὸ πραγμα, ἀλλ’ ἀπὸ τῆς πίστεως πληροφορεῖ ἀνενδοιάσως, σώματος καὶ αἵματος Χριστοῦ καταξιώθεις.”<sup>3</sup>

154. S. JOANNES CHRYSOSTOMUS : “ Non sunt humanæ virtutis hæc opera. Is qui tunc in illa cœna hæc confecit, et nunc etiam operatur.

(1) Adv. Marcion. l. iv. c. xl.

(2) Orat. Catech.

(3) Cat. Myst. xxii.

Nos ministrorum habemus ordinem : qui vero illa sanctificat et **TRANS-  
MUTAT** ipse est"—ὁ δὲ ἁγιάζων ἅντ' αὐτὰ καὶ μετασενάζων, αὐτός.<sup>1</sup> Aliàs : " Sed  
tempus demum est ad horrendam hanc mensam accedendi . . . .  
Adest Christus, et nunc is, qui mensam illam apparavit, hic ipse  
hanc nunc exornat. Non enim homo est, QUI FACIT UT PROPOSITA EFFI-  
CIANTUR CORPUS ET SANGUIS CHRISTI, sed ipse Christus qui pro nobis cru-  
cifixus est—ὅδ' ἔστι γὰρ ἀνθρώπος ἰσὺς ὁ πᾶν τὰ προκείμενα γενέσθαι σῶμα καὶ αἷμα  
Χριστοῦ—Figuram implens stat Sacerdos verba illa proferens : virtus autem  
et gratia Dei est : 'Hoc est corpus meum,' inquit. Hoc verbum trans-  
format ea quæ proposita sunt"—τὸντο δὲ ῥῆμα μεταρρυθμίζει τὰ προκείμενα.<sup>2</sup>

155. S. CYRILLUS ALEXANDRINUS : " Ne horreremus carnem et sangui-  
nem apposita sacris altaribus, condescendens Deus nostris fragilitatibus,  
influit oblati vim vitæ, **CONVERTENS EA IN VERITATEM PROPRIÆ CARNIS**, ut  
corpus vitæ, quasi quoddam semen, inveniatur in nobis."<sup>3</sup>

156. S. GAUDENTIUS BRIXIENSIS : " Ipse igitur naturarum Creator et  
Dominus, qui produxit de terra panem, de pane rursus, quia potest et  
promisit, efficit proprium corpus, et qui de aqua vinum fecit, fecit et de  
vino sanguinem suum." " Ne terrenum putes, quod cœleste effectum est  
per eum qui transit in illum, et fecit illud corpus et sanguinem."<sup>4</sup>

157. S. GERMANUS, episcopus Parisiensis, vel alius quivis auctor *expo-  
sitionis brevis* Liturgiæ Gallicanæ antiquæ, quæ medio sexto sæculo pro-  
diit, scribit : " Panis verò in corpore et vinum **TRANSFORMATUR** in sanguine,  
dicente Domino de corpore suo, ' caro enim mea vere est cibus, et sanguis  
meus vere est potus.' "<sup>5</sup>

158. Alcuinus, seu Albinus, sæculi octavi scriptor, ad Paulinum Aqu-  
leensem scripsit : " Ne, quæso, obliviscaris in tuis sanctis orationibus  
nomen amici tui Albini; sed in aliquo memoriæ gazophylacio manda illud  
et proferto eo tempore opportuno quo **PANEM ET VINUM IN SUBSTANTIAM  
CORPORIS ET SANGUINIS CHRISTI CONSECRAYERIS.**"<sup>6</sup>

159. S. JOANNES DAMASCENUS : " Panis ipse et vinum in corpus et  
sanguinem Domini **TRANSMUTANTUR**. Si requiras quonam pacto istud fiat,  
sat tibi sit audire, hoc fieri per Spiritum Sanctum."<sup>7</sup>

Quæ jam adduximus patrum testimonia ad veram, realem, et substantia-  
lem corporis et sanguinis Christi in eucharistia probandam, dogma transub-  
stantiationis adstruunt, nam simpliciter ostendunt eucharistiam esse corpus

(1) Hom. lxxxii. alias lxxxiii. in Mat.

(2) Hom. de prodit. Judæ.

(3) Ep. ad Cœlosyrium. c. iv. de Fide.

(4) Tract II. in Exod.

(5) Cit. a Lienhart de antiquis Liturgiis, Argentorati, 1829. præf p. xli.

(6) Ibidem p. xxxii.

(7) Orthodoxa c. xiv. Centuriatores Magdeburgenses notant : " De Transubstantia-  
tione habet multa Damascenus." Cent. 8. c. 4.

et sanguinem Christi, et proinde conversionem illam quam transubstantiationem vocamus panis et vini in corpus et sanguinem Christi pro re explorata habent.

*Probatur III. auctoritate conciliorum.*

160. Quindecim concilia sæculo undecimo habita in Italia et Galliis, magno consensu proscripserunt Berengarii sententiam transubstantiationi adversam, quam ejurare verbis maxime perspicuis coactus est. Concilium verò Lateranense anno 1215, cui aderat patriarchæ Græci Alexandrini legatus, et plures episcopi ex Græcia et Palæstina, summo omnium consensu, fidem de eucharistia iis verbis declaravit: “Una verò est fidelium universalis Ecclesia, extra quam nullus omnino salvatur: in qua idem ipse Sacerdos et sacrificium Jesus Christus, cujus corpus et sanguis in Sacramento altaris sub speciebus panis et vini veraciter continetur, transubstantiatis pane in corpus, et vino in sanguinem potestate divina.”

*Probatur IV. ex Liturgiis.*

161. Liturgiæ omnes vetustissimæ continent invocationem Spiritus Sancti, ut efficiat panem et vinum corpus et sanguinem Christi, et substantiæ conversionem vocibus variis significant—*μεταβαλὼν—μεταποιήσας*—et de corpore et sanguine veluti in altari positis, et ore fidelium sumptis loquuntur. Ergo dogma *transubstantiationis* in cultu publico orbis christiani semper est agnitum.<sup>1</sup>

*Probatur V. argumento præscriptionis.*

162. Quo tempore ortus est Carolstadius, transubstantiationis dogma ubique obtinuit: idem de tempore Berengarii, sæculo scilicet undecimo, dicendum est. Quum autem maxime difficile sit, et sensibus et rationi videatur adversum, non potuit facile induci, et apud omnes obtinere. Ergo vel agnoscendum est illud semper ab ipsis religionis christianæ exordiis viguisse, vel indicandum est tempus quo primum excogitatum est, et quo auctore, quibusque subsidiis propagatum et stabilitum. Attamen nemo hactenus hæc felici successu exposuit. Præterea quum eucharistia pertineat ad publicum cultum, et quotidiana Christianorum munera, non poterat nova de ejus natura sententia proponi, quin omnes statim id animadverterent. Porro idem viguit cultus, idemque agnitum est dogma a Græcis et sectis omnibus Orientalibus, tum sæculo decimo sexto, tum sæculo decimo tertio, et undecimo, nec de eo ulla orta est controversia inter sectarios illos et Latinos; nec originis dogmatis post Apostolorum tempora ullum occurrit apud eos vestigium. Ergo, illud ab ipso Apostolorum ævo traditum agnoscendum est, et proinde dogma divinum habendum.

(1) “It appears from Mr. Palmer’s valuable work, that all the ancient Liturgies now existing, or which can be proved ever to have existed contain a prayer of consecration that God will make the bread and wine the Body and Blood of Christ.” Oxford Tracts, No. 3.



## OBJECTIONES DILUUNTUR.

163. *Obj.* 1. Verba Christi non excludunt panem et vinum : quæ proinde manere censenda sunt, quum videantur et gustentur. Sic si quis, dolio exhibito, dixerit : hoc est vinum ; non ideo dolium ibi quoque esse negasse censebitur.

*Resp.* Verba Christi simpliciter et absolute declarant quod dedit Apostolis corpus ejus et sanguinem esse. De pane et vino nil dixit ; sed quum dixerit illud quod manibus tenebat esse corpus suum et sanguinem, non licet aliud de eo credere : nec enim verba ejus vera forent, prout sonant, si panis et vinum adessent. Quando dicitur : *hoc est vinum* ; de dolio non agitur, sed de liquore qui eo continetur ; sed panis et vinum non sunt instar vasm, ideoque non possunt intelligi verba Christi de iis veluti continentibus corpus suum et sanguinem.

164. *Obj.* 2. Christus dicendo : “ Hoc est corpus meum ; ” certiores quidem fecit Apostolos se corpus suum illis vere dare ; sed quod simul daretur panis, res erat obvia sensibus, quæ nulla indigebat declaratione. Ita Cosinus.<sup>1</sup>

*Resp.* Utique Apostolos Christus fecit certiores se corpus suum illis dare, sed quum id quod manibus tenebat corpus illud esse dixerit, non licet alias credere ; habuit enim potestatem panem in corpus convertendi, idque se fecisse ex verbis ejus omnino sequitur. Profectò in re tanti momenti, de qua universos christiani nominis professores per plurima sæcula obvium verborum suorum sensum amplexuros prævidit, non est censendum eum ita locuturum fuisse, si alia ei fuisset mens. Potuit enim dicere : Una cum hoc pane, et illius instar, do vobis corpus meum. Quum autem dicat : hoc est corpus meum ; illud toto mentis obsequio excipimus, ejus verbo, magis quam sensibus nostris, fidentes. Nulla ejus declaratione opus fuit ut Apostoli panem esse æstimarent, qualis videbatur : sed postquam affirmaverat corpus suum esse, jam non licuit alias sentire.

165. *Obj.* 3. Paulus Christi mentem ita explicat, ut panis sit communicatio *κοινωνία* corporis Christi ; scilicet quo corpus Christi datur, et fideles ejus participes fiunt : panis quem frangimus, nonne participatio corporis Domini est ?” Ita ex divina institutione, et Apostoli explicatione, constat quidem nos corpus Domini recipere, æque ac si panis in illud converteretur, non ideo tamen conversus censendus est.<sup>2</sup>

*Resp.* Panis voce utitur Apostolus usitata et familiari ratione ob speciem

(1) Cosin. History of Popish Transubstantiation, ch. v.

(2) I. Cor. x. 16.

(3) “ Though, by the divine institution and the explication of the Apostle, every faithful communicant may be as certainly assured that he receives the Lord’s Body, as if he knew that the Bread is substantially turned into it ; yet it doth not therefore follow that the Bread is so changed that its substance is quite done away.” Cosin. ch. v.



externam. Cæterum satis ostendit ipsum Christi corpus esse, nec enim alias eo accepto, Christi corporis participes essemus. Non dicit occasione panis tantum nobis beneficium contingere; sed ipsum nobis datum communionem esse corporis Domini. Si tanta vis, ipso fatente Cosino, verbis Domini, et Apostoli insit, ut de percepto corpore Domini a digne suscipientibus sit omnimoda certitudo, æque ac si panis vere in illud converteretur; utique probant simpliciter et absolute Sacramentum esse corpus Domini, et omnes illud suscipientes, etiam indigne, ejus esse participes, reos idcirco corporis et sanguinis Domini. Quod panem manere dicat Cosinus, ex sensuum testimonio derivat, quo, in re divinitus extra ordinem naturæ consuetum posita, niti non oportet, contra vim obviam verborum Domini, prout Cyrillus, Chrysostomus, et alii patres sapienter monent.

166. *Obj.* 4. Falsò dicitur a Bellarmino aliisque verba Domini *transubstantiationem* necessariò secum ferre: nam id divinæ omnipotentiae derogat, quasi Deus non posset corpus Christi præsens sistere, et in Sacramento dare, manente panis substantia. Præterea divinæ benedictioni, qua res conservantur, detrahit: et Sacramenti naturæ repugnat, quod signo et re significata constat. Denique ipsam Christi corporis et sanguinis substantiam evertit, hanc quippe ex pane et vino a Sacerdote effici, magna cum presumptione dicitur.<sup>1</sup>

*Resp.* Verissime dixit Bellarminus verba Domini vera non esse, si quod tenebat manibus, non esset corpus suum, quod verbis adeo perspicuis affirmavit. Nec id Dei omnipotentiae detrahit, nec enim quæritur utrum Christus potuerit corpus suum una cum pane dare, sed utrum dederit. Nihil divinæ benedictioni derogatur, sicut quando aqua facta est vinum, divinæ benedictioni derogatum non est: Dei scilicet est rerum substantias mutare. Sacramenti habetur natura, quæ enim manent species signi habent rationem, Christumque animæ cibum, iis tamquam velo obtectum exhibent. Denique substantia corporis et sanguinis Christi non mutatur, sed panis et vinum, Dei omnipotentia, in eam convertuntur, mirabili prorsus et singulari ratione adeo ut solum adsit corpus et sanguis. Nihil tribuitur sacerdoti, nisi veluti Dei ministro, id muneris peragenti, cui divinam illam conversionem Christus alligavit. “Nos,” dicimus iterum cum Chrysostomo, “ministrorum habemus ordinem: QUI VERÒ ILLA SANCTIFICAT ET TRANSMUTAT IPSE EST.”

167. *Obj.* 5. Christi verba vera sunt, absque ulla substantiæ mutatione. Sic si testator, instrumenta et titulos hæredi tradens, dicat: “Accipe domum quam tibi lego:” nemo scripta illa domum ipsam esse dicet. Ita Cosinus.

*Resp.* Nemo non videt quam longe distent hujusmodi exempla a Christi institutione. Scripta noscuntur titulum tantum præbere ad rem possidendam, proinde ex usu communi verborum, quæ forsitan adhibuerit testator

(1) Cosinus loco cit.

aliquis, definitur sensus. Sed panis nulla ratione connectitur cum Christi corpore, neque consuetudine, neque reipsa : ideoque Christi verba non poterant intelligi de signo, pignore, vel instrumento sui corporis adipiscendi. Cæterum locutio illa testatoris quam fingit Cosinus inusitata est, et insulsa.

168. *Obj.* 6. Apostolus de pane loquitur, tamquam qui superest et frangitur in eucharistia : “ panis quem frangimus, nonne participatio corporis Domini est ? ”<sup>1</sup> “ Quotiescumque enim manducabitis panem hunc. . . . quicumque manducaverit panem hunc. . . . Probet autem seipsum homo, et sic de pane illo edat.”<sup>2</sup> Inverosimile est eum panem tam sæpe nominasse, si panis nequaquam adesset.

*Resp.* Quum panis ad conficiendam eucharistiam adhibeatur, et maneat ejus species, mirum non est eum nominari, licet substantia ejus divina potestate in Christi corpus transierit. Cæterum Apostolus cum emphasi quadam eum nominat, ut a pane, corporis cibo, distinguatur ; et corpus Domini discerni et agnosci exigit, reum esse corporis violati declarans eum qui de *pane illo* indigne comederit. Frangitur panis ille, quatenus species franguntur, omnia enim divino consilio ita sensibus exhibentur quasi panis maneret substantia.

169. *Obj.* 7. Patres omnes spiritalem et mysticam esse Christi præsentiam in Eucharistia declarant, et panem et vinum superesse post consecrationem. Justinus dicit in cœtu fidelium dari panis et vini portionem, et carnem et sanguinem ali hoc cibo digesto.

*Resp.* Spiritalem et mysticam Christi præsentiam et nos agnoscimus, quatenus corpus et sanguis Christi naturali sua conditione non nobis exhibentur, species enim sacramentales tantum videmus, corpus et sanguinem adesse fide tenemus. Cæterum veram, realem, substantialem præsentiam patres omnes nobiscum fatentur, quod recitatis testimoniis probavimus. Panem et vinum superesse non tradiderunt, sed e contra sæpissime monuerunt ne sensibus hac in re decepti, Sacramenti veritatis, juxta Christi verba, obliviscamur. Cæterum quum panis et vinum ad Sacramentum conficiendum adhibeantur, et eorum externæ species maneant, mirum non est si patres aliquando hæc nomina usurpent, familiari illa ratione loquendi in Scripturis sæpius adhibita, juxta quam qua ex re quid factum sit, vel quam præseferat formam respicitur, qua ratione et nos loquimur. Justini verba haud fideliter retulit Cosinus, nec enim portionem panis et vini dari adstantibus dicit, sed panem et poculum aquæ et vini afferri præsuli, qui prolixè super iis preces et eucharistiam facit, quibus absolutis panis *consecratus*, una cum vino et aqua pariter consecratis distribuuntur a diaconis :  
*διακονοῦντες διδοσιν ἑκάστῳ τῶν παρόντων μεταλαβεῖν ἀπο τοῦ εὐχαριστηθέντος ἁγίου καὶ οἴνου καὶ*

(1) I. Cor. x. 16.

(2) I. Cor. xi. 26, 27, 28.

ἰδατος: “Diaconi panem et vinum et aquam in quibus gratiæ actæ sunt, unicuique præsentium participanda distribuunt.” Vis vocis illius εὐχαρισθ-  
 εντος—prout eo loci adhibetur, eadem omnino est ac ‘consecratus,’ uti ex  
 iis quæ de precibus et eucharistia dixerat, liquet: εὐχαριστιαν ὑπὲρ τοῦ κατηξίωσ-  
 θαι τῶτων παρ’ αὐτοῦ ἐπὶ πολὺ ποιεῖται: “eucharistiam pro his ab eo acceptis  
 donis prolixè exequitur.” Non igitur panem simpliciter vocat, sed panem  
 consecratum. Fallit etiam Cosinus, dum carnes nostras pane eucharistico  
 nutriri, veluti Justino auctore, dicit, non enim ea fuit huic mens, sed illam  
 alimoniam, ex qua sanguis et carnes nostræ per mutationem aluntur, quando  
 fuerit solemnī benedictione sacrata, esse dicit et carnem et sanguinem Chris-  
 ti: mirabilem scilicet et singularem conversionem ejus prædicat, et agnoscit.  
 Ideo diligenter cavet ne quis eam cum corporis nutrimento confundat: “Ne-  
 que enim ut communem panem, neque ut communem potum ista sumimus;  
 sed quemadmodum per Verbum Dei caro factus Jesus Christus Salvator  
 noster et carnem et sanguinem habuit nostræ salutis causa; sic etiam illam,  
 in qua per precem, ipsius verba continentem, gratiæ actæ sunt, alimoniam,  
 ex qua sanguis et carnes nostræ per mutationem aluntur, INCARNATI ILLIUS  
 JESU ET CARNEM ET SANGUINEM ESSE edocti sumus.” τὴν δὲ εὐχης λόγῳ τοῦ παρ’  
 αὐτοῦ εὐχαρισθῆσαν τροφήν, ἐξ ἧς αἷμα καὶ σαρκεὶς κατὰ μεταβολὴν τρεφόνται ἡμῶν, ἐκείνῳ  
 τοῦ σαρκοποιηθέντος Ἰησοῦ καὶ σαρκα καὶ αἷμα ἐδιδάχθημεν εἶναι.<sup>1</sup> Hæc adeo sunt per-  
 spicua, ut mirari sit Justinum mysterium christianum imperatoribus ethni-  
 cis, ad quos vindicias illas direxit, tam clare enuntiasse, contra morem  
 scriptorum christianorum qui plerumque de altissimo arcano vix aliquid ad  
 ethnicorum pervenire notitiam passi sunt.

170. *Obj.* 8. Quæ patrum testimonia afferuntur, eucharistiam corpus et sanguinem Christi esse affirmantia explicanda sunt ratione significationis, quam habent elementa, ipsi enim patres alias eam vocant sacramentum corporis et sanguinis Christi, et satis suam explicant mentem. Ita Cosinus.

*Resp.* Nullus usus loquendi, nulla interpretationis lex sinit, ut quæ verbis adeo perspicuis a quamplurimis scriptoribus omnis ætatis affirmantur, de mera relatione signi ad rem signatam, vel de virtute qualibet signo adnexa intelligantur: præsertim cum patres magnam in eo vim ponant quod eucharistia sit ipsum corpus et sanguis Christi, et argumentum inde desumant ad probandam humanæ naturæ Christi veritatem, et futuram corporum nostrorum resurrectionem. Falso asseritur eos alibi suam explicare mentem ratione quæ dictorum vim elevet, quamvis enim de mysterio adeo sublimi loquentes, eas aliquando usurpent voces quæ externas species respiciunt, quod et nos facimus, nihil dicunt quod veræ, reali, et substantiali præsentiae, adeoque dogmati ipsi transubstantiationis adversetur. Omnia feliciter facileque cohærent dogmate admisso, et ea consideratione haud neglecta de ratione loquendi diversa, prout vel species externa, vel Sacra-

(1) Apologia i. alias ii. n. 66.

menti veritas menti obversatur : sed si Calviniana placita obtineant, patres verbis lusisse, et ita locuti ut errorem gravissimum lectoribus ingererent, debantur.

171. *Obj.* 9. Qui inter patres asserunt sacerdotes conficere corpus Christi, intelligendi sunt de elementorum consecratione, qua panis communis fit sacramentalis, adeo ut fractus et receptus sit corporis Christi communio, et proinde sacramentaliter designari possit corpus Christi. Ita Hieronymus explicandus est ; ita quoque Chrysostomus, qui tamen animadvertit Deum esse qui munerum mutationem sacramentalem operatur.

*Resp.* Patrum verba non patiuntur, ut eos de mera elementorum sanctificatione locutos intelligamus. Hieronymus verendum sacerdotum ministerium ea de causa dicit, quod “ Christi corpus sacro ore conficiunt ; ”<sup>1</sup> et alias— “ ad quorum preces, Christi corpus sanguisque conficitur. ”<sup>2</sup> Vi illius consecrationis fit ut fideles corpus ipsum et sanguinem de manu sacerdotum accipiant : “ Non Moyses dedit nobis panem verum, sed Dominus Jesus : ipse conviva et convivium ; ipse comedens, et qui comeditur : illius bibimus sanguinem. ”<sup>3</sup> Et alias : “ Sanguis autem ipse est pretiosus, in quo redimimur in passione Domini Salvatoris ; cujus carne alimur, et cruore potamur. ”<sup>4</sup> Sic et Chrysostomus dignitatem sublimem sacerdotum et sanctitatem ex eo quod hæc celebrent mysteria effert, Dei operationem, ministerium tantum humanum in iis agnoscens.

172. *Obj.* 10. Quæ ex patribus allegantur testimonia de conversione, mutatione, transmutatione, transfiguratione, transelementatione panis et vini non probant transubstantiationem, hæc quippe ab iis differt ; nam quum agatur de Sacramento mutatio necessario intelligenda est sacramentalis. Ita Cosinus.

*Resp.* Mira certe est hæc lex interpretationis, ut juxta suam de Sacramenti natura notionem explicet Cosinus quæcumque dixerint patres ad declarandam panis et vini in corpus et sanguinem Christi conversionem. Illa vocum varietas qua, ipso fatente, mutationem quæ fit in mysteriorum celebratione declararunt,—μεταβολή, μεταμόρφωσις, μεταποίησις, μετασχημάτισις,—nullius habetur, quia non usurparunt vocem Latinam qua nunc exprimitur, quamvis Græcis quas plerique adhibuerunt vocibus vim illam adnexam esse ex serie orationis, et ex aliis locis constet. Profectò cogitur White fateri patres ea ratione locutos, quæ transubstantiationi faveat, et eos refugit judices, qui ipso quarto Ecclesiæ sæculo floruerunt.<sup>5</sup>

(1) Ep. ad Heliodorum.

(2) Ep. ad Evagrium.

(3) Ep. ad. Hedibiam.

(4) In. c. xlv. Ezech.

(5) “ The present author would be misunderstood, were he conceived of as believing, that the question is to be brought to the test of what was held by the many eminent men who flourished in the fourth century. Further he knows, that they spoke commonly

173. *Obj.* 11. Patres hyperbolice locuti sunt de eucharistia, uti patet ex Chrysostomi verbis, quæ prout sonant nemo accipit, dicit enim sacerdotis manum carnem Christi secare, fidelium linguam tingi Christi sanguine. Ita Cosinus.

*Resp.* Tot quæ adduximus testimonia, et plurima alia non possunt haberi meræ exaggerationes. Si elementa essent signa tantum, quantalibet virtute prædita, insulsa prorsus forent illa patrum dicta, a quibus proinde omnes abhorrent: sed fide mysterii prævia, hujusmodi dicta optime conveniunt, et facile ab omnibus intelliguntur. Manus sacerdotis carnem Christi secare dicitur, quia frangit hostiam, quæ vere est caro Christi, quamvis ob gloriosam hujus conditionem nulla possit affici mutatione. Fidelium etiam lingua obvio sensu tincta Christi sanguine prædicatur, quum eum bibamus in mysteriis. Sed insanire videretur qui panem et vinum symbola Christi corporis et sanguinis æstimans, Chrysostomi imitaretur sermonem. Hinc White non veretur dicere eum eloquentia raptum minus accurate locutum!

174. *Obj.* 12. Irenæus duas res terrenam et cœlestem in eucharistia agnoscit: “Quemadmodum enim qui est a terra panis percipiens invocationem Dei, jam non communis panis est, sed eucharistia, ex duabus rebus constans, terrena et cœlesti; sic et corpora nostra percipientia eucharistiam, jam non sunt corruptibilia, spem resurrectionis habentia.”<sup>1</sup>

*Resp.* Irenæus respicit rem terrenam ex qua conficitur eucharistia, et cujus speciem retinet, quin ejus substantiam manere innuat: nam vinum et panis “percipientia verbum Dei, EUCHARISTIA FIUNT, QUOD EST CORPUS ET SANGUIS CHRISTI.”<sup>2</sup> Ita ipse docet. Cæterum mirum non est eum de tanto arcano loquentem iis uti nonnumquam vocibus quæ cavillationibus novatorum ansam præbeant; in re enim hujusmodi, cujus species sensibus obvia adeo differt a rei veritate, velo illo oblecta, duplex necessariò inducitur loquendi ratio, uti sapienter monet scriptor egregii operis de fidei perpetuitate, alia scilicet secundum speciem sensibilem, alia secundum rei veritatem fide propositam. Perspicua autem sunt quæ tradit Irenæus de veritate corporis et sanguinis Christi in eucharistia.

175. *Obj.* 13. S. Joannes Chrysostomus manifesto rejicit transubstantiationem, monet enim Sacramenta haud consideranda carnaliter, sed oculis intellectus; et corpus Domini haud percipi externo aliquo actu, sed fide. Hæc Cosinus.

*Resp.* Perperam omnino et contra Chrysostomi mentem hæc objiciuntur,

of a change made in the elements, but not destroying their substantial properties. That they expressed the former sentiment in language which led to transubstantiation, shall not be here denied.” Lectures on the Catechism of the Protestant Episcopal Church, and Dissertations, by William White, D. D. Bishop, &c. Philadelphia, 1813. p. 384.

(1) L. iv. adv. hæer. c. xxxiv. alias xviii.

(2) L. v. c. xi.

uti testimonio integro recitato cuique patebit. “Credamus itaque ubique Deo, nec repugnemus ei, etiam si sensui et cogitationi nostræ absurdum esse videatur quod dicit, superet et sensum, et rationem nostram sermo ipsius, quod in omnibus et præcipue in mysteriis faciamus, non illa quæ ante nos jacent solummodo aspicientes, sed verba quoque ejus tenentes. Nam verbis ejus defraudari non possumus, sensus verò noster deceptui facillimus est: illa falsa esse non possunt, hic sæpius atque sæpius fallitur. Quoniam ergo ille dixit: **HOC EST CORPUS MEUM**: nulla teneamur ambiguitate, sed credamus, et oculis intellectus id perspiciamus. Nihil enim sensibile traditum nobis a Christo, sed rebus quidem sensibilibus: omnia verò quæ tradidit insensibilia sunt. Sic et in baptismo per aquam, quæ res sensibilis est, donum illud conceditur: quod autem in ea conficitur, regeneratio scilicet ac renovatio, intelligibile quiddam est. Nam si tu incorporeus esses, nude ipsa dona incorporea tradidisset tibi: quoniam verò corpori conjuncta est anima tua, in sensibilibus intelligenda tibi traduntur. O quot modo dicunt, vellem ejus formam, typum, vestimenta, calceamenta videre! Ecce illum vides, ipsum tangis, ipsum comedis—*ἰδοὺ αὐτόν ὁρᾷς, αὐτὸς ἄπτη, αὐτὸν ἐσθίεις*—Et tu quidem vestimenta videre cupis: ipse verò seipsum tibi dat, non videndum modo, sed tangendum, comedendum, intus accipiendum—*αὐτὸς δὲ ἑαυτὸν σοι δίδωσιν, ἐκ ἰδεῖν μόνον, ἀλλὰ καὶ ἅψασθαι, καὶ φαγεῖν, καὶ λαβεῖν ἔνδον*—Neque enim satis habuit hominem fieri, alapis cædi, immolari, sed seipsum commiscet nobiscum, non fide tantum, sed reipsa nos corpus suum constituit—*ἀναφέρει ἑαυτὸν ἡμῖν, καὶ οὐ τῇ πίστει μόνον, ἀλλὰ καὶ αὐτῷ τῷ πράγματι σῶμα ἡμᾶς αὐτὸς κατασκευάζει*. Quanta ergo puritate oporteret eum esse qui hoc fruitur sacrificio? quanto radiis solaribus puriorem esse oporteret manum illam, quæ hanc carnem secat, os quod spirituali repletur igne, linguam tremendo sanguine tinctam?—*σοῖας ἡλιακῆς ἀκτίνος τὴν χεῖρα τὴν ταύτην διατέμνουσαν τὴν σάρκα, τὸ σῶμα πληρούμενον πυρὸς πνευματικοῦ, τὴν γλῶσσαν τὴν φοίνισσομένην αἵματι φρίκωδες ἄτω*;—Cogita quantum adeptus sit honorem? qua fruaris mensa? Quod Angeli tremunt videntes, nec sine metu respicere audent ob fulgorem inde manantem, eo nos alimur, huic commiscemur, factique sumus Christi unum corpus, et una caro—*τούτῳ ἡμεῖς τρεφόμεθα, τούτῳ ἀναφυρόμεθα, καὶ γεγόναμεν ἡμεῖς Χριστοῦ σῶμα ἐν καὶ σὰρξ μία*—‘Quis loquetur potentias Domini? auditas faciet omnes laudes ejus? Quis pastor propriis sibi membris oves nutrit? Ecquid pastorem dico? Matres sæpe sunt, quæ post partum infantes aliis nutricibus dant: ipse vero id non passus est, sed nos proprio sanguine nutrit, et per omnia sibi copulat—*ἀλλ’ αὐτὸς ἡμᾶς τρέφει δικαίῳ αἵματι, καὶ διὰ πάντων ἡμᾶς ἑαυτῷ συμπλέκει*.<sup>1</sup>

176. *Obj.* 14. Chrysostomus scribit: “Sicut antequam sanctificetur panis, panem nominamus: divina autem illum sanctificante gratia, mediante Sacerdote, liberatus est quidem ab appellatione panis; dignus autem habi-

(1) Hom. lxxxii. alias lxxxiii. in Matt.



tus Dominici corporis appellatione, etiamsi natura panis in ipso perman-  
sit, et non duo corpora, sed unum corpus Filii Dei prædicamus : sic et hic  
divina insidente corpori natura, unum Filium, unam personam utraque hæc  
fecerunt.”<sup>1</sup>

*Resp.* Inter eruditos disceptatur de epistolæ illius authenticia. Cæterum  
*naturæ* vox latiori sumitur sensu, prout sæpe apud veteres, pro proprieta-  
tibus et speciebus.<sup>2</sup> Sic Chrysostomus de pueris in fornace ardenti loquens,  
ait : “juvenum pietas rerum naturam mutavit.”<sup>3</sup> Ipso loco objecto nega-  
tur duo esse corpora, quamvis panis Dominici corporis appellatione dignus  
habitus sit, utique quia factus est ipsum unum ejus corpus, adeo ut libe-  
ratus sit ab appellatione panis, amplius nonnisi corpus Christi nuncu-  
pandus.

177. *Obj.* 15. S. Ambrosius scribit : “Si tanta vis est in sermone  
Domini Jesu, ut inciperent esse quæ non erant, quanto magis operatorius  
est, ut sint quæ erant, et in aliud commutentur.”<sup>4</sup> Ergo manent panis et  
vinum, nec nisi sacramentaliter commutantur.

*Resp.* De librorum illorum auctore controvertitur, Cave Anglicano, cum  
Catholicis quibusdam, eos Ambrosio abjudicanti, Natali Alexandro, cum  
aliis emunctæ sane naris criticis, pugnante ex adversa parte. Nostrum non  
est tantas dirimere lites. Cæterum libenter agnoscimus eos esse probabilis  
valde et antiqui auctoris, qui Mediolanensem regebat Ecclesiam. Voces  
illæ “ut sint quæ erant,” in pluribus desiderantur codicibus ; sed si pla-  
ceat eas habere genuinas, facilem excipiunt sensum, scilicet panem et  
vinum non ad nihilum redigi, sed in aliud commutari, manentibus etiam  
eorum speciebus. Cosinum scriptoris hujus auctoritatem nobis objicere  
nimis inverecundum est, ex professo enim mutationem panis in corpus  
Christi, vini in ejus sanguinem, Dei potentia, tuetur : “Tu forte dicis :  
Meus panis est usitatus ; sed panis iste panis est ante verba sacramento-  
rum : ubi accesserit consecratio, DE PANE FIT CARO CHRISTI. Hoc igitur  
astruamus, quomodo potest qui panis est corpus esse Christi, consecratione.  
Consecratio igitur quibus verbis est, et cujus sermonibus ? Domini Jesu.  
. . . . . Ergo didicisti, quod EX PANE CORPUS FIAT CHRISTI : et quod  
vinum et aqua in calicem mittitur, sed FIT SANGUIS CONSECRATIONE VERBI  
CÆLESTIS. Didicisti ergo, quia quod accipis CORPUS EST CHRISTI.”

178. *Obj.* 16. S. Ambrosius eam quæ in eucharistia fit mutationem  
adsimilat ei quæ in homine fit baptismo, qua nova dicitur creatura, substan-  
tia certe haud mutata. Ita objicit Cosinus.

*Resp.* Auctor ille venerabilis plurimis utitur similitudinibus et exemplis,  
ut suadeat miram illam quæ in eucharistia fit mutationem ; quibus certe

(1) Ep. ad Cæsarium monachum.

(2) Vide opus sæpe laudatum : *La perpétuité de la foi*, t. ii. l. v. ch. viii. et x.

(3) Hom. iv. ad pop. Antioch.

(4) L. iv. de Sacr. c. iv.

opus non foret, si de sola *symbolica* relatione et virtute ageretur. Creationis exemplum in primis adducit: "Cœlum non erat, mare non erat, terra non erat. Sed audi dicentem: 'Ipse dixit, et facta sunt; ipse mandavit, et creata sunt.' Ergo tibi ut respondeam, non erat corpus Christi ante consecrationem: sed POST CONSECRATIONEM DICO TIBI, QUOD JAM CORPUS EST CHRISTI. Ipse dixit, et factum est, ipse mandavit, et creatum est."<sup>1</sup> Transit auctor ad gratiæ opus in hominis nova nativitate, quæ non minus ostendit divinam potentiam, quamvis natura humana non desinat esse, sed labe peccati mundetur, et ad conditionem supernaturalem evehatur. "Tu ipse eras, sed eras vetus creatura: postea quam consecratus es, nova creatura esse cœpisti." Hæc nova creatio non dicitur esse imago perfecta mutationis quæ fit in eucharistia, quamvis nec ipsa sua careat vi, quum revera magnum sit et divinum opus.

179. *Obj.* 17. Theodoretus dicit: "Neque enim symbola mystica post sanctificationem recedunt a sua natura.—τῆς φύσεως ὁικτίας ἐκ ἐξίσταται—Manent enim in priore substantia et figura, et forma et videri tangique possunt, sicut et prius."<sup>2</sup> Affirmat Deum in eucharistia, non mutare naturam, sed naturæ adjicere gratiam—ἐ τῇ φύσει μεταβαλὼν, ἀλλὰ τὴν χάριν τῇ φύσει προσδείκνυς.

*Resp.* Latiori sensu *natura* eo loci sumitur, sicut et *substantia*, pro figura scilicet qua videri tangique possunt. Dialogus hac de re sic se habet. Eutychianus Eranistes Catholicum interrogat: "Quomodo post sanctificationem symbola appellantur?" Orthodoxus respondet: "Corpus Christi et sanguis Christi." Eranistes: "Et credis te corpus Christi et sanguinem percipere?" Orthodoxus: "Ita credo." Eranistes: "Sicut ergo symbola Dominici corporis et sanguinis, alia sunt ante sacerdotis invocationem, post invocationem verò mutantur,—μέταγε τὴν ἱεράειαν μεταβάλλεται—et alia fiunt, ita Dominicum corpus post ascensionem in divinam substantiam mutatum est." Respondet Orthodoxus: "Retibus quæ ipse texuisti captus es. Neque enim symbola mystica post sanctificationem recedunt a sua natura; manent enim in priore substantia, et figura, et forma, et videri tangique possunt, sicut et prius: intelliguntur autem ea esse quæ facta sunt, et creduntur,—νοεῖται ὡς ἐγένετο, καὶ πισυνεται—et adorantur, ut quæ illa sunt quæ creduntur. Confer igitur imaginem cum archetypo, et videbis similitudinem. Oportet enim figuram similem esse veritati. Illud enim corpus priorem habet formam, et circumscriptionem, et, ut semel dicam, corporis substantiam: immortale autem post resurrectionem, et immune a corruptione factum est, sedemque a dextris adeptum, et ab omni creatura adoratur, quia Domini naturæ corpus appellatur." Ex dogmate de corpore et sanguine Domini, post consecrationem præsentibus, Eutychianus, unicam agnoscens Christi naturam, quærebat argumentum

(1) L. iv. de Sacramentis c. iv.

(2) Dialog. ii. qui dicitur *Inconfusus*.



derivare, quo probaret post ascensionem corpus non esse palpabile, visibile, circumscriptum, nec alias habere proprietates. Huic ut responderet Catholicus, ostendit superesse in eucharistia figuram et formam panis et vini; ideoque argumentabatur humanam Christi naturam suas retinere proprietates etiam post ascensionem. Voces naturæ et substantiæ Catholicus eucharisticis speciebus accommodat, sed ex usu Græcorum scriptorum notum est eas latius sæpe sumi, pro proprietatibus scilicet, vel pro natura quatenus concipitur plurimis communis. Mirum autem non est si in disceptatione de altissimo mysterio, duarum in Christo naturarum, argumentum deductum ex alio mysterio vel minus accurate enuntietur, vel nimis probare videatur. Nostrum non est illud argumentandi genus vindicare: sed satis muneri nostro fecimus, ostendendo ex utraque parte in confesso fuisse, quæ apposita sunt invocatione mutari et alia fieri, et esse quæ facta sunt et credi, et adorari, ut quæ illa sunt quæ creduntur, et vocari corpus et sanguinem Christi. Quod si quis symbolorum vocem dogmati Catholico officere putet, fallitur, nam rite intellecta innoxia est; quum enim corpus et sanguis Christi non nobis exhibeantur intuenda, quæ ea obtegunt species symbolorum instar sunt. De Theodreti sententia nulla est dubitandi ratio, scribit enim: “Non solum undecim Apostolis, sed etiam Judæ proditori PRETIOSUM CORPUS ET SANGUINEM impertiit.”<sup>1</sup>

180. *Obj.* 18. S. Gelasius Papa scribit: “Certe Sacramenta quæ sumimus, corporis et sanguinis Christi, divina res est; propter quod et per eadem divinæ efficimur consortes naturæ, et tamen esse non desinit substantia, vel natura panis et vini.”<sup>2</sup>

*Resp.* Liber ille Gelasium Cyzicenum auctorem habere censetur. Substantia, vel natura, latiori sumitur sensu pro proprietatibus, quod, uti pluries animadvertimus, Græce scribentibus est admodum familiare. Quod similitudo adducatur haud omnino idonea rei de qua agebatur probandæ, scilicet duas esse in Christo naturas, ostendit haud vacare periculo a mysteriis exquirere similitudines vel argumenta ad alia commendanda mysteria. Non hujusmodi similitudinibus probavimus dogma, sed perspicuis testimoniis, quæ rem plane adstruunt, obscuris vel ambiguis locutionibus quorundam haud infirmanda.

181. *Obj.* 19. Facundus Hermianensis scribit: “Sacramentum adoptionis suscipere dignatus est Christus, et quando circumcisisus est, et quando baptizatus est; et potest Sacramentum adoptionis adoptio nuncupari, sicut Sacramentum corporis et sanguinis ejus, quod est in pane et poculo consecrato, corpus ejus et sanguinem dicimus: non quod proprie corpus ejus sit panis, et poculum sanguis, sed quod in se mysterium cor—

(1) Comm. in ep. i. ad Corinth. c. xi. Difficultatem diluit præclare auctor operis: “L'impérissabilité de la foi,” tom. ii. l. v. per totum.

(2) L. de duabus in Christo naturis.

poris ejus sanguinisque contineat. Hinc et ipse Dominus benedictum panem et calicem quem discipulis tradidit, corpus et sanguinem suum vocavit. Quocirca sicut Christi fideles sacramentum corporis et sanguinis ejus accipientes, corpus et sanguinem Christi recte dicuntur accipere, sic et ipse Christus Sacramentum adoptionis filiorum cum suscepisset, potuit recte dici adoptionem filiorum suscepisse.”<sup>1</sup>

*Resp.* Quæ scripsit Facundus ut tria capitula a concilio V. damnata vindicaret, auctoritate carent, utpote schismatis fovendi studio exarata. Mirum non est argumentum deficere quod ex Sacramento ducit ad errorem sustinendum, illumque haud accurate de eo loqui. Cæterum ratione loquendi, potius quam sententia de eucharistia, peccavit. Panis nomine post consecrationem intellexit species panis, quæ proprie corpus Christi non sunt, sed eas veluti velant. Ex eo quod quisque eucharistiam recipiens fiat particeps corporis et sanguinis contendit Christum ob baptismum susceptum, adoptionem filiorum suscepisse dici posse: sed fefellit eum Theodori Mopsuesteni vindicandi studium.

182. *Obj.* 20. Beda in concione de Epiphania, dicit in locum carnis et sanguinis agni, Christum substituisse sacramentum corporis et sanguinis sui, in figura panis et vini: insuper: “dedit in cœna discipulis suis figuram corporis sui sancti et sanguinis.” Hæc omnino evertunt Transubstantiationem. Ita Cosinus.

*Resp.* Hæc suo ingenio excogitavit Cosinus, et perperam tribuit venerabili scriptori, qui perspicuis verbis agnoscit corpus et sanguinem Christi ore fidelium sumi: ait enim: “Lavatur itaque nos a peccatis nostris quotidie in sanguine suo, cum ejusdem beatæ passionis ad altare memoria replicatur, cum panis et vini creatura in sacramentum carnis et sanguinis ejus ineffabili spiritus sanctificatione transfertur; sicque CORPUS ET SANGUIS ILLIUS non infidelium manibus ad perniciem ipsorum funditur et occiditur, sed FIDELIUM ORE SUAM SUMITUR IN SALUTEM. Hujus recte figuram agnus in lege paschalis ostendit, qui semel populum de Ægyptia servitute liberans, in memoriam ejusdem liberationis, per omnes annos immolatione sua populum eundem sanctificare solebat, donec veniret ipse, cui talis hostia testimonium dabat, oblatusque Patri pro nobis in hostiam odoremque suavitatis, mysterium suæ passionis oblato agno in creaturam panis vinique transferret, sacerdos factus in æternum secundum ordinem Melchisedech.”<sup>2</sup>

133. *Obj.* 21. S. Bernardus, qui duodecimo sæculo ineunte floruit, in *Cæna Domini* Sacramentorum externam formam nuci comparat, occultam virtutem nucleo; formam iterum annulo hæreditatis investituræ signo, virtutem ipsi hæreditati. Sicut igitur nemo annulum in hæreditatem converti

(1) L. ix pro defensione iii. Capitulorum Cap. ult.

(2) Beda, Hom. hyemales de Sanctis, in Epiphania Domini. tom. vii. p. 446. edit. Basil. MDLXIII. Pudeat Oxonienses Cosini opus luce iterum donasse, quum liqueat eum infidum esse in testimoniis citandis.

somniat, ita nec panem et vinum in corpus et sanguinem Christi, quorum sunt signa et pignora, converti docuit Bernardus.

*Resp.* Ipse Cosinus dubius videtur utrum concio hæc sit Bernardi, nam quæ deinceps citat indubia pronuntiat. Nobis a stylo suavissimo sancti Abbatis longe videtur distare, quamvis nihil contineat fidei adversum. Auctor, quicumque fuerit, in die qui vocatur *Cæna Domini* disserens, de Sacramentis egit, hoc nomine complectens mysteria redemptionis, et pedum lotionem, et baptismum et eucharistiam. Cœpit igitur dicendo de passione Domini: “Tanta siquidem est vis sacramentorum eorum quæ diebus istis recoluntur, ut possint ipsa quoque lapidea scindere corda, et pectus omne licet ferreum emollire sufficiant.” De his loquens utitur similitudine matris fragentis puero nucem, ut quam in fidei misteriis evolvendis adhibuit industriam repræsentaret. Pergit dicere: “Multa quidem sunt sacramenta;” et quum otium non suppeteret omnibus, de tribus tantum se acturum affirmat, inter quæ ablutionem pedum recenset. Præmittit notionem generalem Sacramenti, quatenus his conveniat, et utitur annuli imagine, ut majora nobis munera dari doceat, quam exterius videntur. Eucharistiæ divinam virtutem, postquam de baptismo egerat, his declarat verbis: “Sed quis poterit tam efferos motus frangere? quis pruritum ulceris hujus ferre queat? Confidite quia et in hoc gratia subvenit, et ut securi sitis, sacramenti Dominici corporis et sanguinis pretiosi investituram habetis. Duo enim illud Sacramentum operatur in nobis: ut videlicet et sensum minuat in minimis, et in gravioribus peccatis tollat omnino consensum. Si quis vestrum non tam sæpe modo, non tam acerbos sentit iracundiæ motus, invidiæ, luxuriæ, aut cæterorum hujusmodi: GRATIAS AGAT CORPORI ET SANGUINI DOMINI, quoniam virtus Sacramenti operatur in eo: et gaudeat quod pessimum ulcus accedat ad sanitatem.” Liquet hæc apprime consona esse catholico dogmati. Quod si quis contendat signum a re a Bernardo distingui, nulli repugnamus, quum externæ quæ oculis obversantur species corporis et sanguinis signa sint et velamina. Cæterum inverecundum est Bernardum Berengariani erroris vindicem exhibere, quum fidei studio claruerit, Pontificibus et toti Ecclesiæ ideo acceptissimus.

184. *Obj.* 22. In concione de purificatione B. Mariæ Virginis, Bernardus dicit “corpus Christi in Sacramento cibum esse animæ, non ventris, ideoque nos eum haud manducare corporaliter, sed quo pacto ipse cibus est, a nobis manducatur.” Item in sermone de S. Martino docet: “quod usque hodie eadem caro nobis, sed spiritualiter utique, non carnaliter exhibeatur.” Ita Cosinus.

*Resp.* Nihil hujusmodi in qualibet Bernardi de purificatione B. Mariæ, concione, diligenter licet legentibus nobis contigit reperire.<sup>1</sup> Quod alio loco dicitur ex contextu facile intelligitur. In illa Apostoli verba: “Jesus

(1) Editio qua utimur operum Bernardi est Colonis Agrippinæ anno MDCXLI.

Christus heri, et hodie : ipse et in sæcula,” disserens, dicit : “ Jam transierat heri, jam illud nostrum illuxerat hodiernum, cum Apostoli loquerentur : ‘ et si cognovimus Christum secundum carnem, sed jam nunc non novimus.’ Videtur tamen et in hoc mane de carnibus Agni nonnihil esse servatum : sed quod residuum est utique jam datur igni : quod videlicet usque hodie eadem caro nobis, sed spiritualiter utique, non carnaliter exhibeatur.” Liquet Christum dici haud carnaliter exhibitum, quia haud in typo agni, prout olim apud Israelitas : sed *spiritualiter*, velis obiectum Sacramenti, quod cum vera et substantiali præsentia non pugnat. De fide Bernardi nullus est dubitandi locus. Ipse narrat, in vita S. Malachiae, clericum in Lesmor, de veritate corporis Christi in eucharistia dubitantem, miraculo adactum ut eam confiteretur. “ Is sciolus in oculis suis, præsumpsit dicere, in eucharistia esse tantummodo Sacramentum, et non rem Sacramenti, id est solam sanctificationem, et non corporis veritatem.” Prædixit ei Malachias : “ Dominus fateri te veritatem faciat vel ex necessitate.” Fugam meditatus est clericus infamiam hæreseos ferre non valens, sed correptus morbo in itinere reductus est in civitatem : “ redit ad cor et ad misericordiam Domini. Eadem hora accitur episcopus, agnoscitur veritas, abjicitur error : confessus reatum absolvitur ; petit viaticum, datur reconciliatio, et uno pene momento perfidia ore abdicatur, et morte diluitur.”<sup>1</sup> Plura a Bernardo ipso patrata miracula occasione oblatis sacrificiis refert coævus auctor Gulielmus Abbas.<sup>2</sup>

185. *Obj.* 23. Concilii Nicæni patres nos a pane et vino ad Christum mentem attollere monent, nosque de elementis pauxillum ideo sumere docent, ne in ipsis hæreamus. Quis autem dixerit pauxillum de corpore Christi sumi ? Ita Cosinus.

*Resp.* Verba a Gelasio concilio tributa hæc sunt : “ Iterum etiam hic in divina mensa ne humiliter intenti simus ad propositum panem et poculum : sed attollentes mentem fide intelligamus situm in sacra illa mensa agnum illum Dei tollentem peccatum mundi, INCRUENTE A SACERDOTIBUS IMMO-LATUM—πίσει νοήσωμεν κείσθαι ἐπὶ τῆς ἱερᾶς ἐκείνης τραπέζης τὸν ἄμνον τοῦ θεοῦ . . . ἀδύτως ὑπὸ τῶν ἱερέων θνύμενον—(hæc verba de incruenta a sacerdotibus immolatione omisit Cosinus, mala, ut liquet, fide,) “ et pretiosum ipsius corpus et sanguinem vere sumentes—καὶ τὸ τίμιον αὐτοῦ σῶμα ἀληθῶς λαμβάνοντας ἡμᾶς—credere hæc esse nostræ resurrectionis symbola. Propter hoc enim neque multum accipimus, sed parum :—διὰ τοῦτο γὰρ οὔτε πολὺ λαμβάνομεν, ἀλλ’ ὀλίγον—ut sciamus quod non satietati, sed sanctimonie sumimus.” Insigne sane est testimonium de Christo vere in Sacramento præsentem, et a sacerdotibus incruente immolato, et a fidelibus vere recepto. Quod autem dicatur pauxillum sumi, ad sacras species obvio sensu refertur, sed corpus pretiosum et sanguis accepta agnoscuntur, etiam sub speciebus

(1) In Vita S. Malachiae c. xxvi.

(2) In Vita S. Bernardi c. ix.

quantumvis parvis. Hæc omnia mire concordant cum Catholica doctrina, et disciplina, et probant tempore Gelasii, quinto scilicet sæculo, eandem fuisse omnibus fidem ; sed concilii Nicæni auctoritatem certam non habent, eruditorum enim iudicio scriptor ille res gestas plurimis auxit sui ingenii figmentis.

186. *Obj.* 24. Paschasius, monachus Corbejensis, qui ante nonum sæculum medium floruit, eucharistia corpus et sanguinem Christi contineri primus inter Latinos excogitavit : de transubstantiatione tamen nihil somnians, quæ nonnisi sæculo undecimo cœpit propugnari, sæculo decimo tertio dogmatis auctoritatem tandem consecuta in concilio Lateranensi. Paschasio autem vix aliqui ante sæculum undecimum assensi sunt, plerisque viris doctis repugnantibus, ex quibus sunt Amalarius, Rabanus, Joannes Erigena, Walafrius Strabo, Ratramus seu Bertramus.

*Resp.* Paschasius non singularem suam sententiam, sed totius orbis fidem se explicare professus est, nec ei id asserenti aliquis contradixisse noscitur : quamvis enim essent aliqui qui de tanto mysterio haud digne sentirent, nemo scripto Paschasio sese opposuit. Sub finem vitæ scribens id ipse testatus est : “ Ideo quamvis quidam de ignorantia errent, nemo tamen est adhuc in aperto, qui hoc ita esse contradicat, quod **TOTUS ORBIS CREDIT ET CONFITETUR.**” . . . “ Videat qui contra hoc venire voluerit, magis quam credere, quid agat contra ipsum Dominum, et contra omnem Ecclesiam.”<sup>1</sup> Quod autem conversionem illam quam vocamus transubstantiationem tradiderit, omnino constat : “ Sensibilis res,” inquit, “ intelligibiliter virtute Dei per verbum Christi **IN CARNEM IPSIUS AC SANGUINEM DIVINITUS TRANSFERTUR.**”<sup>2</sup> “ Omnia quæcumque voluit Dominus, fecit in cœlo et in terra. Et quia voluit licet in figura panis et vini hæc sic esse, **OMNINO NIHIL ALIUD QUAM CARO CHRISTI ET SANGUIS POST CONSECRATIONEM CREDENDA SUNT.**”<sup>3</sup> “ Veram carnem Christi in mysterio sumimus.”<sup>4</sup> “ Vera est Christi caro ; vere creditur esse caro pro mundi vita : in veritate corpus et sanguis fit consecratione mysterii.”<sup>5</sup> Amalarius, quem Cosinus affirmat Paschasio repugnasse, adeo firmiter Christi corpus ore percipi in eucharistia credidit, ut Stercoranistarum erroris incusetur : “ Ita verò sumptum corpus Domini” inquit, “ bona intentione, non est mihi disputandum utrum invisibiliter assumatur in cœlum, an reservetur in corpore nostro usque ad diem sepulturæ, aut exhaletur in auras, aut exeat de corpore.”<sup>6</sup> Rabanus, et Bertramus contra Paschasium non scrip-

(1) Epist. ad Frudegard.

(2) De corp. et sang. c. ii.

(3) In Præf.

(4) De corp. et sang. c. i. et vi.

(5) Ibidem.

(6) In litteris ejus in vii. vol. Spicilegii, cit. in opere La perpétuité de la foi t. i. l. viii. ch. xi.

**serunt, nec veritatem Christi corporis et sanguinis in eucharistia negarunt, sed locutiones quorundam, qui dicebant “ quod nulla sub figura, nulla sub obvelatione fiat,” improbarunt, nam res agitur in mysterio sub specierum velo. Joannis Erigenæ placita nil faciunt contra manifestum totius Ecclesiæ consensum. Walafridus Strabo, testante Paschasio,<sup>1</sup> mysteria redemptionis nostræ vere esse corpus et sanguinem Domini tradidit. Quot absurdis scateat hypothesis de novo dogmate a Paschasio excogitato, et sensim sine sensu obtinente, feliciter exponit auctor Operis de fide perpetua Ecclesiæ Catholicæ de Eucharistiæ Sacramento.<sup>2</sup>**

(1) Pasch. de corp. et sang. c. i. et iv. Vide totam rem dilucide tractatam in opere : La perpétuité loco cit.

(2) 1. “ Il faut supposer, que la doctrine de la presence réelle étant inconnue à tous les Chrétiens du monde ait été proposée par un jeune Religieux, dans quatre ou cinq chapitres d'un livre, comme l'unique doctrine de toute l'Eglise. Cela est fort difficile.

2. Il faut supposer, qu'après cette entreprise insensée, personne n'ait eu la charité trente ans durant de l'avertir qu'il était fou. Cela est encore tres-peu probable.

3. Il faut supposer, que cette nouvelle doctrine si contraire à la raison, aux sens, et au consentement public, n'ait jamais été condamnée par aucun jugement ecclésiastique, et qu'elle n'ait pas même été deferée à aucun tribunal.

4. Il faut supposer, que tous les fidèles ayant passé de l'état de ne pas croire la presence réelle à l'état de la croire, aucun n'ait parlé de son changement, n'ait déploré le temps de son ignorance, et n'ait temoigné de la joie d'avoir appris un secret si important.

5. Il faut supposer, que de dix millions de personnes qui auraient du s'employer à persuader aux autres la presence réelle, nul ne s'est mis en peine de faire aucun livre pour l'établir.

6. Il faut supposer que dix millions de predicateurs de la presence réelle auraient tous resolu d'un commun accord de ne rien écrire, ni de leurs progrès, ni de la resistance qu'on leur faisait ; de ne plaindre point de la dureté des peuples, et de ne se rejouir point des benedictions que Dieu repandait sur leurs travaux.

7. Il faut supposer, que de cent millions d'hommes à qui on aurait du proposer cette doctrine durant le dixième siecle, nul ne se serait mis en peine de la combattre par écrit.

8. Il faut supposer, que l'esprit de cent millions d'hommes se serait trouvé tourné à embrasser durant un siecle une opinion contraire à leur raison, à leur sens, à leur coutume, à leurs préjugés, à la foi dans laquelle ils avaient été nourris.

9. Il faut supposer, qu'un très-grand nombre d'expressions très communes, très-populaires, et qui étaient dans la bouche de tous les Chrétiens du monde auraient changé de sens par toute la terre, sans que personne s'en soit apperçu, et qu'on aurait commencé d'y substituer une idée toute nouvelle, en entendant le vrai corps de Jesus Christ, sous les mêmes termes par lesquels on ne comprenait autrefois que sa figure.

10. Il faut supposer, que toutes les passions qui portent à contredire ceux qui nous veulent montrer que nous avons été dans l'ignorance et dans l'erreur pendant une partie de notre vie, se seraient éteintes, et n'auraient point fait leur effet ordinaire dans ce siecle.

11. Il faut supposer, que les haines, et les animosités, qui divisent les sociétés d'Orient de l'Eglise Romaine, n'auraient empêché aucunes d'entr'elles de recevoir l'opinion de la présence réelle, qui aurait été inventée dans l'Eglise Latine au neuvième siecle.

12. Il faut supposer, que ces sociétés ne se seraient montrées dociles qu'en un seul point ; que leur passions n'auraient cessé d'agir que dans un seul point ; et qu'ayant



187. *Obj.* 25. In fidei formula cui Berengarius subscripsit anno 1059, in concilio Romano centum tredecim episcoporum, præside Nicolao II. dicitur verum corpus et sanguinem Christi “sensualiter non solum sacramento, sed in veritate manibus sacerdotum tractari, frangi, et fidelium dentibus atteri.”<sup>1</sup> Id autem nemo jam tenet.

*Resp.* “Intelligentia dictorum ex causis est sumenda dicendi.” Berengarius, ut suam hæresim celaret, corpus et sanguinem adesse in altari post consecrationem aliquando profitebatur, intelligens ea sacramento adesse, signo scilicet, haud rei veritate. Ut igitur vera et substantialis agnosceretur præsentia, coactus est fateri illud vere manibus sacerdotum tractari, frangi, et fidelium dentibus atteri. Hæc tamen, instar plurium quæ ex Chrysostomo laudavimus, intelliguntur de corpore Christi sub speciebus sacramentalibus. Nihil igitur in ea formula affirmatur quod Catholicæ fidei non sit consonum.

188. *Obj.* 26. Transubstantiatio nonnisi a concilio Lateranensi IV. tamquam dogma proposita et definita est : nullum autem concilium valet novum suo arbitrio cudere dogma.

*Resp.* Dogma quod voce illa exprimitur ab initio Ecclesiæ est traditum, uti ex tot quæ laudavimus testimoniis liquet : vox ipsa ante Concilium Lateranense est usurpata, centum saltem annis a Stephano Augustodunensi : “Oramus ut cibus hominum fiat cibus Angelorum, scilicet ut oblatio panis et vini transubstantietur in corpus et sanguinem Jesu Christi.”<sup>2</sup> Sic etiam plures alii eam adhibuerant. Cæterum licuit certe concilio vocem novam adhibere ad vetus enuntiandum dogma, postquam hæretici, vocum ambiguitate usi, dogma impugnarunt ; quod et fecit Nicænum concilium “consubstantialem” Christum appellando. “An novitate offenderis,” inquit S. Athanasius, “an etiam rei ipsius veritatem, quæ hoc est sortita vocabulum, refugis ? Res enim antiqua novum vocabulum accepit, non vocabulo rei veritas accessit. . . . Etiam si voces ita in Scriptura non extent, sententia tamen quam continent, vere in Scripturis habetur.”<sup>3</sup>

189. *Obj.* 27. Intima illa relatio panis et vini ad corpus et sanguinem Christi, quorum consecratione fiunt symbola, causa fuit cur ea fideles magna cum veneratione contemplarentur : unde per sæcula tenebricosa opinio Paschasii sensim sine sensu obtinuit, donec tandem nefas habitum sit de ea dubitare.

*Resp.* Relatio illa facile effugisset plerorumque mentem, nisi a pastoribus Ecclesiæ fuisset sæpissime inculcata. Facilius idcirco oblivioni fuisset

toutes pris de l'Eglise Romaine la foi de la transubstantiation, elles n'auraient voulu la suivre dans aucun des autres pour lesquels elles se sont divisées d'elle.” La perpétuité de la foi t. i. l. ix. c. xi.

(1) Apud Baronium annalium t. xi. ad annum 1059.

(2) De Sacr. Alt. c. iii.

(3) De decretis Synodi Nic.

data, quam in arcanum adeo stupendum aucta, vel præconum exaggeratis locutionibus, vel populorum fide. Sensim sine sensu non potuit nova sententia obtinere, quæ et sensibus humanis et rationi videbatur aperte adversari: nam nulla est societatis humanæ conditio, nulla ignorantia adeo crassa, ut non sentiatur quantum mysterium eucharistiæ rationem superet, sensuumque relationi repugnet. Maximum foret in ordine morali miraculum, contra omnes leges quibus reguntur mentes, si universi ubique Ecclesiæ ministri, et qui ab Ecclesia divulsi sunt ab antiquis sæculis sectarum præcones per Orientis regiones, a fide de symbolis et signis ad veritatem præsentiae Christi corporis docendam, sensim sine sensu transierint, et fideles et sectarii eos secuti sint duces in arcano colendo, quin mutationis doctrinæ et cultus ullum superesset vestigium, adeo ut qui sæculo undecimo impugnaverit realem Christi præsentiam, veluti novator et hæreticus, ab avita fide desciscens, a toto orbe christiano habitus sit.

190. *Obj.* 28. Transubstantiatio, utpote per se absurda et impossibilis, omnino rejicienda est, nec enim divinum dogma esse potest quod rationi aperte adversatur.

*Resp.* Quando de dogmatis revelatione perspicuis constat documentis, impium est rationem appellare judicem: constat autem omnino de transubstantiatione ex publica totius Ecclesiæ doctrina, assentientibus omnibus Orientis sectis etiam antiquissimis, et suffragantibus plurimis et lucidissimis Scripturæ testimoniis, et monumentis præclaris traditionis divinæ. Nullum profecto mysterium majoribus splendet revelationis indiciis. Quod si de ejus possibilitate agendum sit, et juxta rationis dictamina, prout ea nobis visa fuerint, judicandum de mysterio, actum est de revelatione. Sapienter igitur hanc objectionem deseruerunt Oxonienses, post dogmatis novissimum adversarium insignem.<sup>1</sup> Mystera adoranda sunt, haud ratione vestiganda, quod fatetur Cosinus, placiti sui de reali perceptione Christi in eucharistia sollicitus.<sup>2</sup>

(1) Juvat in rem nostram ipsius recitare verba: "The doctrine of Transubstantiation, like the doctrine of the Trinity, is a question, not of abstract reasoning, but of pure evidence. We believe the revelation of God to be essential and unerring truth. Our business therefore, most plainly is, not to discuss the abstract absurdity, and the imagined contradictoriness of Transubstantiation, but to inquire according to the best means which we possess, whether it be indeed a doctrine of Holy Scripture. If sufficient evidence shall determine such to be the case, we may be sure that the doctrine is neither absurd nor contradictory: if the evidence be insufficient, we require not the aid of irrelevant abstract reasoning, for we then reject the doctrine because we have no sufficient evidence of its truth. Receiving the Scripture as the infallible word of God, and prepared with entire prostration of mind to admit his declarations, I shall ever contend that the doctrine of Transubstantiation, like the doctrine of the Trinity, is a question of pure evidence." Faber, *Difficulties of Romanism*, c. iv.

(2) "If it seems impossible that the flesh of CHRIST should descend, and come to be our food, through so great a distance; we must remember how much the power of the



191. *Obj.* 29. Repugnat ut accidentia maneant, substantia in aliam conversa, accidentia enim substantiæ sunt modi : quum ergo omnibus fatentibus accidentia panis et vini maneant, ipsa substantia adsit necesse est.

*Resp.* Accidentia, sensu philosophico, modi sunt substantiæ, sed species externæ aliquando sic nuncupantur. Equidem non repugnat ut speciei externæ rei veritas non respondeat, angelos enim sub humana forma latuisse novimus, et plurima visioni prophetarum exhibita, quæ rerum imagines et typi potius quam ipsæ res erant. Quis dicet repugnare, ut forma et color panis oculis exhibeantur, quin adsit vere panis? Quis asseret Deum non posse efficere ut gustus vini sentiatur, quin vinum potetur? Philosophicæ disceptationis de accidentibus haud solliciti, affirmamus fidenter formam et colorem manere absque substantia.

192. *Obj.* 30. Si sensibus referentibus panis vinique etiam post consecrationem præsentiam, credere non liceat, de omnibus rebus externis erit dubitandum : quum enim figura, color, gustus, et cætera omnia panis et vini adjuncta maneant, imo species ipsæ corrumpantur, et si nimio potu quis indulgeat ebrietas sequatur, aut si venenum pani admixtum fuerit, moriatur manducans, certitudo de substantia panis et vini præsentem maxima est ; vel nihil unquam fidendum est sensuum relationi.

*Resp.* Sensuum relatio minime infirmatur, etsi credamus mentis nostræ iudicium non debere eam sequi, Christo dicente corpus suum et sanguinem esse quæ nobis dantur. Profecto penes Deum est, ad suas perfectiones ostendendas, consuetum rerum ordinem nonnunquam mutare, præsertim quum nobis alia ratione rerum veritatis certam præbeat notitiam. Possumus quidem de rebus externis juxta sensum relationem judicare, quotiescumque non constat Deum suam interposuisse potentiam. Sapientissime statuit Christus nullatenus variandas externas Sacramenti species, sed omnia exterius eadem videri, eosdemque sequi effectus, ne fidei deesset meritum, vel temeritati ac infidelitati pateret periculum divinæ veritatis faciendi ratio. Manent igitur figura, color, et gustus, externæ corruptionis species videntur, effectusque iidem sequuntur specierum receptionem, qui ex ipsa panis vinique substantia oriantur. Hæc omnia tamen panem et vinum manere non probant, Christo dicente : *hoc est corpus meum : hic est sanguis meus*. Quod de veneno admixto dicitur, vi caret, nec enim Christus venenum, sed panem in suum corpus mutavit. Hanc nostram responsionem Augustini verbis placet confirmare. “Sed ne ipsi quidem oculi fallunt, non enim renuntiare possunt animo, nisi affectionem suam. Quod si non solum ipsi, sed etiam omnes corporis sensus ita renuntiant, ut afficiuntur, quid ab eis amplius exigere debeamus ignoro. . . . Si quis

Holy Spirit exceeds our sense and our apprehension, and how absurd it would be to undertake to measure His immensity by our weakness and narrow capacity; and so make our faith to conceive and believe what our reason cannot comprehend.” *The History of Popish Transubstantiation*, by John Cosin, Bishop of Durham, ch. iii.

remum frangi in aqua opinatur, et cum inde aufertur integrari, non malum habent internuntium, sed malus est iudex. . . . Quare oculus recte, ad hoc enim factus est ut tantum videat; sed animus perverse cui ad contemplandam summam pulchritudinem mens, non oculus factus est. Ille autem vult mentem convertere ad corpora, oculos ad Deum. Quærit enim intelligere carnalia, et videre spiritalia, quod fieri non potest.”<sup>1</sup> Angelicæ et Propheticæ visiones possunt etiam responsionem nostram illustrare.

193. *Obj.* 31. Transubstantiatio plurima includit miracula, quæ quotidie, imo singulis fere momentis, totum per orbem, a sacerdotibus peraguntur, quin aliquod prodeat eorum indicium: hæc miraculorum frequentia divinæ œconomix repugnat, quæ non nisi perraro naturæ legibus derogari sinit, et miraculorum potestatem nulli hominum ordini alligavit, sed per sanctos plerumque viros, ex impulsione quadam divina ea patrari voluit, et quidem in fidei confirmationem, manifestis divinæ potentiæ indiciis, potius quam ad fidem exercendam, occulta quadam operatione.

*Resp.* Plurima quidem miracula divinæ potentiæ et bonitatis in mysterio eucharistico agnoscere oportet, qua de causa Chrysostomus et alii patres ea verbis amplissimis celebrarunt: cæterum alterius sunt generis ab iis quæ ordinem naturæ interrumpunt, cum quibus proinde non sunt conferenda. Plurima singulis momentis contingunt gratiæ miracula, quibus scilicet Deus mentes illustrat superno lumine, cordaque dilectione cœlesti afficit, quæ non ideo deneganda sunt, quia a miraculis ordinis physici differunt. Equidem constat Christum hoc instituisse Sacramentum, illud conficiendi potestatem hominum certo ordini, sacerdotibus scilicet, tradidisse, illud perpetuò celebrandum voluisse, et ipsum corpus suum et sanguinem adesse declarasse. Quæ inde sequuntur non possunt allegari ut divinis ejus consiliis repugnetur; penes ipsum enim est qua voluerit ratione sua perficere opera. Sane conceptio virginea ab aliis miraculis discrepabat, nec enim quomodo contigerit poterat sensuum testimonio constare; nec ad fidem confirmandam inserviebat, sed in ea colenda fides exercetur.

194. *Obj.* 32. Transubstantiatio inutilis prorsus est, Christus enim se suis dare potest, absque panis et vini in corpus et sanguinem suum conversione.

*Resp.* Nostrum non est Christo præscribere leges, sed consilia ejus adorare, et beneficia nobis oblata grato amplecti animo. Si corpori anima conjuncta non fuisset, divina munera nobis donasset absque specie aliqua externa, uti monet Chrysostomus; sed nostræ se misericorditer attemperavit conditioni, sacramentum instituendo, quo eum sub externis illis speciebus accipimus, certi hac ratione facti cœlestis doni quodamur. Agnoscamus et adoremus tantam Dei et Salvatoris nostri munificentiam.

(1) L. de vera Rel. c. xxxiii.

## CAPUT IX.

## DE LITURGIIS.

194. De Liturgiis aliquid diximus, sed quum gravissimum constituent argumentum, de iis specialius agendum duximus. Equidem fieri non potuit ut cultus publicus doctrinæ prædicatæ et apud omnes receptæ non responderet. Meritò idcirco scripsit Cælestinus I. ad Galliarum episcopos, anno 431: "Obsecrationum quoque sacerdotalium Sacramenta respiciamus, quæ ab Apostolis tradita in toto mundo atque in omni catholica Ecclesia uniformiter celebrantur, ut legem credendi lex statuat supplicandi."

195. Λειτουργία vox est Græca quæ *munus publicum* significat, sacrum præsertim ministerium populi fidelis nomine a sacerdote peractum. De ministerio sacerdotii veteris apud Lucam usurpatur in Evangelio,<sup>1</sup> de sacro novi Testamenti munere in Actis Apostolorum: λειτουργούντων αὐτῶν τῷ κυρίῳ.<sup>2</sup> Illud a Vulgato interprete redditum est: "Ministrantibus illis Domino;" ab Erasmo; "cum illi sacrificarent Domino;" quam vim voci inesse episcopus Anglicanus Buckeridge apud Oxonienses haud diffitetur.<sup>3</sup> Græci vocem retinuerunt, eaque designant ritum sacrificium celebrandi, quem Latini Missam vocant. Libros tum Græcos tum Latinos, vel alia quavis lingua conscriptos qui ritum celebrandi sacrificium novæ legis continent, hic intelligimus Liturgiarum nomine.

196. De Liturgiarum antiquitate, quarum plures Apostolorum Petri, Jacobi, et Evangelistæ Marci præseferunt nomina, inter eruditos homines disceptatum est: sed eorum nobis probatur sententia qui agnoscunt earum substantiam ad Apostolos referendam esse auctores,<sup>4</sup> quatenus quæ præ-

(1) Luc. i. 23.

(2) Act. xiii. 2.

(3) "That which we read *ministering*, is translated by Erasmus to be *sacrificing*, *sacrificantibus illis*, and *sacrificing* did surely imply the representation of CHRIST'S Sacrifice; and the word is λειτουργούντων, 'offering of divine worship:' and so there was then a Liturgy, and all Liturgies had this Sacrament in them." Bishop Buckeridge apud Oxonienses, vol. iv. No. 81.

(4) "All the ancient liturgies agree in this Form of Prayer almost in the same words, but fully and exactly in the same sense, order, and method; which whosoever attentively considers, must be convinced that this order of prayer was delivered to the several churches in the very first plantation and settlement of them." Bishop Bull xiii. Sermo apud Oxonienses, vol. ii. Tract No. 64.

cipua sunt præscripserunt viva voce, et sacris ministris demandarunt, ad eorum successores transmittenda. Eam primis ipsis sæculis scripto traditam verosimile est, nam de prece altera schismaticorum et hæreticorum ad altare, illicitis vocibus constante Cyprianus loquitur; quapropter jam precem solemnem certis constantem verbis adhiberi a Catholicis, datur intelligere. Eam verò sola ministrorum memoria nixam ut servaretur, vix credet qui Liturgias vetustissimas perlegerit, quæ prolixæ nimis sunt ut facile retineantur. Harum mira in rebus præcipuis concordia, communem e quo fluxerunt fontem denotat, et quæ ex publica oratione a Cypriano aliisque citantur, iis inveniuntur consona, ita ut tota Liturgia inde colligi quodammodo possit. Cæterum verosimile est Liturgias per tria priora sæcula manibus sacerdotum vel aliorum sacrorum ministrorum tantum teri consuevisse, nec fuisse vulgatas.

197. Præcipuæ Liturgiæ Orientales, Græco idiomate, exaratæ sunt. Liturgia S. Jacobi ea dicitur quæ Hierosolymis et apud Ecclesias alias orientales in usu erat. Exstitit certe ante Cyrilli Hierosolymitani tempora, qui quarto sæculo medio floruit; ea enim usus est, uti liquet ex catechesi ejus quinta cum Liturgia quæ superest collata. Eam in compendium redegerunt, testante S. Proclo, S. Basilus M. et S. Joannes Chrysostomus. Liturgia vetustissima quæ in libro octavo Constitutionum Apostolicarum legitur, ante Nicænum concilium, uti eruditi censent, conscripta, præsupponit Liturgiam Jacobi.

198. Liturgia S. Marci, in Alexandrina Ecclesia, adhiberi consuevit ab antiquissima ætate; Eutychiani enim, qui Jacobitæ dicuntur, ab anno 451, quo Chalcedonense habitum est concilium, ab Ecclesia Catholica divulsi, ea adhuc utuntur.

199. Liturgia Clementis Romani ea dicitur quæ in libro Constitutionum Apostolicarum habetur.

200. Liturgia Dionysii Areopagitæ nomine insignita, in libro tertio de Hierarchia Ecclesiastica occurrit. Scriptum hoc opus nonnullis eruditis videtur ante medium quintum sæculum.

201. Liturgia a Basilio Magno in novum ordinem disposita noscitur, sicut et a Chrysostomo, quarum tamen codices aliquas habent varietates: sed utraque Liturgia a mille trecentis et amplius annis a Græcis adhibita est. Nestoriani, ab Ecclesia ab anno 431 divulsi, Chrysostomi Liturgiam retinent.

203. Inter Liturgias Occidentales primum occupat locum Romana, quæ S. Petri dicitur, utpote juxta ejus instituta composita. Codex vetustissimus ille est qui dicitur: *codex Sacramentorum vetus Romanæ Ecclesiæ, a S. Leone Papa I. confectus*. Superat cæteros omnes codices liturgicos, sive Orientales, sive Occidentales, ætate et integritate, nihilque continet quod quinto saltem sæculo sit posterius. Alter codex est Gelasianus, Gelasio primo auctore, dictus idcirco Gelasii Sacramentarium. In tres

distribuitur libros, quorum primus agit *de mysteriis*, seu *de anni circulo*, per quem celebrantur, secundus *de Natalitiis Sanctorum*, tertius est *pro Dominicis diebus* post Pentecosten. Tertius codex est liber Sacramentorum Gregorii M, qui apud plerasque Occidentis Ecclesias usurpatus, plurimas varietates passus est.

203. Liturgia Ambrosiana dicitur quæ in Ecclesia Mediolanensi usurpata a remota valde antiquitate a S. Ambrosio recognita est, et in ordinem redacta.

204. Liturgia Gallicana dicitur quæ ante Caroli Magni tempora adhibita est in Galliis, sed cessit, ipso agente, Romanæ. Habentur plures ejus codices, quorum aliqui ad octavum sæculum referuntur, vel ad septimum.

205. Liturgia Mozarabica, quæ et Hispanica dicitur, ea est qua utebantur Hispani, Arabibus dominantibus, solebant enim hi Mostarabes vel Mozarabes, Hispanos vocare, veluti *extra Arabes*, uti vox illa explicatur. Dicta est etiam *Gotho-hispanica*, et *Gotho-gallicana*, quia Gothis dominantibus antea Hispaniis et Galliæ meridionali, usurpari consuevit: magnæ proinde est antiquitatis.

Hac brevi Liturgiarum notitia præmissa, quam ex libro de antiquis Liturgiis a Theobaldo Lienhart ante paucos annos edito,<sup>1</sup> compendiodamus, argumentum ipsum de re eucharistica, quod jam indicavimus, fusius exponendum est.

#### PROPOSITIO.

*Vera, realis, et substantialis præsentia corporis et sanguinis Domini nostri Jesu Christi in Sacramento eucharistiæ, et transubstantiationis dogma invicte demonstrantur ex liturgiis omnibus antiquissimis, toto orbe christiano usurpatis.*

206. *Probatur.* Liturgia S. Jacobi, juxta codicem in Bibliotheca veterum Patrum, invocationem continet Spiritus Sancti: “ Ut superveniens sancta et bona et gloriosa sua præsentia sanctificet et EFFICIAT HUNC PANEM CORPUS SANCTUM CHRISTI TUI. Amen. ET CALICEM HUNC PRETIOSUM SANGUINEM CHRISTI TUI. Amen.”<sup>2</sup> Alter codex quem exhibet Renaudotius habet: “ ut adveniens efficiat panem istum corpus cæleste, corpus animabus et corporibus salutem præstans, corpus Domini Dei et Salvatoris nostri Jesu Christi, in remissionem peccatorum, et vitam æternam accipientibus illud.” Populus dicit: “ Amen.” “ Et mistum quod est in hoc calice, efficiat sanguinem Testamenti novi, sanguinem salutarem, sanguinem vivificum, sanguinem cælestem, sanguinem animabus et corporibus salutem præstantem, sanguinem Domini nostri Jesu Christi, in remis-

(1) Argentorati, 1829.

(2) Bibliothecæ Patrum t. ii. edit. Lugdun.

sionem peccatorum, et vitam æternam suscipientibus illum." Populus dicit: "Amen."<sup>1</sup>

207. Ille quem prius laudavimus codex post dominicam orationem, presbyterum exhibet precantem: "ut efficiamur digni qui socii et participes simus sanctorum tuorum mysteriorum." Alter codex habet; "ut digni sumus communicandi corpori et sanguini Christi Salvatoris nostri."

208. Ad fractionem hostiæ dicit sacerdos, juxta priorem codicem: "Unio sanctissimi corporis et pretiosi sanguinis Domini, et Dei, et Salvatoris nostri Jesu Christi." Juxta alterum: "Inspergitur sanguis Domini nostri corpori ejus in nomine Patris et Filii et Spiritus Sancti."

209. Ille codex *circa communionem* hæc habet: "Gustate et videte, quod benignus est Dominus, qui in partes distributus, ac non divisus, et fidelibus impertitus, nec consumptus est, in remissionem peccatorum et vitam æternam." Precatur insuper sacerdos: "ut citra condemnationem particeps fiam sancti corporis et pretiosi sanguinis in remissionem peccatorum et vitam æternam."

210. Codex Renaudotii habet: "Sacerdos accipit corpus Christi dicens: 'Præsta, Domine, ut sanctificentur corpora nostra per corpus sanctum tuum, et purificentur animæ nostræ per sanguinem tuum propitiatorium.' Dat Eucharistiam dicens: 'Corpus et sanguis Domini nostri Jesu Christi datur tibi in veniam delictorum, et remissionem peccatorum in utroque sæculo.'"

211. Cyrillus Hierosolymitanus plane usus est hac Liturgia, ritum autem exponens dicit invocari Spiritum Sanctum, "ut faciat panem corpus Christi, vinum sanguinem Christi."—*ἵνα ποιήσῃ τὸν μὲν ἄρτον σῶμα Χριστοῦ, τὸν δὲ οἶνον αἷμα Χριστοῦ.* Refert sacerdotem porrigentem panem eucharisticum dicere: *Corpus Christi*: cui respondebatur, *Amen*: post communionem corporis Christi propinare sanguinis poculum, quem pronus adorabat qui illum bibebat.<sup>2</sup>

212. Liturgia S. Marci hanc habet invocationem Spiritus Sancti: "Emitte præterea super nos, et super panes et calices istos Spiritum Sanctum tuum, ut eos sanctificet et conservet, tamquam Deus omnipotens (*elata voce*) et 'FACIAT PANEM QUIDEM CORPUS.' Populus dicit: Amen. Sacerdos *elata voce*: CALICEM AUTEM SANGUINEM novi Testamenti ipsius Domini et Dei, et Servatoris et summi Regis nostri Jesus Christi." Post plura orat: "ut digne participemus iis quæ nobis proposita sunt bonis immaculati corporis et pretiosi sanguinis unigeniti Filii tui." Cum distribuit Clero dicit: "Corpus sanctum." Ad calicem: "Sanguis pretiosus Domini et Dei, et Salvatoris nostri." Post communionem tres orationes dicuntur; in prima dicitur "communio sancti corporis et pretiosi sangui-

(1) Apud Renaudot, Tom. II. Liturgiæ Orientis.

(2) Catechesi xxiii. mystag. v. n vii.

nis ;” in secunda, “ sumptio intemerati corporis tui et pretiosi sanguinis tui ;” in tertia, “ participatio sanctissimi corporis et pretiosi sanguinis unigeniti Filii tui.”

213. Liturgia quæ inter constitutiones Apostolicas reperitur, hæc habet in invocatione : “ Supra hoc SACRIFICIUM mittas sanctum tuum Spiritum, testem passionum Domini Jesu ; ut exhibeat panem hunc corpus Christi tui—ὅπως ἀποφέρῃ τοῦ ἁγίου τέτοιο σώμα τε Χριστοῦ σου—et calicem hunc sanguinem Christi tui—καὶ τὸ ποτήριον τέτοιο αἵμα τε Χριστοῦ σου.” Episcopus post plura populum alloquitur : “ Sancta Sanctis—τὰ ἅγια τοῖς ἁγίοις . . . Episcopus quidem tribuat oblatam, dicens : CORPUS CHRISTI—σῶμα Χριστοῦ, et qui recipit, respondeat : Amen ; Diaconus vero teneat calicem, ac tradendo dicat : SANGUIS CHRISTI, CALIX VITÆ—αἷμα Χριστοῦ, ποτήριον ζωῆς ; et qui bibit, *Amen*. respondeat.”<sup>1</sup> *Descriptio Ecclesiæ, et Cleri, et quid facere debeat unusquisque Clericus vel Laicus in Synaxi congregatus*, alibi in Constitutionibus datur, cujus in extrema parte hæc habentur : “ Post illa sacrificium fiat, stante omni populo, et tacite precante : cumque oblatum fuerit, unusquisque ordo seorsum dominicum corpus ac pretiosum sanguinem sumat,—μεταλαμβάνετε ἑκάστη τάξις κατ’ ἐαυτὴν τὸ κυριακὸν σῶμα τὸ καὶ τὸ τιμὴν αἵματος—accedentes ordinate, ac cum reverentia et timore, utpote ad corpus regis.”<sup>2</sup> Oratio post communionem incipit : “ Percepto pretioso corpore et pretioso sanguine Christi :—Μεταλαβόντες τε τιμὴν σῶματος, καὶ τὸν τιμίου αἵματος τοῦ Χριστοῦ—agamus gratias ei.”

214. Liturgia S. Basilii tres præcipue varietates codicum habet, *usualem* scilicet, *Copticam*, et *Alexandrinam*. In usuali precatur sacerdos, post explicatum corporale, linteam scilicet quo hostia est excipienda : “ Fac me virtute sancti tui Spiritus idoneum, ut sacerdotii gratia indutus huic sanctæ mensæ assistam, et sanctum tuum et immaculatum corpus tuum et sanguinem pretiosum consecrem . . . tu enim es qui offers, et offerris—σὺ γὰρ εἶ ὁ προσφέρων καὶ προσφερομενός.” In *Coptica* sic precatur sacerdos : “ ostende faciem tuam super hunc panem et super hunc calicem, quos super mensam hanc tuam sacerdotalem posuimus : benedic eos, sanctifica eos et consecra eos. TRANSFER EOS, ITA UT PANIS QUIDEM HIC FIAT CORPUS TUUM SANCTUM, ET HOC MISTUM IN HOC CALICE, SANGUIS TUUS PRETIOSUS.” In singulis exemplaribus liturgiæ hujus, quod fecit Christus eucharistiam instituendo recitatur magna cum solemnitate, et fit invocatio Spiritus Sancti. In *usuali* : “ proponentes antitypa<sup>3</sup> sancti corporis et sanguinis Christi tui, te rogamus et te obsecramus, Sancte Sanctorum per tuæ bonitatis placitum, ut Spiritus

(1) Vide Constit. Apost. l. viii. c. 5-16.

(2) Ibidem l. ii. c. 57.

(3) Vox hæc typo nonnumquam respondet, aliquando typi impletioni. Panis et vinum antitypa sunt corporis et sanguinis Christi, hæc enim oblatione Melchisedeciana præsignata sunt : vocari etiam possunt hoc nomine species quibus velantur corpus et sanguis.



Sanctus tuus ad nos veniat, et ad hæc proposita dona et ea benedicat, et sanctificet, et efficiat . . panem quidem pretiosum corpus Domini et Dei et salvatoris nostri Jesu Christi—*αὐτὸ τὸ τίμιον σῶμα τοῦ κυρίου, καὶ θεοῦ, καὶ σωτῆρος ἡμῶν Ἰησοῦ Χριστοῦ*—hunc verò calicem pretiosum sanguinem Domini et Dei et Salvatoris nostri Jesu Christi . . . qui pro mundi vita effusus est . . . immutans—*μεταβαλὼν*—Spiritu Sancto tuo.” In *Coptica* invocat Spiritum Sanctum ut: “panem quidem hunc (*ter panem cruce signabit*) faciat corpus sanctum ipsius Domini Dei et Salvatoris nostri Jesu Christi, quod datur in remissionem peccatorum et vitam æternam ei qui illud percipiet.” *Populus*: Amen. *Sacerdos ter cruce calicem signabit et dicet*: “Et hunc calicem sanguinem pretiosum novi Testamenti tui, (*tunc corpus et sanguinem pretiosum designabit*) ipsius Domini Dei et Salvatoris nostri Jesu Christi, qui datur in remissionem peccatorum, et vitam æternam illis qui illum percipient.” *Alexandrina* continet etiam invocationem similem, eisdem fere verbis, adeo ut ea repetere supervacaneum.

215. Precatur deinceps: “fac ut nemo nostrum ad iudicium vel condemnationem sit particeps sancti corporis et sanguinis Christi tui.” Ita in *usuali* habetur. *Ad communionem* orat Christum: “qui supra cum Patre sedes, et hic nobiscum invisibiliter versaris,” dignare potenti tua manu impertiri nobis illibatum corpus tuum, et pretiosum sanguinem, et per nos toti populo.” In *Coptica* post fractionem hostiæ tres illius partes dexteræ manui imponit et dicit: “CORPUS SANCTUM ET SANGUIS PRETIOSUS, PURUS, VERUS, JESU CHRISTI FILII DEI NOSTRI. Amen. CORPUS ET SANGUIS EMMANUELIS DEI NOSTRI, HOC EST IN REI VERITATE. Amen. Credo, credo, credo et confiteor usque ad extremum vitæ spiritum hoc esse corpus vivificum Filii tui . . . Jesu Christi.” In *Alexandrina* Sacerdos elevans *Σπουδαίον* ait; “Sancta Sanctis . . . Corpus sanctum et sanguis pretiosus, verus Jesu Christi Filii Dei. Amen. Corpus sanctum et sanguis pretiosus, verus Jesu Christi Filii Dei. Amen. Corpus et sanguis Emmanuelis Dei nostri, hoc est vere.” *Populus*: “Amen. Credo, credo, credo et confiteor usque ad ultimum spiritum, quod hæc ipsa est caro vivifica, quam accepisti, Christus Deus noster, ex sancta Domina nostra, Deipara, semper Virgine Maria . . . tradiditque pro nobis omnibus ipsam carnem super lignum crucis sanctæ.”

216. Liturgia S. Chrysostomi Græci utuntur plerumque, utpote breviori. Basilii Liturgiam Dominicis per magnam Quadragesimam, Paschalis tempore, et nonnullis aliis diebus adhibentes, prout testatus est Hieremias patriarcha Constantinopolitanus anno 1576 acatholicis Germaniæ respondens. In ea Sacerdos cruce ter signat sancta, et dicit secreto: “FAC QUIDEM PANEM HUNC, PRETIOSUM CORPUS CHRISTI TUI.” *Diaconus*. Amen. Et iterum *Diaconus*: “Benedic, Domine, sanctum calicem. *Sacerdos autem benedicens, ait*: “QUOD AUTEM EST IN HOC CALICE, PRETIOSUM SANGUINEM CHRISTI TUI.” *Diaconus*. Amen. Et rursus *Diaconus utraque sancta stola demonstrans, ait*: “Benedic Domine.” At *Sacerdos utraque*



*sancta manu benedicens ait: "Immutans—Μεταβαλλων—Spiritu tuo Sancto." Diaconus. Amen, Amen, Amen." Ad Communionem, Sacerdos tenens sanctum panem porrigit Diacono, et exosculans diaconus porrigentem sibi manum, accipit sanctum panem, dicens: "Impertire mihi, Domine, pretiosum et sanctum corpus Domini et Dei et Salvatoris nostri Jesu Christi." Sacerdos autem dicit: "Impertior tibi pretiosum et sanctum et illibatum corpus Domini et Dei et Salvatoris nostri Jesu Christi, in remissionem peccatorum, in vitam æternam." Et secedit retro sanctam mensam inclinans caput, et orat eodem modo quo Sacerdos. Similiter autem Sacerdos accipit sanctum panem, inclinans caput ante sanctam mensam et precatur hoc modo: "Credo, Domine, et confiteor, quod tu es Christus Filius Dei vivi." . . . "Dignare me participem effici sanctissimi tui corporis et sanguinis." . . . "Indulge mihi cuncta, ut bonus, et clemens, intercessionibus interematae tuæ et semper virginis matris in condemnationem me custodi, ut sumam pretiosum et immaculatum corpus tuum."<sup>1</sup>*

217. In Missali Chaldaico habetur Liturgia Chrysostomo tributa, quæque verosimiliter ad Liturgiæ suæ exemplum facta est. In ea precatur sacerdos ut Spiritus Sanctus adveniat: "Et panem istum exhibeat corpus Christi Dei mei." *Populus.* "Amen." *Sacerdos:* "Et mistum, quod est in hoc calice perficiat sanguinem ejusdem Christi Dei nostri."

218. Liturgia Nestorianorum præcipua sanctorum Apostolorum nomine insignitur, et ab Apostolo Thaddæo, et sancto Mari dicitur composita. In ea sacerdos Deo gratias agit: "fecisti nos dignos administrandi mysteria sancta corporis et sanguinis Christi tui." Accedens ad hostiæ fractionem, dicit: "Accedimus, Domine, cum fide vera, frangimusque cum confessione, et signamus per misericordiam tuam, corpus et sanguinem vivificatoris nostri Jesu Christi." Postcommunio incipit his verbis: "Christus Deus noster, Dominus, Rex, Salvator et Vivificator noster, per gratiam suam dignos fecit nos suscipiendi corpus ejus, sanguinemque ejus pretiosum."

219. Liturgia Armenorum, prout Uscanus episcopus Armenus schismati licet addictus, anno 1666 testatus est, dum Amstelodami versaretur, invocationem continet Spiritus Sancti: "quo panis iste benedictus CORPUS VERE FACTUM EST DOMINI NOSTRI JESU CHRISTI, et calix iste benedictus FACTUS FUIT SANGUIS VERE DOMINI NOSTRI JESU CHRISTI." Varie tamen id legi dixit, nonnulli enim codices habent: "quo panis et vinum benedicta facta vere corpus et sanguis Domini nostri Jesu Christi. Amen." Nonnulli sic legunt: "quo panem istum benedicens, corpus facies Domini nostri; et calicem istum benedicens, vere facies sanguinem Domini nostri"

(1) Melancthon ut Lutheranam de reali præsentia sententiam defenderet, "adducit canonem Missæ apud Græcos, in quo aperte oret sacerdos, ut *mutato pane ipsum corpus Christi fiat.*" In Conf. Aug. apol. apud Walchium Introd. l. c. iii. p. 289.

Jesu Christi." Postea panem consecratum sacerdos appellat "VERUM CORPUS SALVATORIS DOMINI NOSTRI;" et ter dicit super calicem: "SANGUIS VERUS EST DOMINI NOSTRI JESU CHRISTI."<sup>1</sup>

220. Cophti, Ægyptii scilicet, præter liturgiam S. Basilii utuntur liturgiis S. Cyrilli Alexandrini, et S. Gregorii. Invocatur Spiritus Sanctus in liturgia quæ Cyrilli fert nomen: "super hunc panem et super hunc calicem, ut purificentur et transferantur . . . et hunc panem quidem faciat corpus Christi . . . et hunc calicem faciat quoque sanguinem pretiosum Testamenti novi . . . ejusdem Domini, Dei, Salvatoris et Regis omnium nostrum Jesu Christi."

221. In Liturgia quæ fert nomen S. Gregorii precatur sacerdos: "Ipse igitur Domine tua voce hæc proposita transmuta—μεταποίησον—Ipsè spiritum tuum sanctum mitte, ut adveniens, sancta, bona et gloriosa sua præsèntia sanctificet et transmutet proposita pretiosa, et sancta dona ista, in IPSUM CORPUS ET SANGUINEM nostræ liberationis." *Populus*: "Attendamus." *Diaconus*: "Amen." *Sacerdos alta voce*: "Et faciat panem quidem istum fieri sanctum corpus tuum Domini Dei et Salvatoris, supremique regis omnium nostrum Jesu Christi, in remissionem peccatorum, et ad vitam æternam communicantibus ex illo." *Ad communionem Sacerdos ter dicit*: "Corpus sanctum et sanguis pretiosus, verus Jesu Christi Filii Dei, Amen. Emmanuel Dei nostri, hoc est vere. Amen. *Populus*: "Amen, Credo, credo, credo et confiteor usque ad ultimum spiritum, quod HÆC IPSE EST CARO VIVIFICA, quam accepisti Christe Deus noster ex sancta Domina nostra Deipara, et semper Virgine Maria." Post communionem dicitur: "Concede nobis per immaculatum corpus tuum et pretiosum tuum sanguinem redemptionem, sicut benigne præstitisti nobis nunc ut ex ipsis Eucharistiam acciperemus."

222. Jacobitæ, Eutychiano errore infecti, in Syria, Ægypto et Abyssinia, præter S. Jacobi liturgiam, utuntur alia quam S. Maruthæ catholico tribuunt, qui circa finem sæculi quarti floruisse dicitur. In ea habetur invocatio S. Spiritus iisdem fere verbis quibus aliæ liturgiæ, et post recitatam Sacramenti institutionem dicit Sacerdos: "Illos etiam corporis et sanguinis sui sancti participes faciens, doctrina divina erudiit." Alia utuntur liturgia quæ beati Jacobi Edesseni dicitur. In invocatione legimus: "ut efficiat panem hunc, ipsum corpus Christi Dei nostri, et calicem hunc, exhibeat ipsum sanguinem Christi Dei nostri."

223. Æthiopes in sua liturgia, post Christi verba in panem recitata a sacerdote, clamant: "Amen, Amen, Amen. Credimus et certi sumus, laudamus te Domine Deus noster, hoc est vere, et ita credimus, corpus tuum." Similiter post verba in calicem, populus dicit: "Amen. Vere est sanguis tuus, credimus."

(1) Cit. in opere. *Perpetuité de la foi*, l. v. ch. vii. p. 377, 380

224. In Liturgia Romana, juxta antiquissimos Gelasii et Gregorii codices, habetur, uti hodie, oratio: “ut nobis CORPUS ET SANGUIS FIAT dilectissimi Filii tui Domini nostri Jesu Christi.” Post consecrationem dicit sacerdos: “Offerimus præclaræ majestati tuæ, de tuis donis ac datis, hostiam puram, hostiam sanctam, hostiam immaculatam, panem sanctum vitæ æternæ, et calicem salutis perpetuæ.” *Ad complendum in festo SS. Processi et Martiniani orat Sacerdos*: “Corporis sacri et pretiosi sanguinis repleti libamine, quæsumus Domine Deus noster, ut quod pia devotione gerimus, certa redemptione capiamus.” *Ad S. Petrum ad vincula*: “Corporis sacri et pretiosi sanguines repleti libamine,” etc. In exaltatione S. Crucis ad complendum: “Jesu Christi Domini nostri corpore et sanguine saginati, per quem crucis est sanctificatum vexillum.”<sup>1</sup>

225. In Missa Ambrosiana ea quæ supra ex Romana recitavimus ad verbum fere habentur. Præterea ad fractionem sacerdos dicit: “Corpus tuum frangitur, Christe, calix benedicitur.” Partem in calicem dimittens, ait: “Commixtio consecrati corporis et sanguinis Domini nostri Jesu Christi nobis edentibus et sumentibus proficiat ad vitam et gaudium sempiternum.” Sumens calicem ait: “Præsta quæso, Domine, ut perceptio corporis et sanguinis Domini nostri Jesu Christi ad vitam nos perducatur æternam.” Postea: “Quod ore sumsimus, Domine, pura mente capiamus, ut de corpore et sanguine Domini nostri Jesu Christi fiat nobis remedium sempiternum.”

226. Missa Mozarabica in Missali *omnium offerentium*, institutionem exhibet, et post verba: “Hoc est corpus meum, quod pro vobis tradetur;” præscribitur: “Hic elevetur corpus.” Post verba consecrationis calicis, præscribitur elevatio calicis, et deinceps dicit: “elevetur corpus Christi,” quod super calicem tenens recitat symbolum constantinopolitanum. Ante communionem orat sacerdos: “Domine Deus meus, da mihi corpus et sanguinem Filii tui Domini nostri Jesu Christi ita sumere, ut per illud remissionem omnium peccatorum merear accipere. Ave in ævum SANC-TISSIMA CARO CHRISTI . . . . Corpus et sanguis Domini nostri Jesu Christi custodiat corpus et animam meam in vitam æternam. Amen.” Post communionem orationes variæ recitantur: “Corpus Domini nostri Jesu Christi, quod accepimus, et sanctus sanguis ejus, quem potavimus, adhæreat visceribus nostris, æternæ omnipotens Deus.”—“Refecti Christi corpore et sanguine pariter: quia sanctificati Deo Patri omnipotenti gratias referamus.”

227. Ex Missali Gothico, seu Gothico Gallicano, Missa XI, quæ est in

(1) Mirum est Bullum aliosque Missam Romanam dogmati transubstantiationis adversari affirmasse, quum verbis perspicuis, quamvis minus vehementibus, illud adstruat.

diem sanctum Epiphaniæ, sic incipit: "Venerabilem ac primitivum in mirabilibus Epiphaniæ diem . . . veneremur, pia obsecratione poscentes, ut qui tunc aquas in vina mutavit, nunc in sanguinem suum oblationum nostrarum vina convertat." In Missa XX in Cathedram S. Petri Apostoli post mysterium sacerdos precatur: "ut immittere digneris Spiritum tuum Sanctum super hæc solemnia, ut fiat nobis legitima eucharistia in tuo Filii tui nomine, et Spiritus Sancti, in TRANSFORMATIONE corporis ac sanguinis Domini nostri Jesu Christi, unigeniti tui, edentibus nobis vitam æternam, regnumque perpetuum conlatura bibentibus." Missa LXXX dominicalis post secreta habet: "Explentes sacrosancta cæremoniarum solemnia, ritu Melchisedech summi sacerdotis oblata, precamur mente devota te, Majestas æterna, ut operante virtute, PANEM MUTATUM IN CARNE POCULUM VERSUM IN SANGUINE illum sumamus in calice qui de te fluxit in cruce ex latere." Et post orationem dominicam: "Liberas nos a malo, Domine Jesu Christe. Corpus tuum pro nobis crucifixum edimus, et sanguinem sanctum tuum pro nobis effusum bibimus."

228. Missale Francorum in ordinatione presbyteri episcopum orantem inducit: "ut per obsequium plebis tuæ corpus et sanguinem Filii tui immaculata benedictione transformet." Missa XXI super oblata: "Deus qui legalium differentias hostiarum unius sacrificii perfectione sanxisti; accipe sacrificium a devotis tibi famulis . . . ut Filius tuus Jesus Christus, qui se usque in finem sæculi suis fidelibus promisit adfuturum, et PRÆSENTIÆ CORPORALIS MYSTERIIS non deserat quos redemit, et majestatis suæ beneficiis non relinquat."

229. Missale Gallicanum vetus plura suppeditat. In Missa S. Germani episcopi, collectio post eucharistiam: "Sumsimus ex sacris altaribus Christi Domini ac Dei nostri corpus et sanguinem . . . aspice Domine, qui et tuo vesci corpore, et tuum corpus effici vis fideles." In Missa XVII feria V in cœna Domini, post *Sanctus*: "Hanc igitur oblationem, quam tibi offerimus ob diem jejunii cœnæ dominicæ, in qua Dominus noster Jesus Christus Filius tuus in novo Testamento sacrificandi ritum instituit, dum panem et vinum, (quæ Melchisedech in præfiguratione futuri mysterii sacerdos obtulerat), in Sacramento sui corporis et sanguinis *transformavit*; quæsumus, Domine, ut placatus accipias."

230. Sacramentarium Gallicanum, in Missa *quadraginsimali*, *contestationem* habet: "Hunc panem, Domine, nobis ministrare non desinas, quem ut sitiamus (*esuriamus*) indesinenter hortaris, cujus carne a te ipso sanctificata dum pascimur, roboramur, et sanguine dum potamur, abluimur." In Missa S. Sigismundi regis, *contestatio*: "tua dona sunt, Domine, ut in nomine electi tui Sigismundi per communionem corporis et sanguinis Domini nostri Jesu Christi Filii tui a famulo tuo, *ill.*<sup>1</sup> tempestatis frigora, febrium ardorem repellas."

(1) *Illo*: ita olim nominandus designabatur, qui littera N. nunc indicatur.

231. In ipsa quam Matthias Flaccus Lutheranus edidit anno 1557, Missa Latina, quæ in Galliis olim recitari consuevit, documenta clarissima realis præsentiae habentur: "Sanctifica, Domine, hanc oblationem, ut nobis unigeniti Filii tui Domini nostri Jesu Christi corpus fiat." "Oblatum tibi, Domine, calicem sanctifica, ut nobis unigeniti tui Domini nostri Jesu Christi sanguis fiat." Post orationem dominicam præscribitur: *Misceatur corpus dominico sanguini*, et dicatur: "Hæc sacrosancta commixtio corporis et sanguinis Domini nostri Jesu Christi fiat omnibus nobis sumentibus salus mentis et corporis." Communio sic se habet. *Quando corpus dominicum sacerdos in manus accipit, dicat*: "Panem cœlestem accipiam, et nomen Domini invocabo." Sequitur oratio: "Perceptio corporis tui Domine Jesu Christe, quam indignus sumere præsumo etc." *Cum corpus sumitur*: "Corpus Domini nostri Jesu Christi sit mihi remedium sempiternum in vitam æternam." . . . "Communicatio et confirmatio corporis et sanguinis Domini nostri Jesu Christi prosit mihi in remissionem omnium peccatorum meorum, et conservet me ad vitam æternam." *Cum sanguis sumitur*: "Sanguis Domini nostri Jesu Christi custodiat me in vitam æternam." Post perceptam communionem: "Corpus tuum Domine, quod accepi, et calix quem potavi, adhæreant in visceribus meis." *Deinde presbyteris et diaconis corpus in manus accipientibus, et communicantibus dicitur singulis*: Pax tecum: R. Et cum Spiritu tuo." *Alia*: "Verbum caro factum est, et habitavit in nobis." Calicem vero cum sacrosancta commixtione dando unicuique, dicat: "Hæc sacrosancta commixtio corporis et sanguinis Domini nostri Jesu Christi prosit tibi ad vitam æternam." Post communionem inter preces dicit: "Præsta Domine Jesu Christe Fili Dei vivi, ut qui corpus et sanguinem proprium pro nobis indignis datum edimus, et bibimus, fiat nobis ad salutem."

Ex his omnibus liturgiis patet veram, realem et substantialem corporis et sanguinis Domini nostri Jesu Christi in eucharistia, et transubstantiationem semper et ubique agnitam fuisse in Ecclesia catholica per orbem, imò agnoscì adhuc a sectariis toto Oriente diffusis, et ab iis qui in Ægypto versantur. Equidem omnes liturgiæ panem et vinum Spiritus Sancti virtute mutari et converti in corpus et sanguinem Christi tradunt, hæcque ore fidelium sumi. Ideo hæc occurrunt voces μεταβαλῶν, μεταποιήσον, *transformatio*. Quum autem liturgiarum substantia ab Apostolis derivetur, ut patet ex earum antiquitate, et in rebus præcipuis concordia, liquet dogma fidei de vera, reali, et substantiali præsentia, adeoque de transubstantiatione, fuisse ab Apostolis traditum, et basim esse totius cultus christiani.

#### OBJECTIONES.

232. *Obj. 1.* Liturgiæ fere omnes invocationem Spiritus Sancti, ut transmutet et transformet panem et vinum, institutionis narrationi subjungunt, ideoque verbis consecrationis prolatis nulla agnoscitur substantiarum m

tatio, nec aliud proinde postulatur, quam ut Spiritus Sancti benedictione fiant symbola et signa corporis et sanguinis Christi, cum cœlesti quadam virtute et efficacia conjuncta.

*Resp.* Hanc interpretationem nullo modo patiuntur perspicua illa quæ protulimus testimonia. Quamvis autem daremus iis qui Orientales liturgias composuerunt, et qui eas adhibent, persuasum esse illa Spiritus Sancti invocatione, potius quam verbis Dominicis confici eucharistiam, vel ex verbis Domini una cum invocatione integram formam consecrationis constare, non ideo licebit de præsentia reali et substantiali, quæ adeo manifeste in liturgiis declaratur, dubitare. Cæterum eruditi homines, Græcorum et Orientalium testimoniis innixi, judicarunt consecrationem verbis Christi perfici, sicut olim docuit Chrysostomus, liturgiæ licet auctor insignis : invocationem autem Spiritus Sancti rem veluti adhuc peragendam spectare, adeo ut sacerdos divinum opus veluti admirans, orat ut fiat mira illa substantiæ mutatio, quam jam factam esse novit. Sic in oblatione panis hostiam immaculatam se Deo offerre dicit, miram illam panis in corpus Christi conversionem, quæ futura est, veluti factam contemplans. Ita post episcopum Ostunensem Naironus,<sup>1</sup> cui assentitur Assemanus,<sup>2</sup> Orientalis uterque, et consuetudines et sententias suorum apprime edocti. Græci ipsi in concilio Florentino de verbis Domini interrogati responderunt se fateri per hæc verba consecrari divinum panem et fieri corpus Christi.—τελειῶσαι τὸν θεῖον ἄρτον καὶ γίνεσθαι σῶμα Χρίστου.<sup>3</sup>

233. *Obj.* 2. “ Ex ipsis hisce liturgiis, si consideramus quæ sequuntur, patet quod nulla mutatio, aut conversio substantiæ indicetur.” Ita Walchius.<sup>4</sup>

*Rep.* Id gratis asseritur, et contra rei evidentiam, nam quæ sequuntur ostendunt corpus et sanguinem Christi adesse, et sacerdotis manu dari, et ore fidelium suscipi, nec aliud quidquam ; proinde veram contigisse substantiæ panis et vini mutationem.

234. *Obj.* 3. In Liturgiis pluribus orat sacerdos ut Spiritus Sanctus exhibeat—ἀναδείξαι—ἀποφαίνεω—corpus et sanguinem Christi. Ergo veritas corporis non ibi agnoscitur, nec ulla substantiæ mutatio.

*Resp.* Non orat sacerdos ut panis et vinum exhibeant corpus et sanguinem Christi, sed ut ipse Spiritus Sanctus panem et vinum faciat et exhibeat corpus et sanguinem Christi ; vocum enim Græcarum eadem est vis, uti Isaacus Causaubonus, Græcis litteris insignis, et Protestantium in castris militans, agnovit.<sup>5</sup>—ἀναδείξαι quippe dicitur magistratibus creatis,

(1) In Euoplia p. 159.

(2) Bibliotheca Orientalis p. 200.

(3) Acta Conc. Flor. Sess. xxv.

(4) Introductio ad lib symb. l. i. c. iii. § xxxiii. p. 294.

(5) Exercit. in Baron. p. 520. Ed. Lond.

sicut et ἀποφαίνεω.<sup>1</sup> Equidem unaquæque liturgia verum corpus 'adesse declarat, et ideo mutationem substantiæ statuit, quam pleræque verbis valde perspicuis enuntiant.

335. *Obj. 4.* *Antitypa* vocantur quæ jacent in altari post verba Domini prolata et Spiritus Sancti invocationem. Non sunt igitur ipsum corpus et sanguis Christi.

*Resp.* Optimum damus vocis interpretem S. Joannem Damascenum, quem Græci plurimis faciunt: "Antitypa vero futurorum dicimus, non quod non sint vere corpus et sanguis, sed quia per ipsa, divinitatis Christi nunc sumus consortes ; tunc autem intellectuali ratione per solam visionem percipiemus."<sup>2</sup>

(1) Vide apud Renaudotium Liturg. Oriental. t. i. p. 241.

(2) L. iv. de fide Orthodoxa c. xiv.



## CAPUT X.

## DE FIDE ORIENTALIUM SECTARUM.

Insignia quidem fidei documenta, quam de eucharistia foveant Græci et Orientales omnes, in liturgiis quibus utuntur habemus; sed in re tanti momenti abundare præstat, quam vel minimum relinquere locum dubitationi. Alia igitur testimonia adducemus.

## PROPOSITIO.

*Viget, viguitque semper apud Græcos et Orientales omnes fides de vera, reali, et substantiali præsentia Domini nostri Jesu Christi in Eucharistia, adeoque dogma transubstantiationis.*

*Probatur I. ex Protestantorum scriptorum confessione.*

236. Crusius, Lutheranus professor Tubingensis, post litteras nuntiosque missos ad Jeremiam, patriarcham Constantinopolitanum, fassus est de Græcis, “quod septem Sacramenta habent, ac transmutari panem in corpus Domini, et vinum in sanguinem putant; quod hæc in liturgiis Deo Patri offerunt pro peccatis sacerdotum, et ignorantibus populi.”<sup>1</sup> Eques Anglicus Eduardus Sandius id etiam fatetur;<sup>2</sup> Grotius irridet Rivetum contradicentem;<sup>3</sup> Flavius Lutheranus pariter irridet Hottingerum; Forbesius episcopus Edimburgensis plerosque Græcos ita sentire agnoscit,<sup>4</sup> nec aliquos contra sentire probare aggreditur; Dannawerus, Professor Agrigentinus inter eorum errores recenset transubstantiationem.<sup>5</sup>

*Probatur II. ex silentio Græcorum de transubstantiatione, orto inter eos et Latinos dissidio.*

237. Undecimo sæculo medio, anno scilicet 1053, vehemens ortum est dissidium Græcos inter et Latinos, Michael Cerulario patriarcha Constantinopolitano Leoni IX. objiciente quidquid in Latinorum moribus reprehensioni locum aliquatenus dare videbatur. Attamen de transubstantiatione siluit, quamvis Leo paulo antea Berengarium ob eam denegatam in concilio damnasset, et Michael de usu panis azymi in Sacramento conficiendo graviter quereretur. Ergo illo ex capite nullus erat querelæ locus, sed utraque ex parte concordia fidei et cultus. Græcos tunc temporis

(1) Germano Grec. l. v. p. 226.

(2) Cap. xlii. cit. in opere celeberrimo: “La perpétuité de la Foi de l'Eglise Catholique touchant l'Eucharistie défendue.” l. ii. ch. iv. p. 116. 2dæ edit.

(3) Discussio Apologetici Riveti.

(4) Consid. modest. de Sacr. Euch. c. iv. p. 412.

(5) De Ecclesia Græcanica hodierna p. 46.



Romæ versatos fuisse, ritus suos servantes, ipso haud improbante, testatur Leo, “ quia nihil obsunt saluti credentium diversæ pro loco et tempore consuetudines, quando una fides per dilectionem operans bona quæ potest uni Deo commendat omnes.”<sup>1</sup> De unitate fidei igitur constabat utrinque. Humbertus Cardinalis et alii Constantinopolim profecti, legatione pontificia fungentes, Imperatori obtulerunt scriptum quo Cerularii querelis respondebatur, in quo, dum de azymo ageretur, dicebatur : “ Taliter præparatus azymus, fidei invocatione totius Trinitatis fit verum et singulare corpus Christi.” Excommunicatione perculerunt Cerularium, causis recensitis, quin erroris contra eucharisticum dogma, paulo antea definitum in Occidentis conciliis, eum accusarint ; civitatem et Imperatorem orthodoxam esse simul testantes. Petrus patriarcha Antiochenus, ad quem scripsit Cerularius respondens, nihil dixit unde suspicari liceat de re eucharistiæ esse inter tres illas sedes ullam discrepantiam, cui e contra testimonium præbuit insigne in epistola ad episcopum Gradensem.<sup>2</sup>

238. Occasione illius dissidii scripta edita sunt a Niceta, monacho Constantinopolitano, qui e partibus Cerularii stabat, quibus respondit Humbertus Cardinalis. Accusabat Latinos Nicetas eos jejunium frangere Quadragesimale, Missam celebrando hora tertia, scilicet, quæ apud nos nona dicitur. Respondens Humbertus Nicetam arguebat veluti corpus Domini cibis cæteris adsimilantem, Stercoranistarum more. Cæterum Nicetas scribebat : “ Sanctus autem Spiritus vivificusque in vivificata ejus carne permansit, quam comedentes in pane qui immutatus est, per Spiritum, et effectus corpus Christi, vivimus in ipso, tamquam vivam et deificatam ejus carnem edentes.”<sup>3</sup>

239. Lanfrancus, Italus gente, vindex insignis dogmatis eucharistici scripsit anno 1079, et appellavit Græcos, Armenos, et universos prorsus christianos, utpote credentes mysterio, adeo ut totam Ecclesiam periisse dicendum foret, si transubstantiationis dogma divinum non esset. Berengario idcirco objicit immanem superbiam : “ fastu quo plenus es contra orbem terrarum sentire cœpisti.”<sup>4</sup> Durandus etiam paucis Berengarii asseclis orbis christiani consensum objicit : “ Absit tam perversis et a veritate ipsa tantum aversis pari jungamur perfidia, atque in sancta dominici corporis ac sanguinis communione minus aliquid fateamur quam Catholica per orbem universum prædicat Ecclesia.”<sup>5</sup>

240. Theophylactus, Archiepiscopus Bulgariæ, sæculo undecimo, clarissimis verbis dicit carnem et sanguinem adesse, nobisque dari in Sacramento, quamvis panis speciem corpus præseferat ne a comedendo abhorre-

(1) Leo ix. ep. i. tom. 3. epist. Rom. Pontif. c. 8.

(2) Vide Perpétuité de la Foi, Vol. i. l. ii. c. v. p. 129.

(3) Ibidem c. vi. p. 137.

(4) Lanfranc L. de corp. Domine c. iv.

(5) Durandus part. ii.

remus. Transubstantiationem his verbis declarat—εἰς δυνάμιν σαρκὸς καὶ αἵματος μετασχοιχείω—<sup>1</sup> “in virtutem carnis et sanguinis transmutat;” seu potius in ipsam carnem et sanguinem, hæc est enim vis verborum, uti ex pluribus ejus dictis liquet, vocat enim Sacramentum—αὐτὸ τὸ σῶμα τῷ κυρίῳ—ipsum corpus Domini;—τῷ ὄντι σὰρξ ἐστὶ—<sup>2</sup> “reapse caro est;”—αὐτὴ τῷ κυρίῳ σὰρξ—<sup>3</sup> “ipsa Domini caro.”<sup>2</sup> Εἰπὼν δὲ, τὸ μὲν ἐστὶ τὸ σῶμα, δεικνύει ὅτι αὐτὸ τὸ σῶμα τῷ κυρίῳ ἐστὶν ὁ ἀγιαζόμενος ἐν τῷ θυσιαστήριῳ, καὶ ἐχὼ ἀντίτυπον, ὃ γὰρ εἶπε τὸ ἐξ ἑαυτοῦ ἀντίτυπον, ἀλλὰ τὸ μὲν ἐστὶ τὸ σῶμα. ἀρρήτως γὰρ ἐνεργεῖα μεταποιεῖται, καὶ φαίνεται ἡμῖν ἄρτος.<sup>3</sup> “Porro dicens, Hoc est corpus meum; ostendit, quod ipsum corpus Domini est panis sanctificatus in altario, et non respondens figura (*antitypon*). Non enim dixit: Hoc est figura (*antitypon*), sed: hoc est corpus meum. Ineffabili enim operatione transformatur, etiam si nobis videatur panis.” Iterum: ὃ γὰρ ἀντίτυπος τῷ κυριακῷ σώματός ἐστιν ὁ ἄρτος. ἀλλ’ εἰς αὐτὸ ἐκείνω μεταβάλλεται τὸ σῶμα τῷ Χριστῷ.<sup>4</sup> “Non enim figura et exemplar quoddam Dominici corporis panis est; sed in illum ipsum convertitur corpus Christi.”

241. Ex crucesignatorum bellis fidei Græcorum et Latinorum hac de re concordia liquet. Immanis hominum multitudo, ad millionem facile pertingens, in Orientem transivit, quibus omnibus firma erat de transubstantiatione fides, quæ ex recenti Berengarii damnatione magis claruerat. Urbibus captis plerumque episcopus Latinus constituebatur in Occidentaliū utilitatem, cui aliquando Orientales sese subiciebant, quibus tamen sæpe concessum est, ut episcopo Græci ritus subjecti manerent. Patriarcha Antiochenus, Græcus, capta civitate, a Latinis in suo gradu est servatus, qui et ei sese subjecerunt. Magnum igitur erat Græcos inter et Latinos commercium vitæque societas, et utrorumque doctrinam et fidem noscendi occasio: nec tamen de fide hujus mysterii ulla contigit disceptatio.

242. Occasione schismatis, quod tandem conflatum est, prodierunt utraque ex parte scripta, et acerrima jacta sunt probra, quin transubstantiationis dogma in medium adductum sit. Scripsit quidem Nicolaus, Methonensis episcopus, Latinorum infensissimus hostis, librum contra quosdam dubitantes de hoc mysterio, quod a nonnullis in dubium revocatum contra fidem publicam Græcorum inde colligitur: nulla tamen secta illorum extitit. Titulus libri est—Πρὸς τοὺς διζήζοντας καὶ λεγοντας ὅτι ὁ ἱερουργούμενος ἄρτος

(1) In Marc. Comment. c. xxiv.

(2) In Matth. comm. c. xxvi. Vide et comment. in Joan. c. vi.

(3) In Matt. comm. c. xxvi.

(4) Comm. in Marcum cap. xiv. p. 272. Conjicit Walchius hunc locum ante oculos habuisse Melanctonem, dum in apologia Augustanæ confessionis scriberet Theophylactum scripsisse *panem non tantum figuram esse, sed vere in carnem mutari*. Introd. ad libros symbol. Luther. l. i. c. iii. p. 289. Frustra autem laborat Walchius testimonia Theophylacti de mutatione accidentali interpretari.

καὶ οἶνος ἔκ ἐξὶ σῶμα καὶ αἷμα τοῦ κυρίου ἡμῶν Ἰησοῦ Χριστοῦ<sup>1</sup>—“ Contra dubitantes et asserentes panem et vinum consecratum non esse corpus et sanguinem Domini nostri Jesu Christi.” Dicit “ corpus et sanguinem Christi esse quæ in mysteriis fiunt,”—σῶμα καὶ αἷμα Χριστοῦ τα τελεµενα.

243. Nicetas Choniates de Latinis querens, eos in urbis Constantinopolitanae direptione anno 1203, ipsum corpus Christi et sanguinem in terram projecisse et fudisse affirmat—τὸ δὲ φρικῶδες καὶ ανακροµενον ἦν ὁρᾶν τὸ θεῖον αἷμα καὶ σῶμα Χριστοῦ κατὰ γῆς χεόµενον καὶ µεπτόµενον.

244. Fidei extat confessio quam Græci a Saracenis ad fidem conversis exigebant, ante tempora Manuelis Comneni, in qua profitebatur conversus se credere, panem<sup>2</sup> et vinum mysticis precibus consecratum esse vere corpus et sanguinem Domini nostri Jesu Christi.

245. Gregorius IX. anno 1233 Græcos ad unitatem revocare studens, ad Germanum episcopum Constantinopolitanum scripsit, et post transubstantiationem panem, seu azymum, seu fermentatum, haud superesse docuit; mutatus scilicet est in corpus Domini.<sup>3</sup> Tota inde secuta inter Legatos pontificios et Græcos disputatio fuit, “ An Christi corpus in azymo confici possit ?”<sup>4</sup>

246. Clemens IV. ad Michælem Paleologum Imperatorem professionem fidei misit subscribendam, in qua quum de azymorum usu agere oportuerit, Græcis affirmantibus in azymo corpus Domini confici non posse, transubstantiationis dogma ea occasione expositum est : “ Sacramentum eucharistiæ ex azymo conficit Romana Ecclesia, tenens et docens quod in ipso Sacramento panis vere transubstantiatur in corpus, et vinum in sanguinem Domini nostri Jesu Christi.”<sup>5</sup> Hanc fidei confessionem nomine Imperatoris juratus professus est Gregorius Acropolitani, ejus Nuntius, in concilio generali Lugdunensi anno 1274, et Legatus concilii Græcorum nomine Metropolitanus Ephesini, et triginta episcoporum. Post concilium Lugdunense habitum est in Græcia concilium, præside patriarcha Joanne Vecco, in locum Josephi, qui pertinax in schismate recesserat in monasterium, et quæ acta sunt Lugduni probata sunt. In litteris concilii nomine a Vecco scriptis hæc habentur : “ Credentes et nos, ipsum azymum panem in ipso sacro officio eucharistiæ vere transubstantiari in corpus Domini nostri Jesu Christi, et vinum in sanguinem ejus per sanctissimi Spiritus virtutem et operationem.”<sup>5</sup>

Renovato, sub Andronico, Michaelis filio, schismate, de transubstantiationis dogmate nemo questus est.

247. S. Thomas Aquinas contra Græcos scribens de errore contra tra-

(1) Bibl. vel. pat. l. ii. Græco-lat.

(2) Rainaldus an. 1233. n. 2. par. an. 1237. n. 4.

(3) Ibidem. n. 12.

(4) Rainaldus an. 1267. n. 77.

(5) Ibidem an 1277. n. 39.

substantiationem nihil dicit, quamvis de azymis agat. Ex alio ejus opere constat Saracenos Christianis universis id dogma objicere : “ Improperant etiam Christianis, quod in altari comedunt Deum suum, et quod corpus Christi, si esset ita magnum sicut mons, jam deberet esse consumptum.”<sup>1</sup>

248. Joannes Paleologus, imperator, anno 1369, iter Romam suscepit, et fidei professionem juratus emisit, in qua de azymis dicitur : “ Sacramentum eucharistiæ ex azymo sacrificat Ecclesia Romana prædicta, tenens et docens quod in ipso Sacramento PANIS VERE TRANSMUTATUR IN CORPUS, ET VINUM IN SANGUINEM DOMINI NOSTRI JESU CHRISTI.”—ἐν αὐτῷ τῷ μυστηρίῳ ὁ ἄρτος ἀληθῶς μεταβάλλεται εἰς σῶμα, καὶ ὁ οἶνος εἰς αἷμα τοῦ κυρίου ἡμῶν Ἰησοῦ Χριστοῦ.<sup>2</sup>

249. Clemens VI. de Græcis Serviæ, Dalmatiæ, et Macedoniæ anno 1351 questus est : “ Mendaciter asserunt, contra ea quæ præfata Romana tenet et docet Ecclesia, corpus Christi non in azymo, sed in fermentato pane confici debere, et quod in azymo confectum est, esse denegant corpus Christi.”<sup>3</sup>

250. In concilio Florentino Græci ad unitatem redierunt post maturum rerum omnium examen ; de transubstantiatione autem nulla occurrit difficultas, sed tantum de azymorum usu.

251. Jeremias, patriarcha Constantinopolitanus, a Lutheranis interrogatus de Græcorum fide, anno circiter 1574, respondit panem mutari in ipsum corpus Domini—εἰς αὐτὸ τὸ σῶμα τοῦ κυρίου—vinum in ipsum sanguinem Domini.—εἰς αὐτὸ τὸ τῷ κυρίῳ αἷμα.<sup>4</sup>

252. In concilio Constantinopolitano anno 1642, præside Parthenio, tribus aliis Patriarchis, pluribus Metropolitibus, et episcopis considentibus, confessio fidei a Petro Mogila, Russiæ Metropolita, conscripta, probata est : in qua dicitur : “ quod tempore quo (sacerdos) consecrat sancta dona, substantia panis et substantia vini mutetur in substantiam veri corporis et veri sanguinis Jesu Christi, operatione Sancti Spiritus quem invocat . . Post hæc verba transubstantiatio fit eodem instanti, et panis mutatur in verum corpus Jesu Christi, et vinum in ejus sanguinem apparentiis panis et vini remanentibus, ex divina œconomia.”<sup>5</sup>

253. Armeni, testante Gerlaco, Lutherano : “ In cœna Domini verum et substantiale corpus et sanguinem Domini adesse dicunt, sed videntur transubstantiationem probare.”<sup>6</sup> Olearius, Lutheranus etiam, id testatur : “ Quod Armeni etiam credunt transubstantiationem, cognovi ex patriarcha qui nos invisebat Scamachiæ in Media.”<sup>7</sup>

(1) *Declaratio quorundam dubiorum contra Græcos, Armenos, et Saracenos.* Ob-  
jectio supra recitata Saracænorum nomine proponitur.

(2) Allatius de perpet. cons. p. 846.

(3) Ep. ad episcopos Latinos in Græcia dimorantes apud Rainaldum an. 1351. n. 20

(4) In resp. Jeremiæ passim.

(5) Part. i. in resp. ad interrog. cvii.

(6) Crusius in Germano—Græcia.

(7) Cit. in opere Perpétuité de la foi, l. v. ch. vii. vol. i. p. 374.

254. Jacobitæ, testante Dionysio Barsalibeo, in liturgiam S. Jacobi qua utuntur, scribens, una nobiscum credunt transubstantiationi: “Dicimus panem hunc cælestem in veritate et effectum esse corpus Filii Dei, et illud idem esse corpus personæ ipsius, quod assumpsit ex Maria, et factum est sacrificium in cruce pro nobis.”<sup>1</sup>—“Sacramenta autem vocantur corpus et sanguis, quoniam non illud quod videtur sunt: secundum speciem autem panis et vinum sunt, sed agnoscuntur atque sunt corpus et sanguis Dei.”<sup>2</sup>

255. Maronitæ prope Libanum et in aliis Syriæ partibus degentes, nunquam erroris contra transubstantiationem accusati sunt: Dogma perspicuis verbis declaratur in commentario in Liturgiam S. Jacobi, quod Joannem Maronem, sexti sæculi exeuntis auctorem, habere censetur.<sup>3</sup>

256. Christiani qui dicuntur S. Thomæ in Indiis Orientalibus Liturgia utuntur, in qua verba Domini sic recitant: **HOC EST IN VERITATE CORPUS MEUM: HIC EST IN VERITATE CALIX SANGUINIS MEI.** Ad fractionem hostiæ dicitur: “Accedimus, Domine, in fide veritatis nominis tui ad hæc sancta mysteria; ac pietate tua frangimus, et misericordia tua signamus corpus et sanguinem Salvatoris nostri Jesu Christi.” Ad communionem: “Fratres mei, suscipite corpus ipsius Filii Dei, dicit Ecclesia, et bibite ipsius sanguinem.”<sup>4</sup>

257. Æthiopes, testante Damiano Goez, eucharistiam “indubitatum Christi cum corpus, tum sanguinem esse sincera fide profitentur.” Anno 1651 tres Æthiopes Romæ subscripserunt fidei declarationi: “Nos Æthiopes in veritate attestamus, gentem nostram venerari imagines Sanctorum, et credere corpus et sanguinem Jesu Christi præsentialiter adesse in sancta eucharistia.”<sup>5</sup>

258. Porro ex hac omnium sectarum consensione argumentum derivatur validissimum divinæ traditionis, nam liquet eam fuisse fidem sæculis quarto vel quinto, quo plures sectæ suam referunt originem, et fuisse publico et solemni omnium cultu celebratam. Adeo altas egerat radices, ut nequidem partium studiis evelli potuerit. Erat igitur antiqua et certissima doctrina, quæ ad ipsa rei christianæ primordia necessario referenda est.

(1) Comm. in Lit. S. Jacobi c. i.

(2) Ibidem c. xiii.

(3) Vide opus Perpétuité de la foi, l. v. ch. xii. p. 401.

(4) In Bibliotheca Patrum, cit. in opere: Perpétuité de la foi, l. v. ch. x. vol. i. p. 394.

(5) Cit. in opere: *Perpétuité de la foi*, l. v. ch. xiii. vol. i. p. 404, 406.

## CAPUT XI.

## DE PERMANENTI PRÆSENTIA.

259. Martinus Bucerus, e Dominicana familia apostata, verborum ambiguitate et fallendi studio notissimus, Lutheranos cum Sacramentariis ut conciliaret, Christum in eucharistia adesse docuit, sed in actione tantum, dum sumeretur: hoc scilicet pacto iis favit qui fide suscipientium Christum percipi tradebant; Luthero, præsentiae confessione, gratificans. Hic tamen non satis id habuit, sed per totam actionem Sacramentalem Christum adesse definivit. Kemnitius eum agnovit præsentem in iis actibus qui cum cœna connectuntur, veluti dum eucharistia paulo post ad ægrotautes defertur. Ecclesia Catholica conversionem panis et vini in substantiam corporis et sanguinis Christi prædicans, eum adorat præsentem quamdiu servantur species sacramentales, et anathemate ferit contrarium errorem: "Si quis dixerit, peracta consecratione in admirabili eucharistiæ Sacramento non esse corpus et sanguinem Domini nostri Jesu Christi, sed tantum in usu, dum sumitur, non autem ante vel post, et in hostiis seu particulis consecratis quæ post communionem reservantur, vel supersunt, non remanere verum corpus Domini; anathema sit."<sup>1</sup> Ita Tridentini patres.

## PROPOSITIO.

*In hostiis seu particulis consecratis, quæ post communionem reservantur, vel supersunt, remanet verum corpus Domini.*

*Probatur I. ex Scripturis.*

260. Christi verba vera erant eo quo prolata sunt momento et quod porrigebat Apostolis suum erat corpus et sanguis, antequam ipsi acceperint: ergo ex usu, vel ex fide sumentium non pendebat ut Sacramentum Christi corpus foret et sanguis. Nulla sinit ratio ut illa censeamus desinere adesse, quum semel prolatis Christi verbis præsentia fiant.

*Probatur II. ex Patrum auctoritate.*

261. S. OPTATUS MILEVITANUS in Donatistas vehementer invectus est ob confracta Catholicorum altaria, et eucharistiam horrenda impietate violatam: "Quid enim est altare nisi sedes corporis et sanguinis Christi? Quid vos offenderat Christus, cujus illuc per certa momenta corpus et sanguis inhabitabat? . . . An modo Judæos imitati estis? Illi injecerunt

(1) Sess. xiii. Can. iv.

manus Christo in cruce: a vobis percussus est in altari.' . . . Hoc tamen immane facinus a vobis geminatum est, dum fregistis etiam calices Christi sanguinis portatores."<sup>1</sup>

262. S. JOANNES CHRYSOSTOMUS ad S. Innocentium I. scribens, de militibus ab imperatore missis ait: "Locum in quo sancta condita servabantur, ingressi sunt milites, quorum aliquos scimus nullis initiatos mysteriis, et viderunt omnia quæ intus erant; quin et testes sumus, quod Christi sanguis, sicut in tali tumultu contingit, in prædictorum militum vestes effusus est."<sup>2</sup>

263. S. CYRILLUS ALEXANDRINUS: "Audio aliquos esse qui mysticam Eulogiam nihil ad sanctificationem juvare dicant, si quid ex ea fiat reliqui in alium diem. Insaniunt vero qui hæc asserunt; neque enim alteratur Christus, neque sanctum corpus ejus immutatur, sed benedictionis vis ac facultas et vivificans gratia perpetua in illo existit."<sup>3</sup>

*Probatur III. ex antiquissima consuetudine conservandi eucharistiam.*

264. S. JUSTINUS M. testatur eam deferri a diaconis ad absentes—τοις ἀπαρτοι ἀποφέρουσι: "ad absentes perferunt."<sup>4</sup>

265. S. IRENÆUS monuit Victorem episcopum Romanum suos decessores consuevisse eucharistiam mittere ad episcopos, in quorum ecclesiis Pascha servabatur die eodem quo Judæi suum servabant—ταῖς ἀπο τῶν παραικίων τήρουσιν ἐπέμπον εὐχαριστίαν.<sup>5</sup>

266. TERTULLIANUS, uxorem suam ab ineundis novis nuptiis post mortem suam cum ethnico homine ut deterreat, id inter cætera adducit argumentum, quod maritus non satis veneraretur cœleste hoc Sacramentum, quod juxta illius ætatis disciplinam, fideles domi in arca parva tenebant, mane illud sibi administrantes: "Non sciet maritus, quid in occulto ante omnem cibum sumas."<sup>6</sup>

267. S. CYPRIANUS narrat: "Mulier quædam cum arcam suam in qua SANCTUM DOMINI fuerat, indignis manibus tentasset aperire, igne inde surgente deterrita est."<sup>7</sup>

268. S. BASILIUS M. dicit: "Alexandriæ et per Ægyptum unusquisque etiam de plebe, ut plurimum habet domi suæ communionem."<sup>8</sup>

269. Paulinus Diaconus in vita S. Ambrosii narrat S. Honoratum Vercellensem episcopum, cum in superiori tabulato decumberet, cœlitus de

(1) L. de schismate Donatistarum, n. i. 2.

(2) Ep. ad Innoc.

(3) Ep. ad Cælosyrium.

(4) Apologia i. n. 65.

(5) Apud Euseb. l. v. hist. Eccl. c. xxiv.

(6) L. ii. ad Uxorem.

(7) L. de lapsis.

(8) Ep. cclxxxix. ad Cæsariam Patriciam.



nocte admonitum, ut Ambrosio morituro subveniret: “qui descendens obtulit sancto DOMINI corpus: quo accepto, ubi glutivit, emisit Spiritum.”<sup>1</sup>

270. Græci ex antiquissima disciplina feria quinta majoris hebdomadæ eucharistiam consecrant, infirmorum causa per annum servandam, quam periclitantibus vita administrant. In Ecclesiis eam servant juxta parietem, coluntque, testante viatore Protestantico.<sup>2</sup>

271. Calvinus ipse fassus est veteris Ecclesiæ exemplum suffragari consuetudini servandi eucharistiam ut ægrotis administretur, cui tamen reluctari inverecundus ausus est. “Quorsum igitur,” ait, “evadet altera (*consecratio*) cujus vis ad ægrotos usque pervenit? Sed enim qui sic faciunt, habent veteris Ecclesiæ exemplum. Fateor: verum in re tanta et in qua non sine magno periculo erratur, nihil tutius est, quam ipsam veritatem sequi.”<sup>3</sup>

#### OBJECTIONES SOLVUNTUR.

272. *Obj.* 1. Ecclesia Hierosolymitana, teste Hesychio, solebat comburere quod supererat ex eucharistia.<sup>4</sup> Ecclesia Constantinopolitana reliquias eucharistiæ pueris e scholis evocatis dabat manducandas.<sup>5</sup> Nonnunquam cadaveribus eucharistia inserebatur. Vino consecrato intinxit calamus Theodorus Papa, Pyrrhi Constantinopolitani, monothelismi patroni, damnans errorem. Episcopi qui Photium damnarunt illud exemplum imitati sunt! Augustinus narrat mulierem cataplasma ex eucharistia confecisse, quo sanatus est filius ejus qui ægrotabat.<sup>6</sup> Hæc male conveniunt fidei de Christo in eucharistia præsentem, absoluta jam actione sacramentali.

*Resp.* Plurimæ quidem pro temporum locorumque diversitate fuerunt consuetudines, quas cum reverentia eucharistiæ debita ægre conciliamus. Cæterum indubia aliunde habentur documenta fidei ubique vigentis de præsentia Christi in Sacramento quamdiu manebant species. Equidem id semper pro re explorata habitum est, Christum ea ratione adesse, qua nil pati possit, quascumque vices species sacramentales contigerit subire. Quando hæc commode servari non poterant, vel haud erant necessariae, hostiis in ægrotorum communionem aliàs jam servatis, Hierosolymis igni tradebantur, puriori scilicet elemento, sicut de reliqua victimarum carne in veteri Testamento præceptum est. Nicephorus testatur incorruptis pueris et jejunis particulas illas distributas fuisse, et eas immaculatum divinumque corpus Domini vocat, miraculumque narrat quod ea occasione contigit,

(1) In Vita S. Ambrosii.

(2) In opere Perpétuité de la foi, vol. i. l. ii. ch. iv. p. 117.

(3) Inst. l. iv. c. xvii. n. 39.

(4) L. ii. in Levit. c. viii.

(5) Nicephorus l. xvii. hist. Eccl. c. xxv.

(6) L. iii. op. imperf. c. lxii.



puero judaico in {fornace ardente per tres dies servato illæso, quum pater iratus eum immisisset, eo quod, inter pueros christianos, errore ad sacras particulas percipiendas accessisset. Reprobavit autem Ecclesia morem eucharistiam in os mortuorum immittendi;<sup>1</sup> qui tamen in fide de corpore Domini, resurrectionis pignore, habuit originem. Ex eadem fide contigit, ut Theodorus et episcopi ad horrorem hæreseos et schismatis declarandum, exemplo sane stupendo, ipso Christi sanguine signarent decretum. Quod de muliere pia narrat Augustinus, ex eadem profectum est fide, cui Deus testimonium tulit.

(1) Conc. Carthag. iii. c. vi.

## CAPUT XII.

## DE ADORATIONE EUCHARISTIÆ.

273. Quum Christus in eucharistia sit præsens, summo cultu honorandus est, uti recte docent Tridentini patres : “ Nullus dubitandi locus relinquitur, quin omnes Christi fideles pro more in Catholica Ecclesia semper recepto, patriæ cultum qui vero Deo debetur, huic sanctissimo Sacramento in veneratione adhibeant. Neque enim ideo minus est adorandum quod fuerit a Christo Domino, ut sumatur, institutum ; nam illum eundem Deum præsentem in eo adesse credimus, quem Pater æternus introducens in orbem terrarum, dicit : Et adorent eum omnes angeli Dei ; quem Magi procidentes adoraverunt, quem denique in Galilæa ab Apostolis adoratum fuisse, Scriptura testatur.”<sup>1</sup> Anathemate idcirco feriunt hunc eucharistiæ impugnantes cultum : “ Si quis dixerit, in sancto eucharistiæ Sacramento Christum unigenitum Dei Filium non esse cultu patriæ, etiam externo, adorandum ; atque ideo nec festiva peculiari celebritate venerandum ; neque in processionibus, secundum laudabilem et universalem Ecclesiæ Sanctæ ritum et consuetudinem, solemniter circumgestandum, vel non publice, ut adoretur, populo proponendum, et ejus adoratores esse idololatrias ; anathema sit.”<sup>2</sup>

274. Ex novatoribus ipsis fuerunt qui agnoscerent Christum esse colendum in eucharistia, si adesset : “ Nos semper” inquit Calvinus, “ sic ratiocinati sumus, si Christus est in pane, esse sub pane adorandum.”<sup>3</sup> Beza etiam consentit.<sup>4</sup> Lutherus aliquando docuit Christum colendum in eucharistia in actione Sacramentali ;<sup>5</sup> aliquando negavit.<sup>6</sup> Leibnitius adorationem eucharistiæ probat.<sup>7</sup> Anglicani genibus flexis recipiunt panem

(1) Sess. xiii. cap. v. Jeremias Taylor, episcopus ex Anglicana secta Catholicos, a crimine idololatriæ vindicat : “ The object of their adoration, that which is represented to them in their minds, their thoughts, their purposes (by which God principally, if not solely, takes estimate of human actions) in the B. Sacrament is the only true and eternal God hypostatically joined with his holy humanity, which humanity they believe actually present, under the Sacramental signs.” Liberty of Prophesying, Sect. xx.

(2) Can. vi.

(3) Tract Theol. de vera part. cœnæ.

(4) L. de cœna Domini.

(5) L. de formula Missæ.

(6) L. de Eucharistia ad Waldens.

(7) Syst. Theolog. p. 258.

et vinum eucharisticum ; sed Rubrica declarat nullam adorationem eorum, vel corporalis Christi præsentiae eo pacto intendi, Christi enim corpus naturale in cælo tantum adesse.<sup>1</sup>

## PROPOSITIO.

*Christus in eucharistiæ Sacramento etiam extra actionem sacramentalem, cultu latriæ, tum interno tum externo adorandus est.*

*Probatur I. ex Scripturis.*

275. Liqueat adorationem Christo præstandam, et humanæ ejus naturæ utpote divina subsistentia præditæ: de Christo enim in orbem terræ a Patre introducto dicitur: “ Et adorent eum omnes angeli Dei.”<sup>2</sup> “ In nomine Jesu omne genu flectatur.”<sup>3</sup>

*Probatur II. ex Patribus.*

276. S. CYRILLUS HIEROSOLYMITANUS dicit: “ Tum vero post communionem corporis Christi, accede et ad sanguinis poculum, non extendens manus, sed pronus, et adorationis ac venerationis in modum dicens, Amen.”<sup>4</sup>

277. S. AMBROSIVS: “ Per scabellum terra intelligitur,” explicat scilicet illud Psaltis: *Adorate scabellum pedum ejus;* “ per terram autem caro Christi, quam hodie quoque in mysteriis adoramus.”<sup>5</sup>

278. S. GREGORIUS NAZIANZENSIS, in oratione de obitu sororis suæ Gorgoniæ, narrat “ illam ad altare cum fide procubuisse, ipsumque qui super eo honoratur cum ingenti clamore invocasse.”<sup>6</sup>

279. S. AUGUSTINUS: “ Quia in ipsa carne hic ambulavit, et ipsam carnem nobis manducandam ad salutem dedit. Nemo autem carnem illam manducat, nisi prius adoraverit, inventum est quomodo adoretur tale scabellum pedum Domini, et non solum non peccemus adorando, sed etiam peccemus non adorando.”<sup>7</sup>

(1) “ No adoration is intended or ought to be done, either unto the Sacramental Bread or Wine there bodily received, or unto any corporal presence of Christ’s natural Flesh and Blood.” Communion. Buckeridge tamen ritum Anglicanum genibus flexis suscipiendi eucharistiam contra sectarios alios tuetur, adorationem ex Apostoli testimonio probans: “ As in St. Paul there is *mensa Domini*, ‘ the table of the Lord ;’ so there is *habemus altare*, ‘ we have an altar,’ &c. and the word altar, in the Fathers, is more common than the word table ; so that as the name of table may plead for sitting, so the name of altar enforceth worship, and sacrifice, and that implied adoration and kneeling.” Discourse concerning kneeling at the communion, p. 229. apud Oxonienses, tract. 81. p. 90.

(2) Heb. ii. 6.

(3) Phil. ii. 9.

(4) Catechesi v.

(5) L. iii. de Spir. S. c. xii.

(6) Orat. de ob.

(7) Enarr. in Ps. xcvi.

280. S. JOANNES CHRYSOSTOMUS: "Considera quæso; mensa regalis est apposita: angeli mensæ administrantes. Ipse Rex adest; et tu astas oscitans? Igitur adora et communica."<sup>1</sup>

*Probatur III. ex totius orbis christiani consuetudine vetustissima.*

281. De Græcorum moribus et doctrina illustre præbuit testimonium concilium Hierosolymitanum anno 1672: "Credimus supremo colendum honore, cultuque latriæ idem Domini corpus et sanguinem esse adorandum. Quippe Sanctissimæ Trinitatis, et corporis sanguinisque Domini una est adoratio. Credimus ante usum, statim a consecratione, ac post usum id quod sacris in pyxidibus communioni moribundorum asservatur, corpus esse Domini verum." De Russis testatur Olearius Lutheranus eos eucharistiam adorare. De Armenis, Syris, et sectis omnibus Orientalibus id omnino constat, quamvis non iidem sint ritus ubique, supremi cultus indicia. Ipsi Anglicani genu flectendi ritum dum sumitur eucharistia retinuerunt, quamvis novitiis opinionibus obsequentes eum adorationem haud indicare doceant nonnulli, juxta Rubricam; aliis contra sentientibus.

#### OBJECTIONES.

282. *Obj.* 1. Apostoli non procubuerunt, Christo eis eucharistiam porrigente.

*Resp.* Non semper, nec eadem ratione, adorationis indicia præstantur; nec enim leguntur Apostoli coram Christo procumbere consuevisse, quamvis eum Dominum ac Deum suum agnoverint.

283. *Obj.* 2. Pleraque cultus indicia quæ eucharistiæ impræsentiarum exhibentur, vetustis temporibus ignota fuerunt, v: g. benedictionis ritus, processiones, ipsa hostiæ elevatio in Missa: quorum pleraque apud Orientales adhuc non obtinent.

*Resp.* Indicia cultus varia exhibentur, pro temporum varietate, sed adoratio Christi in eucharistia semper viguit, uti liquet ex laudatis testimoniis. Occasione hæreseos contigit ut plura darentur fidei de hoc mysterio argumenta, sicut et divinitas Christi magis claruit, Ario eam impugnante. Orientalium quod spectat mores, a nostris quidem plurimum discrepant, quamvis et hi nobiscum credant corpus et sanguinem Christi adesse, et ea supremo colant obsequio, cujus documenta in liturgiis plurima attulimus.

284. *Obj.* 3. Adoratio Christo in eucharistia præstita adversatur Sacramenti institutioni, nam corporis et sanguinis symbola dedit Christus, non sui, et divinitatis.

*Resp.* Quum Christus dicat se dare corpus et sanguinem suum, sequitur necessariò eum totum adesse, nam humana ejus natura divinæ indissolu-

(1) Hom. iii. in ep. ad. Eph.

bili nexu conjuncta est hypostatica unione. Igitur adoratio debetur ei, in Sacramento vere præsentì.

## ANIMADVERSIONES.

285. Præter solemnem celebrationem institutionis Sanctissimi hujus Sacramenti quæ feria quinta majoris hebdomadæ fit, institutum est festum quod dicitur *Corpus Domini*, anno 1246, ab Archiepiscopo Tolosano, quod ad universam Ecclesiam anno 1263 extendit Urbanus IV. Non tantum in templis, sed et per vicos solemni pompa circumferebatur hostia sacra, ut publicus honor Christo tribueretur, sicut olim solemniter arca lata est. Supplicationes illæ adhuc fiunt in regionibus Catholicis.

286. *Benedictio* Sanctissimi Sacramenti dici solet ritus minus sollemnis, quo Christus in Sacramento colitur, *benedictione* ei prolata, eo sensu quo in Apocalypsi angeli et seniores dicunt benedictionem sedenti in throno et Agno.<sup>1</sup> Benedicit etiam sacerdos populo, elato in modum crucis Sacramento, nullis autem prolatis verbis.

(1) Act. v. 13.

## CAPUT XIII.

## DE SACRAMENTI RATIONE.

287. Ex his quæ adeo fuse disseruimus liquet eucharistiam omnia habere quæ novæ legis constituunt sacramentum : est enim ritus externus a Christo institutus, ipsum gratiæ et salutis auctorem continens, quem qui digne recipiunt pignus habent certissimum vitæ æternæ, et cælestibus jam donantur muneribus. Hæc ex iis quæ Joannes refert a Christo dicta constant, et ex ipsa eucharistiæ natura, ut sileamus de tot traditionis divinæ monumentis in quibus Sacramentum vocatur, et quidem novæ legis præcipuum. Nec natura Sacramenti tollitur transubstantiatione, manent enim species, quæ signi habent rationem, Christum animæ cibum indicantes.

288. *Materia* ex qua eucharistia conficitur panis est et vinum. Erant olim hæretici *Artotyritæ* dicti, qui pane et caseo in ea conficienda utebantur, primos homines, qui de fructibus terræ et ovium offerebant, imitati.<sup>2</sup> Gnostici horrendum facinus patrare consuevisse dicuntur, contundebant scilicet abortivum infantem in mortario pistillo, eique mel et piper cum aromatibus et unguentis admiscebant : tum in unum collecti, e comminuto corpusculo infantuli digito delibabant, perfectum Pascha id appellantes.<sup>2</sup> De Cataphrygibus refert Augustinus : “ Sacramenta perhibentur habere funesta : nam de infantis anniculi sanguine, quem de toto ejus corpore minutis punctionum vulneribus extorquent, quasi eucharistiam suam conficere perhibentur, miscentes eum farinæ, panemque inde facientes : qui puer si mortuus fuerit, habetur apud eos pro martyre, si autem vixerit pro magno sacerdote.”<sup>3</sup>

289. Græci, Michael Cerulario, patriarcha Constantinopolitano, et Leone, archiepiscopo Acridano, in Bulgaria ducibus, anno 1053, Latinum morem utendi azymo pane carpere et improbare ausi sunt, quos idcirco gravissima perstrinxit epistola S. Leo IX. In concilio Florentino Græcos inter et Latinos convenit utrosque suum ritum sequi posse : “ Definimus in azymo, sive fermentato pane triticeo corpus Christi veraciter confici, sacerdotesque in alterutro, ipsum Domini corpus conficere debere, unumquemque scilicet, juxta suæ Ecclesiæ Orientalis, sive Occidentalis consuetudinem.” Quod consueverunt Græci objicere, panem azymum veri nominis panem non esse, quum ἄζυμος indicet massæ elationem, quæ fit fermento, fundamento caret, quum illa etymologia fictitia sit, et in voce Hebraica **אֶזְמוֹ**

(1) Epiphan. hæ. xlix. Aug. l. de hæ. c. xxviii.

(2) Epiph. hæ. xxvi.

(3) L. de hæ. c. xxvi.

el  
/ nulla sit ejusmodi ratio. Profecto panes propositionis azymi designantur *panes* in Scripturis,<sup>1</sup> et panis quem fregit Christus redivivus<sup>2</sup> azymus certe fuit, quum non licuerit Judæis fermentum intra ferias Paschales domi retinere. Quo pane usus sit Christus eucharistiam instituendo controversatur, Tourneminio et Calmeto assentientibus Græcis qui contendunt fermentatum panem ab eo adhibitum, putant enim pascha celebrasse pridie festi: plerisque Latinis contra dicentibus. Disputatur etiam utrum constans fuerit hac in re Græcorum et Latinorum disciplina. Qui velit rem penitus investigatam videre Calmetum adeat,<sup>3</sup> vel Sardagnam.<sup>4</sup> Panis *triticeus* adhibeatur necesse est, nec sufficit panis hordeaceus, vel alius qui panis simpliciter non vocatur. Triticeum panem, sed usualement exigunt Anglicani.<sup>5</sup>

290. *Vinum* ex vite necessaria est materia eucharistici poculi, genimen enim vitis a Christo constat adhibitum fuisse. Ebionitæ aquam in ejus locum suffecisse dicuntur. Tatianus et Encratitæ ejus asseclæ a vino, tamquam diaboli fructu, in mysteriis abstinebant;<sup>6</sup> quos imitati sunt Manichæi. Sæculo tertio Aquarii, seu Hydroparastatæ in Africa nomen sortiti sunt ab aqua tantummodo in calice adhibita, de quibus jam audivimus Cyprianum disserentem. Qui ex Armenis non sunt Ecclesiæ Romanæ conjuncti aquæ admixtionem negligunt, ne utramque videantur in Christo fateri naturam, errore quippe Eutychemo inficiuntur.<sup>7</sup> Eos reprobavit Trullana synodus. Lutherus aquæ admixtionem figmentum esse humanum dixit, ad regem Angliæ scribens anno 1522; sed postea se hæere significavit.<sup>8</sup>

291. De aquæ vino admixtione in calice Dominico silet Scriptura, sed constans veterum auctoritas et traditio nos certiores facit. Juxta Irenæum “temperamentum calicis suum sanguinem confirmavit”<sup>9</sup> Christus. Cyprianus eam ex professo vindicavit.<sup>10</sup> Hieronymus dicit: “Christus formât sanguinem suum in calice, vino et aqua mixtis.”<sup>11</sup> Concilium Carthaginense III. anno 397, decrevit: “ut in Sacramentis corporis et sanguinis Domini nihil amplius offeratur quam ipse Dominus tradidit, hoc est, panis

(1) I. Reg. xxi.

(2) Luc. xxiv.

(3) Dissertations sur la Bible.

(4) Theol. Dogm. Polem. t. vii.

(5) “To take away all occasion of dissention and superstition, which any person hath or might have concerning the Bread and Wine, it will suffice that the Bread be such as is usual to be eaten; but the best and purest Wheat Bread that conveniently may be gotten.” Rubric.

(6) Hær. xlvi. et xlvii.

(7) Nicephor. l. xviii. hist. Edcl.

(8) Formula Missæ.

(9) L. iv. adv. hæ. c. xxxiii.

(10) Ep. ad Cæcilian. lxiii.

(11) Comm. in e. xiv. Marci.

et vinum aqua mixtum.”<sup>1</sup> Rosenmüller ex consuetudine Judæorum idem infert : “ fuisse autem in eo calice vinum aqua temperatum, docet nos liber *Mischnaiot de benedictione VII.*”<sup>2</sup> Bloomfield dicit apud omnes in confesso esse, vinum aqua temperatum esse, moremque apud nos servatum agnoscit.<sup>3</sup> Rationes ob quas aqua admiscenda est indicat concilium Tridentinum : “ tum quod Christum Dominum ita fecisse credatur, tum etiam quia e latere ejus aqua simul cum sanguine exierit ; quod sacramentum hac mixtione recolitur, et cum aquæ in Apocalypsi Beati Joannis populi dicantur, ipsius populi fidelis cum capite Christo unio repræsentatur.”<sup>4</sup>

292. *Forma* eucharistiæ constat verbis Dominicis quibus conficitur. Manichæos Christum ubilibet sumi asserentes redarguit Augustinus : “ Noster panis et calix, non quilibet (quasi propter Christum in spicis et in sarmentis ligatum, sicut illi desipiunt,) sed certa consecratione mysticus fit nobis, non nascitur. Proinde quod non ita fit, quamvis sit panis et calix, alimentum est refectionis, non Sacramentum religionis. . . . Vobis autem per fabulam vestram in escis omnibus Christus ligatus apponitur, adhuc ligandus vestris visceribus, solvendusque ructatibus. Nam et cum manducatis Dei vestri defectione vos reficitis, et cum digeritis, illius refectione deficitis.” Calvinus dicit “ promissiones illas quibus conficitur consecratio, non ad elementa ipsa, sed ad eos qui recipiunt, destinari.” . . . “ Non hic magicam aliquam incantationem imaginari nos decet, ut satis sit verba demurmurasse, quasi ab elementis exaudiantur, sed verba illa vivam prædicationem esse intelligamus, quæ auditores ædificet.”<sup>5</sup> Græci schismatici recentiores censere dicuntur consecrationem non perfici, nisi invocatione Spiritus Sancti verbis Dominicis adjecta ; quem tamen ritum in concilio Florentino ita explicuerunt, ut consecratione jam verbis Dominicis perfecta, invocatio Spiritus Sancti fieret ut fructus nobis ex corpore et sanguine Christi proveniret.<sup>6</sup> Catharino placuit sententia quam Innocentius III. ante pontificatum fovit ;<sup>7</sup> Christum voluntate consecrasse panem et vinum, verbis deinceps certiores fecisse Apostolos se corpus et sanguinem suum iis vere dare : sed Theologi communiter tenent ipsis quibus nunc peragitur consecratio verbis, a Christo peractam, jussit enim Apostolis facere quod eum viderant facientem.

293. In decreto pro Armenis dicitur : “ forma hujus Sacramenti sunt verba Salvatoris, quibus hoc conficit Sacramentum ; sacerdos enim in persona Christi loquens hoc conficit Sacramentum. Nam ipsorum verborum

(1) Can. xxiv.

(2) In Matt. xxvi. 27.

(3) “ That the wine was mixed with water, all are agreed.” In Matt. xxvi. 27.

(4) L. xx. contra Faustum Manich. c. xiii.

(5) Inst. l. iv. c. xvii. n. 39.

(6) Acta conc. Flor Sess. xxv.

(7) L. iv de mysteriis Missæ.



virtute substantia panis in corpus Christi, et substantia vini in sanguinem convertuntur.” Ita perpetua docuit nos Ecclesiæ traditio.

294. S. IRENÆUS dicit: “Quando ergo et mixtus calix, et fractus panis percipit verbum Dei, fit eucharistia sanguinis et corporis Christi.”<sup>1</sup> S. GREGORIUS NAZIANZENUS dicit; “Inter sermones de carne, præcipui sunt illi Christi: ‘Hoc est corpus meum;’ illisque prolatis a sacerdote, qui non credit verum esse corpus Christi, sine dubio fidem derogat.”<sup>2</sup> Auctor librorum de Sacramentis, Ambrosio adscriptorum, rogat: “Quomodo potest, qui panis est, esse corpus Christi? Consecratione. Consecratio igitur quibus verbis est, et cujus sermonibus? Domini Jesu. Nam reliqua omnia quæ dicuntur, laus Deo defertur; oratio præmittitur pro populo, pro regibus, pro cæteris: ubi venit ut conficiatur venerabile Sacramentum, jam non suis sermonibus sacerdos, sed utitur sermonibus Christi. Ergo sermo Christi hoc conficit Sacramentum.”<sup>3</sup>

295. Forma integra, prout in Missali Romano præscribitur, hæc est: “Hoc est enim corpus meum.” “Hic est enim calix sanguinis mei, novi et æterni Testamenti, mysterium fidei, qui pro vobis, et pro multis effundetur in remissionem peccatorum.” Vox “enim” respondet γὰρ quod in Liturgia S. Marci utroque loco invenitur. “Pro vobis et pro multis” in Liturgia S. Jacobi habetur. ‘Æternum’ vocatur Testamentum et ‘fidei mysterium’ ex traditione Romanæ Ecclesiæ, Petro, uti videtur, auctore, nec enim occurrunt hæ voces in Græcis liturgiis. Tota forma accurate recitanda est, juxta Ecclesiæ ritum:<sup>4</sup> quod fatetur Græbius, Anglicanus eruditione sacra celebris,<sup>5</sup> qui tamen videtur invocationem Spiritus Sancti ad formam referre.

(1) L. v. adv. hæer. c. ii. alias iv.

(2) Orat. ii. de Paschate.

(3) L. iv. de Sac. c. iv.

(4) III. par. qu. 78. art. 3. in resp. ad 4.

(5) “The form of consecration and opinion of the consecrated elements, in which both Catholics and Heretics. in the age immediately succeeding the holy Apostles, have agreed together, and which, ever since, has been kept in all ancient Churches, and is by some of the Fathers expressly reckoned amongst the unwritten apostolical traditions, and is moreover hinted at in the very writings of the New Testament, cometh undoubtedly from our Lord himself, and ought, therefore, by no means, to be changed.” Græbe de forma Consecrationis Eucharistiæ, apud Oxonienses, Vol. iv. No. 78.

## CAPUT XIV.

## DE COMMUNIONE SUB UTRAQUE SPECIE.

296. Anno circiter 1412, Petrus Dresdensis et Jacobellus, Misna, Bohemiæ oppido, oriundus, Ecclesiæ disciplinam, qua sub specie tantum panis administratur eucharistia, impugnarunt, *Calixtini* ob calicis usum vindicatum nuncupati. Lutherus aliquando professus est se nolle disciplinam receptam hac in re mutare, nisi ex concilii generalis auctoritate;<sup>1</sup> deinceps consuluit episcopis ut utramque speciem concederent;<sup>2</sup> tandem dixit: "Si quod concilium statueret aut permetteret utramque speciem, nos nequaquam utraque uti vellemus, sed in despectum concilii, ejusque statuti, aut una aut neutra, et minime utraque uti vellemus, maledicturi universos, qui ex potestate aut statuto concilii utraque uterentur."<sup>3</sup> Calvinus scribit: "Ex eadem (*diaboli*) prodiit officina et altera constitutio, quæ dimidiam cænæ partem meliori populi Dei numero vel furata est vel eripuit."<sup>4</sup> Attamen Lutherani et Calviniani aliquando permiserunt abstemiis sub specie panis communicare.<sup>5</sup> Recte "monet Hugo Grotius in adnotatis in *Cassandri consult*, p. 161 nihil aliud esse, quod hac in re obstat concordiae, præter atroces adcusationes illas, quibus protestantium nonnulli Ecclesiam Romanam heic sacrilegii ream faciant; quum tamen initio Lutherus, Melancthon, Bucerus crediderint sine peccato sub uno symbolo hoc Sacramentum sumi posse."<sup>6</sup>

297. Id in confesso est apud omnes, publicam communionem, per duodecim priora Ecclesiæ sæcula, plerumque sub utraque specie administratam fuisse,<sup>7</sup> quam tamen antea arbitrio fidelium relictam, Gelasius pontifex quinto sæculo præcepto injunxit,<sup>8</sup> quum Manichæorum errore infecti, a specie vini abhorrentes, alteram tantum speciem reciperent. Constat pariter ex plurimis antiquitatis monumentis privatam communionem plerumque quolibet sæculo sub altera tantum specie tributam.<sup>9</sup>

(1) In decl. Serm. de Euch.

(2) In assert. art. xvi.

(3) D. de formula Missæ.

(4) L. iv. Inst. c. xvii.

(5) Vide Calvinian. discipl. c. xii. tit de cœna, art. vii. apud Bossuet in expos. fidei cath.

(6) Apud Walchium introd. l. i. c. iii. § xlii. p. 339.

(7) Vide Card. Bona. l. xi. rerum liturgie c. xviii. § i.

(8) Apud Gratian. de Consecr. dist ii. cap. xii.

(9) Bona, ubi supra.

298. Mutatio disciplinæ de publica communione contigit sensim sine sensu, occasione, uti videtur, effusionis sacri poculi, quæ in fidelium turba facile contingebat. Huic accessit quod diaconorum qui sacrum propinarent calicem copia non semper haberetur, et vini etiam in plurimis regionibus esset inopia, et non parvus foret numerus abstemiorum, vel eorum qui ex eodem cum aliis poculo bibere refugerent. Consuetudo jam invecta probata est concilio Constantiensi, quod eam merito vindicavit: “Cum huiusmodi consuetudo,” inquit patres Constantienses, “ab Ecclesia et sauctis patribus rationabiliter introducta, et diutissime observata sit, habenda est pro lege, quam non licet reprobare, aut sine autoritate Ecclesiæ pro libito mutare.”<sup>1</sup> Ad argumenta intelligenda quæ hac in re allaturi sumus, juvat animadvertere per *concomitantiam* sanguinem dici cum corpore in eucharistia adesse, ob naturalem conjunctionem, quum corpus Christi jam non sit exangue, sed vivum. Ea etiam ratione divinitas Christi in Sacramento adest, quum humana Christi natura divinam habeat subsistentiam. Inde liquet totum Christum sub alterutra specie recipi.

299. Christus etiam sub singulis cujusque speciei partibus, separatione facta, totus continetur; quum enim dividi nequeat, immortalis jam et gloriosus, et nulla sit ratio potior cur, separatione speciei partium facta, sub altera parte sit præsens, necesse est eum fateri sub qualibet parte integrum manere. Constat ex liturgiis fractionem hostiæ semper fieri consuevisse, et Christi corpus sanguini admisceri dici, dum pars hostiæ in calicem dimitteretur, et illud in parte altera adesse simul agnitum.

300. Merito igitur Tridentini patres mysterii naturam et antiquitatis fidem moresque perpendentes, decreverunt: “Si quis negaverit, in venerabili Sacramento eucharistiæ sub unaquaque specie, et sub singulis cujusque speciei partibus, separatione facta, totum Christum contineri; anathema sit.”<sup>2</sup> Explicuerunt etiam concomitantiam, de qua supra locuti sumus: “Semper hæc fides in Ecclesia Dei fuit, statim post consecrationem, verum Domini nostri corpus, verumque ejus sanguinem sub panis et vini specie, una cum ipsius anima et divinitate existere, sed corpus quidem sub specie panis, et sanguinem sub vini specie ex vi verborum: ipsum autem corpus sub specie vini, et sanguinem sub specie panis, animamque sub utraque, vi naturalis illius connexionis, et concomitantiae, qua partes Christi, qui jam ex mortuis resurrexit, non amplius moriturus, inter se copulantur: divinitatem porro propter admirabilem ejus cum corpore et anima hypostaticam unionem.”<sup>3</sup> De hac concomitantia varie sensit Lutherus, eam agnoscens,<sup>4</sup> vel irridens,<sup>5</sup> pro animi mobilitate. Brentius, Chemnitius, Leibnitius aliique eam agnoverunt.

(1) Sess. xiii.

(2) Sess. xiii. can. iii.

(3) Ibidem.

(4) In assert. art. xvi.

(5) Inform. ad quemdam amicum de commun.

301. De communione sub utraque specie decrevit synodus Tridentina : “ Si quis dixerit, ex Dei præcepto, vel necessitate salutis, omnes et singulos Christifideles utramque speciem sanctissimi eucharistiæ Sacramenti sumere debere, anathema sit.” “ Si quis dixerit, Sanctam Ecclesiam Catholicam non justis causis, et rationibus adductam fuisse, ut laicos, atque etiam clericos non conficientes, sub panis tantummodo specie communicaret, aut in eo errasse, anathema sit.” “ Si quis negaverit, totum et integrum Christum, omnium gratiarum fontem et auctorem, sub una panis specie sumi, quia, ut quidam falsò asserunt, non secundum ipsius Christi institutionem sub utraque specie sumatur, anathema sit.”<sup>1</sup>

## PROPOSITIO.

*Nullò Dei præcepto, nullaue necessitate salutis omnes Christi fideles utramque speciem sanctissimi eucharistiæ Sacramenti sumere debent.*

*Probatur I. ex natura Sacramenti.*

302. Sacramentum constat corpore et sanguine Christi, quæ a se invicem non separantur, nam “ Christus resurgens ex mortuis jam non moritur, mors illi ultra non dominabitur.”<sup>2</sup> Ergo totus recipitur Christus sub alterutra specie : quamvis enim vi verborum corpus Christi tantum sub panis specie ponatur, concomitantia tamen, naturali scilicet conjunctione, sanguis quoque adest.

*Probatur II. argumento negativo.*

303. Si quod sit Dei præceptum, illis Christi verbis continetur : “ Bibite ex hoc omnes : ”<sup>3</sup> si qua necessitas salutis, ex illis verbis derivatur : “ Nisi manducaveritis carnem Filii hominis, et biberitis ejus sanguinem, non habebitis vitam in vobis.”<sup>4</sup> Attamen divinum præceptum omnes obstringens fideles priori illo testimonio non probatur, nam præceptum adstantibus Apostolis datum est, et ab ipsis statim impletum, uti refert Evangelista Marcus : “ Et biberunt ex illo omnes.”<sup>5</sup> Alterum autem testimonium præceptum quidem ostendit corpus et sanguinem Christi recipiendi, cui tamen satisfit alterutram sumendo speciem, corpus enim a sanguine non separatur, ideoque utrumque sumitur sub alterutra specie, uti ingenue fateatur Leibnitius : “ Et quidem negari non potest, sub alterutra specie integrum sumi Christum vi concomitantia, ut loquuntur theologi, neque enim caro ejus a sanguine separata est.”<sup>6</sup>

*Probatur III. argumento positivo ex Scripturis.*

304. Christus dicit : “ Si quis manducaverit ex hoc pane, vivet in æter-

(1) Sess. xxi. Can. i. ii. iii.

(2) Rom. vi. 19.

(3) Matth. xxvi. 27.

(4) Joan. vi. 54.

(5) Marci. xiv. 23.

(6) System. Theolog. p. 250.

num : et panis quem ego dabo, caro mea est pro mundi vita. . . . Qui manducat me, et ipse vivet propter me. . . . Qui manducat hunc panem, vivet in æternum.”<sup>1</sup> Vita æterna promittitur manducanti panem illum, carnem scilicet Christi ; et qui eum sumit, manducare Christum dicitur, totum et integrum, corpus utique et sanguinem. Ergo non extat præceptum divinum vel salutis necessitas, ut omnes alteram sumant speciem.

*Probatur IV. ex vetustissima Ecclesiæ consuetudine.*

305. Constat sæpissime privatam communionem sub alterutra specie administratam fuisse. Eusebius narrat, ex Dionysio Alexandrino, presbyterum ægrotum misisse puerum ad Serapionem moribundum, et jussisse ut particulam sacræ hostiæ madefactam—*βραχὺ τῆς εὐχαριστίας ἐπέδωκεν τῷ παιδαριῷ ἀποβρίξαι κελεύσας*<sup>2</sup>—seni in os instillaret, qua ille paulatim absorpta continuò exhalavit animam.<sup>3</sup> S. Ambrosius moribundus corpus Domini suscepit a S. Honorato, statimque decessit. Græci adhuc tantummodo sacras particulas vino communi humectant, antequam eas ægrotantibus dent.<sup>4</sup>

306. Infantibus statim post baptismum solebat guttula sanguinis pretiosi infundi, uti adhuc fit apud Græcos.<sup>4</sup> Miraculum narrat Cyprianus contigisse, quando puella quæ apud nutricem merum idolorum gustaverat, a matre ad Ecclesiam delata esset ad sacrum bibendum sanguinem : “ Ubi verò solemnibus adimpletis calicem diaconus offerre præsentibus cœpit, et accipientibus cæteris locus ejus advenit ; faciem suam parvula INSTINCTU DIVINÆ MAJESTATIS avertere, os labiis obturantibus premere, calicem recusare. Perstitit tamen diaconus, et reluctanti licet de Sacramento calicis infudit. Tunc sequitur singultus et vomitus. In corpore atque ore violato eucharistia permanere non potuit. Sanctificatus in Domini sanguine potus, de pollutis visceribus erupit, tanta est potestas Domini, tanta majestas.”<sup>5</sup>

307. Pueris innocentibus apud Græcos particulæ dabantur manducandæ, quoties magna earum copia supererat : “ consuetudo a multo tempore imperanti urbi fuit, ut quum plusculum de partibus immaculati divinique corporis Domini et Dei et Servatoris nostri Jesu Christi reliquum esset, sacerdotes pueros incorruptos—*ἀφθόρους*—ex eis qui ad præceptores in ludum literarium eunt, accerserent, qui jejuni reliquias eas ederent.”<sup>6</sup>

308. Persecutionis occasione fidelibus permittebatur ut hostias arca

(1) Joan. vi. 52.

(2) Carpunt Protestantici nonnulli scriptores Valesium quod particulam aqua intinctam affirmaverit : sed eam esse vim vocis ex eo satis constat quod *ἀποβρέγμα* aqua dilutum significet, et *βρέχω* ad pluviam referatur : Cæterum seu vino seu aqua intinctum intelligatur, idem est, quum ex narratione liqueat liquorem a puero non allatum, sed apud senem repertum, et proinde non esse vinum consecratum.

(3) Vide Goar. in notis ad Euchologium.

(4) Vide Leonem Allatum in adnot. de comm. Oriental

(5) L. de Lapsis.

(6) Apud Nicephorum hist. Eccl. l. xvii. c. xxv.

inclusas domum secum deferrent, easque suis manibus reciperent, sacerdotis copia, qui communionem illis præberet, haud suppetente. Tertulliani verba jam citavimus de pane ante omnem cibum gustando. S. Cyprianus dicit: “Cum quædam arcam suam, in qua Domini sanctum fuit, manibus indignis tentasset aperire, igne inde surgente deterrita est, ne auderet attingere.”<sup>1</sup> Monachis in eremo, imo fidelibus universis in Ægypto, id concessum Basilius narrat: “Illi omnes qui per eremos vitam monasticam instituunt, ubi copia non suppetit sacerdotis, cum habeant domi communionem, de suis manibus illam percipiunt. Alexandriae autem et per Ægyptum unusquisque etiam de plebe, ut plurimum habet domi suæ communionem. . . . Nam et in Ecclesia ipse sacerdos partem aliquam in manus tradit, et illam apprehendit qui percipit cum omni libera potestate, atque ita suis propriis manibus eandem suo ori admotam ingerit.”<sup>2</sup> Narrat Ambrosius fratrem suum Satyrum e naufragio evasisse incolumem, hostia sacra collo alligata: “Etenim ligari fecit in orario, et orarium involvit in collo, atque ita se deiecit in mare, non requirens de navis compage resolutam tabulam, cui supernatans juvaretur, quoniam fidei solius arma quæsierat.”<sup>3</sup>

309. Publica etiam communio aliquando fiebat sub una specie, libertate utriusque recipiendæ plerumque suscipientibus relicta. Narrat Cyprianus hominem maculatum crimine, cinerem se manibus ferre, accepta eucharistia, invenisse, dono cælesti ob crimen sublato: “Ipse maculatus, sacrificio sacerdote celebrato, panem cum cæteris ausus est latenter accipere, sanctum Domini edere, et contrectare non potuit: cinerem ferre se apertis manibus invenit.”<sup>4</sup> Sozomenus et Nicephorus narrant mulierem Macedonianam, viro jam ad fidem Catholicam converso ut gratificaretur, simulasse eucharistiæ a manibus S. Joannis Chrysostomi receptionem, eam scilicet manu acceptam retinuit—ἀπὲρ ἐδέξατο κατέχουσα—et ori admovit panem, quem domo attulerat ancilla, sed pane obdurescente instar lapidis, eam ad fidem ex animo traductam. Lapidem cum dentium vestigio in Ecclesia Constantinopolitana suo tempore servari dicunt, ne fides rem miram narrantibus denegetur.<sup>5</sup> Liquet autem eam non potuisse simulare, si e calice unusquisque biberet. Libertatem illam e calice bibendi tempore Leonis Magni extitisse constat, qua tamen abusos esse Manichæos graviter questus est pontifex: “Cum ad tegendam infidelitatem suam nostris audeant interesse mysteriis, ita in Sacramentorum communione se temperant, ut interdum tutius lateant: ore indigno corpus Christi accipiunt, sanguinem autem redemptionis nostræ haurire omnino declinant.”<sup>6</sup>

(1) L. de lapsis.

(2) Ep. cclxxxix. ad Cæsariam Patriciam.

(3) Orat. de obitu fratris.

(4) L. de lapsis.

(5) Sozomen. l. viii. hist. Eccl. c. v. et Nicephorus l. xiii. c. vii.

(6) Serm. iv. de Quadrag.

*Probatur V. irrefragabili Ecclesiae iudicio.*

309. Quum præsules Ecclesiae divinitus constituti sint ministri Christi, et dispensatores mysteriorum Dei, iisque ad mundi usque consummationem se adfuturum pollicitus sit Christus, numquam fieri poterit ut ipsi sua auctoritate sanciant aliquid de Sacramentis administrandis, quod vel naturæ Sacramenti, vel divino præcepto adversetur, vel salutis subsidium necessarium fidelibus subtrahat.

#### OBJECTIONES SOLVUNTUR.

310. *Obj.* 1. “Edictum æterni Dei est, ut omnes bibant: quod homo nova et contraria lege antiquare et abrogare audet, edicens, ne omnes bibant.” Ita Calvinus.<sup>1</sup>

*Resp.* Edictum illud nullatenus probatur, nam verba Christi ad Apostolos directa legem omnibus latam non demonstrant, præsertim Marco testante præceptum statim impletum. Syriaca, Arabica, et Æthiopica versiones, prout exhibentur a Waltonio, habent: “Bibite ex hoc omnes vos;” quod ostendit ita Christi verba intellecta. Onus probandi iis est qui edictum affirmant, quod si latum fuerit, nemo est qui auderet legem humanam ei objicere.

311. *Obj.* 2. “Cur de pane simpliciter dixit, ut ederent, de calice, ut omnes biberent? Ac si Satanæ calliditati ex destinato occurrere voluisset.” Ita Calvinus.<sup>2</sup>

*Resp.* Ideo hoc servatum est discrimen, quia panis in plures fractus partes consecratus est, ideoque unusquisque corpus Christi seorsim accepit; poculum unum omnibus est datum. Eæ igitur voces: “bibite ex hoc omnes:” idem sonat ac, “accipite et dividite inter vos.”<sup>3</sup>

312. *Obj.* 3. “Dominus, panem ostendens, corpus suum esse dicit: calicem dum ostendit, calicem vocat. Humana rationis audacia contra reclamat, panem esse sanguinem, vinum esse corpus: ac si Dominus nulla causa corpus suum a sanguine et verbis et signis distinxisset.”<sup>4</sup>

*Resp.* Humanæ rationis audacia in eo apparet, quod Christo dicenti corpus esse et sanguinem suum quæ tradit, haud credatur, et symbola et signa pro veritate donorum cælestium prædicentur. Agnoscimus sub specie panis, vi verborum, esse corpus Christi, sub specie vini, vi verborum, esse sanguinem ejus; nec tamen audemus corpus a sanguine separare, sed utrumque nexu indissolubili conjunctum, ex quo resurrexit a mortuis, credimus. Corpus a sanguine distingui verbis Domini novimus, et quidem sapientissimo consilio, ut mors ejus, sanguinis fusione in cruce,

(1) L. iv. Inst. c. xvii. n. 47.

(2) Ibidem, n. 50.

(3) Luc. xxii. 17.

(4) Inst. l. iv. c. xvii. n. 47.



in mysteriis exhiberetur. Ideo quoties Sacrificium offertur, et Sacramentum conficitur, illa corporis a sanguine separatio quæ in cruce facta est, repræsentatur, quamvis pro conditione Christi corporis præsentis, sanguis cum eo jungatur.

313. *Obj.* 4. “ Si designare se totum voluisset, dicere poterat, *ego sum*, qualiter loqui in Scripturis consuevit, non autem, Hoc est corpus meum, hic est sanguis meus.”<sup>1</sup>

*Resp.* Dixit Christus de Sacramento utique loquens. “ Qui manducat ME, et ipse vivet propter me.” Credat igitur Calvinus assecla Christum totum nobis dari. Dixit autem Sacramentum instituens verba illa, ut certos nos faceret verum ejus corpus et sanguinem esse quæ dat munera in mysteriis.

314. *Obj.* 5. “ Calicem seorsum a pane statuit, ut doceat, se ad potum non minus quam cibum sufficere. Nunc tollatur pars una, nonnisi dimidium alimentorum in eo reperiemus.”<sup>2</sup>

*Resp.* Frivola est et inepta ratio; non enim alimentorum symbolis variis indiguit, ut quibus nos reficiat et refocillet rationibus exhiberet; sed suæ mortis pro mundi salute memoriam perpetuo celebrandam, corpore et sanguine suo præsentibus, jussit.

315. *Obj.* 6. “ An mentiebatur Paulus, quum dicebat Corinthiis (1 Cor. xi. 23,) se accepisse a Domino, quod illis tradiderat? Nam postea, traditionem declarat, ut omnes promiscue utroque symbolo communicarent.”<sup>3</sup>

*Reep.* Non mentitus est Paulus, qui se accepisse a Domino dicit, eum corpus suum et sanguinem in qua nocte tradebatur Apostolis dedisse; sed mentitur Calvinus, (vocem ab ipso liceat mutuari) dicens Paulum traditionem declarare ut omnes promiscue utroque symbolo communicarent. Nihil hujusmodi ab ipso est dictum, quamvis moneat fideles, manducando panem hunc et calicem bibendo se mortem Domini annuntiare. Inde quidem inferre licet sub utraque specie eucharistiam tunc ministratam, quamvis sub alterutra corpus et sanguinem contineri ex iis quæ addit manifesto sequatur: “ Itaque quicumque manducaverit panem hunc, VEL biberit calicem Domini indigne: reus erit corporis et sanguinis Domini.”<sup>4</sup> Perperam Anglicani Bibliorum interpretes verterunt: *and*; sacrum textum vitiantes, ut argumentum inde desumptum declinarent.

316. *Obj.* 7. “ Cur meliore illo sæculo ab Apostolis ad mille usque annos postea, sine exceptione omnes fiebant utriusque symboli participes? ignorabatne vetus Ecclesia, quos Christus convivas ad cœnam suam admisisset?”<sup>5</sup>

(1) Inst. l. iv. c. xvii. n. 47.

(2) Ibidem.

(3) Ibidem n. 50.

(4) 1 Cor. xi. 27.

(5) Calvinus Inst. l. iv. c. xvii. n. 48.



*Resp.* Optime quidem pro ratione locorum et temporum administrabatur eucharistia publice sub utraque specie ; sed et laudabiliter recentioribus temporibus immutata est disciplina, ut periculo effusionis obviam iretur, et iis consuleretur qui in septentrionalibus regionibus, ubi vini laboratur inopia, degunt. Præsertim verò falsa propugnata sententia de Sacramenti natura, quod in pane et vino constituebant novatores, necesse fuit disciplinam sensim sine sensu inductam tueri.

317. *Obj.* 8. Lege olim præscriptum est ut omnes sub utraque specie eucharistiam perciperent, et quorundam contraria consuetudo superstitionis damnata est : “ Sic enim loquitur Gelasius (de consecr. dist. 2. Cap. Comperimus) : Comperimus, quod quidam, sumpta tantummodo corporis sacri portione, a calice abstineant : qui procul dubio, quoniam nescio qua superstitione videntur adstricti, aut integra sacramenta percipiant, aut ab integris arceantur. Divisio enim istius mysterii sine grandi sacrilegio non admittitur.”<sup>1</sup>

*Resp.* Manichæos notat Gelasius, qui vinum a malo principio ortum censentes, a calice sacro abhorrebant, eo quod illud in eo conficiendo adhibitum fuerit. De iis questus fuerat S. Leo. In iis rerum adjunctis certe licuit jubere ut sub utraque specie administraretur, ne superstitione illa sacrilega lateret. Hæc est illa divisio mysterii quæ sine grandi sacrilegio non admittitur, quippe quæ Dominicum sanguinem rejicit ex superstitione impia, qua Creatori derogatur. Sic altero orto errore de Sacramenti natura, optime statuit Ecclesia disciplinam retinere jam inductam, ne error foveretur, quo in pane et vino Sacramentum constitutebatur.

318. *Obj.* 9. Frustra tales legislatores “ pericula obtendunt, quæ accidere possent, si omnibus passim exponeretur sacer hic calix : ac si ab æterna Dei sapientia prospecta ea et animadversa non essent.”<sup>2</sup>

*Resp.* Omnia sunt a Deo prævisa, qui tamen legem tulisse de utraque specie sumenda gratis dicitur. Idcirco Dei lege hac de re haud lata, Ecclesiæ erat id statuere circa Sacramentorum administrationem, quod pro temporum locorumque adjunctis expedire videatur.

319. *Obj.* 10. Mancum est Sacramentum, quale Catholici habent, et ab illo quod Christus instituit et tota celebravit antiquitas, diversum.

*Resp.* Integrum est Sacramentum, quum Christus totus adsit et detur, salutis æternæ ipse largitor. Cum Christi institutione omnino concordat, quod pertinet ad substantiam, est enim corpus et sanguis ejus. Sed ratio qua datur diversa est, sicut et adjuncta : quod nemo nobis vitio vertere debet qui non servet ad amussim omnia quæ in ejus institutione servata sunt. Quis autem dicat eucharistiam in diversorio vel privati alicujus

(1) Calvinus l. iv. Inst. e. xvii. n. 50.

(2) Ibidem.

hominis domo, post agni esum, vel aliud convivii genus, sub noctem, celebrandam esse ut quæ in ejus institutione contigerunt imitemur?

**ANIMADVERSIO.**

320. Quum administratio eucharistiæ sub utraque specie res sit disciplinæ, ex auctoritate suprema Ecclesiæ pendet. Indulsit calicis usum Bohemis et Moravis concilium Basileense; Germanis Pius IV, sed nullo cum fructu; inde enim vires capit error de Sacramenti natura, quapropter brevi indulgentiæ est derogatum, et disciplina universalis Ecclesiæ restituta.

## CAPUT XV.

## DE SUSCIPIENTIBUS EUCHARISTIAM.

321. Eucharistiam nonnisi a baptizatis hominibus suscipiendam docuit Justinus : “ Cujus nemini alii licet esse participi, nisi qui credat vera esse quæ docemus, atque illo ad remissionem peccatorum et regenerationem lavacro ablutus fuerit, et ita vivat ut Christus tradidit.”<sup>1</sup> Id consonum est iis quæ refert Lucas, baptismo initiatos esse eos qui Petro concionante ad fidem conversi sunt, quos deinceps panis fractione, eucharistiæ scilicet perceptione, donatos esse testatur. Lutherus pro more paradoxon tradidit : “ Optima dispositio est nonnisi ea, qua pessime es dispositus ; et e contrario tunc pessime es dispositus, quando optime es dispositus.”<sup>2</sup> Concilium Tridentinum e contra docet : “ Communicare volenti revocandum est in memoriam ejus præceptum : ‘probet autem seipsum homo.’ Ecclesiastica autem consuetudo declarat, eam probationem necessariam esse, ut nullus sibi conscius peccati mortalis, quantumvis sibi contritus videatur, absque præmissa sacramentali confessione ad sacram eucharistiam accedere debeat : quod a Christianis omnibus, etiam ab iis sacerdotibus, quibus ex officio incumbit celebrare, hæc sancta Synodus perpetuo servandam esse decrevit, modo non desit ipsis copia confessoris ; quod si necessitate urgente sacerdos absque prævia confessione celebraverit, quamprimum confiteatur.”<sup>3</sup> Anathema etiam tulit in Lutheri errores : “ Si quis dixerit, vel præcipuum fructum sanctissimæ eucharistiæ esse remissionem peccatorum, vel ex ea non alios effectus provenire, anathema sit.”<sup>4</sup> “ Si quis dixerit, solam fidem sufficientem præparationem ad sumendum sanctissimæ eucharistiæ Sacramentum ; anathema sit.”<sup>5</sup>

322. Equidem Apostoli monitum de conscientiae indagine—δοκιμαζέτω δὲ ἄνθρωπος ἑαυτόν—ostendit magna animi puritate opus esse, ut quis ad tantum Sacramentum secure accedat. Id liquet ex Justini verbis etiam, quæ mox recitavimus ; ex Cypriani gravissimis increpationibus, quibus temere accedentes, “ ante actam poenitentiam, ante exomologesim gravissimi atque extremi delicti factam, ante manum ab episcopo et clero impositam,”<sup>6</sup>

(1) Apologia i. n. 66.

(2) In concion. an. 1518 de præp. ad S. Euch.

(3) Sess. xiii. cap. vii.

(4) Sess. xiii. can. v.

(5) Ibidem, can. xi.

(6) Ep. x.

exagitat; ex Chrysostomi etiam documentis lucidissimis, quibus maximam exigit puritatem ut quis tanto beneficio fruatur.

323. Attamen in liturgiis plura occurrunt quæ peccatorum remissionem veluti Sacramenti fructum indicant: "Hæc nos communio purget a crimine:" . . . . "sit ablutio scelerum;" sed hujusmodi dicta respiciunt plenam delictorum indulgentiam, quæ tamen planxerit peccator, et quorum pœnitens veniam in tribunali assecutus fuerit, antequam divinum cibum degustare auderet.

324. Jejuni accedere debent ad eucharistiam fideles, adeo ut a media nocte nihil quantumvis minimum, vel cibi, vel potus, vel medicinæ sumere liceat. Vetustissima est hæc disciplina, in honorem tanti Sacramenti instituta, et occasione, uti verosimile est, excessuum qui Corinthi contigerunt. Eam memorat Tertullianus, uxorem a secundis nuptiis ut absterret: "Non sciet maritus quid secreto ante omnem cibum gustes."<sup>1</sup> Augustinus non dubitavit dicere: "Placuit Spiritui Sancto, ut in honorem tanti Sacramenti, in os Christiani prius Dominicum corpus intraret, quam exteri cibi. Nam ideo per universum orbem mos iste servatur."<sup>2</sup> Vita periclitantibus tamen non jejunis, tamquam *Viaticum* datur. Quod autem instituta fuerit eucharistia post cœnam, non obstat, oportebat enim agni paschalis typum in Christo mystice immolato implere, ideoque novum sacrificium veteri statim subjicere. Instituta autem eucharistia penes Apostolos erat ea statuere quæ ad quotidianam et perennem ejus celebrationem pertinebant; eos enim ministros suos, et dispensatores mysteriorum divinorum Christus constituit.

325. Juxta veterem Ecclesiæ disciplinam, quæ ad sæculum usque decimum, aut undecimum apud Latinos obtinuit, et quæ apud Græcos adhuc retinetur, parvulis statim post baptismum eucharistia ministrabatur, pretiosi sanguinis gutta ori infusa. Id fiebat ut divino munere donati intimius conjungerentur Christo, ipso sanctitatis auctore, et salutis, accepto. De artissima conjunctione patres aliqui ita locuti sunt ut eam prorsus necessariam esse viderentur dicere; sed dicta hujusmodi benignius sunt exponenda, quum baptizatis infantulis nemo salutem denegaverit. Augustinus, cujus testimonia necessitatem illam adstruere maxime videntur, docet: "si percepto baptismo de hac re vita emigraverit, soluto reatu cui originaliter erat obnoxius, perficitur in illo lumine veritatis, quod incommutabiliter manens in æternum, justificatos præsentia Creatoris illuminat."<sup>3</sup> Jure igitur optimo Tridentina "Synodus docet, parvulos usu rationis carentes nulla obligari necessitate ad sacramentalem eucharistiæ communionem; siquidem per baptismi lavacrum regenerati et Christo incorporati adeptam jam filiorum Dei gratiam in illa ætate amittere non possunt. Neque ideo

(1) L. ii. ad Uxorem c. v.

(2) Ep. liv. alias cxviii. ad Januarium.

(3) L. i. de pec. merit. et remiss. c. xix.

tamen damnanda est antiquitas, si eum morem in quibusdam locis servavit; ut enim sanctissimi illi patres sui facti probabilem causam pro illius temporis ratione habuerunt, ita certe eos nulla salutis necessitate id fecisse sine controversia credendum est.”<sup>1</sup> Decrevit etiam: “Si quis dixerit, parvulis, antequam ad annos discretionis pervenerint, necessariam esse eucharistiæ communionem.”<sup>2</sup> Antiquum morem a superstitionis labe meritò vindicant Oxonienses.<sup>3</sup>

326. Adulti tenentur divino præcepto ad percipiendam eucharistiam, juxta Christi verba: “Nisi manducaveritis carnem Filii hominis, et biberitis ejus sanguinem, non habebitis vitam in vobis.”<sup>4</sup> Ut illud urgerent Lateranenses patres, jusserunt fidelibus omnibus saltem semel in anno eucharistiam suscipere: quo nixi decreto Tridentini patres censuerunt: “Si quis negaverit, omnes et singulos Christi fideles utriusque sexus, cum ad annos discretionis pervenerint, teneri singulis annis saltem in Paschate ad communicandum, juxta præceptum sanctæ matris Ecclesiæ, anathema sit.”<sup>5</sup>

Hæc de Sacramento eucharistiæ disseruimus, fuse quidem si instituti nostri habeatur ratio, sed breviter pro rei gravitate. De ea prout Sacrificium est nunc agendum.

(1) Sess. xxi. cap. iv.

(2) Ibidem, can. iv.

(3) “Would not most men maintain, on the first view of the subject, that to administer the Lord’s supper to infants, or to the dying and insensible, however consistently pious and believing in their past lives, was a superstition, and yet both practices have the sanction of primitive usage.” Oxford Tracts, vol. ii. Advertisement.

(4) Joan. vi. 54.

(5) Sess. xiii. can. ix.

## TRACTATUS XI.

### PARS II.

# DE MISSÆ SACRIFICIO.

---

#### PRÆNOTANDA.

1. Sacrificii nomen latius sæpe sumitur pro actu quocumque cultus, vel virtutis quolibet exercitio, quo Deo placere studemus, dono aliquo oblato in ejus honorem, vel cupidatibus vi illata. Proprie autem sacrificium est actus supremi cultus quo Deus supremus rerum Dominus agnoscitur, re aliqua in illius honorem oblata. *Sacrificium* notionem animalis mactati in Dei honorem juxta communioem acceptationem ingerit. Sic quæ immolabantur apud Judæos ex legis præscripto animantia, sacrificia vocantur. Horum tria fuerunt genera, quorum unum totum comburebatur, עֹלָה idcirco dictum, *ascendens* scilicet, ὁλοκαυστος apud Græcos, ascendebat enim flamma victimæ ad supremum Dei dominium testandum. חַטָּאת *peccatum* dicebatur victima ad delicti veniam assequendam oblata. שְׁלֶמֶת duas victimarum species complectebatur, eas scilicet quæ ad impetrandum beneficium offerebantur, et eas quæ gratum animum ob beneficium acceptum testabantur. Præter sacrificia, oblationes quædam fiebant מִנְחָה ex simila oleo et thure; et libationes ex vino. Sacrificii nomen tribuitur oblationi ad Dei testandum supremum dominium factæ licet nulla sit mactatio victimæ: sic oblatio fructuum terræ a Caino facta, Deo sacrificium verum fuit. Incruentum sacrificium hujusmodi est, sanguis quippe non funditur: *cruentum* e contra vocatur sacrificium in quo victima mactatur, sanguine ejus fuso.

2. Christo adveniente, et in cruce mortuo, omnia vetera cessasse sacrificia res est explorata. Unica illius oblatione pretium pro nobis solutum constat, adeo ut nulla alia opus sit qua luantur peccata, nonnisi ipsius san-

quine delenda. Memoriale quoddam suæ mortis in eucharistia ab ipso relictum apud plerosque in confesso est; sed disputatur Catholicos inter et Protestantes, utrum veri sacrificii habeat rationem. Protestantes fere omnes negant; sed inter Anglicanos plurimi illud fatentur, quamvis gravissimo errore sacrificii rationem in pane et vino, tamquam symbolis corporis et sanguinis Christi, constituent. Dicunt igitur eucharistiam sacrificium esse *commemorative* et *mysticum*: nonnulli illud *verum, reale, impetratorium, et propitiatorium* prædicant, aliis latiori sensu vocem usurpantibus, paucis omnino victimam vere præsentem sisti, et manu Sacerdotis offerri agnoscentibus. Ipsi Oxonienses non satis suam mentem produnt, forsan quod principium ab ipsis traditum sequi velint, caute parceque de religionis arcanis disserentes.<sup>1</sup>

3. Sectarii omnes in his regionibus prorsus denegant eucharistiam esse sacrificium veri nominis, si exceperis quosdam ex Episcopalianis, qui nomine delectantur, rem abjiciunt. White, qui inter suos gratia maxime valuit, quum esset primus in hac regione suæ sectæ antistes, tamquam errorem notat quorundam Protestantium doctrinam, in eucharistia agnoscentium sacrificium: quapropter ab altaris et sacerdotibus vocibus se prodidit alienum.<sup>2</sup> Seabury, alter ejusdem sectæ præsul, aliter sensit; adeo inter se de vocibus dissident, rem, prout in Christi Ecclesia se habet, neuter agnoscens.

4. Ne verborum ambiguitate nos ludificentur Anglicani, id præ omnibus exigendum est, ut victimam vere præsentem, non *mystice* tantum, *spiritu-*

(1) "The doctrine of the early Church was this; that 'in the Eucharist, an oblation or sacrifice was made by the Church to God, under the form of his creatures of bread and wine, according to our Blessed Lord's holy institution, in memory of His Cross and Passion; and this they believed to be the 'pure offering' or sacrifice which the Prophet Malachi foretold that the Gentiles should offer; and that it was enjoined by our Lord in the words 'Do this for a memorial of Me;' that it was alluded to when our Lord or St. Paul spake of a Christian 'altar' (St. Matt. v. 23. Heb. xiii. 10.), and was typified by the Passover which was both a sacrifice, and a feast upon a sacrifice . . . . It is, then, to use our technical phraseology, 'a commemorative, *impetratory* sacrifice' which is all one with saying that it is well-pleasing to God; for what is well-pleasing to Him, how should it not bring down blessings upon us! They preferred to speak of it in language, which, while it guarded against the errors of their days, the confusion with the sacrifices of Jew or Pagan, expressed their reverence for the memorials of their SAVIOUR'S Body and Blood, and named it 'the awful and unbloody sacrifice,' or the like, as men would, with a sense of the unfathomable mystery of God's goodness connected therewith. This pleading of our SAVIOUR'S merits, by a sacrifice instituted by Himself, was (they doubted not) regarded graciously by God for the remission of sins; as indeed our Lord had said: 'This is My Blood which is shed for you and for many for the remission of Sins.' " Vol. iii. Tract 81. p. 5. London edition.

(2) The error referred to, is that the doctrine of the Eucharist involves the being therein a real or material sacrifice; an altar; and a priest, in the sense of an offerer of sacrifice." Dissertation on the Eucharist, Sect. iii. p. 389.

*liter*, et *sacramentaliter*, quo sensu voces hæ plerumque ab eis usurpantur, *sed vere, realiter, et substantialiter*. Hic cardo est controversiæ, nam si vera, realis, et substantialis agnoscatur præsentia, quæ nonnisi panis et vini in ipsam substantiam corporis et sanguinis Christi conversione, contingit, victima aderit, manu sacerdotis vere Deo oblata; ideoque *verum* et *proprium* erit sacrificium, quod commemorativum tamen, incruentum, et mysticum sit. Verum et proprium Sacrificium alio sensu prædicantes verbis ludunt.<sup>1</sup>

5. Apud Syros **ܥܕܝܩܐ**, SANCTUM, vocatur sacrificium eucharisticum, seu ritus integer illud celebrandi: *Λειτουργία* apud Græcos; *Missa* apud Latinos. Hujus vocis origo ad formulam qua dimittebantur catechumeni ante mysteriorum celebrationem, fideles, celebratione peracta, “Ite, Missa est,” referenda videtur; missa scilicet idem est ac missio, seu dimissio. In plerasque Europæ linguas vox adscita est, cum levi aliqua immutatione *Messa, Messe, Misa, Mass* apud Anglos. Jam Ambrosii ætate usu recepta erat: “Ego mansi in munere, Missam facere cœpi, orare in oblatione, Deum ut subveniret.”<sup>2</sup> Vocem non improbant aliqui Anglicani, qui et sacrificium ipsum agnoscere videri volunt.<sup>3</sup>

(1) “If we deny the Eucharist to be A REAL AND PROPER SACRIFICE we give the Papists a great advantage over us. Because they may easily prove from the institution of this Sacrament by CHRIST, from this and divers other texts of Scripture, and from the primitive Fathers of the Church that it is a Sacrifice.” Brett, presbyter Anglicanus: *The Christian Altar and Sacrifice. A Sermon. On Heb. xiii. 10.* apud Oxonienses tract 81. p. 386.

(2) Lib. v. ep. xxxiii. ad Marcellinam.

(3) “Tis visible that the Protestants of the Church of England believe and reverence, as much any the sacrifice of the Eucharist, as the most substantial and essential act of our religion, and doubt not but the word *Missa*, ‘Mass’ has been fitly used by the Western Church to signify it.” Hammond’s Works, vol. ii. p. 164. cit. ab Oxoniensibus, vol. iv. Tract. 81.



## CAPUT I.

III.

## DE SACRIFICII VERITATE.

6. Tridentinum concilium definivit: “ Si quis dixerit in Missa non offerri Deo verum et proprium sacrificium, aut quod offerri non sit aliud quam nobis Christum ad manducandum dari; anathema sit.”<sup>1</sup> Est igitur fidei doctrina in Missa offerri Deo verum et proprium sacrificium. Mentem suam explicant patres Tridentini: “ Is igitur Deus, et Dominus noster, etsi semel seipsum in ara crucis, morte intercedente, Deo Patri oblaturus erat, ut æternam illic redemptionem operaretur; quia tamen per mortem sacerdotium ejus extinguendum non erat, in cœna novissima, qua nocte tradebatur, ut dilectæ sponsæ suæ Ecclesiæ visibile, sicut hominum natura exigit, relinqueret sacrificium, quo cruentum illud semel in cruce peragendum repræsentaretur, ejusque memoria in finem usque sæculi permaneret, atque illius salutaris virtus in remissionem eorum, quæ a nobis quotidie committuntur, peccatorum applicaretur; sacerdotem secundum ordinem Melchisedech se in æternum constitutum declarans, corpus et sanguinem suum sub speciebus panis et vini Deo Patri obtulit; ac sub earundem rerum symbolis, Apostolis, quos tunc novi Testamenti sacerdotes constituebat, ut sumerent tradidit; et eisdem, eorumque in sacerdotio successoribus, ut offerrent, præcepit, per hæc verba: ‘ Hoc facite in meam commemorationem; ut semper Catholica Ecclesia intellexit, et docuit.’”<sup>2</sup>

## PROPOSITIO.

*In Missa offertur Deo verum et proprium sacrificium.*

*Probatur I. ex Christi sacerdotio secundum ordinem Melchisedech.*

7. Psaltes Deum Patrem Filium alloquentem exhibet: “ Juravit Dominus, et non pœnitebit eum: Tu es sacerdos in æternum secundum ordinem Melchisedech.”<sup>3</sup> אֲתָה-כֹּהֵן לְעוֹלָם עַל-דְּבָרִתִּי מֶלֶךְ-יִצְחָק— Illud de Christo explicat Paulus.<sup>4</sup> Jam vero sacerdotii similitudo et proprietas in oblatione seu sacrificio præcipue exquirendæ sunt: “ omnis namque pontifex ex hominibus assumptus, pro hominibus constituitur in his quæ sunt ad Deum, ut offerat dona et sacrificia pro peccatis.”<sup>5</sup> Sacerdotium

(1) Sess. xxii. Can. i.

(2) Ibidem Cap. i.

(3) Ps. cix. Heb. cx.

(4) Heb. v. 5.

(5) Ibidem v. i.

igitur ad sacrificium necessariam habet relationem ; ideoque in Melchisedechi sacrificio Christi oblationis typum et imaginem spectare oportet. Quæ fuerit oblatio Melchisedeciana ex Genesis decimo quarto capite colligitur, in quo narratur eum Abrahæ redeunti obviam ivisse, et protulisse panem et vinum, erat quippe sacerdos Dei altissimi.<sup>1</sup> **וּמֶלְכִי-צֶדֶק מֶלֶךְ שְׁלָם הוֹצִיָא לֶחֶם וַיִּין וְהוּא כֹהֵן לֵאלֹהֵי עֵלְיוֹן** quod a vulgato interprete redditur : “ At vero Melchisedech, rex Salem, proferens panem et vinum, erat enim sacerdos Dei altissimi.” Oblatio Deo facta panis et vini nec in textu, nec in versione affirmatur, sed vox Hebraica, cui respondet “ proferens” in Vulgata, apte exprimit donorum adductionem ut Deo offerrentur, quod ex sacerdotii sui mentione, quæ statim fit, jure optimo inferitur.<sup>2</sup> Equidem nullus alius actus suo sacerdotio peculiaris in sacro textu indicatur, benedicere enim et decimas accipere erat jus sacerdotibus Aaronicis. Ergo, ea in re sacerdotium Christi secundum ordinem Melchisedech a sacerdotio Aaronico distinguitur, quod panis et vinum præ animantibus a Christo adhibeantur, quæ scilicet corpus et sanguis sui facta, Deo hominum causa offeruntur. Præterea quum singulæ circumstantiæ hujus narrationis plenæ sint mysterii, uti Paulo docente didicimus, haud sine causa panis et vini mentio facta censenda est. Ipsa rei gestæ concordia cum panis et vini usu a Christo, cujus sacerdotium ad instar Melchisedeciani sacerdotii declaratur, gravissima est ratio, cur in oblatione affirmetur similitudo, typo rei veritatem præsignante. Ergo Christus censendus est sacerdotii sui secundum ordinem Melchisedech munere functus esse in eucharistiæ institutione, verum utique offerendo sacrificium. Quum autem perpetuum sit illud sacerdotium, idem sacrificium Christi auctoritate, et veluti persona offerendum est, ad mundi usque finem, ut in ævum ipse sacerdos sit.

*Patres appellamus interpretes.*

8. S. CYPRIANUS, post relata Psaltis verba : “ Tu es Sacerdos in æternum secundum ordinem Melchisedech,” dicit : “ Qui ordo utique hic est de sacrificio illo veniens, et inde descendens, quod Melchisedech sacerdos Dei summi fuit quod panem et vinum obtulit, quod Abraham benedixit.

(1) Gen. xiv. 18.

(2) “ Melchisedec was called a Priest, (as he is often by St. Paul to the Hebrews,) who yet had no other offering or sacrifice that we read of, but that of Bread and Wine, Gen. xiv. ‘ He brought forth bread and wine, and,’ or ‘ for (the Hebrew word bears both) He was a Priest, that is, this act of his was an act of Priesthood ; for so must it be referred, ‘ he brought forth bread and wine, for he was a Priest,’ and not thus : ‘ and he was a Priest, and blessed Abraham ;’ for, both in the Hebrew and Greek, there is a full point after these words, ‘ and,’ or ‘ for he was a Priest.’ ” Bishop Sparrow apud Oxonienses, Vol. iv. Tract. 81. p. 155, London edition. Consentit Dodwell : “ The vulgate reads it, *erat enim*, with a causal particle. And unless some such thing be understood, it will not be easy to give any tolerable account of the pertinency and connexion of the former part of the verse with the latter.” Ibidem p. 250.

Nam quis magis sacerdos Dei summi, quam Dominus noster Jesus Christus, qui sacrificium Deo Patri obtulit, et obtulit hoc idem quod Melchisedech obtulerat, id est, panem et vinum, suum scilicet corpus et sanguinem.<sup>1</sup>

9. CLEMENS ALEXANDRINUS : “ Melchisedech rex Salem, sacerdos Dei altissimi, qui panem et vinum sanctificatum dedit nutrimentum, in typum eucharistiæ.”<sup>2</sup>

10. EUSEBIUS CÆSARENSIS : “ Quemadmodum Melchisedech, qui sacerdos gentium erat, nusquam videtur sacrificiis corporalibus functus, sed solo vino ac pane ; ita Salvator ac Dominus noster, deinde qui ab eo profecti sunt sacerdotes, in omnibus gentibus . . . . vino ac pane corporis illius ac salutaris sanguinis mysteria repræsentat : quæ sane mysteria Melchisedech tanto ante Spiritu divino cognoverat, et rerum futurarum imaginibus usus fuerat.”<sup>3</sup>

11. Auctor librorum de Sacramentis : “ Cognovimus sacramentorum istorum figuram Abrahæ temporibus præcessisse, quando obtulit sacrificium sanctus Melchisedech.”<sup>4</sup>

12. S. HIERONYMUS ad Marcellam scripsit : “ Recurre ad Genesim, et Melchisedech regem Salem hujus principem invenies civitatis, qui jam tunc in typo Christi panem et vinum obtulit, et mysterium christianum in Salvatoris corpore et sanguine dedicavit.”<sup>5</sup>

13. S. AUGUSTINUS ad Innocentium scripsit : “ Melchisedech prolato Sacramento mensæ Dominicæ, novit æternum ejus sacerdotium figurare.”<sup>6</sup> Et alias : “ Ibi quippe primum apparuit sacrificium quod nunc a Christianis offertur Deo, toto orbe terrarum, impleturque illud quod longe post hoc factum per prophetam dicitur ad Christum, qui fuerat adhuc venturus in carne : ‘ Tu es sacerdos in æternum secundum ordinem Melchisedech.’ ”<sup>7</sup> “ Alias de Psaltis verbis agens animadvertit : “ Ibi quippe et hoc dictum est : ‘ Juravit Dominus, et non pœnitebit eum : Tu es Sacerdos in æternum secundum ordinem Melchisedech.’ Noverunt qui legunt quid protulerit Melchisedech, quando benedixit Abraham, et jam sunt participes ejus : vident tale sacrificium nunc offerri Deo toto orbe terrarum. Dei autem juratio, incredulorum est increpatio : et quod Deum non pœnitebit, significatio est quia hoc sacrificium non mutabit, mutavit quippe sacerdotium secundum ordinem Aaron.”<sup>8</sup> Anglicani quamplurimi sacrificium Melchisedecianum in eucharistia impletum a patribus prædicari agnoscunt.<sup>9</sup>

(1) Ep. ad Cæcilium, l. ii. ep. iii. alias ep. lxiii.

(2) L. iv. Stromatum.

(3) L. v. dem. Ev. c. iii.

(4) L. v. de Sac. c. i.

(5) Ep. ad Marcellam.

(6) Ep. clxxvii. alias xcv.

(7) L. xvi. de civ. Dei c. xxii.

(8) L. i. contra adversarium legis et prophetarum c. xx.

(9) “ Here, as has been proved, we have the judgment of the ancients with us ; who

14. Ipsi vetustiores Rabbini sacrificium Melchisedech vino paneque contitisse intellexerunt, illudque agnoverunt typum fuisse sacrificii a Messia offerendi. Rabbi Samuel in caput XIV. Geneseos scribens, ait: Actus sacerdotii tradidit: erat enim ipse sacrificans panem et vinum Deo sancto et benedicto." Rabbi Phineas scribit: "Tempore Messiae omnia sacrificia cessabunt, sed sacrificium panis et vini non cessabit; sic dictum est Gen. xiv: 'et Melchisedech rex Salem protulit panem et vinum.' Melchisedech enim, id est, rex Messias, excipiet a cessatione sacrificiorum sacrificium panis et vini, sicut dicitur Psal. 110: 'Tu es sacerdos in æternum secundum ordinem Melchisedech.'"<sup>1</sup>

*Probatur II. ex vaticinio Malachiae.*

15. "Non est mihi voluntas in vobis, dicit Dominus exercituum, et munus non suscipiam de manu vestra. Ab ortu enim solis usque ad occasum magnum est nomen meum in gentibus, et in omni loco sacrificatur, et offertur nomini meo oblatio munda."<sup>2</sup> Textus habet: **מִקְטֹר מִנְּשָׁ וּמִנְחָה לְשֵׁמִי וּפְהוּרָה** Ad verbum redditur: *incensum offertur nomini meo, et munus purum*: sed incensum pro sacrificio quod comitatur sumitur, uti ex dono quod statim nominatur colligitur. Sic et apud Osee: "super capita montium sacrificabant, et super colles accendebant thymiamma."<sup>3</sup> Declarat igitur Deus per Malachiam se rejecturum victimas et oblationes judaicas, acceptaturum autem munus purum a gentibus ubique per orbem sibi offerendum. Haud absque causa victimæ vox omissa est, ne cruenta censeretur oblatio, **מִנְחָה** autem vocatur oblatio, quippe quæ juxta externam speciem aliquam habet similitudinem muneri ex simila, oleo, et thure, quod Judæi ex legis præscripto offerebant.<sup>4</sup> Hujusmodi oblatio victimis antiquis erat substituenda, et ubique offerenda. In eucharistia vaticinium insigniter impletur, est scilicet pura oblatio corporis Domini sub panis specie, una cum sanguine sub specie vini, ubique per orbem a solis ortu usque ad occasum facta, qua gloria Deo redditur longe præstantior illa quam victimæ antiquæ reddebant.

*Patres appellamus interpretes.*

16. S. JUSTINUS M. cum Tryphone Judæo disserens, Malachiae vaticinium in medium adduxit: "De nostris gentium quæ in omni loco offe-

dò generally assert, that CHRIST did offer bread and wine in the Eucharist, and offered them as a Melchisedechian priest, and as symbols of his Body and Blood; and that in and by these symbols, He did mysteriously devote His natural Body to suffer according to the will of God, and this is a certain proof that the Fathers took 'given' not only as expressing, but as meaning and intending the time then present." Vide Johnson apud Oxonienses loco cit. p. 336.

(1) In c. xxviii. Numerorum. Vide Bereschit Rabba.

(2) Mal. i. 10.

(3) Osee. iv. 13.

(4) Lev. ii. 1.

runtur sacrificiis, hoc est, pane eucharistiæ et poculo similiter eucharistiæ, jam tum loquutus Malachias, prædixit nos quidem glorificare nomen ejus, vos autem profanare.”<sup>1</sup>

17. S. IRENÆUS, de institutione Sacrificii agens, Malachiæ vaticinium in ea impletum affirmavit: “Eum qui ex creatura panis est accepit, et gratias egit, dicens: ‘Hoc est corpus meum.’ Et calicem similiter, qui est ex ea creatura, quæ est secundum nos, suum sanguinem confessus est, et novi Testamenti novam docuit oblationem, quam Ecclesia ab Apostolis accipiens in universo mundo offert Deo, ei qui alimenta nobis præstat, primitias suorum munerum in novo Testamento, de quo in duodecim prophetis, Malachias sic præsignificavit: ‘Non est mihi voluntas in vobis, dicit Dominus omnipotens, et sacrificium non accipiam de manibus vestris. Quoniam ab ortu solis usque ad occasum nomen meum glorificatur inter gentes, et in omni loco incensum offertur nomini meo, et sacrificium purum. Quoniam magnum est nomen meum in gentibus, dicit Dominus omnipotens:’ manifestissime significans per hæc, quoniam prior quidem populus cessavit offerre Deo; omni autem loco sacrificium offertur Deo, et hoc purum, nomen autem ejus glorificatur in gentibus.”<sup>2</sup>

18. S. AUGUSTINUS: “Hoc Sacrificium per sacerdotes secundum ordinem Melchisedech, cum in omni loco a solis ortu usque ad occasum Deo jam videant offerri, sacrificium Judæorum, de quibus dictum est: ‘Non est mihi voluntas in vobis;’ jam cessare negare non possunt.”<sup>3</sup>

Anglicani plurimi fatentur vaticinium Malachiæ in eucharistia impleri, juxta patrum communem interpretationem.<sup>4</sup>

*Probatur III. ex verbis Christi.*

19. Verba Christi ostendunt oblationem corporis et sanguinis sui factam ipso quo loquebatur momento: “Hoc est corpus meum quod pro vobis datur:”—τὸ ὑπὲρ ὑμῶν διδόμενον—“hoc facite in meam commemorationem”—τὸτο ποιεῖτε εἰς τὴν ἐμὴν ἀνάμνησιν. “Hic est calix novum Testamentum in

(1) Dial cum Tryphone.

(2) L. iv. adv. hæ. c. xxxii.

(3) L. xviii. de civ. Dei. c. xxxv.

(4) “This place of Scripture, howsoever now in a manner silenced and forgotten, was once, and that in the oldest and purest time of the Church, a text of eminent note, and familiarly known to every christian, being alleged by their pastors and teachers, as an express and undoubted prophecy of the Christian Sacrifice, or solemn worship in the Eucharist, taught by our blessed SAVIOUR unto His disciples, to be observed of all that should believe in His name: and this so generally and grantedly, as could never have been, at least so early, unless they had learned thus to apply it by tradition from the Apostles.” Mede, *The Christian Sacrifice*, apud Oxonienses, tract 81, p. 109. Episcopus Anglicanus Overall dicit de locis Malachiæ et Psaltis: “both which the ancient Fathers, with one consent, understand of the Sacrifice of the Eucharist, and the Priests of the Gospel:” Oxford Tracts, Vol. iv. Tract. 81, p. 73. London edition.

sanguine meo, qui pro vobis fundetur"—Τὸ το ποτήριον, ἡ καινή διαθήκη ἐν τῷ αἵματί μου, τὸ ὑπὲρ ὑμῶν ἐκχυρόμενον.<sup>1</sup> Datum est igitur corpus ipso quo id affirmabat Christus tempore, et quidem non ipsis tantum manducandum, sed pro ipsis, Deo utique oblatum:<sup>2</sup> fusus est calix ipse tunc propter nos:<sup>3</sup> verum proinde tunc oblatum est sacrificium. Id ut *facere* Apostoli jussi sunt: ipsi idcirco sacrificium idem peragere debuerunt, quod ex voce *faciendi* absolute prolata inferre licet, habet enim sacrificandi seu offerendi vim, sicut et vox Græca—ποιεῖτε.<sup>4</sup> Obtulit Christus suum corpus et sanguinem, vim sibi ab hostibus inferendam præveniens, seque voluntate sua hostiam dando, ut Patrem, animantium sacrificia respuentem, hominibus placaret. Tunc igitur impletum est quod per vatem dixerat: "Quia hostias, et oblationes, et holocausta pro peccato noluisti, nec placita sunt tibi, quæ secundum legem offeruntur, tunc dixi: Ecce venio, ut faciam, Deus, voluntatem tuam."<sup>5</sup>

*Patres interpretes damus.*

20. S. IRENÆUS, verbis Christi recitatis, dicit: "Novi Testamenti novam docuit oblationem, quam Ecclesia ab Apostolis accipiens in universo mundo offert Deo."<sup>6</sup>

21. S. CYPRIANUS, de aquariis querens, dicit: "non hoc faciunt, quod Jesus Christus, Dominus et Deus noster, sacrificii hujus auctor et doctor fecit et docuit." Postea dicit: Nam si Jesus Christus, Dominus et Deus noster, ipse est summus Sacerdos Dei Patris, et sacrificium Deo ipse primus obtulit, et hoc fieri in sui commemorationem præcepit, utique ille

(1) Luc. xxii. 19, 30.

(2) "I have beyond all just contradiction proved, that Jesus performed the office of a Sacrificing Priest, when he first instituted the Holy Communion, and that He, at the same time, ordained His Apostles and their successors to succeed Him in that sacred office; and, whether Melchisedech's priesthood were a type of CHRIST's in offering bread and wine, or not, (of which, I believe, few impartial readers will doubt,) yet that, in thus offering a real Sacrifice, He fulfilled the prefiguration of the pontifical Sacrifice offered under the law, and that he intended the latter, as well as the former, to be a PERPETUAL DAILY SACRIFICE, will be granted me by all that are not very hard to be convinced." Johnson, *Propitiatory Oblation in the Holy Eucharist*, published anonymously, p. 98. 100. apud Oxonienses, tract 81. p. 338.

(3) "Which is shed."—i. e. He then, at that instant, gave his Body and Blood a Sacrifice for the sins of the world." Wilson, episcopus Anglicanus, *Holy Bible, with notes*.

(4) Hickes, episcopus Anglicanus, fuse probat sacrificandi vim voci Græcæ inesse præsertim juxta septuaginta interpretum, et judaicorum scriptorum usum: "In that translation of the Old Testament, ποιεῖν signifies the same as ἱεροποιεῖν or ἱεουργεῖν to 'offer,' or 'sacrifice' as פָּעַל does in the Hebrew, and FACERE in the Vulgar translation. So Exod. xxix. 36. καὶ τὸ μυστήριον ΠΟΙΗΣΕΙΣ." The Christian Priesthood asserted, p. 58. apud Oxonienses, tract 81. p. 253.

(5) Heb. x. 8. 9.

(6) L. iv. adv. hæ. c. xxxii.

sacerdos vice Christi vere fungitur, qui id quod Christus fecit imitatur. Et sacrificium verum et plenum tunc offert in Ecclesia Deo Patri, si sic incipiat offerre secundum quod ipsum Christum videat obtulisse.”<sup>1</sup>

22. S. GREGORIUS NYSSENUS: “ Qui potestate sua cuncta disponit. . . arcano sacrificii genere, quod ab hominibus cerni non poterat, se ipsum pro nobis hostiam offert, et victimam immolat, Sacerdos simul existens, et agnus Dei, ille qui mundi peccatum tollit. Quando id præstitit? Cum CORPUS SUUM DISCIPULIS CONGREGATIS EDENDUM ET SANGUINEM BIBENDUM PRÆBUIT, tunc aperte declaravit agni sacrificium jam esse perfectum.”<sup>2</sup>

23. S. JOANNES CHRYSOSTOMUS: “ Pro cæde brutorum Christus se ipsum jussit offerri, ipsumque sacrificium mutavit.”<sup>3</sup>

24. S. AUGUSTINUS: “ Sacrificare martyribus dixi, (*esse peccatum*) non dixi sacrificare Deo in memoriis martyrum; quod frequentissime facimus, illo dumtaxat ritu, qui sibi sacrificari novi Testamenti manifestatione præcepit: quod pertinet ad illum cultum, qui latria dicitur, et uni Deo debetur.”<sup>4</sup>

Anglicani plurimi agnoscunt patres sacrificium a Christo institutum agnovisse. Græbius dicit consensum veterum hac de re adeo clarere, ut vix de alio fidei arcano tanta concordia habeatur.<sup>5</sup>

*Probatur IV. ex Apostoli verbis.*

25. Quum Paulus eos increparet qui cultus idolorum aliquatenus participes eucharistiam sumere auderent, argumentum ex victimæ eucharisticæ natura desumpsit: “ Calix benedictionis, cui benedicimus, nonne communicatio sanguinis Christi est? et panis, quem frangimus nonne participatio corporis Domini est?”<sup>6</sup> Vox Græca *κοινωνία* aptissime exprimit sacrificii consortium, victimæ carnes manducando. Inde infert omnes qui eucharistiam sumunt, unum effici panem, quia eodem vescimur, specie visibili; unum esse corpus, quia idem Christi corpus sub specie illa recipimus: “ Quoniam unus panis unum corpus multi sumus, omnes qui de uno pane participamus.” Id probat ex consortio sacro, quod inierunt Israelitæ victimis Deo oblatis

(1) Ep. ad Cæcilium lxiii. alias l. ii. n. iii.

(2) Orat. i. in Christi resurr.

(3) In i. ad Cor. hom. xxiv.

(4) L. xx. contra Faustum c. xxi.

(5) Narrat disceputationem inter suos: “ This point, namely, was disputed, whether in the Eucharist, the bread and wine, and after the mystical consecration, the Flesh and Blood of the LORD, are offered upon the holy table, as upon an altar to God, for the testifying of His supreme dominion, and the commemoration or representation of the Sacrifice of CHRIST finished on the Cross.” De hac sententia dicit: “ There is in behalf of this opinion such a consent of the most ancient Fathers and successors of the Apostles, as is seen in scarcely any mystery of the Christian faith.” Græbe MS. Adversaria, apud Oxonienses, Tract. 81, p. 374.

(6) I. Cor. x. 16.



vescentes : “ Videte Israel secundum carnem : nonne qui edunt hostias, participes sunt altaris ? ” Inde innuit sequi, eos qui vescebantur idolothytis, iis in rerum adjunctis in quibus manducatio cum victimæ oblatione connectebatur, esse idololatriæ reos, licet idola ipsi non colerent. Proponit autem objectionem, quod fideles idola vana esse et inania noscerent, nec haberent animum ea colendi : sed respondet gentes victimas eo animo offerre, ideoque non licere aliquatenus consortium cum iis inire, victimis vescendo, et nefas esse victima eucharistica vesci, post hujusmodi profanum consortium : “ Quid ergo ? dico quod idolis immolatum sit aliquid ? aut quod idolum sit aliquid ? Sed quæ immolant Gentes, dæmoniis immolant, et non Deo. Nolo autem vos socios fieri dæmoniorum : non potestis calicem Domini bibere, et calicem dæmoniorum : non potestis mensæ Domini participes esse, et mensæ dæmoniorum. ” Loquitur, ut patet, de mensa in qua apponebantur carnes victimarum, de altari scilicet in qua immolabantur, non equidem de mensa communi ; eamque cum mensa Domini conferens, indicat in hac apponi carnem victimæ, corpus scilicet Christi. Calicem etiam in quo vel sanguis victimæ degustandus propinabatur, vel vinum idolo libandum, confert cum calice Domini, in quo sanguis est Christi Deo oblatus, et mystice fusus in peccatorum remissionem.<sup>1</sup> Est igitur eucharistia verum et proprium sacrificium, et quidem corporis et sanguinis Christi, quorum participes fiunt eam sumentes.

26. Id liquet ex iis quæ Apostolus jam dixerat, mores integros commendans, ut epulo sacro fruamur. “ Expurgate vetus fermentum, ut sitis nova conspersio, sicut estis azymi : Etenim Pascha nostrum immolatus est Christus : itaque epulemur, non in fermento veteri, neque in fermento malitiæ et nequitiae : sed in azymis sinceritatis et veritatis. ” Quum agnus paschalis vere esset sacrificium, et Christus Pascha nostrum dicatur, pro nobis immolatum, veram sacrificii rationem in eo agnoscere oportet. Apostolus autem hortatur ut eo epulemur, quo pacto agni paschalis carnibus vescebantur Judæi : ergo vere nobis datur caro Christi manducanda in eucharistia, quæ proinde est veri nominis sacrificium ; neque enim sacrificium crucis, quod semel tantum oblatum est, potest dici illud cujus participes sumus, nec epulum symbolicum sacrificii præteriti verbis Apostoli respondet.<sup>2</sup>

(1) “ Bp. Warburton, Div. Leg. ix. 2. Vol. vi. 296, maintains, that the religious ordinances of the heathens here adverted to, were *feasts upon sacrifice*, so the nature of the expression used by St. Paul plainly denotes that he considered the Eucharist not (with the Socinians,) as a mere commemoration of a dead benefactor, but as a feast upon sacrifice. ” Bloomfield in i. Cor. x. 16.

(2) “ If CHRIST be a propitiatory Sacrifice, a Peace-offering, I see not how we can avoid but the flesh of our peace-offering must be eaten in this feast by us, or else we evacuate the offering utterly, and lose the fruit of it ; and was there a Passover heard of and the lamb not eaten ? ” Andrews episcopus Anglicanus, *Sermons of the Resurrection*, No. 7. apud Oxonienses, tract 81, n. 95.



27. Præterea dicit Paulus: “Habemus altare—*θυσιαστήριον*—de quo edere non habent potestatem, qui tabernaculo deserviunt.”<sup>1</sup> Victimam esse in altari christiano immolatam, de qua edunt qui ritus judaicos dereliquerunt, et Christi instituta sequuntur, ex illo testimonio omnino constat. De orali manducatione agitur, nam confertur manducatio christianæ victimæ, cum sacrificiorum Aaronicorum manducatione, quæ certe ore fiebat, non fide tantum concipiebatur.<sup>2</sup>

*Probat V. ex traditione.*

Patres testes fidei semel sanctis traditæ adducimus.

28. CLEMENS ROMANUS, Apostolis coævus, ad Corinthios scribens, ait: “Cuncta ordine debemus facere quæ nos Dominus jussit peragere. Statutis temporibus oblationes et officia sacra—*προσφορας καὶ λειτουργίας*—perfici, neque temere vel inordinate fieri præcepit.”<sup>3</sup> Utraque vox ad sacrificandi ritum refertur.<sup>4</sup>

(1) Heb. xiii. 10.

(2) Sparrow, Anglicanus episcopus, apud Oxonienses, p. 152. animadvertit: “St. Paul in the verse before, had persuaded that they should not be carried away with strange doctrines of Jewish and carnal observances, which are grown unprofitable to those that walk in them. For ‘we have an altar’ now, ‘whereof they that serve at the Tabernacle,’ the Jewish Priests, ‘have no right to eat’ unless they will receive the faith of CHRIST; our altar is better than theirs, and theirs was but a shadow of ours; the Sacrifices of their altar, but types of ours; theirs are vanished, and ours only continue. And for this reason do you leave strange doctrines of Jewish observances, and continue in the grace of the Gospel, whose altar is to continue; for ‘we have an altar.’” Johnson concinit: “I think it very evident that the Apostle here cannot be understood of spiritual manducation . . . And if the Apostle speak of eating orally, then it will easily be granted that the Sacrifice here understood must be the Sacrifice of the Body and Blood of CHRIST in the Eucharist: for we have no other which can be so eaten.” . . . “The Sacrifice of the Cross cannot be meant in this place; because that was a Sacrifice without an altar, and therefore could not in all probability be intended by the word ‘altar.’” Johnson apud Oxonienses, tract 81. p. 321.

(3) Ep. 1. ad Cor. n. xl.

(4) “This great mystery can be expressed by no other word, more fitly and fully than by those *θυσία πρόσφορα*, ‘Sacrifice’ ‘oblation,’ and the like. By which words accordingly, it is called by Justin Martyr also . . . *Dial. cum Tryph.* In which book the words *θυσία* and *πρόσφορα* are often used in this sense, namely for the Eucharist.” Ita Beveridge episcopus Anglicanus, in opere: *Codex Canonum Eccl. Prim. vindicatus ac illustratus* l. ii. cap. x. §. 3. 4. Apud Oxon. tract 81. p. 240 “The names whereby the ancient Church called this service are *πρόσφορα θυσία* ‘oblation,’ ‘Sacrifice;’ *Εὐχαριστία*, ‘Eucharist,’ (a word, if rightly understood, of equipollent sense;) *θυσία αινέσεως*, *θυσία λογική καὶ ἀναιμακτος*, ‘a Sacrifice of praise,’ ‘a reasonable and unbloody Sacrifice;’ *Sacrificium Mediatoris*, *Sacrificium Altaris*, *Sacrificium pretii nostri*, *Sacrificium corporis et sanguinis Christi*, ‘the Sacrifice of our Mediator,’ ‘the Sacrifice of the Altar,’ ‘the Sacrifice of our Ransom,’ ‘the Sacrifice of the Body and Blood of CHRIST.’ It would be infinite to note all the places and authors where and by whom it is thus called.” Mede, *The Christian Sacrifice*, apud Oxonienses, tract 81. p. 111.

29. **TERTULLIANUS** ait: "Sacrificamus pro salute imperatoris."<sup>1</sup>

30. **S. CYPRIANUS** scribit: "Apparet sanguinem Christi non offerri si desit vinum calici, nec sacrificium Dominicum legitima sanctificatione celebrari, nisi oblatio et sacrificium nostrum responderit passioni."<sup>2</sup> Alias: "Episcopatus nostri honor grandis et gloria est, pacem dedisse martyribus, ut sacerdotes, qui sacrificia Dei quotidie celebramus, hostias Deo et victimas præparemus."<sup>3</sup>

31. **S. CYRILLUS HIEROSOLYMITANUS**: "Deinde vero postquam confectum est illud spirituale Sacrificium, et ille cultus incruentus, super ipsa propitiationis hostia, obsecramus Deum pro communi Ecclesiarum pace."<sup>4</sup>

32. **S. GREGORIUS NAZIANZENSIS** de Juliano apostata scribit: "Impuro et nefario sanguine lavacrum extergit; initiationi nostræ initiationem opponens: manusque suas profanat, ut nimirum eas ab incruento sacrificio per quod nos Christo, ipsiusque passionibus ac divinitati communicamus, elueret ac repurgaret."<sup>5</sup>

33. **S. JOANNES CHRYSOSTOMUS**: "Ad mensam veniente Domino, servos qui Dominum offenderunt, adesse non oportet, sed procul arcentur; ita et hic dum PROFERTUR SACRIFICIUM, ET CHRISTUS IMMOLATUR, et ovis Dominica, cum audieris: 'Oremus omnes communiter;' cum velum videris retrahi, tunc superne cælum cogita aperiri, et angelos descendere."<sup>6</sup> De ritu a Græcis adhibito in solemniori Liturgiæ parte loquitur: velum scilicet sanctuarii retrahebant.

34. **S. AMBROSIIUS**: "Quando sacrificamus, Christus adest, CHRISTUS IMMOLATUR."<sup>7</sup>

35. **S. HIERONYMUS**: "Sic docuit Apostolos suos, ut quotidie in CORPORIS ILLIUS SACRIFICIO credentes audeant loqui: 'Pater noster, etc.'"<sup>8</sup> Et Vigilantium, reprehendentem reliquiarum venerationem, damnari probat consuetudine totius Ecclesiæ, quæ sacrificabat in tumulis martyrum. Irridens eum dicit: "Male ergo facit Romanus episcopus, qui super mortuorum hominum Petri et Pauli ossa veneranda, secundum te pulvisculum, offert Domino sacrificia, et tumulos eorum arbitratur altaria, idque non solum unius urbis, sed totius orbis faciunt episcopi."<sup>9</sup>

36. **S. AUGUSTINUS**: "Verus ille Mediator, in quantum formam servi accipiens Mediator effectus est Dei et hominum, homo Christus Jesus, cum in forma Dei sacrificium cum Patre sumat, cum quo et unus Deus

(1) L. ad Scapulam c. ii.

(2) Ep. ad Cæcilium.

(3) Ep. ad Cornelium lxiv.

(4) Catech. Myst. v.

(5) Orat. iii. quæ est 1. contra Julianum.

(6) Hom. ii. ad Populum Antioch.

(7) Comm. in c. i. Lucæ.

(8) L. iii. adv. Pelag.

(9) L. adv. Vigilantium c. iv.

est, tamen in forma servi sacrificium maluit esse quam sumere, ne vel hac occasione quisquam existimaret cuilibet sacrificandum esse creaturæ. Per hoc et Sacerdos est, ipse offerens, ipse et oblatio. Cujus rei Sacramentum QUOTIDIANUM ESSE VOLUIT ECCLESIAE SACRIFICIUM: quæ cum ipsius capitis corpus sit, se ipsam per ipsum discit offerre. Hujus veri sacrificii multiplicia variaque signa erant sacrificia prisca sanctorum, cum hoc unum per multa figuraretur, tamquam verbis multis res una diceretur, ut sine fastidio multum commendaretur. Huic summo veroque sacrificio cuncta sacrificia falsa cesserunt.”<sup>1</sup>

37. S. CYRILLUS ALEXANDRINUS: “Incruentam celebramus in Ecclesiis sacrificii servitutem.”<sup>2</sup>

38. S. GREGORIUS MAGNUS de Cassio episcopo Narniensi dicit: “quotidianum offerre consueverat Deo sacrificium, seque in lacrymis inter ipsa sacrificiorum arcana mactabat.”<sup>3</sup>

39. Fatetur Forbesius Patres sæpissime dicere ipsum corpus Christi offerri et immolari in eucharistia, quod frustra conatur ad latiore sensum reducere.<sup>4</sup>

*Probatur VI. ex Liturgiis.*

Liturgiæ præclara sunt monumenta vetustæ et universalis fidei de vero sacrificio eucharistico.

40. S. Jacobi Liturgia, juxta codicem quem præ manibus habuerunt editores bibliothecæ veterum Patrum, in oratione habet hæc verba: “Deus . . . . ne averseris nos peccatores, verendum hoc et incruentum sacrificium attrectantes;” quod apud Eusebium Renaudotium redditur: “dum sacrificium hoc spirituale et incruentum celebramus.” Diaconus, juxta priorem codicem, populum ad attentionem excitat: “attenti simus divinæ oblationi;” in altero codice: “ecce oblatio infertur et majestas exoritur.” Post recitatam institutionis hujus sacrificii historiam, populo acclamante, *Amen* sacerdos precatur: “Offerimus tibi Domine hoc sacrificium venerandum et incruentum;” in altero codice: “terribile et incruentum;” et pergit orare pro vivis et defunctis.

41. In S. Marci Liturgia dum Sacerdos ingreditur ad altare, orat: “Domine, ipse nos sanctifica, nosque dignare tremendo tuo sacerdotio, nosque siste venerando altari tuo.” In præfatione dicitur: “offerimus rationabilem et incruentam *ἁγρεια* seu oblationem hanc, quam offerunt tibi, Domine, omnes gentes ab ortu solis usque ad occasum; a septentrione ad meridiem: quia magnum nomen tuum in omnibus gentibus, et in omni loco incensum offertur nomini sancto tuo, et sacrificium, et oblatio.” Sacer-

(1) L. x. de civ. Dei c. xx.

(2) Ep. ad Nestorium.

(3) Dialog. l. iv. c. lvi.

(4) “The holy Fathers very often say that the very Body of Christ is offered and sacrificed in the Eucharist, as is clear from almost innumerable passages.” Forbes *Considerationes* Modestæ l. iii. c. i. p. 451. apud Oxonienses tract 30 p. 109.

dos mysteria sancta signaculo crucis signat, dicens. . . . . “Fac, O Deus, ut plenum quoque sit hoc sacrificium benedictione tua per adventum sanctissimi Spiritus tui.”

42. In Liturgia quæ in libro octavo Constitutionum Apostolicarum refertur, post verba Dominica recitata pergunt sacerdotes gratias Deo agens: “quia nos dignos habuisti, qui staremus coram te, ac sacerdotio fungemur tibi; et poscimus te, ut super hæc dona in conspectu tuo proposita placate respicias, tu qui nullius indiges Deus, et beneplaceas in eis ad honorem Christi tui, atque supra hoc sacrificium mittas sanctum tuum Spiritum.” In ordinatione episcopi oratio fit ut Deo placeat: “offerendo Tibi purum et incruentum sacrificium.”<sup>1</sup>

42. In libro secundo, pluribus descriptis, dicitur; “Post illa sacrificium fiat, stante omni populo, et tacite precante: cumque oblatum fuerit, unusquisque ordo seorsum Dominicum corpus, ac pretiosum sanguinem sumat.”<sup>2</sup>

44. Liturgia S. Basilii *usualis* in oratione *propositionis*, scilicet dum munera in altari ponuntur, hæc habet: “Benedic hanc propositionem et eam suscipe in supercælesti tuo altari . . . . et nos ab omni condemnatione immunes conserva, in sacrificio divinorum tuorum mysteriorum.” In *coptica* Liturgia orat Sacerdos: “Tu, Domine, effice nos dignos, per virtutem Spiritus tui Sancti, ut hoc ministerium perficiamus . . . . et offeramus tibi sacrificium hoc benedictionis. Da nobis ut sacrificium nostrum coram te acceptum sit, pro peccatis meis, et pro insipientiis plebis tuæ.” In Alexandrina Liturgia oratio reperitur ex S. Jacobi Liturgia desumpta: “Ne repellas nos peccatores, qui offerimus tibi tremendum hoc et incruentum sacrificium.”

45. Postquam explicatum est corporale, orat sacerdos: “Fac me virtute Sancti tui Spiritus idoneum, ut sacerdotii gratia indutus huic sanctæ mensæ adsistam, et sanctum tuum et immaculatum corpus tuum et sanguinem pretiosum consecrem . . . . tu enim es qui offers et offerris.—*συ γὰρ εἰ ὁ προσφέρων καὶ προσφερομενος.* Tibi placeat Domine, ut simus ministri . . . . digni tibi offerre hoc rationale et incruentum sacrificium,—*τοῦ προσφέρειν σοὶ τὴν λογικὴν ταύτην καὶ ἀναιμακτον θυσίαν.* In Alexandrina Liturgia orat: “ut digni efficiamur offerre tibi dona et sacrificia pro peccatis nostris et populi tui ignorantibus, et da nobis ut cum omni timore et conscientia pura offeramus tibi spirituale hoc et incruentum sacrificium.” Consecrationem dominicam recitat, et peragit sacerdos, Choro canente; *Amen*; deinceps dicit: *τὰ σὰ ἐκ τῶν σὸν σοὶ προσφέροντες.* “Tua ex tuis tibi offerentes.”

46. In Liturgia Nestorianorum, in *Anaphora*, quæ *canoni* apud nos respondet, adstantes invitat sacerdos ad secum orandum, ut “suscipiatur oblatio hæc ex manibus imbecillitatis meæ, pro me, pro vobis, et pro toto

(1) L. viii. c. v. —xvi.

(2) L. ii. c. lvii.

corpore Ecclesiæ sanctæ Catholicæ.” Deinde ad altare inclinatus orat Deum : “ per gratiam inenarrabilem sanctifica sacrificium istud.”

47. Liturgia sub nomine S. Cyrilli apud Coptas nonnumquam adhibita, post *Sanctus*, habet orationem in qua sacerdos precatur : “ Imple hoc sacrificium tuum, Domine, benedictione quæ a te est, per illapsum super illud Spiritus tui sancti.” Institutio Sacramenti deinceps recitatur, populo sæpius inclamante, Amen.

48. In Liturgia Romana orat sacerdos : “ Quam oblationem tu, Deus, in omnibus, quæsumus, benedictam, adscriptam, ratam, rationabilem, acceptabilemque facere digneris, ut nobis corpus et sanguis fiat dilectissimi Filii tui Domini Dei nostri Jesu Christi.” Sacrificii ratio inde patet, oblatio enim illa benedictione divina fit corpus et sanguis Christi. Post consecrationem vocat eam sacerdos : “ hostiam puram, hostiam sanctam, hostiam immaculatam.” Hinc in oratione super oblata in die Epiphaniæ de donis oblatis dicitur : “ quibus non jam aurum, thus, et myrrha proferitur, sed quod eisdem muneribus declaratur, immolatur, et sumitur Jesus Christus, Dominus noster.”

*Probatur VII. argumento præscriptionis.*

49. Eucharistia magna cum solemnitate ubique per totam Ecclesiam consuevit celebrari, cum omnibus summi cultus indiciis, et ex certa omnium persuasione eam esse oblationem veram, et sacrificium Christi corporis et sanguinis, verum et proprium. Hujus fidei nullum potest ostendi initium Apostolico ævo posterius. Attamen si ab initio symbola tantum Christi mortis adesse crederentur; et nuda commemoratio fieri, absque ulla veri nominis oblatione et sacrificio, non potuit sacrificii veri notio obtinere, nec cultus indicia quæ illud denotant statui : saltem absque magnis turbis, quas retulisset historia. Ergo dicendum sacrificii veri rationem in eucharistia semper agnitam fuisse.

50. Huic argumento magna accedit vis ex Græcorum et Orientalium omnium consensu, qui ex liturgiis patet, et aliis certissimis documentis demonstratur. Concilii Constantinopolitani anno 1638 adversus Cyrillum Lucarim habiti, sicut et Hierosolymitani anno 1672, decreta recitare juvat : “ Cyrillo dogmatizanti . . . neque audienti divinorum Patrum trecentorum decem et octo Niceæ adunatorum ecclesiasticas constitutiones his verbis decernentium : ‘ Fide credamus esse super hanc sacram mensam agnum Dei qui tollit peccatum mundi, incruente a sacerdotibus immolatum, ejusque venerandum sanguinem et corpus vere sumi’—Anathema.” Ita Constantinopolitanum concilium. Hierosolymitanum autem : “ Credimus verum ac propitiatorium esse sacrificium, quod pro fidelibus omnibus, tum vivis, tum defunctis, necnon et pro utilitate omnium offertur, uti et in hujusce Sacramenti precibus exprimitur, quas pro ea quam a Domino receperant disponendi potestate Apostoli Ecclesiæ tradidere.”<sup>1</sup>

51. Accedit quod ab initio mundi Deus sacrificio coleretur, quod summæ

(1) Cap. vi. c. 17.

ejus majestatis idoneum est testimonium : ergo verosimile non est hunc cultum, Christo adveniente, penitus desiisse. At nullum est sacrificium, si eucharistia non sit ; igitur in ea ratio sacrificii agnoscenda est. Argumentum hoc Overall, episcopus Anglicanus, agnoscit et urget.<sup>1</sup>

## OBJECTIONES SOLVUNTUR.

**52. Obj. 1.** De oblatione panis et vini a Melchisedech silet Moyses, qui sacerdotii ejus mentionem fecit, ut intelligatur cur Abrahæ benedixerit, et decimas ab eo acceperit, prout explicat Paulus, de oblatione pariter silens. Quod autem attulerit panem et vinum, contigit ut milites Abrahæ refocillaret.

**Resp.** Fatemur oblationem haud affirmari a Moyse, qui tamen panem et vinum allata esse dicens, et statim adnotans eum fuisse sacerdotem Dei Altissimi, fundamentum præbet cogitandi ea fuisse oblata. Non dicit ea fuisse militibus data, ideoque quum neutrum dicat, ex adjunctis sermonis quid fecerit verosimiliter conjicimus. Cæterum non repugnat ut post oblationem militibus distribuerentur, id enim consuetum est ut participes forent sacri muneris qui oblatis vescebantur. Quod benedixerit Melchisedech Abrahæ, et decimas ab eo acceperit contigit ratione sacerdotii, cujus tamen munus in oblatione est positum. Patet ea non fuisse sui sacerdotii jura peculiaria, et proinde Christum non ideo vocari sacerdotem, ad instar Melchisedech. De oblatione siluit Paulus, christiani sacerdotii præ Aaronico præstantiam explicans, quia ad scopum non pertinebat, quum sanguinis victimarum effusio foret imago vividior sanguinis in cruce fusi, quam panis et vinum. Hac igitur ex parte non apparebat præstantia sacerdotii christiani. Præterea doctrina de eucharistico sacrificio, erat adeo alta, ut non facile scripto explicanda foret, quod in manus Judæorum ad fidem non conversorum facile posset venire, vel ad eorum pervenire notitiam, plura scilicet continebat documenta illis haud sine fructu magno communicanda.

**53. Obj. 2.** Frivolæ afferuntur rationes Pauli silentii, quum enim ex professo singula in quibus Melchisedech typus erat Christi explicaret, ad propositum maxime pertinebat oblationis similitudinem ostendere, ut christianum sacrificium, abrogata animalium immolatione, jam unicum superesse probaret.

(1) "As there never was, nor could be any religion without a God ; so there never was, nor could be any without a Sacrifice, being one of the chiefest acts whereby we profess our religion to Him that we serve." Overall, Oxford Tracts, vol. iv. Tract 81. p. 73. "This Sacrament is the only proper external daily Sacrifice of the Church, without which the other two relatives cannot stand ; viz : that there is no religion without priesthood, nor priesthood without Sacrifice." Buckeridge, Discourse concerning kneeling at the Communion, p. 87, Tract 81.

*Resp.* Haud leves indicavimus causas cur Paulus eam similitudinem, quæ inter typum et veritatem intercedit, prætermiserit. Cæterum ipsum habemus auctorem, quod ob fidelium infirmitatem de arcano siluerit: præfatur enim, de Christo agens: “appellatus a Deo Pontifex juxta ordinem Melchisedech: de quo nobis grandis sermo, et ininterpretabilis ad dicendum, quoniam imbecilles facti estis ad audiendum.”<sup>1</sup> Non igitur professus est se singula evolvere in quibus Melchisedech typus erat Christi, sed potius innuit latere arcanum quod auditores vix ferre possent. Ex aliis verò capitibus ostendit, sacerdotium juxta ordinem Melchisedech jam locum tenere sacerdotii Aaronici. Cæterum ad propositum non pertinebat ostendere oblationis similitudinem, nam prius statuendum erat et inculcandum sacerdotium Christi Melchisedecianum, qua in re Apostolus totus est. Illud vero veluti consectorium erat, quod sacerdotio semel admissio difficultatem vix patiebatur.

54. *Obj.* 3. Christi igitur sacrificium constare pane et vino dicendum erit, ut sacerdos secundum ordinem Melchisedech habeatur.

*Resp.* Panis et vinum a Christo adhibita quidem sunt, qua ratione visus est sacerdos ad instar Melchisedech; sed quum rei veritas figura et typo longe præstare deberet, ea in corpus et sanguinem suum mutavit, ut perfectissima sui oblatione Patri redderet summum honorem.<sup>2</sup> Mire hallucinantur Anglicani illi qui panem et vinum eucharisticum esse sacrificium æstimantes, sola *symbolica* relatione ad crucis sacrificium, Christi oblationem a Melchisedeciana distinguunt. Absit ut adeo humiliter quis de Christi sacrificio et sacerdotio sentiat.

55. *Obj.* 4. Vaticinium Malachiæ in cultu qui ubique terrarum Deo redditur, in spiritu et veritate a Christi fidelibus, impletur, quin sacrificium sit, omnia enim sacrificia ibi declarantur abolita, sacrificio crucis ea implente et tollente.

*Resp.* Quum de sacrificiis agat vates, et quæ Judæi consueverunt offerre rejecta pronuntiet, oblationem quæ eorum loco ubique offertur, veri nominis sacrificium oportet intelligere. Id ex serie orationis colligitur, et institutione eucharistiæ confirmatur, adeo ut vetustissimi patres meritò inde desumpserint argumentum veritatis religionis Christi, in qua vaticinii imple-

(1) Heb. v. 10.

(2) Id pene fatetur Thorndike: “Having maintained that the elements are really changed from ordinary bread and wine into the Body and Blood of CHRIST, mystically present, as in a Sacrament; and that in virtue of the consecration, not by the faith of him that receives; I am to admit and maintain whatever appears duly consequent to this truth, namely, that the elements so consecrated are *truly* the Sacrifice of CHRIST upon the Cross, in as much as the Body and Blood of Christ are contained in them. . . . It is therefore enough, that the Eucharist is the Sacrifice of CHRIST upon the Cross, as the Sacrifice of CHRIST upon the Cross is represented, renewed, revived and restored by it.” Epilogue, book iii. ch. v. p. 44.



tio claret.<sup>1</sup> Quod autem *sacrificii* nomen a Malachia oblationi christianæ non sit datum, aptissime contigit, ut discrimen illud inter et animantium immolationem insinuaretur, et ipsa species, sub qua latet victima nostra, indicaretur. Cultus autem qui fide et oratione præstatur, numquam designatur in scripturis voce illa Hebraica—**זֶבַח**—quæ de oblationibus Abel et Cain, et de quibusdam legis oblationibus usurpatur; nec potest haberi novo Testamento peculiaris, quum a veris Dei cultoribus semper præstaretur. De sacrificio crucis Malachias eo loco nil dicit; sed totus est ut cultum a gentibus ubique terrarum præstandum veteribus Judæorum sacrificiis anteponat. Agitur proinde de publico et visibili sacrificio.

56. *Obj.* 5. Apostolus unicam docet esse oblationem, eam scilicet quæ in cruce est facta: “Sanctificati sumus per oblationem corporis Jesu Christi semel. Et omnis quidem sacerdos præsto est quotidie ministrans, et easdem sæpe offerens hostias, quæ numquam possunt auferre peccata. Hic autem unam pro peccatis offerens hostiam, in sempiternum sedet in dextera Dei . . . . Una enim oblatione consummavit in sempiternum sanctificatos . . . . Ubi autem horum remissio, jam non est oblatio pro peccato.”<sup>2</sup>

*Resp.* In eo est vis orationis Apostoli, quod unicam crucis oblationem valere ad omnia delenda peccata, et gratiæ et sanctitatis dona impetranda ostendat, quum sub veteri lege nova quotidie immolarentur animantia, quæ non poterant auferre peccata. Una est hostia, una oblatio, quæ suffecit abunde ad peccatorum remissionem, adeo ut jam non sit *oblatio pro peccato*, qualem scilicet lex olim præscripsit. Cæterum ipsa unica hostia exhibetur quotidie in mysterio, ut nobis applicetur crucis oblatio. Ex scopo Apostoli mens ejus colligitur, edocere scilicet voluit Judæos legis sacrificia esse abrogata, et Christi morte copiosam redemptionem nobis præstitam; nec necesse esse amplius offerre hostias pro peccatis, vel alias quascumque victimas. Res non postulabat ut explicaret quomodo mors Christi recolenda foret in mysteriis, ut fructus ejus nobis provenirent, quod quidem satis constabat ex quotidiana Ecclesiæ oblatione, qua eadem victima quæ in cruce est immolata iterum iterumque offerebatur.

57. *Obj.* 6. Apostolus quotidianam sacrificii oblationem omnino excludit: “Non enim in manufacta sancta Jesus introivit exemplaria verorum; sed in ipsum cælum, ut appareat nunc vultui Dei pro nobis: neque ut sæpe offerat semetipsum, quemadmodum Pontifex intrat in Sancta per singulos annos in sanguine alieno: alioquin oportebat eum frequenter pati ab origine mundi: nunc autem semel in consummatione sæculorum, ad des-

(1) “The ancients always spoke of the Eucharist as the sacrifice, or oblation of the Gentiles, in opposition to those of the Jews, when they argued against them from the prophecy of Malachi.” Hickes, episcopus, Anglicanus, the Christian Priesthood asserted, pp 97. apud Oxonienses p. 258.

(2) Heb. x. 10.



titutionem peccati, per hostiam suam apparuit . . . Christus semel oblatus est ad multorum exhaurienda peccata.”<sup>1</sup>

*Resp.* Ipse se explicat Apostolus, excluditque frequentem Christi oblationem sanguinis fusione, “alioquin oportebat eum frequenter pati ab origine mundi.” Ostendit discrimen eum inter et pontificem judaicum; hic enim semel quotannis, sanguinem animantis immolati deferens, sanctuarium ingrediebatur; Christus autem semel, sanguine proprio effuso, quo omnia hominum delevit peccata, quod spectat ad expiationis sufficientiam. Tantam sanguinis illius virtutem esse prædicat Paulus, ut ejus iterata fusione opus non sit. Oblationem igitur cruentam, qualis singulis annis a pontifice fiebat, excludit, non tamen mysticam et realem, sacerdotum ministerio peractam in terris, dum ipse vultui Dei apparet pro nobis, sacerdotio suo in æternum secundum ordinem Melchisedech per illos fungens. Hæc optime constant cum quotidiana oblatione, quæ fit in Sacrificio eucharistico, hæc enim ipsa est crucis oblatio, in mysterio renovata et continuata, ut tanti Sacrificii numquam intereat memoria, et fructus nobis inde proveniat. *Overall* Anglicanum, suæ sectæ præjudiciis obviam euntem, appellamus.<sup>2</sup>

58. *Obj.* 7. Patres de mystico sacrificio, quod memoriam Christi mortis celebrat, locuti sunt; non de vero et proprio sacrificio.

*Resp.* Iis utuntur vocibus patres, quæ vero et proprio sacrificio conveniunt, illudque verum et propitiatorium ipsi nuncupant. Cæterum recte vocatur mysticum et commemorativum; nec enim corpus Christi immolatur qua ratione in cruce immolatum est, nec funditur ejus sanguis manu sacerdotis. Res peragitur in mysterio: attamen vere adest agnus, cujus sanguine pretioso tollitur peccatum mundi, ipseque Deo Patri offertur victima. Feliciter rem explicat episcopus prælaudatus *Overall*,<sup>3</sup> cujus verba recitant Ox-

(1) Heb. ix. 24.

(2) “This is no new Sacrifice, but the same which was once offered, and which is every day offered to God by CHRIST in heaven, and continueth here still on earth, by a mystical representation of it in the Eucharist. And the Church intends not to have any new propitiation, or new remission of sins obtained, but to make that effectual, and in act applied unto us, which was once obtained by the Sacrifice of Christ upon the Cross. Neither is the Sacrifice of the Cross, as it was once offered up there, *modo cruento*, so much remembered in the Eucharist, though it be commemorated, as regard is had to the perpetual and daily offering of it by CHRIST now in Heaven in His everlasting Priesthood, and thereupon was, and should be still the *juge sacrificium* observed here on earth as it is in Heaven, the reason which the ancient Fathers had for their daily Sacrifice. *S. Chrysost. in 10 Heb. . . . S. Aug. de Civ. Dei, lib. 10. cap. 20. . . . p. 46. Oxford Tracts, vol. iv. No. 81. p. 70.*

(3) Hæc recitant Oxonienses, ex scriptis episcopi *Overall*. “If we compare the Eucharist with the Sacrifice once made upon the Cross, with reference to the killing or destroying of the Sacrifice, or with reference to the visibility of it, in that sense we call it only a Commemorative Sacrifice, as the Fathers do. *Chrys. Hom. contr. Jud. part 2. Sentent. lib. 4. dist 12.* “So the ancient Fathers were wont to call this Sacrifice *Sacri-*

onienses. Utinam hæc nobiscum omnes palam profiterentur, vocum remota ambiguitate !

59. *Obj.* 8. Patres qui videntur dicere Christum se obtulisse in ultima cœna, non possunt intelligi vere et proprie, nam nulla fuit fusio sanguinis, nulla occisio seu mors victimæ: explicandi igitur sunt ratione habita representationis, prout dicit Augustinus, “significante mysterio” vel juxta Cypriani mentem, de “Sacramento Dominici Sacrificii.” Ita Fernius.

*Resp.* Nil obstat quin patres obvio excipiantur sensu; imo id postulat tota orationis series, et testimoniorum congeries. Cæterum incruentum fuit et mysticum sacrificium, verum tamen et proprium; corpus enim et sanguis Christi vere aderant et offerebantur, quamvis in mysterio, et sacramento. Quæ objiciuntur voces nullam faciunt difficultatem, probe et sane juxta contextum intellectæ. Equidem non agitur de cruento sacrificio oculis obversante, sed de vera oblatione victimæ cujus sanguis in cruce semel effusus est. Ipse Fernius non potuit diffiteri patres plerumque ita locutos ut transubstantiationem tradere viderentur, et verum sacrificium Christi corporis et sanguinis.<sup>1</sup> Quod autem has locutiones mysticas et obscuras dicat, gratis asseritur, quum testimonia sint clarissima, et omni ambiguitate libera, uti ea recolenti patebit.

*ficium laudis et gratiarum actionis*; not exclusively, as if it were no other Sacrifice but that; for they called it also, *Sacrificium commemorationis*, and *Sacrificium Spiritus*, and *Sacrificium obsequii*, &c., and which is more *Sacrificium verum et propitiatorium*: all other ways but this, the Eucharist or any other Sacrifice we make, are improperly, and *secundum quamdam similitudinem*, called Sacrifices. . . . Now the Eucharist, though by way of analogy it may be called a Sacrifice many of these ways, yet the true and real nature of it in the offertory is to acknowledge God's Majesty and our misery, and to appease His wrath towards us, to get blessings from Him, to make CHRIST's bloody Sacrifice effectual unto us. . . . The people may offer it up all the improper ways, none but the Priest can offer it as a proper Sacrifice. So that though it may analogically be called a Sacrifice most of the seven ways, YET FORMALLY AND TRULY IT MAY BE CALLED A SACRIFICE ALSO IN THE VERY NATURAL SIGNIFICATION OF A SACRIFICE, for ought I know any harm should come on't: not in strictness and rigour of speech, for so was there never a Sacrifice, nor never shall be any, but CHRIST's alone. See the exposition of the place in Malachi *apud Maldon. de Euch.* p. 326. and of Psal. 110. *Tu es Sacerdos*, &c.” Hæc Catholicæ doctrinæ admodum consona, si ambigua quædam sub finem exceperis, sensit Anglicanus ille episcopus Overall, quamvis non videatur ausus fuisse ea palam profiteri, nam ex privatis suis scriptis desumpta suat. “MS. Notes written in an interleaved Common Prayer Book, printed in the year 1619, supposed to be made from the collections of Bishop Overall, by a friend or chaplain of his.”

(1) “The Fathers used, for the most part, to speak of this mystery of the Eucharist mystically and obscurely, under the properties of the things signified, rather than of the external symbols, and therefore seeming to imply A REAL CONVERSION, OR TRANSUBSTANTIATION OF THE SYMBOLS INTO THE BODY AND BLOOD OF CHRIST, AND A REAL SACRIFICE, OR OFFERING UP OF THAT BODY AND BLOOD AGAIN IN THE EUCHARIST. Ferne, Bishop, *Certain considerations*, p. 155.

60. *Obj.* 9. Patrum dicta sacrificii crucis repræsentationem, quæ utilitates omnes novi sacrificii nobis afferat, tantum ostendunt.

*Resp.* Repræsentatio quam statuunt patres est illa quæ fit corpore et sanguine Christi, sub speciebus sacramentalibus, Deo Patri oblatis. Est igitur verum et proprium sacrificium, quia eadem offertur victima ac in cruce, sola offerendi ratione diversa. Quod si mera foret repræsentatio, tolleretur ratio veri sacrificii, quam tamen plurimi Anglicani prædicant. Si autem panis et vinum dicerentur sacrificium constituere, duo forent sacrificia, scilicet illud crucis, et alterum eucharisticum, ab illo plane diversum, quippe non eadem foret victima. Præterea tribuerentur pani et vino, tamquam symbolis corporis et sanguinis Christi, ea quæ nonnisi ipsi corpori pro nobis dato, ipsi sanguini pro nobis fuso, tribuere fas est.

61. *Obj.* 10. S. Joannes Chrysostomus ait: "Quid verò nonne nos quotidie offerimus? offerimus quidem, sed ejus mortem revocamus in memoriam: et hæc oblatio una est, non multæ, quoniam semel est oblatus."<sup>1</sup>

*Resp.* Diluit præstantissimus ille Pauli interpretes difficultatem de unica oblatione, docens quotidianam oblationem esse ipsam semel factam in cruce, quæ in memoriam revocatur, et celebratur. Mentem suam dilucide explicat: "siquidem eundem semper offerimus; hoc est, non alias ovem alteram, alias aliam, sed eandem perpetuo: itaque unicum est sacrificium. Quoniam multis in locis offertur, multine sunt Christi? nequaquam: sed unus ubique Christus. Quomodo ergo multis in locis oblatus, unum est corpus, non multa corpora; ita enim unum est sacrificium." Memoria recolitur passionis, vero tamen oblato sacrificio, quo victima eadem præsens sistitur, et Deo offertur. Sic alias dicit: "Mensa mystica parata est; et Agnus Dei pro te immolatur. Sacerdos pro te angitur, ignis spiritalis e sacra mensa erumpit, Cherubim adstant, Seraphim advolant, et Spiritus sex alas habentes faciem tegunt; omnes incorporeæ virtutes pro te cum sacerdote intercedunt; ignis spiritalis e cælo descendit; SANGUIS IN CRATERE IN TUAM PURIFICATIONEM EX IMMACULATO LATERE EFFUSUS EST."<sup>2</sup>

62. *Obj.* 11. Augustinus dicit: "Hoc est sacrificium Christianorum, multi unum sumus in Christo: Quod etiam Sacramento altaris fidelibus noto frequentat Ecclesia, ubi ei demonstratur, quod in ea oblatione quam offert ipsa offeratur."<sup>3</sup> Mystica igitur oblatio eucharistia est, in qua fideles omnes Christo se animo conjungunt, ut Deo dent honorem.

*Resp.* Optime hæc a præclaro doctore dicuntur, ut doceat oportere nos victimas Deo offerre, cum capite nostro, cui jungimur, divino fruente convivio. Quantum lateat arcanum indicat Augustinus "SACRAMENTO ALTARIS FIDELIBUS NOTO," nec enim totum suum sensum de eo promere voluit. Cæterum licet Ecclesia Deo offerat se cum capite suo, ipse

(1) Hom. xvii. in ep. ad Hebr.

(2) Hom. ix. de Pœnitentia.

(3) L. x. de civ. Dei. c. vi.

Christus tamen est offerens, ipse et oblatio.<sup>1</sup> Ejus oblationis in cruce sacramentum est quotidianum Ecclesiæ sacrificium, quo scilicet repræsentatur, exhibetur, et nobis applicatur. “Id sacrificium” inquit, “successit omnibus illis sacrificiis veteris legis, quæ immolabantur in umbra futuri . . . quia pro illis omnibus sacrificiis et oblationibus corpus ejus offertur, et participantibus ministratur.”<sup>2</sup>

63. *Obj.* 12. Confert Augustinus eucharistiam cum Hebræorum victimis: “Hebræi in victimis pecorum quas Deo offerebant, multis et variis modis, sicut tanta re dignum erat, prophetiam celebrabant futuræ victimæ quam in cruce Christus obtulit: jam Christiani peracti ejusdem sacrificii memoriam celebrant sacrosancta oblatione et participatione corporis et sanguinis Christi.”<sup>3</sup>

*Resp.* In eo posita est comparationis vis, quod eucharistia celebret sacrificium in cruce peractum, cujus figuræ in Hebræorum victimis præcesse-  
rant: cæterum non meram memoriam, sed sacrosanctam oblationem et participationem corporis et sanguinis Christi agnoscit Augustinus.

64. *Obj.* 13. Nulli sunt in nova lege præter Christum sacerdotes; Apostolus enim de antiquo sacerdotio dicit: “Alii quidem plures facti sunt sacerdotes, idcirco quod morte prohiberentur permanere. Hic autem eo quod maneat in æternum sempiternum habet sacerdotium.”<sup>4</sup>

*Resp.* Præstantiam Christi sacerdotii Apostolus demonstrat, quum prædicetur in æternum sacerdos secundum ordinem Melchisedech; Aaron quippe brevem vitæ curriculum suo munere sacerdotali functus est, quo e vivis sublato; alii in ejus locum suffecti sunt: Christus autem, eo quod maneat in æternum, sempiternum habet sacerdotium, quod et exercet, homines enim nonnisi ministri ejus sunt, ejus nomine visibili munere fungentes, ipso præcipue offerente, sacerdote simul et victima.

65. *Obj.* 14. In Missa nulla est victimæ mactatio.

*Resp.* Missa non est sacrificium instar illorum quæ fuso sanguine immolabantur: sed est incruentum, mysticum, commemorativum, verum tamen et proprium, quum victima adsit, et Deo offeratur, in suæ majestatis et arbitrii supremi testimonium, quæ præcipua est sacrificii ratio.<sup>5</sup> Fit etiam mystica mactatio, quum distincta elementorum consecratione corpus et sanguis ponantur, veluti a se invicem separata, ut separationis realis in cruce, quando fusus est sanguis, imago quædam habeatur. Hinc Chrysostomus jurantem per altare increpans, non dubitat dicere: “Quid agis, o homo? juras super sacram mensam, ubi et Christus occisus jacet?”<sup>6</sup>

(1) Vide c. xx. supra cit.

(2) L. xvii. de civ. Dei, c. xx.

(3) L. xx. contra Faustum c. xviii.

(4) Heb. vii. v. 23. 24.

(5) Videntur primorum hominum oblationes hujusmodi fuisse, quæ idcirco מנחה dicuntur a Moyse, Gen. iv. 4. hostia *ἑσπέρια* a Paulo. Heb. xi. 4.

(6) Hom. xv. ad populum.

66. *Obj.* 15. Si Christus immoletur quoties Missa celebratur, jam de unica salutis hostia actum est: Quod si mystice tantum immoletur, sensu latiori, et minus proprio dicitur sacrificium.

*Resp.* Immolatur Christus incruente, et mystice, vere tamen, quia corpus ejus et sanguis præsentia fiunt, et Deo offeruntur, ad divinam majestatem colendam. “Ipse offerens, idemque hostia; ipse Agnus, ipseque gladius spiritus.”<sup>1</sup> Ita vetus auctor, cujus oratio inter Cyrilli Hierosolymitani opera edita est. Igitur unica est hostia, Christus, qui semel cruenta immolatus, quotidie, imo fere singulis momentis, Deo offertur.<sup>2</sup> Verum etiam est sacrificium, nam victima vere offertur, et quidem præstantissima.

(1) Hom. de Christi occurso in templo.

(2) “Have I said any thing to cause any man to imagine, that I suppose CHRIST to be crucified again, as often as the Eucharist is celebrated? . . . Certainly, I will speak freely, neither can they that hold Transubstantiation, be truly said to stand obliged to any such consequence, so long as they acknowledge, with all Christians, that the Covenant of Grace is for once settled by the one Sacrifice of our LORD upon the Cross. Why? because, though they believe the natural Flesh and Blood of CHRIST, as crucified to be there, yet not naturally, but sacramentally, (that is, in their sense, under the accidents of bread and wine, which is, indeed, and in the sense of the Church, under the *species* or kinds;) which difference is so great an abatement of that common and usual sense, in which all Christians understand that CHRIST was sacrificed upon the Cross, that all that know it to be their profession (which all must know that will not speak of they know not what) must acknowledge that the repeating of the Sacrifice of CHRIST crucified by the Eucharist, is not the repeating of that Sacrifice by which mankind was redeemed, otherwise than as a Sacrament is said to be that whereof it is a Sacrament.” Thorndike, epilogue, book iii. ch. v. apud Oxonienses, tract. 81 p. 166.

## CAPUT II.

## DE SACRIFICII PROPRIETATIBUS.

67. Ex his quæ attulimus vetustæ fidei documentis, sicut et ipsis Christi Domini verbis, liquet corpus ejus et sanguinem vere Deo offerri, sub speciebus panis et vini. Optime igitur Leibnitius: “Res oblata sive victima aut hostia est ipse Christus, cujus caro et sanguis sub specie symbolorum utique immolationis atque libamenti officium subit. Nec video quid hic desit ad veram sacrificii rationem: quidni enim id quod sub symbolis præsens est, Deo offerri possit, cum quod sub his in eucharistia continetur, sit omnium rerum pretiosissimum.”<sup>1</sup> Anglicani nonnulli fere cesserunt veritatis evidentiæ:<sup>2</sup> aliqua tamen adjicientes ut suis consulerent placitis.

68. Qua in re sacrificii eucharistici ratio constituenda sit, quæritur. Anglicanorum sententia eam in panis et vini oblatione, quatenus symbola fiunt corporis et sanguinis Christi, reponentium absona plane est: hujusmodi enim oblatio foret a corpore ipso et sanguine diversa, et proinde repugnaret unico Christi sacrificio; nec mera repræsentatio, victima deficiente, potest sacrificium haberi. Theologi varie sentiunt de essentia sacrificii eucharistici, nec nobis per otium licet singulas sententias perscrutari. Placet illa quæ totam in consecratione agnoscit, nam Christus tamquam victima præsens fit, ideoque Deo, ipsa præsentia sua, oblatus censendus est. Utriusque speciei consecrationem ad essentiam sacrificii pertinere plerique tenent, Colleto tamen cum aliis dissentiente, qui, licet divinum præceptum agnoscat utramque speciem consecrandi, essentiam sacrificii haberi in unius speciei consecratione putat. Hanc nobis arridere opinionem haud diffitemur; quamvis enim non facile Colleto assentiamur docenti in divino illo præcepto dispensari posse ab Ecclesia, urgente necessitate, tamen si casu vel culpa contingat alteram speciem deficere, peracta alterius consecratione, quum Christus, victima nostra, adsit, sacrificium haberi opinamur. Cum De La Hogue, Perrone, aliisque plurimis communionem, seu sacerdotis, seu populi, ad sacrificii essentiam haud censemus pertinere.

(1) System. Theol. p. 285.

(2) “What time then so fit and seasonable to commend our devotions unto God, as when the LAMB of GOD is slain upon the Holy Table?” Mede, presbyter, *The Christian sacrifice* Mal. i. ii. apud Oxonienses tract. 81, p. 111.

69. Sacrificium *latreuticum* imprimis eucharistia est, quippe ad Dei honorem et cultum supremum destinata. Christus quidem victima est cæteris omnibus præstantior, qua immolata summus honor Deo tribuitur. Tamquam homo, sacerdos, et hostia, Deum colit, sacerdotum suorum ministerio. Hinc in Liturgia S. Marci dicitur : “ Offerimus rationabilem et incruentum cultum—προσφέρομεν τὴν λογικὴν καὶ ἀναιμάκτον λατρείαν ταύτην—quem offerunt tibi, Domine, omnes gentes ab ortu solis usque ad occasum ; a septentrione ad meridiem : quia magnum nomen tuum in gentibus, et in omni loco incensum offertur nomini sancto tuo, et sacrificium, et oblatio.”<sup>1</sup>

70. *Eucharisticum* esse Missæ sacrificium, quatenus Deo persolvuntur laudes ob beneficia nobis collata, nemo facile negaverit : sed non omnes fatentur eo laudes persolvi ob sanctorum gloriam, ita ut simul celebretur eorum memoria, et preces apud Deum quærantur : quod tamen ex liturgiis omnibus liquet. Sic in liturgia S. Gregorii Alexandrina fit commemoratio “ præcipue sanctissimæ, gloriosissimæ, immaculatæ, et benedictionibus cumulatae, dominæ nostræ Deiparæ, et semper virginis Mariæ ; sancti gloriosi prophetæ, præcursoris, Baptistæ et martyris Joannis . . . eorumque quorum hodie memoriam facimus, et omnis chori sanctorum tuorum, quorum precibus et intercessionibus miserere nostri et salva nos.”—ὡς ταῖς εὐχαῖς καὶ πρεσβείαις καὶ ἡμᾶς ἐλέησον, καὶ σῶσον.<sup>2</sup> Hac de re definivit concilium Tridentinum : “ Si quis dixerit imposturam esse Missas celebrare in honorem sanctorum, et pro illorum intercessione apud Deum obtinenda, sicut Ecclesia intendit ; anathema sit.”<sup>3</sup> De sacrificio celebrato *in memoriis* martyrum, super tumulos scilicet in quibus eorum reliquiæ erant, dicit Augustinus : “ Honoramus sane memorias eorum tamquam sanctorum hominum Dei, qui usque ad mortem suorum corporum pro veritate certarunt, ut innotesceret vera religio, falsis religionibus fictisque convictis : quod etiam si qui antea sentiebant, timendo reprimebant. Quis autem audivit aliquando fidelium stantem sacerdotem ad altare, etiam super sanctum corpus martyris, ad Dei honorem, cultumque constructum, dicere in precibus : Offero tibi sacrificium, Petre, vel Paule, vel Cypriane, cum apud eorum *memorias* offeratur Deo, qui eos et homines et martyres fecit, et sanctis suis angelis cælesti honore sociavit : ut ea celebritate, et Deo vero de illorum victoriis gratias agamus, et nos ad imitationem talium coronarum atque palmarum, eodem invocato in auxilium, ex eorum memoriæ renovatione adhortemur.”<sup>4</sup>

71. *Impetratorium* esse eucharisticum sacrificium liquet, quum enim pro nobis offeratur, juxta Christi verba, utique valet impetrare ea quibus indigemus a Deo beneficia, ea præsertim quæ ad salutem referuntur. Hinc

(1) Apud Renaudotium t. i. p. 145.

(2) Ibidem. p. 112.

(3) Sess. xx. can. v.

(4) L. viii. de civ. Dei c. xxvii.



Cyrillus Hierosolymitanus dicit : “ Postquam confectum est illud spirituale sacrificium, et ille cultus incruentus super ipsa propitiationis hostia, obsecramus Deum pro communi ecclesiarum pace, pro tranquillitate mundi, pro regibus, pro militibus, pro sociis, pro ægrotis, et in summa pro omnibus qui indigent auxilio.”<sup>1</sup> Chrysostomus ait : “ Pro infirmis, et terræ, et maris, et universi orbis fructibus sacrificamus.”<sup>2</sup> Liturgiæ omnes eas habent preces, quæ quidem ab Apostolo præscriptæ sunt : “ Obsecro igitur primum omnium fieri obsecrationes, orationes, postulationes, gratiarum actiones pro omnibus hominibus, pro regibus, et omnibus qui in sublimitate sunt.”<sup>3</sup>

72. Definivit concilium Tridentinum eucharistiam esse *propitiatorium* sacrificium, non quod novam pro peccatorum venia pretium, a crucis sacrificio diversum, in ea offeratur ; sed quod ipse sanguis in cruce fusus exhibeatur, et offeratur, iterum iterumque, ad Deum nobis placandum. Id apprime intellexit et explicuit episcopus Anglicanus Overall ab Oxoniensibus laudatus.<sup>4</sup> Concilii definitio his concepta est verbis : “ Si quis dixerit, Missæ sacrificium tantum esse laudis, et gratiarum actionis, aut nudam commemorationem sacrificii in cruce peracti, non autem propitiatorium, vel soli prodesse sumenti, neque pro vivis, et defunctis, pro peccatis, pœnis, satisfactionibus et aliis necessitatis offerri debere ; anathema sit.”<sup>5</sup>

73. Plerique sectarii carpunt hanc definitionem, omnique proscindunt vituperio patres Tridentinos, veluti crucis virtutem evacuantes ; sed nonnulli sanius sapientes, fatentur eucharisticum sacrificium esse *propitiatorium*,<sup>6</sup> quamvis vehementer errent dum panem et vinum, tamquam symbola corporis et sanguinis Christi, illud sacrificium constituere dicunt.

(1) Cat. Myst. v.

(2) Hom. lxxi. in Joan.

(3) I. Tim. ii.

(4) Tract 81, p. 71. “ If we compare the Eucharist with CHRIST’S Sacrifice made once upon the Cross, as concerning the effect of it, we say that that was a *sufficient* Sacrifice ; but withal that it is a *true, real, and efficient* Sacrifice ; and both of them propitiatory for the sins of the whole world. And therefore in the oblation following, we pray that it may prevail so with God, as that we and all the whole Church of CHRIST, (which consists of more than those upon the earth) may receive the benefit of it. Neither do we call this sacrifice of the Eucharist an *Efficient* Sacrifice, as if that upon the Cross wanted efficacy ; but because the force and virtue of that sacrifice would not be profitable unto us, unless it were applied and brought into effect by this Eucharistical Sacrifice, and other of the Holy Sacraments, and means appointed by God for that end : but we call it propitiatory both this and that, because they have both force and virtue in them to appease God’s wrath against this sinful world.—Read Mald. de Sac. p. 322.”

(5) Sess. xxii. Can. iii.

(6) “ It is not only an Eucharistical, but a Propitiatory Sacrifice : and to prove it a Sacrifice propitiatory, always so acknowledged by the ancient church, there can be no better argument than that it was offered up, not only for the living, but for the dead, and



## PROPOSITIO.

*Missa est sacrificium propitiatorium.*

*Probatur I. ex verbis Christi.*

74. Christus dixit: “Hoc est corpus meum QUOD PRO VOBIS DATUR:” “Hic est calix novum Testamentum in sanguine meo QUI PRO VOBIS FUNDATUR;”<sup>1</sup> vel uti habet textus, “calix . . . qui pro vobis funditur.” “Pro multis fundetur IN REMISSIONEM PECCATORUM.”<sup>2</sup> Quum textus verba præsens sint temporis,<sup>3</sup> liquet corpus in ipsa eucharistiæ institutione datum esse, sanguinem fusum esse in remissionem peccatorum. Ergo propitiatorium sacrificium tunc oblatum est; quod offertur quoque quoties celebratur eucharistia, ex Christi mandato; idem enim fit quod ab ipso factum est. Hujus argumenti vim agnoverunt plures Anglicani.<sup>4</sup>

*Probatur II. ex Liturgiis.*

75. In liturgia Jacobi, post consecrationem orat sacerdos his verbis: “Offerimus tibi, Domine, hoc sacrificium venerandum et incruentum, orantes, ne secundum peccata nostra nobiscum agas.” . . . Ut efficiamur digni qui socii et participes simus sanctorum tuorum mysteriorum in remissionem peccatorum, et in vitam æternam.” In liturgia Marci post invocationem Spiritus Sancti, orat sacerdos ut corpus et sanguis Christi “fiant omnibus nobis qui ex iis participamus in remissionem peccatorum.” In liturgia Basilii, juxta Copticum exemplar, orat “ut sacrificium nostrum coram te acceptum sit pro peccatis meis, et pro insipientiis plebis tuæ.”

*Probatur III. ex Patribus.*

76. S. CYRILLUS HIEROSOLYMITANUS eucharistiam vocat propitiationis hostiam: “super illam propitiationis hostiam obsecramus Deum”—ἐν τῇ

for those [that were absent, for them that travelled, for Jews, for heretics, &c. who could have no other benefit of it, but as it was a propitiatory Sacrifice; and that thus they did offer it, read a whole army of Fathers, apud Mald. de Sac. p. 302. *Nos autem ita comparati sumus, ut cum tam multis et magnis authoribus errare malimus, quam cum Puritanis verum dicere.*” Ita Overall apud Oxonienses, p. 74.

(1) Luc. xxii. 19, 20.

(2) Matt. xxvi. 28.

(3) Quod vulgatus interpres verbo futuri temporis textum reddiderit, contigisse videtur, ex eo quod sanguinis fusionem in cruce designatam intelligens, præsens tempus pro mox futuro usurpatum censuerit. Cæterum versio non potest infirmare vim textus, qui hoc loco nullam habet mendam, uti omnes fatentur. Versio autem cum textu optime concordat, si textus de fusione mystica, versio de fusione reali explicetur.

(4) “I shall make use of the words of institution; because I think that an argument drawn from them will be of the greatest weight; and I am persuaded that the propitiatory nature of the holy Eucharist is as plainly contained in those words, as any rational man can desire.” Johnson apud Oxonienses, tract 81. p. 317.

ἀνίας ἰκεως τὸ ἱλασμὸν παρακαλῶμεν τὸν θεόν.<sup>1</sup> S. AMBROSIIUS ait: “Ante agnus offerebatur, offerebatur vitulus; nunc Christus offertur, sed offertur quasi homo, quasi recipiens passionem, et offert se ipse quasi sacerdos, ut peccata nostra dimittat.”<sup>2</sup> S. JOANNES CHRYSOSTOMUS de Christo Judæ propinante calicem dicit: “Christus ei sanguinem quem vendidit offerebat ut haberet remissionem peccatorum, si tamen impius existere noluisse.”<sup>3</sup> Insuper sanctitatem qua ornari debet sacerdos, ex munere quo fungitur, victimam hanc offerendo, ostendit: “Eum qui pro civitate tota; quid dico civitate? immo vero pro universo terrarum orbe legatus intercedit, deprecatorque est apud Deum, ut hominum omnium non viventium modo, sed etiam mortuorum peccatis propitius fiat, qualem quæso esse oportet?”<sup>4</sup> Patrum hac in re consensum, sicut et liturgiarum, agnoscunt Anglicani plures doctrina præstantes.<sup>5</sup>

## OBJECTIONES SOLVUNTUR.

77. *Obj.* 1. Juxta doctrinam de propitiatorio eucharistiæ sacrificio virtus crucis evacuatur; nec enim redempti videbimur sanguine in cruce fuso, sed in eucharistia oblato.

*Resp.* Christi sanguine redempti sumus, nec enim alius est qui in eucharistia offertur, et qui in cruce est fusus. Se obtulit Christus victimam, sacrificium instituendo, et in mysterio sanguinem fudit, quem fusuri erant hostes ejus, cruci eum affigendo. Dum celebratur eucharistia, non novum offertur pretium redemptionis, sed sanguis in cruce fusus iterum Deo offertur ad eum nobis placandum, ut applicetur nobis in peccatorum remissionem. Hoc tantum sensu propitiatorium vocamus eucharistiæ sacrificium, qua in re plurimi et doctissimi Anglicani nobis assentiuntur.<sup>6</sup>

(1) Cat. xxiii. Myst. v. n. viii.

(2) L. 1. de officiis c. xlviii.

(3) Hom. de prodit. Judæ t. iii. p. 344.

(4) Lib. vi. de Sacerdotio.

(5) “The other end of this Sacrifice is to procure divine blessings, and especially pardon of sin. In the first respect, it is propitiatory; in the second, expiatory, by virtue of its principal, the grand Sacrifice . . . . St. Chrysostom . . . . St. Austin . . . . Cyril of Jerusalem . . . . Eusebius . . . . St. Cyprian . . . . Origen . . . . St. Clement of Rome. . . . The Liturgies are very full of proof to this purpose; the Gregorian . . . . that of St. Peter . . . . St. Chrysostom’s Liturgy . . . . the Liturgy of St. Basil . . . . and the Liturgy of St. James. . . . But the Clementine Liturgy best deserves our notice, and in that the Bishop beseeches God to look favourably on the gifts, and to send down His Holy Spirit on them; that they who partake of them, may be confirmed in godliness, obtain remission of sins, &c.” Johnson apud Oxonienses, tract 81. p. 340.

(6) Thorndike, presbyter Anglicanus, dicit: “If the consecrated elements be the Flesh and Blood of CHRIST, then are they the Sacrifice of CHRIST crucified upon the Cross. For they are not the Flesh and Blood of CHRIST as in His Body, while it was whole, but as separated by the Passion of the Cross. Not that Christ can be sac-

78. *Obj.* 2. Blasphemum est sacrificium eucharisticum Christi in cruce sacrificio adæquare, quod tamen fit dum utrumque propitiatorium prædicatur.

*Resp.* Illud inter utrumque intercedit discrimen, quod pretium in cruce solutum sit, quod nobis in eucharistia applicatur. Igitur nihil derogatur virtuti illius sacrificii; quæ e contra prædicatur quoties celebratur eucharistia, ut fructus nobis inde proveniant.

79. *Obj.* 3. Præ unica oblatione crucis quotidianæ et innumeræ hostiæ propitiationis habentur, eucharistia propitiatorio sacrificio agnita.

*Resp.* Unica est propitiationis victima, semel immolata, sanguinis effusione, sed in mysterio sæpissime oblata.

80. *Obj.* 4. Quæ ad adstruendam propitiatoriam vim eucharistiæ allegantur, intelligenda sunt de repræsentatione sacrificii crucis, et de oratione quæ offertur ejus occasione.

*Resp.* Testimonia tum Scripturæ, tum patrum, tum Liturgiarum vim Deum placandi eucharistico sacrificio inesse probant: placatur autem non pane et vino, tamquam symbolis, sed corpore et sanguine Filii sui. His, non orationi, tribuenda est vis purgandi delicta, quamvis oratio cum sacrificio conjuncta magnam habeat vim.

81. Ostendimus eucharisticum sacrificium esse *propitiatorium*, quod tamen non ita est accipiendum ac si ejus oblatione tollerentur peccata. Quum Christus baptismi et pœnitentiæ sacramenta in peccatorum remissionem instituerit, iis utatur necesse est qui hanc cupit consequi. Missæ oblatio prodest baptizato homini ut gratiæ consequatur auxilia, quibus ad rite suscipiendum pœnitentiæ Sacramentum disponatur. Venialium culparum remissio etiam ea obtinetur, sicut et plenior remissorum peccatorum indulgentia.

82. Toto cœlo aberrant Anglicani nonnulli qui eucharistiam sacrificium propitiatorium agnoscentes, precibus quæ ejus offerendæ occasione funduntur propitiandi vim tribuunt:<sup>1</sup> nam ex ipsa propitiationis hostia, uti ex Cyrillo didicimus, precum illarum vis derivatur.

83. Vis propitiatoria sacrificii eucharistici ex precibus quæ pro defunctis ea occasione funduntur optime colligitur. Res est apud Oxonienses

rificed again; for a Sacrifice being an action done in succession of time cannot be done the second time, being once done, because then it should not have been done before: but because the Sacrifice of Christ is represented, commemorated and applied, by celebrating and receiving the Sacrament which is that Sacrifice." Just Weights and Measures, pp. 95-6. apud Oxonienses, tract 81. p. 179.

(1) "This self same prayer in which, through the Body and Blood of CHRIST represented on the altar, God is entreated to be propitious to us, and bestow upon men all good things, is that 'propitiatory Sacrifice,' or 'unbloody immolation' and propitiatory Sacrifice, of CHRIST, of which very frequent mention occurs in the writings of the holy Fathers." Græbe *MS. adversaria* apud Oxonienses, p. 377.

explorata illum esse antiquissimum Ecclesiæ ritum,<sup>1</sup> quem et magnas habere utilitates non diffitentur; quamvis negent inde recte inferri Purgatorium esse, in quo animæ, sacrificii pro iis oblatione, sublevantur. De hoc animarum statu disserere non est hujus loci; sed opportunum videtur ostendere Missæ sacrificium revera pro defunctis esse propitiatorium, quod profecto intelligendum est de animabus justorum, quibus leviores forsitan inhæreant maculæ.

## PROPOSITIO.

*Missæ sacrificium est propitiatorium, etiam pro defunctis.*

*Probatur I. ex Liturgiis omnibus.*

84. In liturgia S. Basilii Alexandrina orat sacerdos hisce verbis: “Memento, Domine, et omnium ex ordine sacerdotali qui pridem quieverunt, et eorum qui erant in statu sæculari. Præsta omnium animas requiescere in sinibus sanctorum patrum nostrorum Abraham, Isaac, et Jacob. Induc et congrega eos in locum herbidum, super aquam requietis, in paradiso voluptatis, unde fugit dolor, tristitia, et gemitus, in splendore sanctorum tuorum. . . . Illis quidem Domine quorum animas accepisti, illid quietem tribue, eosque in regnum cælorum transferre dignare.—Εκείνους μὲν κύριε τὰς ψυχὰς ἐκ τῶν λαβῶν ἀνὰ πᾶνσον, καὶ βασιλείας ἑρανοῦ παραξίωσον.”

*Probatur II. Patrum testimoniis.*

84. TERTULLIANUS dicit: “Oblationes pro defunctis, pro natalitiis, annua die facimus.”<sup>2</sup>

85. S. CYPRIANUS: “Episcopi antecessores nostri religiose considerantes, vel salubriter providentes censuerunt, ne quis frater excedens ad tutelam vel curam Clericorum nominaret, ac si quis hoc fecisset, non offerretur pro eo, nec pro dormitione ejus sacrificium celebraretur.”<sup>3</sup>

86. S. CYRILLUS HIEROSOLYMITANUS scribit: “Pro defunctis sanctis patribus, et episcopis, et omnibus generatim qui inter nos vita functi sunt oramus, maximum esse credentes animarum juvamen, pro quibus offertur

(1) De veteribus christianis dicunt: “Since they knew not of our chill separation between those who being dead in CHRIST, live to CHRIST, and with CHRIST, and those who are yet in the flesh, they felt assured that this Sacrifice offered by the Church on earth, for the whole Church conveyed to that portion of the Church, which had passed into the unseen world such benefits of CHRIST’S Death, as (their conflicts over and they in rest) were still applicable to them.” Tract. 81, p. 6.

(2) Apud Renaudotium t. i. p. 73. Alias afferre liturgias supervacaneum est nam res est in confesso: “There is one proof of the propitiatory nature of the Eucharist, according to the sentiments of the ancient Church, which will be thought but only too great; and that is the devotions used in the Liturgies, and so often spoken of by the Fathers, in behalf of deceased souls. There is, I suppose, no Liturgy without them and the Fathers frequently speak of them.” Johnson, apud Oxonienses, tract 81. p. 340.

(3) L. de cor. mil.

(4) L. i. ep. ix. aliàs ep. lxvi.

obsecratio sancti illius et tremendi quod in altari positum est sacrificii.”<sup>1</sup>

μεγίστην ὄνησιν πλεονούντες ἴσασθαι ταῖς ψυχαῖς, ὑπὲρ ὧν ἡ δέησις ἀναφέρεται εἰς ἁγίας καὶ φρικωδεστάτης προκειμένης θυσίας.

88. S. CHRYSOSTOMUS : “ Non temere hæc ab Apostolis sancita fuerunt, ut in tremendis mysteriis defunctorum agatur commemoratio : sciunt enim illis inde multum contingere lucrum, multam utilitatem.”<sup>2</sup>

89. S. AUGUSTINUS : “ In Machabæorum libro legimus oblatum pro mortuis sacrificium, sed etsi numquam in Scripturis veteribus omnino legeretur, non parva est universæ Ecclesiæ, quæ in hac consuetudine claret, auctoritas, ubi in precibus sacerdotis, quæ Domino Deo ad ejus altare funduntur, locum suum etiam habet commendatio mortuorum.”<sup>3</sup> Memorat etiam matrem suam moribundam sic ipsum et fratrem allocutam esse : “ Ponite, inquit, hoc corpus ubicumque : nihil vos ejus cura conturbet : tantum illud vos rogo, ut ad Domini altare memineritis mei, ubi, ubi fueritis.”<sup>4</sup> Narrat funus ejus : “ Cum ecce corpus elatum est, imus, redimus sine lacrymis. Nam neque in eis precibus quas tibi fudimus, cum offerretur pro ea *sacrificium pretii nostri*, jam juxta sepulchrum posito cadavere, priusquam deponeretur, sicut illic fieri solet, nec in eis precibus ego flevi.”<sup>5</sup>

#### OBJECTIONES SOLVUNTUR.

90. *Obj.* 1. Commemorantur in sacrificio mortui ut profiteamur resurrectionis et gloriæ spem. Ita Oxonienses.<sup>6</sup>

*Resp.* Fidem de resurrectione et spem enuntiat sancta illa consuetudo, timoremque ne labe aliqua leviori inquinata anima decesserit. Levamen animabus sacrificii oblatione quærebatur, ex certa fide multam eis utilitatem inde provenire, uti docent Cyrillus et Chrysostomus.

91. *Obj.* 2. Orabatur etiam et offerebatur sacrificium pro virgine Maria et Apostolis. Oxonienses iterum.<sup>7</sup>

*Resp.* Commemorabatur Maria Virgo cum Apostolis et martyribus, ut eorum causa Deus hominum misereretur. Sic testatur Cyrillus, liturgiam explicans : “ Cum hoc sacrificium offerimus, mentionem facimus eorum qui ante nos obdormierunt, primum patriarcharum, prophetarum, Apostolorum, martyrum, ut Deus orationibus illorum et deprecationibus suscipiat preces nostras” — “ ὅπως ὁ Θεός τῶν εὐχῶν αὐτῶν καὶ πρεσβείαις προσδεξῆται ἡμῶν τὴν δέησιν.”<sup>8</sup> E contra cæteris sacrificii oblatio maximum juvamen esse c

(1) Cat. myst. v. n. 9.

(2) Hom. lxix. ad pop. Antioch.

(3) Lib. de cura pro mortuis.

(4) L. ix. Confess. c. xi.

(5) Ibidem c. xii.

(6) Tract 79, p. 20.

(7) Ibidem p. 21.

(8) Cat. v. Myst. n. ix.

debatur. Discrimen lucide exponit Augustinus: “Non sic eos (*martyres*) commemoramus, quemadmodum alios qui in pace requiescunt, ut etiam pro eis oremus, sed magis ut orent ipsi pro nobis, ut eorum vestigiis adhæreamus.”<sup>1</sup>

92. *Obj.* 3. Ordo officii communis in codice Colbertino hæc habet: “Præsta etiam per illud incensum, quietem et memoriam bonam Genitrici tuæ, et sanctis tuis.” Et “Ecce obsecramus te, Domine Deus, suscipe incensum istud aromatum, quod offert tibi tenuitas nostra, pro sancta Genitrice Dei Maria, pro patre nostro Adamo, et matre nostra Eva, pro prophetis et Apostolis, &c., pro divitibus et pauperibus.” Iterum: “Deus per clementiam tuam, præsta requiem et memoriam bonam Genitrici tuæ et Sanctis tuis, omnibusque defunctis, super altare tuum sanctum et cæleste.” Liquet pari ratione sacrificium offerri pro omnibus defunctis, et proinde haud propitiationis ad instar, sed ut vota nostra de perfecta eorum beatitudine exprimantur.

*Resp.* Cum Renaudotio, “non dubitamus in his locis peccatum potius a librariis imperitis fuisse, qui ea quæ disjunctim scribenda erant, ut passim alibi, conjunxerunt, quam certo consilio admissum id fuisse, ut nova doctrina, a qua remotissimi sunt, et quam quotidiana illorum disciplina refellit, induceretur.”<sup>2</sup> In ordine communi quem exhibet Renaudotius, sic habetur: “Petimus ecce a te, Domine, ut suscipias hunc odorem thuris, quod offert tibi tenuitas nostra, pro peccatis et insipientiis nostris; pro divitibus et egenis; pro pupillis et viduis; pro afflictis, et qui persecutionem patiuntur; pro infirmis et oppressis; pro iis omnibus qui dixerunt et præceperunt nobis, ut in nostris ad te Christum Deum nostrum precibus, eorum meminissemus; pro vivis et mortuis, pro animarum ipsarum quiete, in cælesti Jerusalem: per intercessionem Patris nostri Adami et Evæ matris nostræ; per deprecationes sanctæ Genitricis Dei Mariæ: per orationes prophetarum &c.”<sup>3</sup>

(1) Tract. lxxxiv. in Joan.

(2) Liturgiarum Orientalium collectio, ab Eusebio Renaudotio. Observationes in Liturgiis Syriacas, vol. ii. p. 98.

(3) Ibidem p. 6.

## CAPUT III.

## DE SACRIFICII CELEBRATIONE.

93. Sacrificium eucharisticum primò a Christo oblatum, adhuc suo mandato, auctoritate, et nomine offerri constat, quapropter merito prædicatur unicus novæ legis sacerdos, qui suo in ævum fungitur sacerdotio, secundum ordinem Melchisedech.<sup>1</sup> Pulchre Chrysostomus ait : “ Et nunc ille præsto est Christus, qui illam ornavit mensam, ipse istam quoque consecrat. Non enim homo est qui proposita de consecratione mensæ Domini corpus Christi facit et sanguinem : sed ille qui crucifixus pro nobis est Christus. Sacerdotis ore verba proferuntur, et Dei virtute consecrantur, et gratia. Hoc est, ait, corpus meum : hoc verbo proposita consecrantur. Et sicut illa vox quæ dixit : Crescite, et multiplicamini, et replete terram, semel quidem dicta est, sed omni tempore sentit effectum, ad generationem operante natura : ita et vox illa semel quidem dicta est, sed per omnes mensas Ecclesiæ, usque ad hodiernam diem et usque ad ejus adventum, præstat sacrificio firmitatem.”<sup>2</sup>

94. Constat Christum Apostolos constituisse sacerdotes, qui sacrificium suo nomine offerrent, prout a patribus Tridentinis definitum est : “ Si quis dixerit illis verbis : Hoc facite in meam commemorationem, Christum non instituisse, Apostolos sacerdotes, aut non ordinasse, ut ipsi, alique Sacerdotes offerrent corpus et sanguinem suum ; anathema sit.”<sup>3</sup> Id jam, dum de sacrificio ageretur, probavimus : quum enim Christus vere se ipsum hostiam propitiationis obtulerit,<sup>4</sup> ipsisque ut facerent quod fecerat jusse-

(1) “ His Melchisedeckial or eternal Priesthood, joined with Kingship, was consummated in His resurrection ; and is now continued in His service in the heavenly sanctuary. In which heavenly sanctuary He perpetually offers His Blood and Passion to God ; and as Man makes perpetual prayers and intercessions for us . . . As also He hath instituted the same oblation of his Holy Body and Blood, and commemoration of His Passion, to be made in the Holy Eucharist to God the FATHER by his ministers here on earth, for the same ends, viz. the application of all the benefits of His sole meritorious death and sacrifice on the Cross, till His second return out of this heavenly sanctuary.” Fell, episcopus Anglicanus, *Paraphrase and Annotations*, on Heb. v. 10. apud Oxonienses tract 81. p. 206.

(2) Hom. de prodizione Judæ t. iii. p. 344. edit. Paris 1687.

(3) Sess. xxii. Can. ii.

(4) “ I take it for granted that when our SAVIOUR says, ‘ This is my body given,’ by ‘ given’ he means ‘ offered’ or sacrificed to God. This is a thing very plain in itself, and is, nay, must be, acknowledged by all ; when he said ‘ Take, eat,’ He gave His sacra-



rit, liquet eos constitutos esse sacerdotes, sacrificii offerendi potestate auctos. Ex voce ipsa *faciendi* id inferre licere adnotavimus, quod fatentur Anglicani plures; quamvis non ea, sed toto mandato nitamur. Potestatem eandem ad episcopos presbyterosque transmissam esse manuum impositione ex omnium sæculorum fide constat. Sacerdotes passim in omnibus antiquitatis documentis nominantur, adeo ut singula referre testimonia supervacaneum sit. Unum aut alterum recitare sat erit. Gaudentius Brixiensis dicit: "Dominus discipulis fidelibus mandat, quos primos Ecclesiæ constituit sacerdotes, ut indesinenter ista vitæ æternæ mysteria exercerent, quæ necesse est a cunctis sacerdotibus per singulas totius orbis Ecclesias celebrari."<sup>1</sup> Augustinus ait: "episcopi et presbyteri proprie dicuntur sacerdotes."<sup>2</sup>

95. Sacerdos minister est eucharistiæ conficiendæ, adeo ut nemo valeat eam conficere qui sacerdotio non sit insignitus, prout docet concilium Lateranense, anno 1215 habitum: "Hoc sacramentum nemo potest conficere, nisi sacerdos qui fuerit rite ordinatus."<sup>3</sup> Id fatentur Anglicani.<sup>4</sup> Presbyteriani nullum prorsus reale sacrificium in eucharistia agnoscunt; dicunt tamen Dominum Jesum ministros suos constituisse, qui verba institutionis declarent populo, orent et benedicant elementis panis et vini, eaque ab usu communi secernant.<sup>5</sup> Baptistæ cœnam Dominicam nonnisi ab idoneis personis, ad id ex Christi mandato vocatis, administrandam tradunt.<sup>6</sup> Cæterum apud eos plurimi se ingerunt publicis muneribus, (*sacris*, ne dixerim,) nullo ordinationis ritu prævio, sed divinam vocationem jactantes.

mental Body to His disciples: when He adds 'given for you,' He must mean given, or offered in sacrifice to God for them. The giving His Body to His Apostles, and giving it *for* them, are two things perfectly distinct: His putting it into their hands or mouths, was not giving His Body for them; this was an action performed to the Apostles: His giving, or offering it for them, was an action directed to *God*; which as it is very plain in itself, so is it expressly taught by Paul: 'for Christ,' says he, 'has given Himself for us, an offering and Sacrifice to God.' Eph. v. 2." Johnson, Presbyter Anglicanus in opere anonymo: "*Propitiatory oblation in the Holy Eucharist*."

(1) Tract. ii. de Exodo.

(2) L. xx. de civ. Dei c. x.

(3) Can. i.

(4) "I cannot but observe from S. Cyprian that the Eucharist is called a true and full Sacrifice, which the Priest offers to God the FATHER; and while he is offering it, acts in the stead of JESUS CHRIST Himself, our great High Priest. And if the case be so, if the Eucharist is a true Sacrifice, if as often as the Priest offers this Sacrifice, he acts in the stead of JESUS CHRIST Himself, what can be more plain and manifest than that no man ought to offer up this venerable Sacrifice, but he who is called of God, but he who is ordained and consecrated after the lawful and ordinary manner?" Hughes, presbyter Anglicanus, Dissertationes proœmiales, editioni quam concinnavit S. Joannis Chrysostomi librorum de Sacerdotio p. cccclxxxvi.

(5) Presbyterian Confession of Faith, ch. xxix. n. iii.

(6) Baptist Confession of Faith, ch. xxix. n. 2.



Verbo dicam, apud plerosque sectarios, haud exceptis episcopalianis plerisque, ipsum sacerdotis nomen ignotum esse, vel invisum, et omnem veram sacerdotii notionem evanuisse. Fatetur tamen White sacerdotia, et altaris, et sacrificii voces valde antiqua ætate obtinuisse.<sup>1</sup>

96. Dispensatio eucharistiæ episcopis et sacerdotibus jure suo convenit; sed et diaconis olim commissa est, testante Justino.<sup>2</sup> Quoties sub utraque specie dabatur, diaconi erat calicem propinare iis quos sacerdos divino refecerat corpore.<sup>3</sup> Imo permisit concilium Carthaginense quartum, ut necessitate urgente, ex sacerdotis mandato sacrum corpus diaconus fidelibus porrigeret: “Diaconus, præsentem presbytero, eucharistiam corporis Christi populo, si necessitas cogat, jussus eroget.”<sup>4</sup>

97. Inter probra quæ Ecclesiæ intulerunt decimi sexti sæculi novatores, illud erat præcipuum quod Missarum celebratione in quibus solus communicabat sacerdos, Christi institutum violaret, et frustraretur consilia; cœnæ enim magis quam sacrificii rationem in eucharistia spectabant. Eas reprobavit Lutherus, quem non puduit diabolum prædicare auctorem, cui post plurima a se adducta, ut consuetudinem Missam ita celebrandi, quam tot annos habuit, tueretur cessasse se fassus est, argumentorum dæmoniacorum vi oppressus. Calvinus questus est, quod “aditus Missis privatis patefactus est, quæ excommunicationem quandam magis referrent, quam communitatem illam a Domino institutam, quum sacrificulus, suam victimam seorsim voraturus, se a toto fidelium populo segreget.”<sup>5</sup> In eas debacchantur passim Anglicani et sectarii omnes: attamen lugent jam Oxonienses quotidianum sacrificium ea de causa eis sublatum: de mutationibus scilicet quæ in liturgia Anglicana Cranmeri opera factæ sunt, agentes, queruntur ipsum communicandi ritum hac ratione ter quaterve in anno tantum servari.<sup>6</sup> Concilium Tridentinum morem Ecclesiæ explicuit et vindicavit: “Optaret quidem sacrosancta synodus, ut in singulis Missis fideles adstantes, non solum spirituali affectu, sed sacramentali etiam eu-

(1) “It has been acknowledged, that the here supposed error concerning ‘sacrifice,’ ‘altar,’ and ‘Priest’ arose at an early period of the history of the Christian Church.” Dissertation viii. of the Eucharist by William White, p. 402.

(2) Apol. i. n. 66.

(3) L. de lapsis.

(4) C. xxviii.

(5) L. iv. Inst. c. xviii. 7.

(6) “Daily communion was altogether dropped; it is implied only that there *may* be communion on holy days; and that in Cathedral and Collegiate Churches, there should be *weekly* communion; but on the other hand, it is provided that ‘there shall be no celebration of the Lord’s supper,’ not as before, ‘unless there be *some*,’ but ‘*except there be a good number* to communicate with the priest.’ . . . “We have followed reformers, and have brought down our celebrations of the communion from weekly to monthly, or quarterly, or three times in the year.” *Relative value of the Communion before and after the change of the Liturgy.* Tract. 81, p. 18.

charistiae perceptione communicarent, quo ad eos sanctissimi hujus sacrificii fructus uberius proveniret; nec tamen, si id non semper fiat, propterea Missas illas, in quibus solus sacerdos sacramentaliter communicat, ut privatas et illicitas damnat, sed probat, atque adeo commendat; siquidem illae quoque Missae vere communes censi debent, partim quod in eis populus spiritualiter communicet, partim verò quod a publico Ecclesiae ministro non pro se tantum, sed pro omnibus fidelibus, qui ad corpus Christi pertinent, celebrentur.”<sup>1</sup> “Si quis dixerit, Missas in quibus solus sacerdos sacramentaliter communicat illicitas esse, ideoque abrogandas; anathema sit.”<sup>2</sup>

## PROPOSITIO.

*Missae in quibus solus sacerdos communicat licitae sunt.*

*Probatur I. ex natura sacrificii eucharistici.*

99. Omnis sacrificii natura in eo sita est ut Deo offeratur victima: offerentis privilegium est ejus fieri particeps, quo jure fruuntur alii ad victimae carnes manducandas admissi. Eucharistici autem sacrificii natura in corpore et sanguine Christi oblatis posita est. Nihil ergo obstat quin celebretur, licet non adsint qui ejus fiant participes: praecipuus enim finis sacrificii obtinetur, ut Deo summus tribuatur cultus, et secundarius etiam ut placetur, victima oblata ob hominum peccata.<sup>3</sup>

*Probatur II. ex constanti Ecclesiae usu.*

100. Semper fuisse consuetudinem sacrificium celebrandi quotidie, licet saepissime non forent qui communionem susciperent, constat ex indubitatis monumentis antiquitatis. Chrysostomus reprehendit eos qui semel tantum in anno communicabant: “Quomodo, inquires, ista perpetimur, cum semel tantum per annum ea sacramenta sumamus? Hoc nempe est, quod universa perturbat: quia non munditia animi, verum intervallo temporis longiore constare meritum putas, summamque arbitraris reverentiam ac religionem esse, si non saepius caelestem adeas mensam.”<sup>4</sup> Eos se fraudare beneficio divinitus oblato queritur: “Frustra est quotidianum sacrificium. Frustra adstamus altari: nemo est qui participet.”<sup>5</sup> Illum Graecorum plurimorum neglectum reprobatur auctor antiquus librorum de Sacramentis: “Si quotidianus est panis, cur post annum illum sumis, quemadmodum Graeci in Oriente facere consueverunt?”<sup>6</sup> Ferrandus dia-

(1) *Sess. xxii. cap. vi.*

(2) *Ibidem Can. viii.*

(3) “The merits of CHRIST’S Death it is, which still keeps in subsistence a sinful world, and retains God’s love for his Church.” *Tract 81. Doctrine of the Eucharistic Sacrifice stated*, p. 7.

(4) *Hom. v. in i. Tim.*

(5) *Hom. iii. in ep. ad Eph.*

(6) *L. v. de Sac. c. iv.*

conus, S. Fulgentii discipulus, in epistola data anno 533 quotidianum sacrificium memorat: “Sicut Ecclesiam suam docuit (*Christus*) in *quotidianis sacrificiis* hanc custodire regulam, ut pro peccatoribus, sive adhuc in terra laborantibus, sive de sæculo recedentibus, orationem faciat, pro martyribus verò gratiarum referat actionem.”<sup>1</sup>

101. Plurima referuntur exempla certissima Missæ privatim celebratæ: “Marcellus Pontifex sacra mysteria fecit in domo Lucinæ; Nazianzenus senior in domestico cubiculo; Ambrosius Romæ in quadam domo trans Tyberim; Paulinus Nolanus, instante morte, in altari ante lectum suum parato.”<sup>2</sup>

102. Concilium Agathense, anno 506, decrevit: “sæculares, qui Natale Domini, Pascha, et Pentecosten non communicaverint, Catholici non credantur, nec inter Catholicos habeantur:”<sup>3</sup> nec ideo ob communicantium defectum, Missas celebrari vetuit.

#### OBJECTIONES SOLVUNTUR.

103. *Obj.* 1. Christus eucharistiam instituit instar agni paschalis, ejusque participes fecit Apostolos: præceptum autem est in lege ut numerus sufficiens ad esum agni haberetur.<sup>4</sup>

*Resp.* Post agni esum Christus instituit eucharisticum sacrificium, veritatemque in typi locum suffecit: cæterum nulla lege jussit, ut singula paschatis adjuncta vel ritus in eucharistia servarentur. Quod autem Apostolos sacrificii participes fecerit, ostendit quidem illius consiliis optime convenire, ut adstantes communicent, quod vehementer optat Ecclesia; sed non ideo vetatur Deo offerre victimam sanctam, quia nemo est qui velit tanto frui beneficio. Profecto Christus vere obtulit Patri corpus suum antequam illud manducandum porrexerit, nec aliquid oblationi detractum fuisset, si Apostoli divinum donum haud recepissent.

104. *Obj.* 2. Christus jussit Apostolos facere in sui memoriam quod se facientem viderant: ipse autem dederat eis sacramentum.

*Resp.* Jussit ut facerent quod fecerat, corpus suum et sanguinem offerendo. Licet etiam inferre eum jussisse ut darent volentibus ea suscipere: sed certe non prohibuit ne offerrent Deo Patri divina dona, eaque sumerent, si alii nollent eorum fieri participes.

105. *Obj.* 3. Apostolus eos redarguit qui soli manducant, et Domini — cam cœnam multos postulare convivas docet: “Convenientibus ergo vobis

(1) In Scriptorum veterum collectione e Vaticanis codicibus edita, Romæ 1828, tom. iii. p. 183.

(2) Perrone Tract. de Euch. pars post. c. ii. n. 305.

(3) Can. xxi.

(4) Exod. xii. 3.

in unum, jam non est Dominicam cœnam manducare, unusquisque enim cœnam suam presumit ad manducandum.”<sup>1</sup>

*Resp.* Non agit Apostolus eo loci de eucharistia, sed de conviviiis quæ fiebant in Dominicæ cœnæ memoriam, quæque *αγανη* dicebantur. Ea describit Tertullianus.<sup>2</sup> Chrysostomus de iis explicat hoc testimonium, eandem memorans consuetudinem: “statis diebus mensas faciebant communes, et peracta synaxi, post Sacramentorum communionem omnes commune inibant convivium, divitibus quidem cibos offerentibus, pauperibus autem et qui nihil habebant, etiam vocatis, et omnibus communiter vescentibus.”<sup>3</sup> Eos igitur qui regulas hujus convivii violabant, haud expectatis fratribus, vel nimio potui indulgendo, redarguit Apostolus, eosque eucharistiæ violatores esse docet, quum paulo post eam acceptam tam male se gesserint.

106. *Obj.* 4. Omnes liturgiæ pro certo habent plurimos cum sacerdote eucharistiæ esse participes, orationes enim omnes multorum nomine fiunt.

*Resp.* Sacrificium nomine totius Ecclesiæ peragitur, et preces fiunt ea ratione quæ fidelibus communionem suscipientibus convenit. Quod si nemo sit qui communicet præter sacerdotem, non ideo immutandus est ritus, multo minus negligendum est sacrificium.

107. *Obj.* 5. Missæ privatæ omnino differunt a cœnæ institutione, et superstitionem foveant, nec nisi ad sacerdotum lucrum videntur excogitatæ.

*Resp.* Sacrificium eucharisticum necessario constat oblatione corporis et sanguinis Christi, quæ fit a solo sacerdote: ideo Missa cum institutione concordat, illa oblatione facta. Nulla est superstitio credere eam esse Deo gratam, Pater enim in Filio dilecto semper sibi complacet. Id agnovit Leibnitius: “Porro, cum jugis sacrificii tanta sit dignitas atque utilitas, receptum denique est, ut creberrime Deo offeratur pro fidelium necessitatibus, etiamsi non semper accederet dispensatio. . . . Non ideo tamen honori divino aliquid detrahendum fuit, quia communicantes non semper habentur. Quare, ex quo sanctissimum sacrificium in omnibus Ecclesiis quotidie celebrari laudatissima pietate institutum est, consequens fuit, ut sufficere judicaretur perceptio offerentis sacerdotis, atque hæc Missarum, quas privatas vocant, origo est, quarum fructu sane maximo privari Ecclesiam cum divini honoris detrimento æquum non est.”<sup>4</sup> Quæ de lucri studio dicuntur ad odium conflandum sacro ministerio, non possunt argumenti

(1) I. Cor. xi. 20.

(2) Apologet. xxxix.

(3) Hom. xxvii. in i. ep. ad Corinth.

(4) Syst. Theol. p. 292.

locum tenere, quum constet piissimos sacerdotes, ab omni lucri turpi cupiditate alienos, ad Dei cultum augendum Missas celebrare, quin adsint communicaturi.

#### ANIMADVERSIONES.

108. Supervacaneum duximus argumentis ostendere neminem præter sacerdotem proprie offerre sacrificium. Dicuntur quidem fideles omnes, etiam in canone, illud offerre, quod tamen patet intelligi de animo cum sacerdote conjuncto, quo Deum colunt. Quæ post Jansenianos nonnullos infelix episcopus Pistoriensis tradidit in synodo famosa, mala utique fama, anno 1785, partium et novitatum studio excogitata sunt, levissimis et futilibus omnino rationibus allegatis. Qui velit ea, quæ ad nos vix spectant, discussa videre, consulat eruditissimum et acutissimum theologum Perrone,<sup>1</sup> cujus laboribus, in rem nostram, sæpius usi sumus.

109. De applicatione sacrificii plura perperam in illa synodo tradita sunt, quæ cum cæteris erroribus damnavit Constitutione Apostolica Pius VI.<sup>2</sup> Equidem mos erat purissimis Ecclesiæ sæculis, ut fideles munera sua ad altare deferrent, ex quibus quæ ad sacrificium necessaria erant sumebantur, cæteris in sacerdotum sustentationem servatis. Æquissima fuit Dei ipsius lex, ut Aaronici sacerdotes victimarum immolandarum occasione sustentationem aliquam acciperent, nam “qui altari deserviunt de altari participant.”<sup>3</sup> Meritò igitur fideles pristini obtulerunt sacrificii occasione munera quæ in sustentationem sacerdotum cederent. Sæculo octavo, ut eruditis videtur, cœpit mos offerendi pecuniam, ut sacerdos sacrificium offerret, et eleemosyna sic in utilitatem dantis evaderet. Bene animadvertit S. Thomas: “Sacerdos non accipit pecuniam, quasi pretium consecrationis eucharistiæ, aut Missæ decantandæ: hoc enim esset simoniacum: sed quasi stipendium suæ sustentationis.”<sup>4</sup>

110. Ne hac occasione turpis lucri cupido corda sacerdotum inficere, plurimis Pontificum summorum constitutionibus cautum est, et episcopis vindicatum est jus eleemosynam statuendi, quæ modica prorsus ubique est. Nihil proinde in consuetudine illa reprehendendum occurrit, quum divino jure, quo sustentationi sacrorum ministrorum consulitur, nitatur, et sanctum illud fideles inter et sacerdotes foveat officiorum bonorum commercium, quo illi his in temporalibus subveniunt, utilitates spirituales inde

(1) Tract. de Euch. post. par. c. iii. prop. iv.

(2) *Auctorem Fidei.*

(3) I. Cor. ix. 13.

(4) II. Secundæ qu. 100. art. 2, ad. 2.

percepturi : “ Si nos vobis spiritualia seminavimus,” inquit Paulus, “ magnum est si nos carnalia vestra metamus ?”<sup>1</sup> Profectò qui hujusmodi carpunt consuetudinem, calumniandi se agi libidine produnt, dum ex quorundam abusu rem innocuam, et sanctissimis viris, imo Ecclesiæ ipsi probatam, rejiciunt et damnant.

(1) I. Cor. ix. 11.

## CAPUT IV.

## DE LINGUA SACRA.

111. Linguam quæ in sacro faciendo usurpatur sacram, post Leibnitium, appellamus. De ea controversia a novatoribus sæculi decimi sexti excitata est; quum enim ad id usque tempus per totum Occidentem Latino tantum idiomate celebrari consueverit, vernaculam cujusque gentis linguam potius adhibendam contendebant. Res fuit Tridentinorum patrum judicio mature expensa; qui tamen nihil in recepta hac de re disciplina mutandum censuerunt. “Etsi Missa,” inquiunt, “magnam contineat populi fidelis eruditionem, non tamen expedire visum est patribus ut vulgari passim lingua celebraretur. Quamobrem, retento ubique cujusque Ecclesiæ antiquo et a Sancta Romana Ecclesia, omnium Ecclesiarum matre et magistra, probato ritu, ne oves Christi esuriant, neve parvuli panem petant, et non sit qui frangat eis; mandat sancta synodus pastoribus, et singulis curam animarum gerentibus, ut frequenter inter Missarum celebrationem, vel per se, vel per alios, ex iis quæ in Missa leguntur, aliquid exponant; atque inter cætera sanctissimi hujus sacrificii mysterium aliquod declarent, diebus præsertim dominicis et festis.”<sup>1</sup> Ut novatorum temeritatem reprimerent, decreverunt: “Si quis dixerit. . . lingua tantum vulgari Missam celebrari debere; anathema sit.”<sup>2</sup> Ad disciplinam quidem pertinet qua lingua celebretur Missa, ideoque ex Ecclesiæ arbitrio omnino pendet; sed meritò feriuntur anathemate, qui suam Ecclesiæ judicio anteponentes sententiam, asserunt linguam vulgarem necessariò adhibendam.

## PROPOSITIO.

*Missæ non potest lingua vernacula celebrari, obstante Ecclesiæ disciplina, quæ æquissimis fulcitur rationibus.*

*Probatur ex suprema Ecclesiæ potestate.*

112. Habet Ecclesia a Christo supremam potestatem omnia constituendi quæ ad sacrificii celebrationem et sacramentorum administrationem pertinent: nam præsulibus dictum est: “quæcumque alligaveritis super terram, erunt ligata et in cælo.”<sup>3</sup> et Apostolus ait: “Sic nos existimet homo ut ministros Christi, et dispensatores mysteriorum Dei.”<sup>4</sup> Ergo recepta hac

(1) Sess. xxii. cap. viii.

(2) Ibidem, can. ix.

(3) Matt. xviii. 18.

(4) 1 Cor. iv. 1.



in re disciplina servanda est, nonnisi ipsius Ecclesiæ auctoritate immutanda.

113. Præcipua ratio cur obtinuerit disciplina Latino tantum idiomate utendi in patriarchatu Romano, et ubicumque gentium S. Sedis Missionarii Romani ritus inveniantur, aliis vero locis linguis veteribus ab antiqua ætate usurpatis, nobis videtur esse ut certa foret norma munus adeo sanctum peragendi, nimia enim linguarum varietate mutationes plurimæ ipsam cultus substantiam afficientes facile inducerentur. Hæc autem gravissima sane est causa cur disciplina illa retineatur.

114. Ipsa disciplinæ vetustas argumento est eam gravi niti fundamento. Non constat alias linguas præter Græcam et Latinam a primordiis Ecclesiæ in sacro faciendo adhibitas,<sup>1</sup> quamvis populi plurimum inter se sermone discreparent. Quod si eruditis quibusdam viris assentiri placeat opinantibus Syriaco quoque idiomate apud Syros, præsertim extra urbes, celebratum esse sacrificium, Armeniaco apud Armenios, Ægyptiaco, seu Coptico, apud Ægyptios plerosque, excepta Alexandria et inferiori Ægypti provincia, Æthiopico apud Æthiopes;<sup>2</sup> id saltem exploratum est paucis tantum linguis, pro magna idiomatum varietate, id factum. Constat quoque veteres linguas ubique retentas in sacro peragendo, etiamsi per plurima sæcula desierint esse vernaculæ. Ergo persuasum est Ecclesiæ præsulibus per tot sæcula haud expedire a norma statuta recedere.

115. Hæc disciplina præclaras habet utilitates; hæc enim pacto innotescit fidei vetustas, et cultus servatur integer, adeo ut iisdem utamur vocibus quibus majores nostri suam fidem, inter mysteriorum solemnias, professi sunt, et coluerunt Deum. Liturgia hac ratione fit monumentum antiquæ fidei, et vinculum sacrum quo omnium sæculorum fideles in Deo colendo junguntur. Veneranda adeo mysteria servantur a temeritate hominum, qui si vellent vernaculo cujusque gentis sermone liturgiam reddere, facile possent voces ineptas et ridiculas adhibere, et ita ea irrisioni exponere. Fidei autem unitas fovetur, gentibus plerisque eandem in sacrificii oblatione usurpantibus linguam, adeo ut paucis linguis omnes per Orbem fideles, in præcipuo præsertim actu cultus, utentes, facilius in unam

(1) Merito deseritur sententia eorum qui Hebraice celebratum esse putabant: nam desierat illius linguæ apud Judæos in familiari sermone usus: nec verosimile est Apostolos liturgiam lingua obsoleta concinnasse. Insuper nullum vestigium liturgiæ Hebraciæ superest.

(2) Ita visum est Renaudotio, *Dissert. de liturgiæ orientalium origine* ch. vi. p. xliii. cui assentitur Perrone *Tract. de Euch. par. post. c. iv. n. 388. not.* Nobis magis probatur Lienharti sententia, "primas orientis liturgias Græce fuisse exaratas, ex quibus deinde enatæ sunt liturgiæ Syriaca, Coptica, Æthiopica, et Arabica, unde in ipsis tam sæpe occurrunt voces Græcæ, quæ earum originem sat manifestant." *De antiquis liturgiis* p. 120. Equidem nonnisi Græce scripserunt novi Testamenti auctores, si Matthæum exceperis, quod ostendit Græcum sermonem apud plerosque Orientis populos ea ætate satis pervulgatum.

fidem et cultum convenient, posteris illud unitatis pignus et subsidium relicturi.<sup>1</sup> Igitur et antiquæ fidei argumentum insigne nobis suppeditatur hac disciplina, et reverentiæ mysteriorum consulitur, et unitas fidei et cultus fovetur : quæ quidem gravissimæ esse causæ cur servetur vetus illa disciplina, cuilibet a studio partium immuni videbuntur.

#### OBJECTIONES SOLVUNTUR.

116. *Obj.* 1. Apostolus reprobatur linguæ ignotæ usum : “ si benedixeris spiritu : qui supplet locum idiotæ, quomodo dicet, Amen, super tuam benedictionem ? quoniam quid dicas nescit. Nam tu quidem bene gratias agis : sed alter non ædificatur.”<sup>2</sup> In hæc scribit Calvinus : “ Nunc dicit Paulus : Si idioma exoticum in sollemni prece usurpas, quod non intelligant idiotæ et plebei, inter quos loqueris, nulla erit communicatio. Quid enim apertius his Pauli verbis : non posse idiotam consortem esse publicæ precationis, quin percipiat quod dicitur ? quid hoc interdicto planius : ne benedictiones aut orationes in publico concipiantur, nisi vulgari lingua ?”<sup>3</sup>

*Resp.* Agit Apostolus, ut ex tota orationis serie patet, de linguarum dono, quod in primordiis Ecclesiæ quibusdam ex fidelibus est concessum, et quo nonnulli inter Corinthios abutebantur, illud ostentantes in sui gloriam, quum in aliorum utilitatem esset exercendum. Calvinum ipsum damus interpretem : “ Ne objicerent Corinthii, Deo fieri injuriam, si contemnerentur ejus dona, anticipat Apostolus testaturque, sibi non esse in animo, illos a donis etiam quibus abusi fuerant abducere . . . Nunc ex re ipsa ostendit, cur prætulerit aliis donis prophetiam. Atque eam cum dono linguarum comparat : in quo verosimile est magis occupatos fuisse Corinthios, quia magis ad pompam serviret : nam hominem audire loquentem lingua exotica, vulgo admirationem movet. Ergo ex principiis jam assumptis ostendit, quam sit illud perversum, quum nihil Ecclesiam ædificet.”<sup>4</sup> Liqueat igitur de liturgia, seu solemni prece, non agi, sed de iis quæ quilibet e cœtu fidelium effunderet, orando lingua ignota. Quod autem objicit Calvinus de idiotæ conditione, qui preci assensum suum dare non poterat, de prece ex Spiritus instinctu prolata, a quolibet linguam ignotam usurpante, intelligendum manifesto est : nec nisi contextu et occasione dicendi neglectis, potest ad publicam precem, in sacriiicii oblatione a ministro, ex Ecclesiæ auctoritate, privatam transferri : diversa enim omnino est ratio, publicæ enim preces, probatæ jam et sancitæ,

(1) “ Quelle idée sublime que celle d’une langue universelle pour l’Eglise universelle ! D’un pôle à l’autre, le catholique qui entre dans une église de son rite est chez lui, et rien n’est étranger à ses yeux.—Il peut s’écrier :

Rome est toute en tous lieux, elle est toute où je suis.” Comte Le Maître : Du Pape t. I. ch. xx.

(2) 1 Cor. xiv. 16.

(3) Comment. in loc.

(4) Ibidem in v. 1. 2.

innotescunt, et iis responderi potest, *Amen*, etiam ab iis qui earum specialem significationem haud noverunt. Ergo frustra afferuntur Pauli verba, quum in confesso sit ea aliam prorsus rem spectare ; et ratio dispar sit sollemnis precis ab ea quæ fortuito a quolibet funditur.

117. *Obj.* 2. *Ædificatio*, quam postulat Paulus, non obtinetur, sacrificio lingua populo ignota celebrato.

*Resp.* Præcipuus sacrificii finis est ut Deus summe colatur, quod fit oblata victima. Cæterum ædificatur populus fidelis, tum toto ritu, qui reverentiam mysteriorum commendat, tum singulis precibus, quæ explicantur a sacerdotibus, data occasione, et in plurimis libris. Recte igitur Leibnitius : “ De lingua, qua celebretur divinum officium, deque ceremoniis sacrisque introductis non est quod multa dicam. Constat enim de his statuendi potestatem penes Ecclesiam esse, modo decor servetur, et eorum quæ submisce et lingua sacra dicuntur, notitia et interpretatio fidei populo non desit ; atque certe nunc nihil in eo genere desiderari potest, ex quo complures libelli vernaculi prodire, in quibus canon Missæ et quidquid ad rem divinam pertinet abunde explicatur.”<sup>1</sup>

118. *Obj.* 3. Longe acceptior Deo foret cultus in quo fideles omnes vocibus conjungerentur, quam ille qui a solo sacerdote, ignota lingua, præstatur, cæteris otiose spectantibus.

*Resp.* Deus corde magis quam voce colitur, corde autem omnes fideles sacrificio adstantes conjunguntur, quod enim fit norunt, et ad illud simul cum sacerdote offerendum, pia animi voluntate, sæpius invitantur.<sup>2</sup> Quod autem ipsa quæ proferuntur verba non omnes intelligant, non obstat, quum enim res ipsa intelligatur, tota animi intentio ad Christum in mysterio oblatum dirigitur, et preces a singulis, pro cujusque devotione et necessitate, funduntur. Sæpe contingit, orante vernacula lingua ministro, tantum studium in accuratiori et elegantiori legendi et pronuntiandi ratione poni, ut ad populum, magis quam ad Deum directa videatur oratio ; quam audiunt plerique curiosius, cum gravitate quadam et reverentia, sed mente ad Deum vix evecta. Periculo facto norunt Anglicani quam parum foveant pietatem formulæ illæ, quibus adstantes familiares facti, fastidium, tædiumque celare haud curant.<sup>3</sup> Quicumque Catholicorum cœtum, in solemniori præsertim Missæ parte, inspexerit, haud aegre judicabit quæ cultus ratio pios animi affectus magis excitet. Cæterum desinant ignotam linguam nobis objicere, quum Latini idiomatis notitia sit adeo diffusa, et ipsarum vocum versio plurimis libris, qui manibus fidelium teruntur, contineatur.<sup>4</sup>

(1) *System. Theol.* p. 294.

(2) “ Chez nous, c’est le *sacrifice* qui est le véritable *culte*, tout le reste est accessoire.” Le Maistre.

(3) “ They are indifferent, even on a Sunday, to the prayers of the Church, unless there is a sermon.” Bishop Horne.

(4) “ On ne cesse de nous parler de *langue inconnue*, comme s’il s’agissait de la langue chinoise, ou sanscédane.” Le Maistre.

*Obj.* 4. Joannes VIII. indulget Illyricis, sæculo nono, ut sacra fierent lingua vernacula, quod et Sinensibus Paulus V. concessit.

*Resp.* Res pendet tota ex Ecclesiæ judicio, pro locorum temporumque varietate. Illyricis recens conversis ad fidem id aliquando concessum est, quum copia ministrorum sacrorum haud esset qui Latine callerent: sed sæculo undecimo facultas est revocata Pontificis Alexandri II. auctoritate, ab Apostolico legato, concilio habito episcoporum Dalmatiæ et Croatiae. Sinensibus ob linguæ difficultatem id etiam concessum. Sed non ideo immutandus est vetustus ritus a sæculis plurimis inductus et statutus apud totam Ecclesiam.

120. *Obj.* 5. Apud veteres liturgiæ paucis linguis exaratae sunt, quia pleræque gentes idiomate non utebantur ad certas loquendi et scribendi leges composito: nec enim Italica, Gallica, Germanica, aliæque Europæ linguæ, nisi recentiori ævo excultæ sunt, ut nihil dicamus de gentibus prorsus barbaris. Jam verò linguis plerisque ad tantam perfectionem adductis, quas et scribere et legere plerique norunt, non est ratio cur veteres linguæ retineantur.

*Resp.* Unica non fuit ratio cur lingua antiqua retineretur, sed ut fidei claresceret antiquitas, et foveretur concordia, quæ rationes adhuc obtinent. Præterea omnia idiomata, quæ *viva* dicuntur, usurpata scilicet impræsentiarum apud aliquam gentem, plurimis mutationibus obnoxia sunt, et stylus in dies variatur, et voces facile pravum accipiunt sensum ex usu vulgari: quæ rationes haud leves sunt cur a norma loquendi, per tot sæcula servata in sanctissimo hoc munere obeundo, discedendum non sit.<sup>1</sup>

121. *Obj.* 6. Ipsa vetus disciplina favet celebrationi sacri in lingua vernacula, Græca enim apud plurimos populos vernacula erat, plerisque notissima, quo tempore eam adhibuerunt Apostoli: sic et Latina innotuit toto orbe Romano. Igitur mutatis jam populorum idiomatibus, liturgia his concinnanda est, si Apostolorum velimus sectari exempla.

*Resp.* Quamvis utriusque linguæ notitia late diffusa fuerit Apostolorum ætate, haud fuit tamen omnibus communis. Quum igitur Apostoli nullam ostenderint sollicitudinem linguis vernaculis singulorum populorum sacrum faciendi, sed duas tantum linguas, ut nobis videtur, paucas, ex omnium confessione, selegerint, eos sequimur auctores eas retinendo liturgiarum linguas, quas adhibitas novimus.

#### ANIMADVERSIO.

122. Ritum Ecclesiæ Romanæ quo secreto plures proferuntur orationes, et maxima pars canonis, carpunt novatores, quos idcirco merito damnarunt patres Tridentini: "Si quis dixerit, Ecclesiæ Romanæ ritum, quo submissa

(1) "Toute langue changeante convient peu à une religion immuable. . . . La corruption du siècle s'empare tous les jours de certains mots, et les gâte pour se divertir." *Le Maistre.*

voce pars canonis, et verba consecrationis proferuntur, damnandum esse . . . anathema sit.”<sup>1</sup> Quam antiquus sit iste ritus, ostendit Le Brun.<sup>2</sup> Suffragatur consuetudo sacerdotum Hebræorum, qui intra sanctuarium populi nomine orabant, et adolebant thus, populo foris orante, ne quidem vidente sacerdotem.<sup>3</sup> Liturgiæ Græcorum cum Latina in eo concordant, quod quædam partes secreto recitentur, quamvis non eædem ubique.<sup>4</sup> Quum cuique liqueat magnam mysteriorum venerationem hac ratione commendari et insinuari, necesse non duximus in re tam obvia probanda immorari, præsertim quod sectarii harum regionum, sacrificio ipso rejecto, de ritu hoc vix agant.

(1) Sess. xxii. can. ix.

(2) Explication de la Messe. Suite du iv. vol. Quinzième dissertation sur l’usage de réciter en silence une partie des prières de la Messe dans toutes les Eglises, et dans tous les siècles.

(3) Luc. i. 9. 10.

(4) Apud Renaudot. Liturg. Orient. t. ii. p. 21.

## CAPUT V.

## DE RITIBUS MISSÆ.

123. Initio Ecclesiæ, nullo adhuc extracto templo christiano, Missa ubique celebrabatur, quamvis plerumque in domibus ad conventus fidelium habendos electis, et destinatis, uti ex Apostoli dictis pluribus colligitur. Etiam post sacra ædificia erecta, vigente persecutione, quicumque locus opportunus idoneus habitus est mysteriis celebrandis, teste S. Dionysio Alexandrino: “Cumque ab omnibus fugaremur, atque opprimeremur, nihilominus tunc quoque festos egimus dies. Quivis locus, in quo varias ærumnas singillatim pertulimus, ager, inquam, solitudo, navis, stabulum, carcer, instar templi ad sacros conventus peragendos fuit.”<sup>1</sup> S. Augustinus refert sacrificium in privata domo aliquando suo tempore celebratum: “Vir tribunitius Hisperius, qui apud nos est, habet in territorio Fussalensi fundum Cubedi appellatum, ubi cum afflictione animalium et servorum suorum domum suam spirituum malignorum vim noxiam perpeti comperisset, rogavit nostros, me absente, presbyteros, ut aliquis eorum illo pergeret, cujus orationibus cederent. Perrexit unus: obtulit ibi SACRIFICIUM CORPORIS CHRISTI, orans quantum potuit, ut cessaret illa vexatio. Deo protinus miserante cessavit.”<sup>2</sup> Plerumque tamen sacrificium nonnisi in Ecclesia celebrabatur, quod et lege districte injunctum est. Concilium Tridentinum idcirco jussit episcopis, “ne patiantur privatis in domibus, atque omnino extra Ecclesiam, et ad divinum tantum cultum dedicata oratoria ab eisdem Ordinariis designanda et visitanda, sanctum hoc sacrificium a sæcularibus aut regularibus quibuscumque peragi.”<sup>3</sup> Missionum causa indulgetur Missionariis ut in privatis domibus aliquando celebrent, quod tamen nonnisi in locis ab Ecclesia dissitis licere declaravit concilium Baltimoreense primum.

124. Vestes peculiare in sacrificii celebratione adhibentur ad cultus decorem, et plurimis adnexis salutaribus documentis. Utrum mos eas induendi ad Apostolicam referendus sit ætatem, inter eruditos disceptatur. Nonnullis de sacro pallio explicare placuit quod a se Troade relictum afferri jussit Paulus—τὸν φαλόνην.<sup>4</sup> De Sancto Joanne refert Eusebius, ex Polycrate, Ephesino episcopo, ad Victorem Papam scribente: “Supra

(1) Apud Euseb. hist. Eccl. l. vii. c. xxii.

(2) L. xxii. de civ. Dei c. viii.

(3) Sess. xxii. decr. de observandis et evitandis in celeb. Missæ.

(4) II. Tim. iv. 13.

pectus Domini recubuit, et Pontifex ejus fuit, auream laminam in fronte portans.”<sup>1</sup> De Jacobo refertur eum auream laminam etiam gestasse in sacris muneribus obeundis.

125. Constat tempore Constantini sacros ministros vestibus sacris indui consuevisse, ex veteri, ut videtur, more : in oratione enim panegyrica quæ de Ecclesiarum ædificatione habita est, exordium ducitur ab his verbis : “ Amici Dei et Sacerdotes, qui sacra tunica talari, et cælesti gloriæ corona decorati, et sacerdotali Sancti Spiritus veste induti estis.”<sup>2</sup> Theodoretus narrat Constantinum Magnum, Macario episcopo Hierosolymitano, sacram vestem aureis filis contextam donasse.<sup>3</sup> S. Hieronymus ait : “ Religio divina alterum habitum habet in ministerio, alterum in usu vitæ communis.”<sup>4</sup> Verosimile censet Benedictus XIV. nullas peculiaris formæ vestes Apostolorum temporibus adhibitas, sed nitidiores et quæ in sacris tantum muneribus obeundis usurpabantur. Cæterum liquet morem esse antiquissimum.

126. Concilium Tridentinum decrevit : “ Si quis dixerit, cæremonias, vestes, et externa signa, quibus in Missarum celebratione Ecclesia Catholica utitur, irritabula impietatis esse, magis quam officia pietatis, anathema sit.”<sup>5</sup> Omnibus breviter explicatis, decreti æquitas patebit.

127. *Casula*, seu *planeta*, quæ præcipua est vestis, juxta veterem formam totum operiebat corpus brachiaque, adeo ut caput tantum emergeret, quæ forma adhuc apud Abyssinos retinetur. Ut brachia libera sint, obvolvatur anterior pars sacerdoti ascensuro ad altare, et supra brachium alligabatur : cujus ritus vestigium videre est in eo quod manipulus porrigatur episcopo antequam gradibus adscendat. *Alba* vestis ab antiquis temporibus adhibita est, eo quod virorum dignitate auctorum is esset mos, uti nonnulli conjiciunt, constat quippe *candidatos* a veste nomen desumpsisse ; sed potius, ut nobis videtur, ob puritatem et munditiem, cujus est symbolum. *Cingulum* olim a quibuslibet adhibebatur ad vestes, ne defluerent, retinendas. *Stola*, seu Orarium circa collum pendens oræ instar erat vesti exteriori. *Amictus*, quo collum tegitur, *Anaboladium* apud veteres nuncupatus, sæculo octavo inductus est. *Manipulus* pro sudariolo eodem sæculo, vel posteriori, cœpit adhiberi communiter, quum S. Gregorii Magni temporibus jus eum in sacro munere deferendi esset Clericis Ecclesiæ Romanæ, et etiam primis diaconis Ravennatensibus, dum episcopo ministrarent.

128. Quamvis non constet vestes sacras eo consilio primum adhibitas, ut documenta forent fidei mysteriorum, et virtutum christianarum, id tamen

(1) Euseb. l. v. hist. Eccl. c. xxiii.

(2) L. x. hist. Eccl. c. iv.

(3) L. ii. hist. Eccl. c. xxvii.

(4) L. de Script. Eccl.

(5) Sess. xxii. can. vii.



admodum verosimile est, quippe quod consonum sit loquendi rationi a Christo usurpatæ, ut imaginibus et similitudinibus nos edoceret, et toti veteris Ecclesiæ *systemati*, ubique enim ritibus sacras adnexas significationes reperimus. Ex verbis quæ profert episcopus dum vestes candidatos induit, et ex orationibus quæ recitandæ sunt, dum induuntur, significatio quæ iis adnectitur colligitur. Amictus capiti primum obductus, deinde collo circumligatus, galeæ salutis, quam miles Christi induere debet, notionem ingerit. Alba vestis animi munditiem denotat. Manipulus fructus bonorum operum quos afferre oportet; et pœnitentiæ lacrymas, quibus abstergenda sunt peccata, denotat. Stola jugum Christi, quod ferre debemus, revocat in memoriam, obedientiæque virtutem insinuat. Planeta, seu Casula, charitatem, veluti vestem nuptialem, qua ornari debet sacerdos, indicat. Christi patientis memoriæ revocandæ vestes sacræ possunt inservire. Amictus velum quod faciei Christi obductum est; Alba vestem qua eum induit Herodes; Cingulum funes quibus ligatus est, dum ad tribunalia Caiphæ et Pilati adduceretur. Manipulus ligamina quibus manus tenebantur, dum flagellis cæderetur; Stola crucem humeris impositam, et collo alligatam; et Casula vestem inconsuetilem Christi denotat.

129. Præcipui ritus Missæ sunt crucis signum, pectoris tunsio, osculum altari, libro, patenæ datum, hostiæ et calicis elevationes, genuflexiones, capitis inclinationes, manus extensiones, et alia hujusmodi, de quibus raptim aliqua dicemus.

130. Crucis signum in Missa sæpe fit, ad mysterium Christi crucifixi recolendum. *Semel* factum mortem Christi, quam semel obiit, designat, et Dei, quem colimus unitatem: *ter* tres personas in uno Deo denotat, earum quippe in redemptionis mysterio agnoscimus bonitatem. *Quinques* plagas quinque Christi, manibus pedibusque confixis, et latere confosso exhibet. *Seipsum* signat sacerdos, suam ut profiteatur in Christum fidem, divinamque in se imploret opem et benedictionem. Signat initio Evangelii *frontem*, *os*, et *pectus*, ut fiduciam qua se Christi discipulum professurus sit indicet, et amorem quo veritates illas cordis affectu amplexurus. *Librum* signat eo quod verba Christi crucifixi contineat. Signat *oblata* ut Christi benedictio in ea descendat, et fiant corpus ejus et sanguis. Post consecrationem signat etiam *panem sanctum vitæ æternæ*, et *calicem salutis perpetuæ*, eandem victimam adesse agnoscens quæ in cruce oblata est. Signat *populum* sub finem Missæ, Christum imitans, qui in cœlum ascensurus, elevatis manibus, benedictionem discipulis elargitus est.

131. Pectus *ter* tundit sacerdos, dum peccata confitetur, antequam altaris gradibus ascendat, ut gravitatem culparum suarum et dolorem animi significet; publicanum, quem laudavit Christus, imitatus. *Semel* pectus percutit, *Nobis quoque peccatoribus* consortium sanctorum implorans: *ter* ab Agno Dei qui tollit peccata mundi, misericordiam et pacem, pectus percutiendo, supplex petit: *trina* denique pectoris tusione se haud dignum



esse profitetur qui in animam suam Dominum suscipiat, centurionis verbis sibi accommodatis.

132. Osculatur altare sacerdos quum primum ad illud accedat, ut Christum, cujus figura est, adoret, et sanctorum veneretur reliquias, quæ in altari continentur. Id etiam fit quoties ad populum convertere se debet, osculum quippe adorationis, sicut et amoris, indicium apud veteres habebatur, et Christus adorandus est et diligendus. Osculatur librum, lecto Evangelio, ut affectum quo Christum magistrum prosequitur, declaret. Osculatur etiam patenam, dicta oratione *Libera nos* etc. ut indicet pacem a Christo nobis comparatam crucis sacrificio.

133. Coram altari in medio se sistit, Psalmum recitans, et peccata sua generali formula confitens antequam gradibus adscendat. Revertitur ad medium altare, misericordiam imploraturus vocibus illis *Κυrie ελεησον* quæ sexies proferuntur, Christo ter invocato, post Domini trinam invocationem. Eodem loco recitatur, vel canitur, diebus festis hymnus: “Gloria in excelsis Deo;” sicut et symbolum Nicænum. Dum fit oblatio panis et vini eodem loco consistit; sicut et dum dicit orationes secretas et præfationem, et per totum Canonem. Ex sinistro latere crucis introitum, collectas, epistolam, versiculosque recitat: ad dexterum latus transit ut evangelium legat; quæ loci mutatio commodi causa inducta conjicitur, quamvis apte significet transitum a lege ad Christianam dispensationem.

134. Manus *junctas* sæpius tenet sacerdos, quæ orantis est positura; aliquando *extensas* et in alto suspensas, instar Moysis in monte, dum Israelitæ cum Amalecitis pugnarent: eas disjungit populum ad orandum invitans. Eas una cum oculis versus crucem sæpius attollit, mysterium redemptionis ut in memoriam revocet; et cælum versus, ut cœlestia cogitet. Genu flectit, si adsit sanctissimum Sacramentum in altari, illudque adorat. Inclinat caput, cervicemque sæpius, crucem venerandi et animi humiliationem significandi causa. Ad populum se convertit quatuor vicibus, Dominum fidelibus adesse optans; et etiam dum ministrat communionem, eisque benedictionem largitur. Manus abluit in munditie animi quam colere oportet indicium.

135. Campanula ter pulsatur sub finem Præfationis, ut sic excitetur populi devotio ad gratias Deo agendas, et post consecrationem hostiæ et calicis, ad Christum adorandum sub speciebus sacramentalibus.

136. Quum Christus panem legatur fregisse in Sacramenti institutione, invaluit a vetustissimis temporibus ubique hostiæ frangendæ ritus. In tres dividitur apud Latinos partes, quarum una in calicem immittitur, altera olim pro infirmis reservabatur, altera absumebatur a sacerdote: utraque nunc a sacerdote sumitur. Immissio hostiæ in calicem corporis sanguisque in Christi resurrectione conjunctionem non obscure indicat.

137. Secreto dicuntur orationes illæ quæ post offertorium sequuntur ad Præfationem usque, et totus fere canon, qui ritus antiquissimus est: quippe

per tria priora saltem sæcula Ecclesiæ viguit arcani disciplina. Ritus ratio est veneratio erga mysterium tremendum, et Christi inter ærumnas silentium quod indicat.

138. Candelæ duæ in altari, una ex utraque crucis parte, accenduntur, qua ratione fidei lumen a Christo in gentes Judæosque diffusum apte significatur. Vigente persecutione, jamine opus erat Christianis sacra mysteria in cryptis et catacumbis celebrantibus. Sed seu necessitate, seu significationis causa lumen adhibitum fuerit initio, constat illud significationem sacram deinceps adnexam habuisse; scribit enim Hieronymus: "Per totas Orientis Ecclesias quando legendum est Evangelium accenduntur luminaria, jam sole rutilante, non utique ad fugandas tenebras, sed ad signum lætitiæ demonstrandum. Unde et virgines illæ Evangelicæ semper habent accensas lampades suas. Et ad Apostolos dicitur: 'Sint lumbi vestri præcincti, et lucernæ ardentes in manibus vestris.' Et de Joanne Baptista: 'ille erat lucerna ardens et lucens;' ut sub typo luminis corporalis illa lux ostendatur, de qua in Psalterio legimus: 'Lucerna pedibus meis verbum tuum, Domine, et lumen semitis meis.'"<sup>1</sup>

139. De ritibus omnibus Missæ monent Tridentini patres: "Cumque natura hominum ea sit, ut non facile queat sine adminiculis exterioribus ad rerum divinarum meditationem sustolli; propterea pia mater Ecclesia ritus quosdam, ut scilicet quædam submissa voce, alia verò elatiore in Missa pronuntiarentur, instituit. Cæremonias item adhibuit, ut mysticas benedictiones, lumina, thymiamata, vestes aliaque id genus multa ex apostolica disciplina, et traditione, qua et majestas tanti sacrificii commendaretur, et mentes fidelium per hæc visibilia religionis et pietatis signa, ad rerum altissimarum, quæ in hoc sacrificio latent, contemplationem excitarentur."<sup>2</sup>

140. Preces cæteraque quæ liturgiam constituunt non omnia eadem gaudent antiquitate. Ex Justini apologia liquet primis sæculis prolixas preces a sacerdote, in eucharistiæ celebratione, recitatas. Liturgiæ omnes iisdem fere constant partibus, quamquam diverso aliquantulum ordine nonnumquam dispositis. Ubique fit oblatio panis et vini, præfatio recitatur, preces pro vivis funduntur, et etiam pro defunctis. Martyres sanctique commemorantur, ut eorum intercessione adjuvemur. Consecratio fit verbis Dominicis, invocatur Spiritus Sanctus, recitatur oratio Dominica, hostia frangitur, communio percipitur, et gratiæ aguntur ob divinum munus. Hæc liturgiis omnibus contineri agnoscunt post Palmer Oxonienses.<sup>3</sup> Singulas Missæ Romanæ partes, prout nunc se habent referre juvat.

141. Psalmus quadragesimus secundus: "Judica me, Deus," initio Missæ, sæculo septimo recitari cœpit, mosque a Pio V. firmatus est.

(1) L. adv. Vigilantium.

(2) Sess. xxii. cap. v.

(3) Vol. ii. Tract 63.

Confessionis generalis formula ab anno usque 1300 invaluit.<sup>1</sup> Dum sacerdos ad altare accederet, chorus Psalmum consuevit cantare, cujus initium plerumque *Introitum* Missæ constituit, juxta normam a S. Gregorio M. statutam. *Κύριε ἐλεησον*—a Græcorum liturgiis ad Latinam transiit, sexaginta saltem annis ante prælaudati pontificis tempora. Græcarum et Hebræicarum vocum in Latina liturgia usus eo inservit, ut fidei origo et unitas ostendatur; ab Hebræis enim Ecclesia duxit initium, ad Græcos Latinosque, et cæteros populos dimanatura. Hinc Amen, *vere*, Alleluia, *Laudate Deum*, Deus Sabaoth, scilicet *exercituum*, Hosanna, *salus*, in Romana Missa usurpantur. Hymnus qui incipit: “Gloria in excelsis Deo;” cantico scilicet angelorum, Christo nato, olim canebatur in Missa Nativitatis tantummodo, Græcos apud et Latinos. *Collectæ*, seu orationes quibus fidelium vota, veluti in unum collecta, exprimuntur, pleræque Gelasium aut Gregorium auctorem habere censentur. Leo II. dictavit eam quæ incipit: “Deus qui B. Petro, &c.” Innocentius III. auctor est alterius: “A cunctis nos, quæsumus, Domine, mentis et corporis defende periculis, &c.”

142. Lectiones ex Scripturis, tum veteribus, tum novis, ab initio Ecclesiæ in sacris conventibus recitabantur, quas ordine quodam digessisse censetur Hieronymus. *Graduale* nomen habet a gradibus altaris, in cujus plano olim canebatur, vel a gradibus *ambonis*, quos scandebat diaconus, dum caneretur, lecturus inde Evangelium. Hujus ritus auctor putatur S. Cælestinus, seu S. Gregorius. *Tractus* plerumque canitur tractim, cum asperitate quadam et prolixitate, tempore pœnitentiæ; quæ ratio est nominis. *Sequentia* dicuntur rhythmici, qui aliquando post tractus recitantur. Antiquissimus omnium est qui incipit: “Victimæ paschali laudes immolent christiani,” cujus auctor habetur Robertus Francorum rex sæculo undecimo. *Symbolum*, prout in Nicæno et Constantinopolitano conciliis est auctum, ut Arii Macedonique hæreses evellerentur, ab anno usque 471, apud Orientales cani consuevit inter mysteriorum celebrationem; sed in Romana Ecclesia usus haud obtinuit, quia nulla eam infestaverat hæresis, quam fidei confessione profligare opus esset. Cessit tamen sæculo undecimo Benedictus VIII. consiliis Henrici imperatoris, et illud cani jussit. Apostolorum symbolum Romæ recitabatur inter baptismi ritus, nulla additione auctum; quapropter Ambrosius ait: “Ecclesia Romana symbolum

(1) “As to the confession at Prime and Compline, in which is introduced the name of the Blessed Virgin and other saints. . . . It is not a simple gratuitous Invocation made to them, but it is an address to Almighty God in *His heavenly court*, as surrounded by His Saints and Angels, answering to St. Paul’s charge to Timothy ‘before God and the Lord Jesus Christ, and the elect Angels,’ and to Daniel and St. John’s address to the Angels who were sent to them.” Vol. iii. Tracts No. 75. p. 10. Ita Oxonienses in præfatione suæ versioni Breviarii: qui dum silent de posteriori *Confessionis* parte, videntur eam probare, ideoque consuetudinem orandi Sanctos ut pro nobis intercedant apud Deum.

Apostolorum intemeratum semper custodit, et servat."<sup>1</sup> *Offertorium* post sæculum tertium cani cœpit, dum populus oblationes ad altare deferret. Oratio, *Suscipe Sancta Trinitas*, antiquissima est, utpote cujus origo ignoratur. Reperitur autem apud auctorem librorum de sacramentis.<sup>2</sup>

143. Invitatio ad populum ut orent: "Orate fratres;" S. Leoni tribuitur, quamvis haud absimilis in liturgiis S. Marci et S. Jacobi reperiatur. *Præfationes* pleræque antiquissimæ sunt, et quoad substantiam ad Apostolica videntur referendæ tempora; sed nonnullarum S. Gelasius habetur auctor. S. Cyprianus: *Sursum corda*; memorat, quibus vocibus sacerdos fideles ad cælestium contemplationem adhortatur, laudis voces cum angelorum canticis ut admisceant. Hymnus Cherubicus, quo terminatur præfatio: "Sanctus, Sanctus, Sanctus," a pluribus veterum celebratur. Liturgiæ Jacobi, Basilii, et Chrysostomi similes quasdam laudum formulas exhibent, quarum exemplum in catechesi S. Cyrilli Hierosolymitani videre est.<sup>3</sup> *Canon*, seu regula celebrandi, quæ et *actio* a veteribus dicta est, unde quædam oratio "*infra actionem*" inscribitur, sæculo quarto est antiquior, et quoad maximam ejus partem ad Apostolorum traditionem recte refertur. Institutio narratur, et consecratio perficitur, vocibus aliquibus et circumstantiis relatis, de quibus silent Evangelistæ, sed quæ eadem fere sunt in omnibus liturgiis, nixæ procul dubio Apostolica traditione.<sup>4</sup> Ei S. Leo adjunxit verba illa: "Sanctum sacrificium, immaculatam hostiam." S. Gregorius noscitur hæc addidisse: "diesque nostros in tua pace disponas, atque ab æterna damnatione nos eripi, et in electorum tuorum jubeas grege numerari." Dicitur etiam inseruisse nomina SS. Agathæ, Luciæ, Agnetis, Cæciliæ et Anastasiæ. Post illius tempora nihil Canoni additum, nihilque in eo mutatum est.<sup>5</sup>

(1) Ep. vii. ad Siricium.

(2) L. iv. c. vi.

(3) Catech v. mystag.

(4) De consecrationis forma notant Oxonienses eam iisdem fere verbis in omnibus liturgiis reperiri, quamvis non reperiantur omnia apud aliquem sacrum scriptorem. "All contain . . . a commemoration of our Lord's words and actions in the institution of the Eucharist, which is the same, almost word for word, in every Liturgy, but is not taken from any of the four Scripture accounts." Vol. ii. Tract No. 63. p. 7. London edition.

(5) "Mr. Palmer has shown that we have abundance of materials for ascertaining the text of this Liturgy, as it stood in the time of Gregory the Great, patriarch of Rome, A. D., 590, by whom it was revised, and in some parts enlarged. . . . It also deserves to be noticed, that at the time when the Roman Liturgy was undergoing these successive revisals, a tradition all along prevailed attributing to one part of it an apostolic origin; and that this part does not appear to have undergone any change whatever. Vigilius, who was Pope between the times of Gelasius and Gregory, tells us that the 'canonical prayers,' or what are now called the 'Canon of the Mass' had been 'handed down as an apostolical tradition. And much earlier we hear the same from Pope Innocent, who adds that the Apostle from whom they derived it was St. Peter. Ibidem p. 4

144. Juxta morem vetustissimum quem superius retulimus, orat sacerdos in canone, pro fidelibus omnibus, præsertim Pontifice, episcopo, et quibusdam cibi commendatis, vel amicis, quorum memoriam tacitus revocat. *Diptycha* Δίπτυχα, videlicet *bis plicata*, dicebantur olim tabulæ, seu asseres ita sibi invicem conjuncti ut plicari possent, quibus specialiter commendandorum referebantur nomina. Defunctorum pariter meminit, quorum commendationem ex Rituali Anglicano exclusam esse notat Palmer,<sup>1</sup> liturgiis omnibus veteribus eam contineri agnoscens. Sergius I. dicitur orationem: “Agnus Dei qui tollis peccata mundi, miserere nobis,” in usum induxisse. Tres orationes ante communionem ex antiqua piorum hominum consuetudine derivantur. Verba centurionis se indignum profitentis sacris usibus accommodata esse tempore Origenis constat. Verba quæ porrigendo Sacramentum dicuntur, antiquissima sunt.<sup>2</sup> Antiphona quæ *communio* dicitur olim canebatur a choro, dum sacerdos eucharistiam distribueret. Benedictio in fine Missæ nonnisi ab episcopo dabatur, sed jam sæculo undecimo obtinuit mos ut sacerdotes eam impertirentur.<sup>3</sup> Evangelium S. Joannis ex quorundam devotione recitari cœpit, sed illud ex mandato S. Pii V. nunc dicitur.

145. Ex his quæ breviter retulimus, liquet liturgiam, seu Missam, magna ex parte constare scripturarum excerptis, cæteris plerisque ex antiquissima traditione derivatis. Solemniorem ejus partem, precem a Cypriano, canonem a nobis dictam, ad Apostolos referendam esse auctores, saltem quoad substantiam, ex omnium liturgiarum concordia in rebus præcipuis merito censeant eruditi. Canonem Missæ idcirco merito vindicavit concilium Tridentinum contra novatorum temeritatem: “Si quis dixerit Canonem Missæ errores continere, ideoque abrogandum esse; anathema sit.”<sup>4</sup>

Qui hæc fusius explicata et vindicata videre velit, consulat eruditissimum opus Benedicti XIV. de Sacrificio Missæ, ex quo pleraque desumpsimus: vel dissertationem ab episcopo Carolopolitano jam laudato, Anglicæ, quam edidit, Missalis versionis præfixam, in qua omnia dilucide exposuit, et illustravit.

(1) “All the ancient Liturgies contain likewise another Prayer (which has been excluded from the English Ritual,) for the rest and peace of all those who have departed this life in God’s faith and fear.” Tract No. 63.

(2) Ex vita S. Gregorii M. a Joanne Diacono.

(3) Micrologus.

(4) Sess. xxii. Can. vi.



# TRACTATUS XII.

## DE PŒNITENTIA.

---

### PRÆNOTANDA.

1. Pœnitentia—*μετάνοια*—generatim dicitur animi dolor de errato aliquo, quo sensu verbum pœnitendi passim apud scriptores profanos usurpatur: “Alexandrum regem videmus,” inquit Tullius, “qui cum interemisset Clytum familiarem suum, vix a se manus abstinuit: tanta vis fuit pœnitendi.”<sup>1</sup> Apud Ovidium legimus:

“Pœnitet: O! si quid miserorum creditur ulli,  
Pœnitet; et facto torqueor ipse meo.  
Cumque sit exilium, magis est mihi culpa, dolori;  
Estque pati pœnam, quam meruisse minus.”<sup>2</sup>

Ansonius, Græci et Latini vocabulorum vim explicat:

“Sum Dea, quæ facti, non factique exigo pœnas,  
Nempe ut pœniteat, sic Metanœa vocor.”<sup>3</sup>

Lactantius pariter: “Is quem facti sui pœnitet, errorem suum pristinum intelligit: ideoque Græci melius et significantius *μετάνοιαν* dicunt, quam nos possimus resipiscentiam dicere; resipiscit enim, ac mentem suam quasi ab insania recipit, quem errati piget, castigatque seipsum dementiæ, et confirmat animum ad rectius vivendum: tum illud ipsum maxime cavet, ne rursus in eisdem laqueos inducatur.”<sup>4</sup> Agere pœnitentiam idem sonat ac pœnitere: “agat pœnitentiam pœnitentiæ suæ;” ait Plinius. Hinc factum ut vox Græca *μετάνοια* sic redderetur a vulgato interprete, cujus versionem

(1) In Tusculana iv.

(2) L. i. de Ponto, ep. i. v. 59.

(3) Epigram. xi.

(4) Instit. div. l. vi. c. xxiv.

nemo idcirco jure carpere potest. Equidem in vernaculis versionibus voces majorem habent vim, sed quæ contextu plane fulcitur, et sensui christiano et constanti majorum nosterum agendi rationi omnino congruit. Juxta sanioris critices leges vocis etymologia usui recepto cedit; ideoque qui hujus immemores intrinsecam vim vocis spectant, ipso contextu sacro neglecto, haud optimam interpretandi rationem sequuntur. Constat sæpius pœnitentia designari in Scripturis animi dolorem, cujus indicia prodeunt in corporis afflictatione. Sic Job dicit: “Ago pœnitentiam in favilla et cinere.”<sup>1</sup>

2. Pœnitentiæ virtus in eo sita est ut quis delictis doleat, ob Dei offensam, et efficax foveat propositum ea in posterum vitandi, et quæ ad ea expiandi necessaria sint faciendi. Recte dicit Tertullianus: “Ubi emendatio nulla, pœnitentia necessariò vana, quia caret fructu suo, cui Deus eam sevit, id est, hominis saluti.”<sup>2</sup> Pœnitentiæ sacramentum est ritus a Christo institutus quo peccatorum post baptismum admissorum obtinetur venia sacerdotum ministerio: vel cum Perrone dicamus: “est Sacramentum a Christo Domino institutum quo per juridicam sacerdotis absolutionem hominì contrito et confesso remittuntur peccata post baptismum commissa.” Ut ordine quodam procedamus, remittendi peccata potestatem a Christo Apostolis concessam, et ad sacerdotes omnes transmissam primum ostendere juvat.

(1) Cap. ult. Vide et Matt. xi. 21. xii. 41. In Protestantibus versionibus reddita est vox: “repent.” Jam vero contendit Campbell reddendam esse: “reform.” The four Gospels with Preliminary dissertations, dissert. vi. p. iii.

(2) L. de pœn. c. ii.



## CAPUT I.

## DE POTESTATE REMITTENDI PECCATA.

3. Constat Apostolos Christi nomine prædicasse poenitentiam et remissionem peccatorum ; et inter primarios fidei articulos a primordiis Ecclesiæ remissionem peccatorum recensitam esse, reperitur enim in Apostolorum Symbolo. Quo autem sensu ea prædicetur et credatur, controvertitur. Nemo quidem dubitat veniam promitti poenitenti, Christi intuitu et auctoritate ; sed disceptatur utrum Evangelii præcones potestate divinitus præditi sint eam Christi nomine largiendi. Nemo etiam censet hominem, sua veluti auctoritate vel pro arbitrio posse peccata dimittere, apud omnes enim in confesso est nonnisi Deum, vel hominem divino mandato obsequentem posse veniam largiri, et iis tantum quos peccatorum vere poenitet.

4. In apologia Confessionis Augustanæ “tria sacramenta numerantur scilicet baptismus, cœna Domini, et absolutio, quæ sit sacramentum poenitentiae, atque expresse adseritur quod *vere sint Sacramenta*.”<sup>1</sup> “Absolutio proprie dici potest Sacramentum poenitentiae.”<sup>2</sup> In ipsa Confessione, privatae confessionis atque absolutionis utilitatem agnoverunt Lutherani.<sup>3</sup> Calvinus animadvertit “videmus tamen ministros ipsos, ut de remissione peccatorum certiores reddant conscientias, testes ejus ac sponsores constitui, adeo ut ipsi dicantur remittere peccata et animas solvere.”<sup>4</sup>

5. Anglicani potestatem remittendi et retinendi peccata in formula ordinationis presbyteri annuntiant ;<sup>5</sup> et ejus exercitium erga vita periclitantes præscribunt, prævia speciali peccatorum confessione, adeo ut presbyter dicat se Christi auctoritate sibi demandata ab omni peccato moribundum absolvere.<sup>6</sup> Quoties publice administratur communio, Rituale Anglicanum etiam præscribit, presbyterum hortari debere eos qui ad eam

(1) Art. vii. de numero et usu Sacramentorum p. 200 apud Walchium introduct. l. i. c. iv. p. 457.

(2) Art. v. de poenitentia p. 167.

(3) Art. xi. apud Walchium l. i. c. iii. § xxxiv. p. 295.

(4) Inst. l. iii. c. iv. n. 12.

(5) “Whose sins thou dost forgive, they are forgiven : and whose sins thou dost retain, they are retained.” The Ordering of Priests.

(6) “Our Lord Jesus Christ who hath left power to his Church to absolve all sinners who truly repent and believe in him, of his great mercy forgive thee thine offences. And by his authority committed to me I absolve thee from all thy sins, in the name of the Father,” &c. The Order of the Visitation of the Sick.

accessuri sunt, ut diligentiori sui conscientiae indagine se parent, et si non valeant conscientiae sedare motus, ad eum vel alium ministrum verbi accedant, ministerio ejusdem verbi absolutionis beneficium recepturi.<sup>1</sup> Episcopaliani nostrates formulam verborum in Ordinatione retinent; erga aegrotos potestatem exercendam non tradunt; quae apud Anglicanos de confessione et absolutione praescripta sunt penitus praetermittentes. In precibus mane dicendis, generalioribus verbis se peccasse omissione et actione profitentur, precantes ut juxta promissiones suas Deus poenitentibus ignoscat: postea presbyter, solus stans, dicit Deum ministris suis potestatem et mandatum dedisse, absolutionem et remissionem peccatorum declarare, et enuntiare populo suo poenitenti. Absolutionis auctoritate Christi datae, qualem profitetur Rituale Anglicanum, nec vola nec vestigium in Americano rituali, quod in ipso titulo formulae matutinae cavet, ne quis eam aliud quam meram *declarationem* remissionis poenitentibus danda existimet,<sup>2</sup> et in hortatione ante communionem omnem absolutionis mentionem omittit.<sup>3</sup> Caeterum nec Anglicani articulis suis, vel fidei decretis aliquid de potestate peccata remittendi inserere ausi sunt, quod fatentur Oxonienses, spiritalia beneficia absolutionis nonnisi ex traditione orali ministrorum nosci affirmantes.<sup>4</sup> Pearsonius tamen haeresim esse Novatianam plane docet Ecclesiae denegare auctoritatem remittendi peccata.<sup>5</sup> Wilsonus dicit Ecclesiam Anglicanam ministris vindicare potestatem absolutionem declarandi auctoritate; et effectum asserit consequi ex Christi promissione, si potestas rite exerceatur.<sup>6</sup> Kettlewellus dicit sacerdotali absolutione remissionem peccatorum poenitentibus donari.<sup>7</sup> White, ex Americanis episcopalianis, dicit ministerio divinitus instituto, et declarationibus eo nixis, esse testimonium de peccato condonato, quod tamen e conscientia cujusque pendeat, et absolutiones conditionales in precibus matutinis et vespertinis fieri vere, et auctoritate asserit;<sup>8</sup> ipsa verborum for-

(1) "That by the ministry of God's holy word he may receive the benefit of absolution." The Communion.

(2) 'The declaration of Absolution.'

(3) The Communion.

(4) Vol. iv. tract 81.

(5) Exposition of Creed.

(6) "She asserts, what is most true, that CHRIST's ministers have a special commission, which other believers have not, authoritatively to declare this absolution for the comfort of true penitents; and which absolution, if duly dispensed, will have a real effect from the promise of Christ. (John xx. 23.) Pull. Moderat. apud Oxonienses, vol. ii. tract 62.

(7) "Is it (forgiveness) in any signs and tokens outwardly dispensed? Ans. Yes, both in the Holy Sacraments and the sacerdotal Absolution." Kettlewell, on the Creed, apud Oxonienses, Tract 76.

(8) "We need not hesitate to consider the conditional absolutions in our morning and evening prayer, as made not only truly, but authoritatively. White's Lecture II. on the Apostles Creed, p. 43.

mula haud suffragante. Onderdonk, episcopus ex eadem secta Neo-Eboracenus, in concione Baltimori nuperrime habita, et in lucem edita, potestatem dimittendi peccata verbis amplissimis vindicavit, quin explicuerit quo pacto apud suos exerceatur. Sectarii plerique omnem notionem hujus potestatis exsibilare solent. Ii tamen qui Anna Lee matre et magistra gloriantur, *Shakers* vulgo dicti, potestatem peccata dimittendi sanctis datam dicunt.<sup>1</sup>

6. Inter veteres hæreticos fuerunt qui potestatem Ecclesiæ in peccatis dimittendis vel negarunt, vel arctioribus incluserunt limitibus. Montanus graviora peccata, præsertim mœchiam, condonari non posse ab Ecclesia docuit; qua de causa Zephyrini pontificis decretum, veniam pœnitentibus pollicentis, carpit Tertullianus. Sæculo tertio Novatianus, presbyter Romanus, una cum Novato Carthaginensi presbytero, schismate facto, invidiam legitimo Pontifici Cornelio conflare studuit, eo quod idololatriæ reos reciperet pœnitentes. Mœchos deinceps contendit venia numquam donandos:<sup>2</sup> imo ipsam potestatem peccata quælibet dimittendi videtur aliquando impugnasse, nam quosdam ejus sectatores, qui leviorum culparum indulgentiam dari posse concedebant, ab auctoris sui placitis recedere dixit Ambrosius.<sup>3</sup>

7. Concilium Tridentinum, ut novatorum errores evelleret, plures hac de re edidit canones: “Si quis dixerit, verba illa Domini Salvatoris: ‘Accipite Spiritum Sanctum: quorum remiseritis peccata, remittuntur eis, et quorum retinueritis, retenta sunt,’ non esse intelligenda de potestate remittendi et retinendi peccata in Sacramento pœnitentiæ, sicut Ecclesia Catholica ab initio semper intellexit; detorserit autem contra institutionem hujus Sacramenti ad auctoritatem prædicandi Evangelium; anathema sit.”<sup>4</sup> “Si quis dixerit, absolutionem sacramentalem sacerdotis non esse actum judiciale, sed nudum ministerium pronunciandi et declarandi remissa esse peccata confitenti, modo tantum credat se esse absolutum . . . anathema sit.”<sup>5</sup> “Si quis dixerit, sacerdotes qui in peccato mortali sunt, potestatem ligandi et solvendi non habere, aut non solos sacerdotes esse ministros absolutionis, sed omnibus et singulis Christifidelibus esse dictum: ‘Quæcumque ligaveritis super terram, erunt ligata et in cœlo, et quæcumque solveritis super terram, erunt soluta et in cœlo, et quorum remiseritis peccata, remittuntur eis, et quorum retinueritis, retenta sunt;’ quorum

(1) “As the son of man had power on earth to forgive sins; so he gave the same power unto his followers . . . the same power and greater, was to be restored and given unto the saints in the latter day.” The Testimony of Christ’s second appearing, 2d edit. Albany, 1810. p. viii. ch. iv. n. 29. 30.

(2) Vide Eusebium l. vii. hist. Eccl. c. vii. Socraten l. iv. hist. Eccl. c. xxiii. et l. vii. c. xxv. Epiphanium hæc. lix.

(3) L. 1. de pœnit. c. ii.

(4) Sess. xiv. Can. iii. de Pœnitentia.

(5) Can. ix.

verborum virtute quilibet absolvere possit peccata, publica quidem per correptionem dumtaxat, si correptus acquieverit, secreta verò per spontaneam confessionem ; anathema sit.”<sup>1</sup>

PROPOSITIO.

*Concessa est a Christo Domino Apostolis, et per eos iis qui ministerio sacerdotali funguntur, potestas vere judicialis in peccatorum remissione.*

*Probatur I. ex Scripturis.*

8. Petro promisit Christus claves regni cœlorum, et ligandi et solvendi potestatem, cujus exercitium ratum haberetur in cœlis. “Tibi dabo claves regni cœlorum.”<sup>2</sup> Metaphora hæc potestatem aperiendi cœli januas, quæ adversus peccatorem clausæ sunt, enuntiat, ideoque dimittendi peccata facultatem, ut peccator, repagulo ablato, cœlos possit ingredi. Quæ de ligandi et solvendi auctoritate subjunxit, id plane confirmant. Apostolis omnibus ligandi et solvendi potestatem etiam pollicitus est : “Amen dico vobis : quæcumque alligaveritis super terram, erunt ligata et in cœlo : et quæcumque solveritis super terram, erunt soluta et in cœlo.”<sup>3</sup> Aptissima imago peccatorum in vinculis habetur, peccatis enim captivus quis fit et servus : solutio ergo vinculorum est peccatorum indulgentia, quæ ab Apostolis concessa in cœlo rata habetur.

9. Promissioni respondet eventus, nam Apostolis Christus se redivivum exhibuit, et postquam plagas quas acceperat ostenderat, dixit : “Sicut misit me Pater, et ego mitto vos. Hæc cum dixisset, insufflavit, et dixit eis : Accipite Spiritum Sanctum : quorum remiseritis peccata, remittuntur eis ; et quorum retinueritis, retenta sunt.” Illa vulnerum exhibitio ut eos se adesse certiores faceret, ostendit de re magni momenti agi, de qua nulum locum dubitandi relinquere oportebat. Missio Christi a Patre vadium datum est et exemplar auctoritatis quam ipse illis impertiebatur. Spiritus Sanctus datus est, Christo exterius etiam illis insufflante, ut potestatem divinam ab illo manare, iisque communicari intelligeremus. Verbis perspicuis et simplicibus potestas ipsa enuntiatur, et indulgentia vel severitas apud judicem cœlestem ex eorum sententia pendere dicitur. Judicialis tribuitur potestas, penes eos enim est remittere vel retinere peccata, scilicet cognita causa, et iudicio æquissimo perpensa peccatorum voluntate, et animi dispositione. Porro potestatem hanc ad ministerium pertinere liquet ex missione divina qua nititur, hujus enim vi contingit ut sacra omnia qbeantur munera. Versatur etiam circa rem præcipuam prædicationis evangelicæ, pœnitentiam scilicet et remissionem peccatorum in nomine Jesu, quæ annuntianda erat in omnibus gentibus.

(1) Can. x.

(2) Matt. xvi. 19.

(3) Ibidem xviii. 18.

*Probatur II. ex Patribus.*

10. S. CYPRIANUS, una cum triginta octo aliis episcopis, ad Cornelium pontificem Romanum scribens, quæ 'in concilio statuta erant refert : " Statueramus quidem jampridem, frater charissime, participato invicem nobiscum consilio, ut qui in persecutionis infestatione supplantati ab adversario et lapsi fuissent, ac sacrificiis se illicitis maculassent, agerent diu pœnitentiam plenam, et si periculum infirmitatis urgeret, pacem sub ictu mortis acciperent. Nec enim fas erat, aut permittebat paterna pietas et divina clementia, Ecclesiam pulsanibus claudi, et dolentibus et deprecantibus spei salutaris subsidium denegari, ut de sæculo recedentes sine communicatione aut pace Domini demitterentur, cum permiserit ipse, qui legem dedit, ut ligata in terris, etiam in cœlis ligata essent, solvi autem possent illic quæ hic prius in Ecclesia solverentur."<sup>1</sup> Agi liquet de venia sub mortem danda, quæ coram Deo prodesset, proinde de vera remissione peccatorum, non de solis communionis ecclesiasticæ juribus.

11. S. JOANNES CHRYSOSTOMUS de Sacerdotio agens, ejus potestatem mire extollit : " Quæ terram incolunt, atque in ea versantur, iis commissum est, ut ea quæ in cœlis sunt dispensent ; iis datum est ut potestatem habeant, quam Deus optimus neque angelis, neque archangelis datam esse voluit : neque enim ad illos dictum est : ' quæcumque alligaveritis in terra, erunt alligata et in cœlo.' Habent quidem et terrestres principes vinculi potestatem, verum corporum solum : id autem quod dico sacerdotum vinculum ipsam etiam animam contingit, atque ad cœlos usque pervadit, usque adeo ut quæcumque inferne sacerdotes confecerint, illa eadem Deus superne rata habeat, ac servorum sententiam Dominus confirmet."<sup>2</sup> " Etenim quidnam hoc aliud esse dicas nisi omnium rerum cælestium potestatem illis a Deo concessam ? Quorumcumque, ait, peccata retinueritis retenta sunt. Quænam obsecro potestas hac una major esse queat ? Pater omnifariam Filio potestatem dedit. Cæterum video ipsam eandem omnifariam potestatem a Deo Filio illis traditam." Hæc de solutione ligaminum æque valent, ideoque potestas agnoscenda est peccata dimittendi, quæ Dei ipsius judicio confirmetur. Hanc sacerdotum Christi auctoritatem cum ea quæ sacerdotibus Aaronicis in lepræ examine dabatur, confert, ut ejus præstantiam ostendat : " Corporis lepram purgare, seu verius dicam, haud purgare quidem, sed purgatos probare, Judæorum sacerdotibus solis licebat. At vero nostris sacerdotibus, non corporis lepram, verum animæ sordes, non dico purgatas probare, sed purgare prorsus concessum est."<sup>3</sup> Verbis clarioribus animæ mundatio, quæ fit peccata remittendo, enuntiari non potuit.

(1) Ep. ii. l. i. alias ep. liv.

(2) L. iii. de Sacerdotio.

(3) Ibidem.

12. S. HILARIUS : “ O ! beatus cœli janitor ! cujus arbitrio claves æterni aditus traduntur, cujus terrestre judicium præjudicata autoritas sit in cœlo ; ut quæ in terris aut ligata sint, aut soluta, statuti ejusdem conditionem obtineant et in cœlo.”<sup>1</sup>

13. S. AMBROSIIUS Deum sic alloquitur, Novatianorum notans errorem : “ Quod ergo isti possunt consortium tecum habere, qui claves regni non suscipiunt, negantes quod dimittere peccata debeant ? Quod quidem recte de se fatentur, non habent enim Petri hæreditatem, qui Petri fidem non habent, quam impia divisione discerpunt. Sed hoc improbe, quod etiam in Ecclesia donari peccata negant posse, cum Petro dictum sit : ‘ Tibi dabo claves regni cœlorum, et quaecumque ligaveris super terram, erunt ligata et in cœlo : et quaecumque solveris super terram, erunt soluta et in cœlis.’”<sup>2</sup> Redarguit Novatianos qui hominem dimittere posse peccata negant : “ Nulla in his hominis potestas est, ubi divini muneris gratia viget. . . . Cur baptizatis, si per hominem peccata dimitti non licet ? In baptismo utique remissio peccatorum omnium est. Quid interest utrum per pœnitentiam, an per lavacrum, hoc jus sibi datum sacerdotes vindicent ? Unum in utroque mysterium est. Sed dicis quia in lavacro operatur mysteriorum gratia. Quid in pœnitentia ? Nonne Dei nomen operatur ?”<sup>3</sup> Item : “ impossibile videbatur per pœnitentiam peccata dimitti. Concessit hoc Christus Apostolis suis, quod ab Apostolis ad sacerdotum officia transmissum est.”<sup>4</sup>

14. S. PACIANUS : “ Numquam Deus non pœnitenti comminaretur, nisi ignosceret pœnitenti. Solus hoc, inquires, Deus poterit. Verum est : sed et quod per sacerdotes suos facit, ipsius potestas est. Nam quid est illud quod Apostolis dicit : ‘ quæ ligaveritis, etc.’ Cur hoc, si ligare hominibus ac solvere non licebat ?”<sup>5</sup>

15. S. HIERONYMUS : “ Absit, ut de his quidquam sinistrum loquar, qui apostolico gradui succedentes, Christi corpus sacro ore conficiunt ; per quos et nos Christiani sumus : qui claves regni cœlorum habentes, quodammodo ante diem judicii judicant.”<sup>6</sup>

16. S. AUGUSTINUS : “ Annon cogitamus, cum ad istorum periculorum pervenitur extrema, nec est potestas ulla fugiendi, quantus in Ecclesia fieri soleat ab utroque sexu, atque ab omni ætate concursus, aliis baptismum flagitantibus, aliis reconciliationem, aliis etiam pœnitentiæ ipsius actionem, omnibus consolationem et sacramentorum confectionem et erogationem.”<sup>7</sup> Et alias : “ Nemo sibi dicat : occulte ago pœnitentiam : apud Deum ago :

(1) Can. xvi. in Matth.

(2) L. i. de pœnit. c. vi.

(3) Ibidem c. vii.

(4) Ibidem l. ii. c. ii.

(5) Ep. i. ad Sympronianum.

(6) Ep. i. ad Heliodorum.

(7) Ep. clxxx. ad Honoratum.

novit Deus qui mihi ignoscit quid in corde meo ago. Ergo sine causa dictum est : ‘ quæ solveritis in terras soluta erunt et in cœlo ? ’ Ergo sine causa sunt claves datæ Ecclesiæ Dei ? Frustramus Evangelium : frustramus verba Christi.”<sup>1</sup>

17. S. LEO MAGNUS sic docet : “ Mediator Dei et hominum homo Christus Jesus hanc præpositis Ecclesiæ tradidit potestatem, ut et confidentibus actionem pœnitentiæ darent, et eosdem salubri satisfactione purgatos, ad communionem sacramentorum per januam reconciliationis admitterent : cui utique operi incessabiliter ipse Salvator intervenit, nec unquam ab his abest quæ ministris suis exequenda commisit.”<sup>2</sup>

18. VICTOR VITENSIS persecutionem Vandalicam narrans, exhibet populos sic alloquentes sacerdotes in exilium abituros : “ Quibus nos miseros relinquitis, dum pergitis ad coronas ? Qui hos baptizaturi sunt parvulos fontibus aquæ perennis ? Qui nobis munus pœnitentiæ collaturi sunt, et reconciliationis indulgentia obstrictos peccatorum vinculis soluturi ? quia vobis dictum est : ‘ quæcumque solveritis super terram, &c. ’ ”<sup>3</sup>

19. INNOCENTIUS I, ad Decentium Eugubinum episcopum scribens, ait : “ Cæterum de pondere æstimando delictorum, sacerdotis est judicare, ut attendat ad confessionem pœnitentis, et ad fletus atque lachrymas corrigentis, ac tum jubere dimitti, cum viderit congruam satisfactionem.”<sup>4</sup>

20. S. GREGORIUS MAGNUS : “ Causæ ergo pensandæ sunt, et tunc ligandi atque solvendi potestas exercenda. Videndum est quæ culpa præcessit, aut quæ sit pœnitentia secuta post culpam ; ut quos omnipotens Deus per compunctionis gratiam visitat, illos pastoris sententia absolvat. Tunc enim vera est absolutio præsentis, cum æterni arbitrium sequitur iudicis.”<sup>5</sup>

*Probatur III. ex Græcorum consensu.*

21. Veram remittendi peccata potestatem sacerdotibus a Christo datam agnoscunt Græci, uti liquet ex absolutionis forma : “ Ipse humane et malorum tolerator, Domine, exorare nunc quoque super servum tuum, et modum pœnitentiæ, peccatorumque veniam illi concede ; condonans illi per me indignum famulum tuum omne delictum spontaneum pariter ac involuntarium. Tu enim dixisti, Domine, divinis et sanctis discipulis tuis, et Apostolis : ‘ Accipite Spiritum Sanctum, quorum remiseritis peccata, remittuntur eis : quorum retinueritis, retenta sunt. Et quæcumque igeritis et solveritis super terram, erunt ligata et soluta in cœlis. ’ ”<sup>6</sup>

(1) Serm. cccxcii.

(2) Ep. xci. ad Theodorum Forojul.

(3) L. ii. de Pers. Vand.

(4) Ep. ad Decentium c. vii.

(5) L. ii. Hom. xxvi. in Evang.

(6) Vide Euchologium.



*Probatur IV. præscriptionis argumento.*

22. Ubique in Ecclesia potestatem remittendi peccata sacerdotes sibi vindicant, et exercent; quin ostendi possit quo auctore vel qua ætate fides tantæ potestatis primum obtinuerit: attamen et auctor et ætas novi dogmatis inducti debet innotescere, si fuerit apostolica ætate posterius, nam quum divinæ potestatis communicatione nitatur, non facile potuit suaderi, præsertim quum onus gravissimum omnia sua delicta ad sacerdotes deferendi cuique imponat. Ergo dogmatis hujus origo ad rei christianæ initium referenda est.

## OBJECTIONES SOLVUNTUR.

23. *Obj. 1.* Constat solvere et ligare, “δέειν et λύειν quando de *clavibus* est sermo, idem esse ac *claudere*, et *aperire*. *Januæ* enim veterum clauduntur funibus, quibus ligandis vel solvendis claves adhibebantur: unde quod nobis est januas *claudere* et *aperire* id iis fuit *ligare* et *solvere*. . . Δέειν igitur, quando de personis usurpatur, erit, *repellere* et *excludere*, λύειν *admittere*. De *personis* autem omnino h. l. est sermo; neutro enim sæpius utuntur Evangelistæ, ubi de hominibus utriusque sexus sermo est, e. c. Matt. xviii. 11. Joan. vi. Sic totius commatis sensus erit: Tibi, Petre, facultatem concedo, post meum in cælos reditum, Judæis et gentibus aditum ad Ecclesiam meam reserandi.”<sup>1</sup>

*Resp.* Frustra conatur Rosenmüller verba Christi Petro dicta de sola facultate aditum Ecclesiæ patefaciendi, vel claudendi interpretari; sunt enim amplissimæ significationis, et omne auctoritatis ecclesiasticæ exercitium complectuntur. Equidem nulla est ratio cur claves regni cælorum de Ecclesia in terris tantum intelligendæ sint, quum vi sua obvia cæleste regnum respiciant, et nonnisi ob similitudinem quamdam et relationem, Ecclesiam quæ in terris versatur. Data igitur est Petro facultas ipsum cælorum aditum patefaciendi, cujus potestatis exercitium videre est in peccatis remittendis, quibus tamquam repagulis clauduntur januæ. De ligandi et solvendi metaphora, prout ad claves refertur, haud sumus sollicitiores; quacumque enim ratione intelligatur, potestas affirmatur aperiendi cælos, qui peccatori nisi remissis peccatis nequeunt patere. Nec diffitetur ipse Rosenmüller δέειν et λύειν de personis usurpatum, interdum esse *reum declarare* et *absolvere*. Sic *Munthius* ex *Diodoro Siculo* attulit verba: ὅσα ἐγὼ δῆσω ἅδεις δύναται λύσαι, i. e. *quoscumque ego noxios pronunciavero, nemo absolvere, aut a noxa immunes judicare sustinebit.* Absolutio autem quæ rata habenda est in cælis, ipsam remissionem peccatorum præstat.

24. *Obj. 2.* “Multi verba δέειν et λύειν accipiunt de sola doctrina ab Apostolis determinanda, vel saltem de præceptis et interdictis. Nec potest negari voces hebræas שָׂרָא אֱמֶר, quibus respondent Græcæ δέειν et λύειν

(1) Rosenmuller in Matt. xvi. 19.



ex usu Scholæ Hillelianæ et Schammæanæ adhiberi in doctrinis et judiciis seu censuris, de rebus licitis et non licitis secundum legem, ut *figere idem sit quod prohibere seu prohibitum declarare, solvere verò idem ac permittere, aut declarare licitum.*" Iterum Rosenmüller.

*Resp.* Illa vis vocum apud quasdam Hebræorum scholas<sup>1</sup> non obstat quin quæ Christus de solvendis dixit, obvio accipiantur sensu, de peccatorum ligaminibus relaxandis, præsertim ipso interprete, qui Apostolis retinendi et remittendi peccata, clarissimis verbis, fecit potestatem, promissionem dono illustrans. Profecto apud Rabbinos vocum significatio eorum usibus accommodata erat, ideoque nil mirum si quædam peculiarem habuerint sensum: sed Christo loquente verba totam suam vim habere intelligenda sunt, quum obvio et populari sensu locutus censendus sit, potius quam juxta scholarum quarundam usum; et eo loci certe non agebat de doctrina determinanda, uti ex contextu liquet.

25. *Obj.* 3. Altero Matthæi loco Christus Apostolis ligandi et solvendi potestatem dans, jus dedisse intelligendus est pœnam in peccatorem pertinacem, de quo agebatur, decernendi: "*Quodcumque communi consensu decreveritis, (de tali peccatore) ratum erit apud Deum.* Sententia a vobis lata, (i. e. non decretis Judaicis, aut γράμματι, s. scripto legis Mosaicæ, sed doctrinæ meæ et præceptis virtutis consentanea) apud ipsum Deum rata erit." Rosenmüller.

*Resp.* A singulari casu ad potestatem Apostolis et præsulibus Ecclesiæ dandam transiit Christus, verbis amplissimis eam explicans. Jusserat peccatorem pertinacem qui Ecclesiæ non obaudiret, tamquam ethnicum et publicanum habendum: et statim subjunxit illam potestatis Ecclesiæ declarationem, quæ ad omnia ligata vel soluta extenditur, promissione facta ea in cœlis pariter liganda et solvenda. Hæc quidem non respicit solam remittendi et retinendi peccata potestatem, sed eam complectitur, uti ex promissionis impletionem liquet. Directe censuras ecclesiasticas sancit, de iis quippe agebat Christus, sed et omne potestatis ecclesiasticæ exercitium divina auctoritate firmandum esse testatur. Christi verbis limites humano arbitrio temere ponuntur, quum enuntient potestatis et auctoritatis amplissimam communicationem.

26. *Obj.* 4. Verborum apud Joannem "*sensus esse videtur: Quicquid in rebus ad religionem meam pertinentibus, a Spiritu divino edocti, constitueritis, id ratum habebitur a Deo. Peccata remittere, peccata retinere, vel non remittere, Deo alias est proprium, nec sensu latissimo Apostolia tribui potest.*" Rosenmüller.<sup>2</sup>

*Resp.* Vis manifesta illa explicandi ratione infertur Christi verbis, dixit enim se dare illis Spiritum Sanctum, eos mittere eo pacto quo ipse a Patre missus fuerat, eosque fecit certiores peccata remittenda quibus ea ipsi

(1) Consule Morinum in Comm. Hist. de Pœnit. l. i. c. viii.

(2) In Joan. xx.

remitterent. Hæc ad statuta de re Religionis referre, vel ad spirituum discretionem, vel ad aliam quamcumque auctoritatem, vel donum, exclusa remittendi peccata potestate, non est Scripturam interpretari, sed pro sectæ præjudiciis, vel odio veritatis Catholicæ, detorquere. Quam rationem adducit Rosenmüller ineptissima est; quamvis enim remittere peccata, suo jure, Deo sit proprium, illa tamen Dei nomine ac mandato remittere, hominibus ab ipso in id muneris delegatis convenit, ideoque non sensu latissimo, sed vero et proprio tribui potest Apostolis, aliisve legatione Dei ad homines fungentibus.

27. *Obj.* 5. Ligabant peccatores Apostoli, pœnas delinquentibus ex divino instinctu irrogantes, sicut Petrus punivit Ananiam et Sapphiram; solvebant, morbos sanando ob peccatum immissos. “Pertinere huc videtur visibile signum remissionis peccatorum sanatio morborum, ob peccatum inflictorum, Jac. v. 14, et immissio morborum vel aliorum malorum, tamquam visibile signum retentionis peccatorum, Act v. 5, xiii. i. I. Cor. v. 5.”<sup>1</sup>

*Resp.* Hæc nonnisi per summam vim ex Christi verbis colliguntur. Quod Ananiæ et Sapphiræ contigit in deceptionis pœnam, Deo auctore factum est in aliorum terrorem, nec ad muneris Apostolici exercitium potest referri. Morborum curatio Apostolorum opera sæpe contigit, Deo hac ratione eorum confirmante auctoritatem; sed Jacobi dictum ad extremæ unctionis ritum spectat, uti postea probabimus. Nihil est in Apostolorum rebus gestis quod obviam verborum Christi vim de remittendis et retinendis peccatis infirmet.

28. *Obj.* 6. “Remittere peccata potest esse: hominibus declarare, eos habere Deum propitium, si nempe resipiscant, et doctrinam ipsis traditam sequantur.” Rosenmüller.<sup>2</sup>

*Resp.* Frustra Christus adhibuit verba adeo ampla et clara, si de sola annuntiatione remissionis ageretur. Equidem voces illæ obvio sensu denotant veram peccatorum veniam, quo pacto alias passim in Scripturis usurpantur: “Remittuntur tibi peccata tua.”<sup>3</sup> Contra omnem Hermeneuticæ sanioris legem verba ab obvio sensu, et in Scripturis frequenti, detorquentur a Protestantibus et Rationalistis.

29. *Obj.* 7. Christus redivivus discipulos ex Scripturis veteribus edocuit, oportere “prædicari in nomine ejus pœnitentiam et remissionem peccatorum in omnes gentes.” Ergo in eo exercenda erat remittendi peccata potestas, quod remissionem prædicarent pœnitentibus.

*Resp.* Optime cohæret prædicatio Apostolorum cum illius potestatis divinitus datæ exercitio; oportebat scilicet commendare pœnitentiam et veniam

(1) In Joan. xx.

(2) Ibidem.

(3) Matt. ix. 2. xii. 31. Luc. v. 20. vii. 47. Act. viii. 22. Rom. iv. 7. Jac. v. 15. 1. Joan. i. 9.

polliceri ; quam Christi auctoritate reapse dabant agentibus pœnitentiam, quibus enim remittebant peccata, revera in cœlo remittebantur. Quando plura occurrunt testimonia quæ conciliari secum queunt, nulla alterutri vi illata, non est cur ab obvio utriusque sensu recedatur.

30. *Obj.* 8. Paulus testatus est prædicationem Apostolicam nihil scripturis veteribus adjicere : “ annuntiabam ut pœnitentiam agerent, et converterentur ad Deum, digna pœnitentiæ opera facientes . . . nihil extra dicens, quam ea quæ prophetæ locuti sunt.”<sup>1</sup>

*Resp.* Id suadet Paulus Agrippæ, se nonnisi ea de Christo annuntiare quæ prædixerant vates : “ Nihil extra dicens quam ea quæ prophetæ locuti sunt futura esse, et Moyses. Si passibilis Christus, si primus ex resurrectione mortuorum, lumen annuntiaturus est populo et gentibus.” A novitatis crinine se hac ratione vindicat, et ostendit gentes ab eo ad Christum sectandum non alia lege invitari, quam derelictis vitiis et superstitionibus, adeo ut veri Dei gloriam quæreretur. Non is erat locus ut potestatem a Christo acceptam peccata remittendi exponeret, vel explicaret, nam reus se contra accusatores defendebat.

31. *Obj.* 9. “ Christus non ante Apostolis ligandi et solvendi potestatem fecit, quam eos Spiritu Sancto donavit. Nego igitur ullis competere clavium potestatem, qui non prius acceperint Spiritum Sanctum. Nego quemquam clavibus uti posse nisi præeunte docenteque Spiritu Sancto, et dictante quid agendum sit.”<sup>2</sup> Ita Calvinus, inspirationem Spiritus Sancti necessariam conditionem ad exercitium hujus potestatis statuens.

*Resp.* Christus Spiritum Sanctum Apostolis dedit, ut auctoritate divina peccata remitterent, quæ nemo remittere valet, nisi divinitus accepta potestate. Manuum impositione tradi adhuc eundem Spiritum Sanctum novimus, docente Paulo ; quapropter qui sacerdotes eo ritu constituuntur, meritò sibi vindicant potestatem quam Christus Apostolico muneri et sacerdotali misericorditer adnexuit. Cæterum gratia Spiritus Sancti, qua anima fit Deo accepta, non est necessaria ut quis potestatem sibi demandatam exercere valeat ; quamvis peccet gravissime indignus minister sancto fungens munere, in alienorum peccatorum remissione, dum ipse peccatis ligatus manet. Nec lumen Spiritus Sancti, quo cordium arcana pateant, ad muneris hujus exercitium requiritur, nec enim requiritur ut infallibile sit judicium. Potestatis originem præcipue illis verbis : “ Accipite Spiritum Sanctum ;” Christus declaravit ; et proinde omnes qui ex eo fonte illam derivant potestatem eam valent exercere nec enim de inspiratione eo loci est quæstio, sicut alias quando agitur de munere docendi. Nihil est in verborum serie, nihil in cæteris Scripturis, nihil in tota œconomia christiana, quod suadeat remittendi peccata potestatem ex lumine illo superponere.

(1) Act. xxvi. 22.

(2) Inst. l. iii. c. iv. n. 20.

**32. Obj. 10.** Videntur Christi verba de Spiritus Sancti lumine, quo in spiritibus dijudicandis dirigerentur Apostoli, intelligenda, qua ratione Petrus Ananiam, Sapphiram, et Simonem magum novit: nam “Apostoli in negotiis ad religionem constituendam pertinentibus acceperunt διαπίστεισιν πονημάτων. I. Cor. xii. 7.—11.<sup>1</sup>

*Resp.* Quum potestas remittendi peccata verbis simplicibus et claris tradatur, non potest iis quæ præcedunt vocibus, de Spiritu Sancto accipiendo, sensus dari, qui ei non congruat. Omnia cohærent, obvio accepta sensu, de Spiritus Sancti auctoritate communicata Apostolis ad peccata remittenda. Quod hypocrisin Ananiæ et Sapphiræ, et pravam Simonis magi mentem noverit Petrus, Spiritu Sancto illustrante contigit, sed non vi verborum Christi, quæ potestatem in peccatorum remissione exercendam ostendunt. Spirituum igitur discretio, qua pollebant Apostoli, erat quidem Spiritus Sancti munus, sed ad potestatem ministerii non spectabat; erat enim cuilibet e cœtu fidelium, pro Spiritus Sancti arbitrio summo concessa, uti ex objecto Pauli loco colligitur.

**33. Obj. 11.** Absque illa cordis arcanorum notitia potestas remittendi peccata exerceri nequit.

*Resp.* Optime exercetur, adhibita omni diligentia ut sacerdos de pœnitentis animo certior fiat; æquum idcirco, quod Deus firmet, prolaturus iudicium. Necesse non est ut absit omne errandi periculum, nam pœnitens fiduciam certam concipere valet veniæ, sacerdotis opera, consequendæ, dummodo animo rite parato ejus utatur ministerio: quod sane divinæ misericordiæ admirationem provocat. Quod autem non omnimoda sit certitudo, quum animus cujusque non sit penitus exploratus, humilitati favet.

**34. Obj. 12.** Nulla potestas æstimanda est, ubi ejus exercitium ex re prorsus ignota et incerta pendet, scilicet ex pœnitentium dispositionibus: “Quæ erit isthæc potestas, nescire quid ligandum sit, aut solvendum? ligare autem non posse, aut solvere, nisi scias? Cur ergo dicunt se absolvere auctoritate sibi data, quum incerta sit absolutio?” Ita Calvinus.<sup>2</sup>

*Resp.* Vera est potestas, quamvis ejus exercitium quasdam postulet condiciones. Quum hominibus sit commissa, iudicium eorum de iis qui ejus beneficio frui velint, non omnimodam habet certitudinem; sed certe valet ejus exercitium iis qui animo rite parati sunt. Nulla est absolutionis incertitudo, quod pertinet ad auctoritatem; sed fieri potest ut prava mens eorum qui pœnitentiam profitentur obstet, ne veniam oblatam accipiant.

**35. Obj. 13.** Ea absolvendi potestas idem sonat, ac “si mereris, te absolvo. Ac tantumdem posset, non dico laicus (quando id æquis auribus non ferrent,) sed Turca aut diabolus.” Calvinus iterum.<sup>3</sup>

(1) Rosenmüller in Joan. xx.

(2) Inst. l. iii. c. iv. n. 21.

(3) Ibidem.

*Resp.* Non meritis humanis nititur sacerdotis absolutio, sed Christi auctoritate; quamvis sanctissima ejus lege exigantur quædam animi dispositiones ut venia possit indulgeri. Nemo, præter Dei sacerdotem, potest poenitentem certiores facere, se, Dei ipsius auctoritate, solvere peccatorum, quibus obstrictus erat, ligamina.

36. *Obj.* 14. “Quicquid sit, non ad omnes doctores christianos pertinet hoc privilegium, sed ad solos Apostolos, quippe futuros *tales* Christi legatos ad homines, qualis fuerat Christus.” Rosenmuller.

*Resp.* Ad sacerdotes omnes novæ legis id spectat, quum manuum impositione fiant eatenus Apostolici muneris participes. Equidem omnia quæ ad *missionem* referuntur, perpetua sint in Ecclesia oportet, nam ex iis pendet animarum salus. Quo jure potestas remittendi peccata ad sacerdotes transiisse negatur, docendi et baptizandi etiam denegari poterit. Igitur ni velimus omnia sacra munia solis Apostolis concessa dicere, fateri oportet omnia quæ ministerii sunt, ad doctrinam et salutem spectantia, in Ecclesia esse perpetua: quod quidem ex constanti traditione et fide apertissime constat. Pulchre S. Pacianus Novatianorum errorem explodit: “An tantum hoc solis Apostolis licet? Ergo et baptizare solis licet: et Spiritum Sanctum dare solis, et solis gentium peccata purgare: quia totum hoc non aliis quam Apostolis imperatum est. Quod si uno in loco et resolutio vinculorum et Sacramenti potestas datur; aut totum ad nos ex Apostolorum forma et potestate deductum est; aut nec illud ex decretis relaxatum est. . . . Si ergo et lavacri et chrismatis potestas, majorum longe charismatum, ad episcopos inde descendit, et ligandi quoque jus adfluit, atque solvendi.”<sup>1</sup>

37. *Obj.* 15. Miracula patrando potestas Apostolis data est, quæ tamen sacerdotali ordini non convenit: ergo nec peccata remittendi eis tribuenda est facultas.

*Resp.* Miracula patrare ad Apostolorum munus non spectabat; sed veluti argumentum veritatis et auctoritatis datum est: “Domino cooperante et sermonem confirmante sequentibus signis.”<sup>2</sup> Docere autem, baptizare, peccata remittere, eucharistiam conficere ad munus eorum plane pertinebat, ideoque perpetua sunt hæc sacra officia. Discrimen sumitur ex rerum natura, et patet ex constanti Ecclesiæ fide. Equidem miracula patrare non erat Apostolorum tantummodo, vel sacrorum ministrorum, frequentia enim erant mira opera apud fideles, quæ credentibus, absque ordinis seu conditionis discrimine, pollicitus est Christus: “Signa autem eos qui crediderint, hæc sequentur.”<sup>3</sup>

38. *Obj.* 16. Impium est homini tribuere peccata remittendi potestatem.

(1) Comm. in Joan. xx. 23.

(2) Marc. xvi. 20.

(3) Ibidem 16.

*Resp.* Impium foret eam potestatem homini tribuere, nisi Deus eam concessisset; pium autem est grato animo agnoscere et prædicare divina dona. Ideo redarguit olim Ambrosius Novatianos, qui graviorum criminum reos poenitentiae severiori subiciebant, veniam tamen nonnisi a Deo expectandam affirmabant, poenitentes ad ejus judicium remittentes: "Sed aiunt se Domino deferre reverentiam, cui soli remittendorum criminum potestatem reservent. Imo nulli majorem injuriam faciunt, quam qui ejus volunt mandata rescindere, commissum munus refundere. Nam cum ipse in Evangelio suo dixerit Dominus Jesus: 'Accipite Spiritum Sanctum, quorum remiseritis peccata, remittuntur eis, et quorum detinueritis, detenta sunt,' quis est ergo qui magis honorat, utrum qui mandatis obtemperat, an qui resistit? Ecclesia in utroque servat obedientiam, ut peccatum et alliget, et relaxet: hæresis in altero immitis, in altero inobediens, vult ligare quod non resolvat, non vult solvere quod ligavit; in quo se sua damnat sententia. Si quibusdam datum utrumque est licere, aut utrumque non licere, certum est Ecclesiae utrumque licere, hæresi utrumque non licere. Jus enim hoc solis permissum sacerdotibus est. Recte igitur hoc Ecclesia vindicat, quæ veros sacerdotes habet; hæresis vindicare non potest quæ veros sacerdotes non habet. Non vindicando autem ipsa de se pronuntiat, quod cum sacerdotes non habeat, jus sibi vindicare non debeat sacerdotale, Ita in impudenti contumacia pudentem cernimus confessionem."<sup>1</sup>

39. *Obj.* 17. Potestas remittendi peccata ita Dei propria est ut homini non possit communicari: ideo Christus Scribarum et Pharisæorum objectioni: "Quis potest dimittere peccata, nisi solus Deus?"<sup>2</sup> satisfecit, se Deum probando, miraculo patrato.

*Resp.* Dei potestati detrahitur asserendo eum non posse hanc facultatem homini demandare. Equidem non constat eo usque processisse Scribarum et Pharisæorum temeritatem, quamvis, quia non credebant Deum revera potestatem remittendi peccata alicui concessisse, blasphemiae reum habebant Jesum eam sibi vindicantem. Hæc eorum cogitatio orta est ex eo quod eum merum hominem aestimarent: ipse tamen non patravit miraculum ut divinitatem suam ostenderet, sed ut ipsam probaret potestatem quam tamquam homo exercebat: "Ut autem sciatis quia Filius hominis habet potestatem in terra dimittendi peccata: (ait paralytico) Tibi dico, surge, tolle lectum tuum, et vade in domum tuam."<sup>3</sup> Patrato miraculo dicitur: "videntes autem turbæ timuerunt, et glorificaverunt Deum, qui dedit potestatem talem hominibus."<sup>4</sup> Igitur ex ipsis Christi verbis, et ex turbarum sententia, quam Evangelista referendo videtur probare, colligitur

(1) L. iii. de Spiritu S. c. xviii.

(2) Luc. v. 21.

(3) Matt. ix. 6.

(4) Ibidem, 8.

potestatem remittendi peccata a Christo, tamquam homine, eo miraculo vindicatam esse. Quamvis autem ipsius ea potestas fuerit eminentissima quadam ratione, quæ hominibus ab eo delegatis non convenit, inde satis patet potestatem remittendi peccata non ita esse Dei propriam, ut non possit communicari hominibus.

40. *Obj.* 18. Dei est suscitare peccatorem, nec sacerdos quid valet præter-quam declarare sibi persuasum esse eum esse a morte peccati resuscitatum: "Quis eum suscitabit, nisi qui remoto lapide clamavit, dicens: Lazare, prodi foras?"<sup>1</sup> Ita Augustinus.

*Resp.* Utique divinæ est potestatis peccatorem excitare ad pœnitentiam, et vita gratiæ donare, quamvis et hominis utatur ministerio, quod pulchre explicat ipse Augustinus: "Cum audis hominem pœnitere peccatorum suorum, jam revixit: cum audis hominem confitendo proferre conscientiam, jam de sepulchro eductus est, sed nondum solutus est. Quando solvitur? a quibus solvitur? 'Quæ solveritis,' inquit, 'in terra, erunt soluta et in cœlo. Merito per Ecclesiam dari solutio peccatorum potest; suscitari autem ipse mortuus nonnisi intus clamante Domino potest: hæc enim Deus interius agit.'"<sup>2</sup>

48. *Obj.* 19. Patres varias exhibent explicationes locorum quæ afferuntur ad potestatem remittendi peccata adstruendam: nec dubitant asserere Dei esse solius peccata remittere. Sic Cyprianus: "Solus Dominus misereri potest. Veniam peccatis quæ in ipsum commissa sunt solus potest ille largiri."<sup>3</sup>

*Resp.* Id in more positum est patribus, varias adhibere interpretationes moribus informandis accommodatas; quod a nonnullis factum de his testimoniis quum alias de peccata remittendi potestate apud omnes constaret, ex obvia verborum acceptatione. Quandocumque affirmant Dei esse solius dare veniam, intelligendi sunt de summa qua pollet auctoritate; et ut nemo sibi putet licere aliquid contra divinam legem, qua congrua pœnitentia exigitur. Hac de causa Cyprianus arguit eos qui lapsos in persecutione temere donabant venia, pœnitentia tanto sceleri congrua non peracta: "Contra Evangelii vigorem, contra Domini ac Dei legem temeritate quorundam laxatur incautis communicatio: irrita ac falsa pax periculosa dantibus, et nihil accipientibus profutura. Ante expiata delicta, ante exomologesim factam criminis, ANTE PURGATAM CONSCIENTIAM sacrificio, et MANU SACERDOTIS, ante offensam placatam indignantis Domini, et minantis, pacem putant esse quam quidam verbis fallacibus venditant." De hac nimia facilitate dicit: "Nemo se fallat, nemo se decipiat: solus Dominus misereri potest. Veniam peccatis quæ in ipsum commissa sunt, solus potest ille largiri, qui peccata nostra portavit, qui pro nobis doluit, quem Deus

(1) Serm. lxxvii. alias viii. de verbis Domini.

(2) Enarr. II. in Ps. cl.

(3) L. de lapsis.



tradidit pro peccatis nostris. Homo Deo esse non potest major: nec remittere aut donare indulgentia sua servus potest quod in Dominum delicto graviore commissum est." Cæterum agnoscit Cyprianus veram remissionis potestatem, uti patet, ex eo quod conscientiam manu sacerdotis purgari dicat; et lapsos ad pœnitentiam hortetur, ut remissionis fruantur beneficio . . . "Confiteantur singuli, queso vos, fratres dilectissimi, delictum suum, dum adhuc qui deliquit in sæculo est, dum admitti confessio ejus potest, dum satisfactio et REMISSIO PER SACERDOTES APUD DOMINUM GRATA EST."<sup>1</sup>

42. *Obj.* 20. Deus hominum opera non indiget in peccatis remittendis.

*Resp.* Nulla re, nullius opera indiget Deus, sed pro summo arbitrio hominum utitur ministerio ut sua nobis impertiatur dona. Ejus voluntas exquirenda est, et adimplenda; illudit enim sibi quisquis veniam et salutem sibi pollicetur alia quam ea quam statuit Deus ratione.

43. *Obj.* 21. Saltem liberum est cuicumque ad divinam confugere misericordiam: nec enim Deus se sua potestate spoliasset censendus est."

*Resp.* Non sua se spoliavit potestate Christus, sed Apostolos, judicium instar auctoritate reos vel damnandi, vel absolvendi, induit, et ideo tribunal constituisse, ad quod peccatorum causæ necessario deferendæ sunt, dicendus est. Profectò si nullam imposuisset necessitatem ad Apostolicum ministerium pro venia recurrendi, frustra dedisset illam potestatem; uti supra Augustinus recte animadvertit.

#### COROLLARIA.

44. I. Ex probata potestate remittendi peccata, vel retinendi, liquet Apostolos, et sacerdotes omnes, judicium exercere ex Christi auctoritate, quod sane in eos qui baptismo ingressi sunt Ecclesiam exercendum est; "quid enim mihi," ait Apostolus, "de iis qui foris sunt judicare?"<sup>2</sup> Ergo potestas illa circa peccata post baptismum admissa versatur: baptismo quippe priora omnia delicta abluuntur.

45. II. Sequitur absolutionem sacramentalem sacerdotis esse actum judicalem, quo, scilicet, judicio habito, sententiam Dei auctoritate profert, ideoque vere remittit peccata. Non igitur nudum est ministerium pronunciandi et declarandi remissa esse peccata.

46. III. Sequitur singulis Christifidelibus illa Christi verba de ligandi et solvendi, retinendi et remittendi peccata non convenire, sed Apostolis imprimis, episcopis et sacerdotibus; nec enim aliis datum est judicium in alios ferre in conscientiae foro.

47. IV. Sequitur Sacramentum pœnitentiæ esse a Christo Domino

(1) Lib de lapsis.

(2) White, Dissertation iii. Forgiveness of Sins.

(3) I. Cor. v. 12.



institutum, data enim potestate remittendi peccata vel retinendi, judicii quædam forma necessariò habenda est; ideoque ritus externus quo venia datur; signum idcirco visibile invisibilis gratiæ.

48. V. Sequitur pœnitentiæ sacramentum esse a baptismo distinctum, hic enim ablutio est, illud est judicii instar: illo fiunt homines Ecclesiæ membra: hoc fideles pœnitentes veniam consequuntur. A quolibet datus baptismus valet, ob ablutionis naturam, et Christi voluntatem: a nemine præter sacerdotem administrari potest pœnitentia, quia ad judicium judicandi potestas omnino est necessaria.

## CAPUT II.

## DE HÆRESI NOVATIANA.

49. Potestatem remittendi graviora peccata, idololatriam præsertim, homicidium, et adulterium, Ecclesiæ denegabant Novatiani. Reos horum criminum pœnitentiæ legibus adstrictos nulla ab Ecclesia venia donari voluerunt, sed Dei relinquendos iudicio. Quum nullus appositus sit limes a Christo Domino, sed e contra verbis amplissimis potestas sit explicata—“quæcumque solveritis;” “quorum remiseritis peccata”—liquet peccatores gravissimorum scelerum reos veniam consequi posse a ministris Ecclesiæ, quando eam pœnitenti animo petunt. Recte Ambrosius: “Deus distinctionem non facit, qui misericordiam suam promisit omnibus, et relaxandi licentiam sacerdotibus suis sine ulla exceptione concessit.”<sup>1</sup> Augustinus etiam: “Nec eos audiamus, qui negant Ecclesiam Dei omnia peccata posse dimittere. Itaque miseri dum in Petro petram non intelligunt, et nolunt credere datas Ecclesiæ claves regni cœlorum, ipsi eas de manibus amiserunt.”<sup>2</sup> In refellenda igitur illa hæresi non juvat immorari, præsertim quum sectarii hodierni non limites potestatis exercitio ponere quærant, sed ipsam radicitus evellere. Ne tamen aliquis hæreat in difficilibus quibusdam Scripturæ locis in quibus Novatiani sui erroris præsidium quærebant, placet quæ veteres patres iis reposuerunt referre.

50. Objiciebant Novatiani verba Heli sacerdotis peccata filiorum suorum Ophni et Phineis arguentis: “Si peccaverit vir in virum, placari ei poterit Deus: si autem in Dominum peccaverit vir, quis orabit pro eo?”<sup>3</sup> Difficultatem veniæ ob sceleris gravitatem eo loci significari optime intellexit Ambrosius: “Non enim scriptum est: nullus orabit pro eo; sed quis orabit? hoc est quis ille sit qui in tali causa orare possit, quæritur, non excluditur. . . . Singularis vitæ aliquis debet orare pro eo qui peccavit in Dominum: quia quo major culpa, eo majora quærenda sunt suffragia. Non enim quicumque de vulgo pro Judæorum populo sed Moyses rogavit, quando vituli caput, fidei immemores, adoraverunt. Numquid erravit Moyses? At certe quia non erravit, quod rogavit, et meruit, et impetravit.”<sup>4</sup>

(1) L. i. de pœnit. c. iii. n. 10.

(2) L. de agone christiano c. xxxi.

(3) I. Reg. ii. 25.

(4) L. i. pœnit. c. viii.

51. Aliam difficultatem ex Joannis epistola a Novatianis objectam Ambrosius pariter diluit: “Nec illa quæstio vestra quicquam potest adferre ponderis, quam sumitis de epistola Joannis dicentis: ‘Qui scit fratrem suum peccare peccatum non ad mortem, petat, et dabit illi vitam Deus, quia non peccat ad mortem. Est peccatum ad mortem, non de illo dico ut oret.’ Non enim ad Moysen et Hieremiam loquebatur: sed ad populum, qui suorum peccatorum alium precatorem deberet exhibere, cui satis est si pro levioribus delictis Deum precetur, graviorum veniam justorum orationibus reservandam putet. Nam quomodo Joannes diceret non orandum pro delicto graviore, qui legisset Moysen rogasse, et impetrasse, ubi erat prævaricatio voluntaria: qui sciret etiam Hieremiam rogasse?”<sup>1</sup> Hieronymus simplicius dicit: “Cernis, quod si pro peccatis minoribus deprecemur, impetremus veniam; si pro majoribus, difficilis impetratio sit.”<sup>2</sup>

52. Illud Apostoli ad Hebræos testimonium de renovationis post lapsum impossibilitate sic explicat: “Authoritatem aiunt Apostolicæ sibi suffragari sententiæ, allegantes scriptum ad Hebræos: ‘Impossibile est enim hos qui semel illuminati sunt, et gustaverunt donum cæleste, et participes facti sunt Spiritus Sancti, et bonum gustaverunt Dei verbum, virtutesque futuri sæculi; lapsos iterum renovari in pœnitentiam, rursus crucifigentes filium Dei, et ostentatione triumphantes.’ Numquid Paulus adversus factum suum prædicare potuit? Donavit Corinthio peccatum per pœnitentiam: quomodo hic potuit sententiam suam ipse reprehendere? Ergo quia non potuit quod ædificaverat destruere, non contrarium dixisse eum sed diversum advertimus. Quod enim contrarium est, seipsum impugnat: quod diversum est, distinctam solet habere rationem. Ita autem contrarium non est ut alterum suffragetur alteri. Etenim quia de remittenda prædicavit pœnitentia, debuit et de iis qui iterandum putant baptismum non silere: et prius sollicitudinem nobis auferri oportuit ut sciremus etiam post baptismum si qui peccarent donari eis posse peccatum, ne spe veniæ destitutos iterandi baptismatis opinio vana perverteret. Deinde iterandum non esse baptismum, rationabili disputatione suadendum fuit. De baptismo autem dictum verba ipsa declarant, quibus significavit impossibile esse lapsos renovari in pœnitentiam. Per lavacrum enim renovamur, per quod renascimur, sicut ipse Paulus dicit. . . . Quid quod et supra doctrinam baptismorum præmisit? Et quia multa erant baptismata in lege, meritò reprehendit illos, qui perfecta dimittant, et principia verbi requirant. Docet nos scire oportere destructa esse universa legis baptismata; unum baptismum esse in Ecclesia.” . . . Possem quidem etiam illud dicere ei qui hoc de pœnitentia dictum putat, quia quæ impossibilia sunt homini, possi-

(1) L. i. de Pœnit. c. ix.

(2) L. ii. contra Jovinian.

bilia sunt apud Deum.”<sup>1</sup> Quum baptismus a Paulo dicatur lavacrum renovationis, prior illa Ambrosii explicatio, qua iteratio baptismatis excluditur, satis verosimilis est: quod si de qualibet renovatione intelligere placeat testimonium, notum est impossibile aliquando dici quod summe est difficile; et apostatarum a fide, qui ad Iudaismum relabuntur, de quibus Apostolus agit, conversionem esse difficilem, res est explorata.

53. Celebre est testimonium de peccato in Spiritum Sanctum, quod numquam remittatur. Illud objecerunt Novatiani, quibus respondit Ambrosius: “Perlatum est tamen ad nos etiam illud vos objicere solere, quod dicatis scriptum esse. ‘Omne peccatum et blasphemia remittetur hominibus, Spiritus autem blasphemia non remittetur hominibus; et quicumque dixerit verbum contra Filium hominis remittetur ei, qui autem dixerit contra Spiritum Sanctum, non remittetur ei neque in hoc sæculo, neque in futuro. Quo exemplo omnis assertio vestra destruitur, et absolvitur. Scriptum est enim: ‘Omne peccatum et blasphemia remittetur hominibus.’ Cur igitur non remittitis? Cur ligatis vincula quæ non solvitis? Cur nodos nectitis quos non relaxatis? Remittite cæteris, et agite de iis quos peccantes in Spiritum Sanctum evangelica autoritate in perpetuum adstringi putatis. Et tamen quos adstringat consideremus, repetentes superiora lectionis ipsius, et evidentius comprehendamus. Dicebant Judæi: ‘Hic non ejicit dæmonia nisi in Beelzebub principe dæmoniorum.’ Respondit Jesus: ‘Omne regnum divisum contra se destruetur, et omnis civitas vel domus divisa contra se non stabit. Si enim Satanas Satanam ejecit, adversum se divisus est: quando ergo stabit regnum ejus? Quod si ego in Beelzebub ejicio dæmonia, filii vestri in quo ejiciunt? De iis utique expressum videmus, qui Dominum Jesum in Beelzebub ejicere dæmonia loquebantur, quibus sic respondit Dominus, quod Satanæ hæreditas in iis esset qui Satanæ compararent Salvatorem omnium, et in regno diaboli constituebant gratiam Christi. Et ut cognosceremus quia de hac dixit blasphemia, adjunxit: ‘Progenies viperarum, quomodo potestis bona loqui, cum sitis mali?’ Hos ergo qui hæc loquuntur negat ad veniam pertinere. Denique Petrus Simoni qui magicæ artis consuetudine depravatus putasset quod gratiam Christi per impositionem manus, atque infusionem Spiritus Sancti compararet pecunia, ait: ‘Non est tibi pars, neque sors, in hac fide; quia cor tuum non est rectum apud Deum. Pœnitentiam itaque age ab hac nequitia tua, et precare Dominum, si forte remittatur tibi hæc cogitatio cordis tui. In obligatione enim iniquitatis et amaritudinis fellis video te esse.’ Vides quod hunc magica vanitate blasphemantem in Spiritum Sanctum apostolica autoritate condemnet, et eo magis quia puram conscientiam fidei non habebat: et tamen non interclusit ei spem veniæ, quem invitavit ad pœnitentiam? Responsum est igitur a Domino blasphemix

(1) L. ii. de Pœnit. c. ii.

Pharisæorum, et ideo his potestatis suæ gratiam negat, quæ in remissionem peccatorum est, qui cælestem ejus potestatem diabolico fultam suffragio vindicarent. Eos quoque asserit diabolico uti Spîritu, qui separarent Ecclesiam Dei, ut omnium temporum hæreticos et schismaticos comprehenderet, quibus indulgentiam negat. . . . Et ideo revertimini ad Ecclesiam, si qui vos separastis impie: omnibus enim conversis pollicetur veniam, quia scriptum est: ‘Omnis quicumque invocaverit nomen Domini, salvus erit.’ Denique etiam Judæorum populus qui dicebat de Domino Jesu: ‘dæmonium habet:’ qui dicebat: ‘In Beelzebub ejicit dæmonia:’ qui crucifixit Dominum Jesum, Petri prædicatione vocatur ad baptismum, ut sceleris tanti merita deponat.”<sup>1</sup>

54. Ex patrum quæ laudavimus testimoniis liquet controversiam cum Novatianis respexisse remissionem peccatorum, non tantum in foro externo Ecclesiæ, sed etiam vere, et coram Deo: de hac enim Ambrosius manifesto agit. Equidem severior illa pœnitentiæ disciplina quæ per plura sæcula vixit, inducta videtur, ne faciliori veniæ consecutione pœnitentes ad peccandum fierent propensiores, et ut Montanistarum et Novatianorum obviam iretur accusationibus. Concilii Eliberitani episcopi censuerunt ecclesiasticæ communionis jura, ne quidem in mortis discrimine esse quibusdam gravissime delinquentibus concedenda,<sup>2</sup> quibus tamen veniam in foro, uti aiunt, conscientiæ denegatam non possumus nobis persuadere. Meminit Cyprianus quorundam episcoporum, qui “dandam mœchis pacem non putaverunt, et in totum pœnitentiæ locum contra adulteria clauserunt:”<sup>3</sup> quorum tamen decreta ei non fuerunt probata.<sup>4</sup> Ea fuit etiam vetus disciplina, ut nemo pœnitentiæ publicæ stadium iterato posset percurrere: quapropter qui in gravia facinora publica luenda pœnitentia relabebantur, Ecclesiæ communionem non nisi sub mortem iterato donari valuerunt. Eruditorum hominum de his rebus disceptationes nostrum non interest penitus expendere.

55. Generalis Ecclesiæ disciplina qualibet ætate omnibus pœnitentibus veniam et communionem ecclesiasticam post pœnitentiam indulsit. S. Cyprianus ait: “Neminem putamus a fructu satisfactionis et spe pacis arcendum; cum sciamus juxta Scripturarum divinarum fidem, auctore et hortatore ipso Deo, et ad agendam pœnitentiam peccatores redigi, et veniam atque indulgentiam pœnitentibus non denegari.”<sup>5</sup> S. Gregorius Nyssenus statuit: “in hora sui excessus e vita apostata pœnitens sacramenti communionis erit particeps. Sin autem contigerit, ut is præter spem vivat,

(1) L. ii. de Pœn. c. iv.

(2) Can. i.

(3) Ep. lii. ad Antonian.

(4) Ep. liv. ad Corn.

(5) Ep. lii. ad Anton.

in eodem rursus vivet iudicio mysticorum sacramentorum ad vitæ exitum usque pœnitens.”<sup>1</sup> Decrevit concilium Nicænum ; “ De his qui ad exitum veniunt, etiam nunc lex antiqua regularisque servabitur ; ita ut si quis egreditur a corpore, ultimo et maxime necessario viatico minime privetur.”<sup>2</sup>

(1) Ep. ad Letojum Can. ii.

(2) Can. xiii.

## CAPUT III.

## DE CONTRITIONE.

56. Potestas remittendi peccata, quam sacerdotibus vindicavimus, in eos exercenda est qui animo pœnitenti sunt; non enim possunt homines eam exercere, nisi Dei vicibus fungentes, qui peccatoribus non alia lege veniam pollicitus est. “Contritio” prout a Tridentinis patribus definitur, “animi dolor ac detestatio est de peccato commisso, cum proposito non peccandi de cætero.”<sup>1</sup> Consona est hæc definitio iis quæ tradit Gregorius Magnus: “Pœnitentia est mala præterita plangere, et plangenda iterum non committere.”<sup>2</sup> Attritio dicitur illa peccati detestatio, quæ “vel ex turpitudinis peccati consideratione, vel ex gehennæ et pœnarum metu communiter concipitur.”<sup>3</sup> Dolor quicumque seu imperfectus, qualis est *attritio*, seu perfectus, *contritio* stricte dictus, debet a Spiritus Sancti inspiratione proficisci, et ejus niti adjutorio, ut ad justificationem hominem disponat, juxta Tridentinorum patrum decretum: “Si quis dixerit sine præveniente Spiritus Sancti inspiratione atque ejus adjutorio hominem credere, sperare, diligere aut pœnitere posse, sicut oportet, ut ei justificationis gratia conferatur: anathema sit.”<sup>4</sup> *Supernaturalis* igitur oportet ut sit, quoad principium: quamvis aliquando contingat *occasionem* oriri ex re naturali, morbo scilicet, infamia, mortis discrimine. Debet esse *summus*, quatenus peccatum quis super omnia detestetur, et Dei legem omnibus anteponat: quo pacto erit et *universalis*, omnia peccata gravia spectans: “Convertimini ad me in toto corde vestro;” inquit Deus per Joelem.<sup>5</sup> “Si autem impius egerit pœnitentiam ab omnibus peccatis suis, quæ operatus est, et custodierit omnia præcepta mea, et fecerit judicium et justitiam: vita vivet, et non morietur.”<sup>6</sup>

57. Tridentina synodus “docet præterea, etsi Contritionem hanc aliquando charitate perfectam esse contingat, hominemque Deo reconciliare priusquam hoc sacramentum actu suscipiatur, ipsam nihilominus reconciliationem ipsi contritioni sine Sacramenti voto, quod in illa includitur, non

(1) Sess. xiv. cap. iv.

(2) Hom. xxxiv. in Evang.

(3) Sess. xiv. cap. iv.

(4) Sess. vi. can. iii.

(5) Joel II.

(6) Ezech. xviii. 21.



esse adscribendam.”<sup>1</sup> Negarunt Bajus, Iansenius Iprensis, et etiam Estius hominem quantumvis contritum extra sacramentum veniam consequi, nisi in necessitate, vel martyrii occasione.<sup>2</sup> Recentiores nonnulli charitati vehementi et contritioni intensæ veniam ante susceptum sacramentum concedi assensi sunt : quam plerique charitati veræ, licet haud vehementiori, semper tribui putant. “ Omnis qui diligit, ex Deo natus est.”<sup>3</sup> Pulchre Chrysostomus : “ Ubi charitas est, omnia sublata sunt mala.”<sup>4</sup>

58. “ Illam verò contritionem imperfectam, quæ attritio dicitur, quoniam vel ex turpitudinis peccati consideratione, vel ex gehennæ, et pœnarum metu communiter concipitur, si voluntatem peccandi excludat, cum spe veniæ : declarat (*Synodus Tridentina*) non solum non facere hominem hypocritam, et magis peccatorem, verum etiam donum Dei esse, et Spiritus Sancti impulsum, non adhuc quidem inhabitantis, sed tantum moventis quo pœnitens adjutus viam sibi ad justitiam parat. Et quamvis sine sacramento pœnitentiæ per se ad justificationem perducere peccatorem nequeat, tamen eum ad Dei gratiam in sacramento pœnitentiæ impetrandam disponit.”<sup>5</sup> Plures ea de re lati sunt canones : “ Si quis dixerit, gehennæ metum, per quem ad misericordiam Dei de peccatis dolendo confugimus, vel a peccando abstinemus, peccatum esse, aut peccatores peiores facere ; anathema sit.”<sup>6</sup> “ Si quis dixerit, eam contritionem, quæ paratur per discussionem, collectionem, et detestationem peccatorum, qua quis recogitat annos suos in amaritudine animæ suæ, ponderando peccatorum suorum gravitatem, multitudinem, fœditatem, amissionem æternæ beatitudinis, et æternæ damnationis incursum, cum proposito melioris vitæ, non esse verum et utilem dolorem, nec præparare ad gratiam, sed facere hominem hypocritam, et magis peccatorem ; demum illam esse dolorem coactum et non liberum ac voluntarium : anathema sit.”<sup>7</sup> Hi canones Lutheri et aliorum illius sæculi novatorum errores feriunt, qui sectariis plerisque hodiernis adhuc arrident, sed præ cæteris, Jansenianis.<sup>8</sup>

#### PROPOSITIO.

*Contritio quæ paratur per discussionem, collectionem et detestationem peccatorum, ponderando eorum gravitatem, multitudinem, fœditatem, amissionem æternæ beatitudinis, et æternæ damnationis incursum, cum proposito melioris vitæ, est verus et utilis dolor, et præparat ad gratiam.*

(1) Sess. xiv. cap. iv.

(2) Vide prop. Baji lxxi.

(3) 1 Joan. iv. 7.

(4) Hom. vii. in II. ad Tim.

(5) Sess. xiv. cap. iv.

(6) Sess. vi. Can. viii. de Justificatione.

(7) Sess. xiv. can. v.

(8) Vide Prop. lx. lxi. lxii. lxxvii. Quesnelli. et Prop. xv. et xvi. ab Alexandro viii. damnatas.

*Probatur I. ex Scripturis.*

59. Verus est et utilis dolor, qui in sacris scripturis nobis exemplis et præceptis commendatur. Ezechiel ait: "Recogitabo tibi omnes annos meos in amaritudine animæ meæ."<sup>1</sup> David passim plorat peccatorum suorum multitudinem et gravitatem: "iniquitates meæ supergressæ sunt caput meum: et sicut onus grave gravatæ sunt super me."<sup>2</sup> Jeremias populum ad considerandum mala quæ ei evenerunt ob Deum derelictum hortatur: "Arguet te malitia tua, et aversio tua increpabit te. Scito, et vide, quia malum et amarum est reliquisse te Dominum Deum tuum, et non esse timorem mei apud te, dicit Dominus Deus exercituum."<sup>3</sup>

60. Timor divinorum judiciorum passim in Scripturis inculcatur. David orat: "Confige timore tuo carnes meas; a judiciis enim tuis timui."<sup>4</sup> Christus nos monet: "Nolite timere eos qui occidunt corpus, animam autem non possunt occidere; sed potius timete eum qui potest et animam et corpus perdere in gehennam."<sup>5</sup> Joannes metu pœnarum peccatores ad pœnitentiam movit: "Facite ergo fructus dignos pœnitentiæ . . . jam enim securis ad radicem arborum posita est. Omnis ergo arbor non faciens fructum bonum, excidetur, et in ignem mittetur."<sup>6</sup> Paulus ait: "horrendum est incidere in manus Dei viventis." Quum igitur sacri scriptores et ipse Christus Dominus timorem divinorum judiciorum tam sæpe incutere quærant, ut peccatores a peccato avertant, liquet verum et utilem esse dolorem de peccatis sic excitatum.

*Probatur II. Patrum auctoritate.*

61. TERTULLIANUS: "Si de exomologesi retractas, gehennam in corde considera, quam tibi exomologesis extinguit: et pœnæ prius magnitudinem imaginare, ut de remedii adoptione non dubites."<sup>7</sup> S. CHRYSOSTOMUS ait: "Quid gehenna gravius? Sed hujus metu nihil utilius; gehennæ namque timor regni nobis adfert coronam. . . . Nihil enim tantum peccata quidem consumit, virtutem verò crescere facit, et germinare, quantum continui timoris natura. . . . Nisi bonus esset timor, non multos impen-disset Christus sermones et longos, de illa pœna et supplicio loquens."<sup>8</sup> S. AUGUSTINUS: "Ille timor nondum castus præsentiam Domini et pœnas timet. Timore facit quidquid boni facit: non timore amittendi bonum illud, sed timore patiendi illud malum. Non timet ne perdat amplexus pulcherrimi sponsi, sed timet ne mittatur in gehennam. Bonus est iste timor: utilis est."<sup>9</sup>

(1) Isaia xxxviii. 15.

(2) Ps. xxxvii. 5.

(3) Jer. II. 19.

(4) Matt. x. 28.

(5) Luc. iii. 9.

(6) L. de pœnit. c. ix.

(7) Hom. xv. ad pop. Antioch.

(8) In Ps. cxxvii. n. 8.

*Probatur III. ratione theologica.*

62. Verus et utilis dolor ille habendus est qui concipitur ob rationes fide propositas, et qui voluntatem a peccato avertit. Hujusmodi autem est dolor quem vindicamus.

## OBJECTIONES SOLVUNTUR.

63. *Obj. 1.* Timor, ex quo nascitur attritio, est charitati adversus, juxta illud Joannis: “timor non est in charitate, sed perfecta charitas foras mittit timorem, quoniam timor pœnam habet: qui autem timet, non est perfectus in charitate.”<sup>1</sup>

*Resp.* Timor quo pœna tantummodo metuitur, voluntate peccandi manente, est charitati adversus; quem idcirco vocant Theologi *serviliter servilem*. Timor autem *servilis*, quo voluntas peccandi deponitur, nihil habet charitati contrarium, quum potius conveniat in eo quod peccato adversetur: quamvis non nitatur ratione adeo perfecta. Cæterum perfecta charitas abhorret a peccato, absque respectu ad pœnam, quin hunc prorsus excludat, quamvis ita Deum diligens, *filialem* potius metum habeat, filii instar verens ne Deo, amantissimo Patri, displiceat. Id tradit Joannes loco objecto hominem charitate perfecta donatum Deo inservire amore magis quam metu, ille enim huic prævalet, adeo ut solus cor videatur occupare.

64. *Obj. 2.* Timor servilis non est Christi discipulorum: “non enim,” inquit Apostolus, “accepistis spiritum servitutis iterum in timore, sed accepistis spiritum adoptionis filiorum.”<sup>2</sup>

*Resp.* Conditionem fidelium extollit Apostolus, quod Deus nos habeat veluti filios, quum Judæi instar mancipiorum haberentur. Vult igitur ut Spiritu Dei acti tamquam filios Dei nos geramus, quum gratiam acceperimus adoptionis; sed non ideo omnem metum divinorum judiciorum damnat. Profecto ipse Apostolus sæpius monet peccatores eos a regno cœlorum procul futuros, nisi pœnitendo sua luant delicta. “Terra . . . proferens spinas ac tribulos reproba est, et maledicto proxima: cujus consummatio in combustionem.”

65. *Obj. 3.* Apostolus aperte profitetur nihil prodesse sine charitate.<sup>4</sup>

*Resp.* Loquitur Apostolus de merito apud Deum consequendo; et docet nec sacrarum rerum notitiam, nec eleemosynas, nec martyrium ipsum prodesse sine charitate; nemo enim beatitudinem æternam asequi, vel aliquid apud Deum promereri potest, quin ipsum diligat. Non inde sequitur dolorem ex pœnarum metu conceptum malum esse; nam et ille qui ex Apostolici judicii severitate ortus est, quum ad pœnitentiam duxerit Co-

(1) 1 Joan. iv. 18.

(2) Rom. viii. 15.

(3) Heb. vi. 8.

(4) II Cor. v. 10.

rinthium, probatus est : “quæ enim secundum Deum tristitia est, pœnitentiam in salutem stabilem operatur.”

66. *Obj.* 4. Augustinus ait : “Inaniter putat victorem se esse peccati, qui pœnæ timore non peccat ; quia etsi non impletur foris negotium malæ cupiditatis, ipsa tamen mala cupiditas intus est hostis.”<sup>1</sup>

*Resp.* Loquitur Augustinus de eo qui affectum peccandi retinet. Equidem quamdiu quis hunc non deponit, sibi frustra blanditur de peccati victoria.

67. *Obj.* 5. Attritio necessariò includit affectum peccandi, quum enim ideo detestetur peccator quæ admiserit, quia pœnas metuit, convincitur pœnas, non autem peccata, detestari.

*Resp.* Pœnarum intuitu movetur peccator ad peccatum detestandum ; novit enim illud gravissimum esse malum, quum a Deo optimo adeo puniatur. Pœnas igitur metuit ; peccatum verò utpote in se malum et justissime puniendum detestatur.

68. *Obj.* 6. Illa de attritione doctrina totam evertit fidei œconomiam et morum principia.

*Resp.* Sane intellecta nihil habet hæc doctrina quæ non sit maxime moribus et fidei consona : peccator scilicet quem Dei dilectio non tangit, metu judiciorum divinorum a peccato retrahitur, ut postea ad altiora assurgat, et toto animi affectu Deum amplectatur.

69. *Obj.* 7. Peccator attritione motus seipsum magis quam Deum diligit, imo manifestò se Deo anteponit ; abhorret enim a peccato, quia sibi æternorum suppliciorum causa foret, non quia Deo irrogat injuriam. Igitur peccat ipso actu quo peccatum detestari dicitur.

*Resp.* Attritione tactus peccator abhorret a peccato, utpote contra Dei legem, et ideo æternis suppliciis luendo. Non se, nec creatam ullam rem Deo anteponit, sed legem Dei tamquam regulam agendi et sentiendi amplectitur, et omnia spectat relatione habita ad Deum. Ipsa supplicia non tantum in se considerantur, sed prout a Deo justissime infliguntur. Nihil autem est vitii in eo quod quis a suppliciis abhorreat, est enim a Deo animæ nostræ insitus amor ille felicitatis, cui obsequi voluntatem necesse est.

#### ANIMADVERSIONES.

70. Attritionem disponere ad Dei gratiam in sacramento pœnitentiæ impretandam docuerunt patres Tridentini, quin eam sufficere declararint. Fuerunt quidem e scholæ doctoribus qui perfectam contritionem requiri contenderent, ut quis absolutioni sacerdotis recipiendæ foret idoneus ; quorum sententia, licet haud damnata, post concilium Tridentinum obsolevit, Jansenianis tamen plerisque acceptissima. Orta est inter Theologos

(1) Ep. cxlv.

acris satis disceptatio, utrum aliquam Dei dilectionem attritio includere debeat, ut sufficeret justitiæ in sacramento consequendæ. Plurimi affirmarunt, Scripturæ afferentes testimonia : “ qui non diligit manet in morte ; et alia hujusmodi : concilii etiam Tridentini allegantes authoritatem ; nam modum quo præparantur peccatores ad justitiam in baptismo assequendam describens, dicit : “ illum (*Deum*) tamquam omnis justitiæ fontem diligere incipiunt.” Plerique attritionem *formidolosam*, omnis charitatis expertem, sufficere censebant, accedente sacerdotis absolutione ; nam deposita voluntate peccandi, et converso animo ad Deum, licet gehennæ metu, obex omnis potestatis remittendi peccata exercitio sublati illis videbatur. Ne cum charitatis dispendio lis ageretur, vetuit Alexander VII. anno 1667, utriusque sententiæ patronis adversariorum placitis aliquam inurere notam. De hac sententiarum varietate nulla nos tenet sollicitudo, quum apud omnes in confesso sit, neminem posse absolutionis frui beneficio, qui affectum peccandi non deposuerit ; et a confessario omnem adhibendam diligentiam ut pœnitens ad contritionem excitetur. Hoc animadvertendum duximus ut obstruatur os calumniantibus Theologos catholicos et Ecclesiam ipsam ; sunt enim inter novissimos scriptores Anglicanos qui doctrinam de attritione veluti portentum quoddam et monstrum notant.

71. Apud Baptistas, aliosque sectarios, qui, in occidentalibus præsertim provinciis, omni arte student sectatores augere, hominum mulierumque imprimis excitatis phantasiis, præsertim in illis conventibus per plures dies continuatis, in sylvis, (*Camp-meetings* vulgò dictis,) totum reconciliationis negotium peragi censetur, terrore prius incusso, et peccatore ad desperationem fere redacto, qui quum statim conceperit certam fiduciam peccata sua sibi remissa esse, hac sibi blanditur. Hanc persuasionem Lutheri principiis admodum congruam fanatici fœcundam parentem novit quicumque eos inviserit conventus. Quanto melius Tridentini patres dolorem animi de peccato admissio cum proposito non peccandi de cætero, ad peccatorum remissionem exigere docuerunt, anathemate dicto ei qui “ duas tantum esse pœnitentiæ partes, terrores scilicet incussos conscientiæ, agnito peccato, et fidem conceptam ex Evangelio, vel absolutione, qua credit quis sibi per Christum remissa peccata.”<sup>1</sup>

(1) Sess. xiv. can. iv. de Pœnit.

## CAPUT IV.

## DE CONFESSIONE.

72. Judiciaræ quam sacerdotibus vindicavimus potestatis exercitium causæ postulat cognitionem, quæ haberi nequit nisi reo confitente, pleraque enim delicta latent. *Confessio* idcirco est sui accusatio sacerdoti facta tamquam Dei ministro, a peccatore, veniam quærente. Ε'ξομολογήσις a Græcis dicta est, qua tamen voce totam pœnitentiæ disciplinam, cujus pars est præcipua, nonnumquam veteres scriptores complectebantur. *Publica confessio* aliquando fiebat, coram fidelium cœtu, ut sui coram omnibus humiliatione peccator tolleretur quod delinquendo pravum præbuerat exemplum, et Dei iram averteret. *Secreta* autem confessio, *auricularis* dicitur, quia auribus insusurratur sacerdotis.

73. Confessionis necessitatem primus impugnavit Wickleff, cujus error a concilio Constantiensi damnatus est.<sup>1</sup> Petrus de Osma, sæculo decimo quinto, confessionem peccatorum specialem ad Ecclesiæ legem, potius quam ad jus divinum referens, ab Archiepiscopo Toletano, et deinde a Sixto IV. damnatus est. Lutherus aliquando confessionis prædicavit utilitates: “Occulta confessio, quo modo celebratur, miro modo mihi placet, et utilis, imo necessaria est, nec vellem eam non esse, cum sit afflictis conscientiae remedium:”<sup>2</sup> sed pro more mutavit sententiam, et confessionem deinceps designavit cruentissimam carnificinam.<sup>3</sup> Ejus sectatores in Confessione Augustana privatæ confessionis utilitatem agnoverunt,<sup>4</sup> et eam retinendam optarunt, quam Walchius suo tempore adhuc apud suos vigere testatus est.

74. Calvinus negavit juris esse divini confessionem, eam vero antiquissimam esse agnovit: “cujus equidem vetustissimum esse usum fatemur.”<sup>5</sup> Consuluit autem afflicto “non negligere quod illi a Domino offertur remedium: nempe ut ad se sublevandum privata confessione apud suum pastorem utatur.”<sup>6</sup> Carnificinam tamen appellavit quæ apud Catholicos fit specialem omnium peccatorum confessionem.<sup>7</sup>

(1) Sess. vii. prop. vii.

(2) L. de captiv. Babyl. cap. de Pœnit.

(3) Serm. de Pœnit.

(4) Art. xi. apud Walchium introd. l. i. c. iii. §. xxxiv. p. 295.

(5) Inst. l. iii. c. iv. n. 7.

(6) Ibidem n. 12.

(7) Ibidem n. 17.

75. Convocatio cleri Anglicani anno 1536 docuit pœnitentiam perfectam constare contritione, confessione, et vitæ emendatione, cum legum et voluntatis Dei acceptatione.<sup>1</sup> Anglicanum rituale injungit presbyteris, ut periclitantem vita ad specialem peccatorum confessionem, si qua forte teneatur culpa graviore, hortentur;<sup>2</sup> quod tamen omittit rituale Americanum, uti pluries monuimus. Hortatur etiam presbyter ante communionem, ut si quis conscientiam suis conatibus pacare nequeat, ad ministrum accedat, et quo angitur dolorem ei pandat, ministerio verbi divini absolutionis beneficium una cum consiliis salutaribus accepturus.<sup>3</sup> Id etiam in Rituali Americano reperitur, omissa absolutionis mentione.

76. Methodistæ, in regulis quas præscripserunt societatibus quas vocant Band-Societies, quæ duobus, tribus, aut quatuor vere fidelibus constant, seu viris, seu mulieribus, nuptis vel innuptis, dummodo quælibet ejusdem generis personis constet, quamdam commendant confessionem, ut Dei mandato quod scilicet a Jacobo promulgatum intelligunt, obtemperent: “Confitemini ergo alterutrum peccata vestra.” Ex illis quilibet conscientiæ suæ statum exponit, et cæteros deinceps interrogat, qua majori possit diligentia, de suo statu, de peccatis etiam et tentationibus; præsertim quænam patraverint peccata ex quo tempore ultima vice convenerint, vel quid cogitatione, verbo, vel opere admiserint de quo dubitant utrum peccatum sit.<sup>4</sup>

77. *Shakers* peccatorum omnium confessionem sanctis faciendam esse

(1) “Convocation 1536.—‘That perfect penance which Christ requireth, consists of contrition, confession, and amendment of former life, and an obedient reconciliation to the laws and will of God.’ See also the Homilies.” Apud Oxonienses, tract No. 62.

(2) “Here shall the sick person be moved to make a special confession of his sins (if he feel his conscience troubled with any weighty matter).” *The visitation of the Sick*. Episcopus Anglicanus nomine Patrick hac de re monet: “The penitent therefore should be reminded that his confession be as minute and particular as it can; since the more particular the confession is, to be sure, the more sincere and safe the repentance.” In Paley’s Works: *The Clergyman’s Companion*, § iii. Jeremias Taylor examen prolixum conscientiæ suis scriptis inseruit.

(3) “Let him come to me, or to some other discreet and learned minister of God’s holy Word, and open his grief.” *The Communion*.

(4) “Rules of the Band Societies, drawn up Dec. 25, 1738. The design of our meeting is to obey that command of God, ‘Confess your faults, one to another, and pray one for another, that ye may be healed,’ James v. 16. To this end we agree. . . . To desire some person among us to speak his own state first, and then to ask the rest in order, as many and as searching questions as may be, concerning their state, sins, and temptations. . . . What known sins have you committed since our last meeting? . . . What particular temptations have you met with? What have you thought, said or done, of which you doubt whether it be a sin or not?” The doctrines and discipline of the Methodist Episcopal Church, published for the Methodist Episcopal Church at the Conference office, New York, 1836. Ch. ii. section iii. p. 82.



contendunt ad veniam consequendam, sacerdotum autem ministerium nihili faciunt.<sup>1</sup>

78. Concilium Tridentinum hos edidit canones: “ Si quis negaverit, confessionem sacramentalem vel institutam, vel ad salutem necessariam esse jure divino, aut dixerit modum secrete confitendi soli sacerdoti, quem Ecclesia ab initio semper observavit et observat, alienum esse ab institutione et mandato Christi, et inventum esse humanum; anathema sit.”—“ Si quis dixerit in Sacramento pœnitentiæ ad remissionem peccatorum necessarium non esse jure divino confiteri omnia et singula peccata mortalia, quorum memoria cum debita et diligenti præmeditatione habeatur, etiam occulta, et quæ sunt contra duo ultima Decalogi præcepta, et circumstantias quæ peccati speciem mutant; sed eam confessionem tantum esse utilem ad erudiendum, et consolandum pœnitentem, et olim observatam fuisse tantum ad satisfactionem canonicam imponendam, aut dixerit, eos qui omnia peccata confiteri student, nihil relinquere velle divinæ misericordiæ ignoscendum; aut demum non licere confiteri peccata venialia; anathema sit.” “ Si quis dixerit, confessionem omnium peccatorum, qualem Ecclesia servat, esse impossibilem et traditionem humanam a piis abolendam, aut ad eam non teneri omnes et singulos utriusque sexus Christifideles, juxta magni concilii Lateranensis constitutionem, semel in anno, et ob id suadendum esse Christifidelibus, ut non confiteantur tempore Quadragesimæ, anathema sit.”<sup>2</sup>

#### PROPOSITIO.

*Confessio omnium peccatorum mortalium quæ quis post baptismum se patrasse recordatur, jure divino est necessaria.*

*Probatur I. ex Scripturis.*

79. Christus potestatem remittendi peccata Apostolis communicans dixit: “ quorum remiseritis peccata, remittuntur eis; et quorum retinueritis, retenta sunt.”<sup>3</sup> Judices ergo constituti sunt, ut dijudicarent quinam venia forent digni, quibusnam ea deneganda esset. Causæ autem cognitio ad judicium hujusmodi maxime est necessaria, nam quanta fuerit peccatoris pravitas; quænam ex admissis delictis sequantur onera, quibus debet satisfacere; et quæ sit præsens animi voluntas, innotescant oportet, ut æquum proferatur judicium, divina sanctione roborandum. Hæc autem omnia ex pœnitentis confessione discenda sunt, pleraque enim delicta patrantur remotis arbitris; et etiam intra animum plurima continentur, solo desiderio concepta. Pœnitentis animus ad reparandum damnum, et ad occasiones

(1) “ In order to obtain a final forgiveness, an honest and full confession of every sin, in the order of God, will for ever be indispensably necessary, while one sin remains concealed in the earth.” The testimony of Christ’s second appearing, p. viii. ch. iv.

(2) Sess. xiv. can. vi. et vii. de Pœnit.

(3) Joan. xx. 23.



peccandi in posterum declinandas pariter explorandus est. Ergo vi illius potestatis Apostoli, et qui hac in re eorum ministerio funguntur, eorum scrutari debent conscientias qui veniam peccatorum petunt: omnes autem petere tenentur, statuto enim divinitus tribunali, ad eas causæ deferantur necesse est, ne frustra potestas data habeatur.

Idem argumentum ex promissione de ligandi solvendique potestate efflorescit.

*Probatur II. ex Patribus.*

80. S. CLEMENS ROMANUS, in secunda ad Corinthios epistola, quæ quidem non ea qua prima gaudet auctoritate, sed haud omni caret, dicit: “ Quamdiu sumus in hoc mundo, de malis quæ in carne gessimus, ex toto corde resipiscamus, ut a Domino salvemur, dum habemus tempus pœnitentiæ. Postquam enim e mundo exivimus, non amplius possumus ibi confiteri, aut pœnitentiam adhuc agere.” — *μετὰ γὰρ τὸ ἐξελθεῖν ἡμᾶς ἐκ τοῦ κόσμου, ἐκ ἐκείνης τῆς δυνάμεως ἐκεῖ ἐξομολογήσασθαι ἢ μετανοῆν ἐτι.*<sup>1</sup>

81. S. IRENÆUS de Marco quodam refert: “ Adhuc etiam et amatoris et adlectantia efficit, ut et corporibus ipsarum contumeliam irroget, hic idem Marcus quibusdam mulieribus, licet non universis. Hæ sæpissime conversæ ad Ecclesiam Dei CONFESSÆ SUNT, et secundum corpus exterminatas se ab eo, et velut cupidine inflammatas valde illum dilexisse.”<sup>2</sup> S. Epiphanius idem referens utitur voce *ἐξομολογήσαντο*.<sup>3</sup> Ergo viguit tunc confessio peccatorum etiam occultorum, nam nonnisi ex mulierum confessione flagitia illa innotuerunt. Verosimile autem est eas ad majorem sui humiliationem et ad hæretici hominis progressus impediendos privatæ delictorum confessioni publicam adjecisse.

82. TERTULLIANUS confessionem veluti pœnitentiæ partem et veniæ conditionem commendat; “ Tantum revelat confessio delictum, quantum dissimulatio exaggerat: confessio enim satisfactionis consilium est, dissimulatio contumaciæ. . . . Is actus qui magis Græco vocabulo exprimitur et frequentatur *exomologesis* est, qua delictum Domino nostrum confitemur, non quidem ut ignaro, sed quatenus satisfactio confessione disponitur, confessione pœnitentia nascitur, pœnitentia Deus mitigatur. Itaque exomologesis prosternendi et humilificandi hominis disciplina est, conversationem injungens misericordiæ illicem. De ipso quoque habitu atque victu mandat, sacco et cineri incubare, corpus sordibus obscurare, animum mæroribus dejicere, illa quæ peccavit tristi tractatione mutare: cæterum pastum et potum pura nosse, non ventris scilicet, sed animæ causa; plerumque verò jejuniis preces alere, ingemiscere, lachrymari, et

(1) Edita est hæc epistola cum altera an. 1677 Oxoniæ in Theatro Sheldoniano. Eam commemoravit in hist. Eccl. l. iii. c. 38 Eusebius, quamvis paræ auctoritatis, ac prima, eam non esse dixerit.

(2) L. i. adv. hæ. c. ix.

(3) Hær. xxxiv.

mugire dies noctesque ad Dominum Deum tuum, PRESBYTERIS ADVOLVI, et aris Dei adgeniculari, omnibus fratribus legationes deprecationis suæ injungere. Hæc omnia exomologesis, ut pœnitentiam commendet, ut de periculi timore Dominum honoret, ut in peccatorem ipsa pronuncians pro Dei indignatione fungatur, et temporali afflictatione æterna supplicia non dicam frustretur, sed expungat. Cum igitur provolvit hominem, magis relevat; cum squalidum facit, magis mundatum reddit: cum accusat, excusat; cum condemnat absolvit. In quantum non peperceris tibi, in tantum tibi Deus, credo, parcat. Plerosque tamen hoc opus ut publicationem sui aut suffugere, aut de die in diem differre, præsumo, pudoris magis memores quam salutis: velut illi qui in partibus verecundioribus corporis contracta vexatione, conscientiam medentium vitant, et ita cum erubescencia sua pereunt. Intolerandum scilicet pudori, Domino offenso satisfacere, saluti productæ reformari. Næ tu verecundia bonus, ad delinquendum expandens frontem, ad deprecandum vero subducens. . . . Grande plane emolumentum verecundiæ occultatio delicti pollicetur: videlicet si quid humanæ notitiæ subduxerimus, proinde et Deum celabimus? Adeone existimatio hominum et Dei conscientia comparantur? An melius est damnatum latere, quam palam absolvi? . . . Si de exomologesi retractas, gehennam in corde considera, quam tibi exomologesis extinguit: et pœnæ prius magnitudinem imaginare, ut de remedii adoptione non dubites . . . . Igitur cum scias adversus gehennam, post prima illa intinctionis Dominicæ monimenta, esse adhuc in exomologesi secunda subsidia, cur salutem tuam deseris? cur cessas aggredi quod scias mederi tibi? . . . . Peccator restituendo sibi institutam a Domino exomologesin sciens, præteribit illam, quæ Babylonium regem in regna restituit?"<sup>1</sup>

83. Tertullianum exomologesis nomine totam pœnitentiæ disciplinam complecti liquet, a præcipua parte tota appellata. Confessio, et quidem homini facta, clarissimis verbis statuitur: "revelat confessio delictum," "confessione pœnitentia nascitur;" inde fit peccatorem "presbyteris Dei advolvi:" "cum accusat, excusat; cum condemnat, absolvit." Occulta delicta respicit, ideoque malus pudor reprobatur. Quod autem publicationem sui refugere dicantur, qui confiteri differunt, de revelatione soli sacerdoti facta recte intelligitur. Equidem Tertulliani verba de quadam confessione, seu publica, seu privata, necessario explicanda sunt: at publicæ confessioni non conveniunt quæ dicit, nempe eam esse a Domino institutam, et tantæ necessitatis ut non alia ratione gehenna extinguatur.

84. ORIGENES, respondens objectioni unam esse apud Christianos peccatorum veniam, quia baptismum iterato suscipere non licet, dicit, martyrio, eleemosyna, injuriarum condonatione, peccatorum conversione, et charitatis abundantia veniam impetrari, deinceps pergit. "Est adhuc et septima, licet dura et laboriosa, per pœnitentiam remissio peccatorum,

(1) L. de pœnit. c. ix.

cum lavat peccator in lacrymis stratum suum, et fiunt ei lacrymæ suæ panes die ac nocte, et cum **NON ERUBESCIT SACERDOTI DOMINI INDICARE PECCATUM SUUM**, et quærere medicinam, secundum eum qui ait : ‘ Dixit, pronuntiabo adversum me injustitiam meam Domino, et tu remisisti impietatem cordis mei.’ In quo impletur et illud, quod Jacobus Apostolus dicit : ‘ Si quis autem infirmatur, vocet presbyteros Ecclesiæ, et imponent ei manus, ungentes eum oleo in nomine Domini, et oratio fidei salvabit infirmum, et si in peccatis fuerit, remittentur ei.’<sup>1</sup> Confessio igitur qua quis sacerdoti Domini indicat peccatum suum, quærens animæ medicinam, est ratio veniam consequendi. Quod Origenes eam cum unctione infirmorum conjunxerit, contigit quia Apostolus ea occasione dixit : “ Confitemini ergo alterutrum peccata vestra.”<sup>2</sup>

85. Omnia publicanda, etiam quæ cogitatione sola deliquimus, dicit ut accusatorem diabolum præveniamus : “ Si quid in occulto gerimus, si quid in sermone solo, vel etiam intra cogitationum secreta commisimus, cuncta necesse est publicari, cuncta proferri. . . . Tu ergo, inquit, dic prior, ne te ille præveniat : quia si prior dixeris, et sacrificium pœnitentiæ obtuleris . . . et tradideris carnem tuam in interitum, ut spiritus salvus fiat in die Domini, dicetur et tibi, quia percepisti et tu in vita tua mala, nunc vero hic requiesce. Sed et David eodem spiritu loquitur in Psalmis, et dicit : ‘ Iniquitatem meam notam feci, et peccatum meum non cooperui. Dixi, pronuntiabo adversum me injustitiam meam, et tu remisisti impietatem cordis mei.’ Vide ergo quia pronunciare peccatum, remissionem peccati meretur.”<sup>3</sup> Hæc adstruunt necessitatem confitendi, quæ quum de publica coram omnibus confessione non potest affirmari, ad confessionem qua peccator *non erubescit sacerdoti Domini indicare peccatum suum* referenda plane est.

86. Peccatorem comparat homini male se habenti, qui stomacho gravatur : “ Vide ergo quid edocet nos Scriptura divina, quia oportet peccatum non celare intrinsecus. . . . . Tantummodo circumspice diligentius cui debeas confiteri peccatum tuum : proba prius medicum, cui debeas causam languoris exponere, qui sciat infirmari cum infirmante, flere cum flente, qui condolendi et compatiendi noverit disciplinam ; ut ita demum si quid ille dixerit, qui se prius et eruditum medicum ostenderit et misericordem, si quid consilii dederit, facias et sequaris. Si intellexerit et præviderit talem esse languorem tuum, qui in conventu totius Ecclesiæ exponi debeat et curari, ex quo fortassis et cæteri ædificari poterunt, et tu ipse facile sanari, multa hoc deliberatione, et satis perito medici illius consilio procurandum est.”<sup>4</sup> Confessionem publicam a privata clare distinguit,

(1) Hom. II. in Levit. n. 4.

(2) Jac. v. 16.

(3) Hom. III. in Levit. n. 4.

(4) Hom. II. in Ps. xxxvii.

hancque adstruit necessariam ; illam e confessarii judicio prudenti pendere docet.

87. S. CYPRIANUS de lapsis agens dicit. “ Videt ille (*Deus*) corda et pectora singulorum, et judicaturus est non tantum de factis, sed et de verbis, et de cogitationibus nostris ; omnium mentes voluntatesque conceptas in ipsis adhuc clausi pectoris latebris intuetur. Denique quanto et fide majores et timore meliores sunt, qui quamvis nullo sacrificii, aut libelli<sup>1</sup> facinore constricti, *quoniam tamen de hoc cogitaverunt, hoc ipsum apud sacerdotes Dei dolenter et simpliciter confitentes, exomologesin conscientiae faciunt*, animi sui pondus exponunt, salutarem medelam, parvis licet et modicis vulneribus exquirunt ; scientes scriptum esse : Deus non deridetur. . . . . Confiteantur singuli, quaeso vos fratres dilectissimi, delictum suum, dum adhuc qui deliquit in saeculo est, dum admitti confessio ejus potest, dum satisfactio et remissio facta per sacerdotes apud Dominum grata est.”<sup>2</sup> Patet confessionem apud Sacerdotes peccatorum etiam cogitatione admissorum a Cypriano commendari et inculcari ad remissionem peccatorum assequendam. Quod autem de cogitatione idololatrii cultus loquatur, contigit quia de lapsis in persecutione scribebat ; sed de aliis omnibus peccatis gravibus valet quam adducit ratio, quod scilicet Deus omnium mentes intueatur, judicaturus ipsas cogitationes. Privata igitur apud sacerdotes fiebat tunc confessio, et remissio per hos facta apud Dominum grata credebatur.

88. LACTANTIUS circumcisionem symbolum quoddam et typum poenitentiae esse docet. “ Volens enim (*Deus*) vitae ac salutis nostrae pro aeterna sua pietate consulere, poenitentiam nobis in illa circumcisione proposuit : ut si cor nudaverimus, id est, si PECCATA NOSTRA CONFESSI satis Deo fecerimus, veniam consequamur, quae contumacibus et admissa sua celantibus denegatur ab eo qui non faciem, sicut homo, sed intima et arcana pectoris intuetur.”<sup>3</sup> Hanc peccatorum confessionem fieri homini liquet, neque enim de privata sui coram Deo humiliatione verbis tam amplis dicendum foret. Eam autem respicere omnia peccata, etiam occulta, pariter manifestum est, quum nullum fiat discrimen, et cor nudandum dicatur. Ejus necessitas tanta est, ut venia admissa sua celantibus denegetur. Nihil est quod suadeat de confessione coram coetu fidelium agi : quam sane nemo dixerit tantae necessitatis. Hanc verae Ecclesiae notam adsignat, qua scilicet a Novatianis, eo tempore grassantibus discernebatur, quod omnium peccatorum vulneribus poenitentiae et confessionis remedia suppeditaret : “ Sed quia singuli quique coetus haereticorum se potissimum christianos esse, et suam Catholicam Ecclesiam putant, sciendum est, illam esse ve-

(1) ‘ Facinus libelli ’ dicebatur eorum crimen qui testimonium cultus idololatrii praestiti a magistratibus mercabantur, quin idola ipsi colerent.

(2) L. de lapsis.

(3) Inst. l. iv., c. xvii.

ram in qua est confessio et pœnitentia, quæ peccata et vulnera, quibus subjecta est imbecillitas carnis, salubriter curat.”<sup>1</sup> Viderint sectæ quo discrimine a vera Christi Ecclesia distinguantur.

89. S. EPHREM SYRUS, post peccata enumerata ait: “ Si te devictum in hoc senseris, festina sanitatem recipere, et statue custodiam in corde tuo, et per confessionem a spiritali patre et a medico quære medelam, ne rursum eadem patiaris.”<sup>2</sup>

90. S. BASILIUS ait: “ Omnino in peccatorum confessione eadem ratio est, quæ etiam in apertione vitiorum corporis. Ut igitur vitia corporis nequaquam quibusvis homines temere aperiunt, sed iis tantummodo qui rationem qua ea curanda sint teneant, eodem modo etiam peccatorum confessio fieri debet apud eos videlicet, qui ea possunt curare.”—ὄντω καὶ ἡ εξαγόρευσις τῶν ἀμαρτημάτων γίνεσθαι ὀφείλει ἐπὶ τῶν δυναμένων θεραπεύειν.<sup>3</sup> Alias dicit: “ Necessariò iis peccata aperiri debent, quibus credita est dispensatio mysteriorum Dei.” ἀναγκαῖον τοῖς πεπιστευμένοις τὴν οἰκονομίαν τῶν μυστηρίων τοῦ Θεοῦ ἐξομολογῆσαι τὰ ἀμάρτηματα.<sup>4</sup> Unicuique e populo peccati reo confessionem necessariam esse tradit, præsertim gravius peccantibus: “ Magnum est et grave peccatum? Multa opus habes CONFESSIONE, lacrymis amarulentis—πολλῆς σοι χρεῖα τῆς ἐξομολογήσεως.<sup>5</sup>

91. S. GREGORIUS NYSSENUS hortatur peccatorem ad fiduciam in sacerdote, ut ei detegat peccata: “ Quam ob rem major tibi in eum fiducia sit, qui te in Deo genuit, quam in illis a quibus corpore procreatus es. Audacter ostende illi quæ sunt recondita. Animi arcana tamquam occulta vulnera medico detege. Ipse et honoris et valetudinis tuæ rationem habebit.”<sup>6</sup> Et alias: “ Qui autem latenti ablatione sibi alienum usurpat, si deinde per declarationem peccatum suum sacerdoti aperuerit, vitii studio in contrarium mutato, ægritudinem curabit.”<sup>7</sup>

92. S. AMBROSIIUS ait: “ Nonnulli ideo poscunt pœnitentiam, ut statim sibi reddi communionem velint. Hi non tam se solvere cupiunt, quam sacerdotem ligare. Suam enim conscientiam non exuunt; sacerdotis induunt. Præceptum est: Nolite sanctum dare canibus.”<sup>8</sup> Arguit eos qui post confessionem negligunt obire pœnitentiæ publica munia, quibus Deo satisfaciant: “ An quisquam ferat, ut erubescas Deum rogare, qui non erubescis rogare hominem? Et pudeat te Deo supplicare quem non lates, cum te non pudeat peccata tua homini, quem lates, confiteri?”<sup>9</sup> Dicit

(1) Inst. l. iv., c. xxx.

(2) L. i. Admonit, de compunctione cordis.

(3) In Reg. brev. resp. ad qu. 229.

(4) Ibidem resp. ad qu. 288.

(5) Hom. in hæc verba: *Attende tibi ipsi.*

(6) Orat. in eos qui alios acerbè judicant.

(7) Ep. ad Letojum.

(8) L. ii., de Pœnit, c. ix.

(9) Ibidem, c. x.

etiam : “ Si vis justificari, fatere delictum tuum : solvit enim criminum nexus verecunda confessio peccatorum. . . . Vides qua remissionis pollicitatione te provocet ad confitendum.”<sup>1</sup> Confessionis homini, scilicet sacerdoti, faciendæ vim et necessitatem hæc plane ostendunt.

93. S. PACIANUS : “ Vos ergo primum appello, fratres, qui criminibus admissis pœnitentiam recusatis : vos, inquam, post impudentiam tumidos, post peccata verecundos, qui peccare non erubescitis, et erubescitis confiteri : qui cum mala conscientia Dei sancta contingitis, et altare Domini non timetis. . . . Ecce iterum Apostolus ad sacerdotem : ‘ Manus citò nulli imponas, nec communicaveris peccatis alienis.’ Quid facies tu qui decipis sacerdotem ? qui aut ignorantem fallis, aut non ad plenum scientem, probandi difficultate confundis ? . . . . Rogo vos, fratres, etiam pro periculo meo, per illum Dominum quem occulta non fallunt, desinite vulneratam tegere conscientiam.”<sup>2</sup> De confessione occultorum delictorum sacerdotibus facienda agit, nam Deus per sacerdotes pœnitentibus ignoscere dicit.

94. S. JOANNES CHRYSOSTOMUS, sub finem Quadragesimalis jejunii populum Antiochenum sic allocutus est : “ Quemadmodum naücleri, et cursores, et athletæ, ubi ad finem veniunt, magis enituntur et vigilant, eodem modo et nos facere oportet : quia in magnam hanc hebdomadam pervenimus Dei gratia, nunc maxime et jejunii cursus intendendus, et magis continuandæ sunt preces, FACIENDAQUE DILIGENS ET PURA PECCATORUM CONFESSIO.”<sup>3</sup>—πολλὴν καὶ ἀκριβὴ τὴν ἐξομολόγησιν τῶν ἡμαρτημένων ἐπιδείξασθαι.—Hæc de confessione a singulis communioni paschali præmittenda intelligenda sunt ; quod enim pertinet ad publicam confessionem, jam ab initio Quadragesimæ peracta erat. Alias dicit : “ Qui homini detegere peccata erubescit, Deo verò cernente facere non erubescit, neque confiteri vult, et pœnitentiam agere, in die illa, non coram uno vel duobus, sed universo terrarum orbe spectante traducetur.”<sup>4</sup>—ὁ γὰρ ἐπὶ σκηνωμένος ἀνδρῶν ἀποκαλύψαι τὰ ἡμαρτήματα· Θεοῦ δὲ ὁρῶντος μὴ ἀνδρῶν πραξαι, μηδὲ δέλων ὁμολογῆσαι καὶ μετανοῆσαι ἐν ἐκείνῃ τῇ ἡμέρᾳ ἐκ ἐνώπιον ἑνὸς καὶ δύο, ἀλλὰ τῆς διακεμένης ἀπάσης ὁρώσης παραδειγματίζεται.—Alias post explicata Pauli ad Hebræos verba de renovatione iterata per baptismum impossibili, ait : “ Annon priusquam didicissetis, quod per pœnitentiam ablui possunt peccata, eratis anxii, ut qui sciretis non esse aliud lavacrum, et de vobis spem abjeceratis ? Tunc autem cum ea didiceritis, per quæ recte agitur pœnitentia et remissio, et quod omnia poterimus effugere, si ea utamur, ut oportet, quamnam assequamur veniam, si ne in mentem quidem nobis veniant nostra peccata ? Nam si hoc esset, omnia essent confecta. Nam sicut qui ostium est ingressus, est intus : sic

(1) L. ii. de Pœnit. c. vi.

(2) Parœnesi ad pœnit.

(3) Hom. xxx. in Genes.

(4) Orat. de muliere Samaritana.

qui propria mala cogitat ac supputat, omnino venit ad eorum curationem. Si autem dicit: sum peccator; ea autem per species non cogitat ac supputat, et non dicit: Hoc et illud peccatum admisi, numquam cessabit, semper quidem confitens, curam autem nullam gerens correctionis.<sup>1</sup>

95. S. HIERONYMUS: "Si quæm aspersus diabolus occultis morderit, et nullo consilio, cum peccati veneno infecerit; si tacerit qui periculosus est, et non egerit poenitentiam, nec vulnus suum fratri et magistro voluerit confiteri. Magister qui linguam habet ad curandum, facile ei prodere non poterit. Si enim erubescat agrotus vulnus medico confiteri, quod ignorat medicina non curat." "Alligat vel solvit episcopus et presbyter, non eos qui insonites sunt vel noxii, sed pro officio suo, cum peccatorum audierit varietates, scit qui ligandus sit, quive solvendus."<sup>2</sup>

96. S. AUGUSTINUS ait: "Conscientia tua seniem collegorat, apertum tuncerat, cruciabat te, requiescere non sinebat: adhibet medicum senientis verborum, et aliquando sanat; adhibet medicinale ferrum in corruptione tribulationis. Tu agnosce medici manum: CONFITERE, exeat in confessione, et defluat omnis sanies."<sup>3</sup> Alias dicit: "Implentur igitur tam mortiferorum vinculis peccatorum . . . veniat ad antistites, per quos illi in Ecclesia claves ministrantur: et tanquam bonus jam incipiens filius, maternorum membrorum ordine custedito, a præpositis sacramentorum accipiat satisfactionis suæ modum: ut in offerendo sacrificio cordis contribulati devotus et supplex, id tamen agat quod non solum ipse proit ad recipiendam salutem, sed etiam cæteris ad exemplum. Ut si peccatum ejus, non solum in gravi ejus malo, sed etiam in tanto scandalo aliorum est, atque hoc expedire utilitati Ecclesiæ videtur antistiti, in notitia multorum, vel etiam totius plebis agere poenitentiam non recuset, non resistat, non lethali et mortiferæ plagæ per pudorem addat tumorem."<sup>4</sup> Liqueat igitur peccata necessario deferenda ad Ecclesiæ antistites, per quos claves ministrantur, publicam autem poenitentiam ex eorum pendere iudicio.

97. S. LEO MAGNUS ad episcopos Campaniæ scribit: "Illam etiam contra apostolicam regulam præsumptionem, quam nuper agnovi a quibusdam illicita usurpatione committi, modis omnibus constituo submoveri: ne videlicet de singulorum peccatorum genere, libello scripta professio publicetur: cum reatus conscientiam sufficiat solis sacerdotibus indicari confessione secreta."<sup>5</sup>

98. S. GREGORIUS MAGNUS explicat quomodo potestas a Christo data exercenda sit: "Causæ ergo pensandæ sunt, et tunc ligandi atque solvendi potestas exercenda. Videndum est quæ culpa præcessit, aut quæ sit

(1) Hom. ix. c. vi. Heb.

(2) Comm. in c. xvi. Mat.

(3) Enarr. in Ps. lxvi. n. 7.

(4) Serm. cccli. alias l. c. 4.

(5) Ep. cxxxvi. alias lxxx.



pœnitentia secuta post culpam, ut quos omnipotens Deus per compunctionis gratiam visitat, illos pastoris sententia absolvat. Tunc enim vera est absolutio præsidentis, cum æterni arbitrium sequitur iudicis.”—“Lazaro ergo dicitur: Veni foras: ac si aperte cuilibet mortuo in culpa diceretur: Cur reatum tuum intra conscientiam abscondis? Foras jam per confessionem egredere, qui apud te interius per negationem lates. Veniat itaque foras mortuus, id est culpam confiteatur peccator. Venientem foras solvant discipuli, ut pastores Ecclesiæ ei pœnam debeant amovere quam meruit, qui non erubuit confiteri quod fecit.”<sup>4</sup>

*Probatur III. conciliorum auctoritate.*

99. CONCILIUM LAODICENUM decrevit: “De his qui diversis facinoribus peccaverunt, et perseverantes in oratione confessionis et pœnitentiæ—προσκαρτερουντὰς τῇ προσευχῇ τῆς ἱξομολογησεως καὶ μετανοιας—conversionem a malis habuere perfectam, pro qualitate delicti, talibus post pœnitentiæ tempus impensum, [propter clementiam et bonitatem Dei] communio concedatur.”<sup>3</sup>

100. CONCILIUM CABILONENSE I. anno 650: “De pœnitentia verò peccatorum, quæ est medela animæ, utilem esse hominibus censemur: et ut pœnitentibus a sacerdotibus data confessione indicatur pœnitentia, universitas sacerdotum noscitur consentire.”<sup>3</sup>

101. TRULLANA SYNODUS anno 692: “Oportet autem eos, qui solvendi et ligandi potestatem a Deo accepere, peccati qualitatem considerare, et ejus qui peccavit ad conversionem promptum studium, et sic morbo convenientem afferre medicinam.”<sup>4</sup>

102. TURONENSE III. CONCILIUM anno 813 docet: “episcopis et presbyteris diligenti cautela pertractandum est, qualiter hominibus sua sibi delicta confitentibus tempus abstinendi adscribant, ut juxta modum peccati pœnitentibus abstinentia indicatur: quoniam varie ab aliquibus sacerdotibus et indiscrete hæc judicia proferuntur. Ideo necessarium videbatur nobis, cum omnes episcopi ad sacrum palatium congregati fuerint, ab eis edoceri, cujus antiquorum liber pœnitentialis potissimum sit sequendus.”<sup>5</sup>

Concilium Cabilonense II. et Rhemense eodem anno habita, et Wormatiense anno 868 videre etiam licet.

*Probatur IV. ex veteribus libris pœnitentialibus.*

103. Extat liber pœnitentialis Joannis jejunatoris, patriarchæ Constantinopolitani, sub finem sæculi sexti, quem ex codice manuscripto quingentorum annorum vetustatis descripsit ante duo fere sæcula Joannes Morinus. In eo sacerdos sic alloquitur pœnitentem: “Spiritualis fili, ego confes-

(1) Hom. xxvi. in Evang.

(2) Can. ii.

(3) Can. viii.

(4) Can. cii.

(5) Can. xxii.



sionem tuam primario ac præcipue non recipio, nec tibi absolutionem concedo, sed per me Deus . . . . Revela igitur et declara coram sanctis angelis, nihilque me cæla eorum, quæ a te clam facta sunt, velut si Deo occulta cordium cognoscenti confitereris, et ipse occultorum cognitor delebit omnia quæ revelaveris. . . . Licet enim hoc pudendum et probrosum tibi videatur opera probris et pudori obnoxia revelare; attamen eximie et accurate tibi persuasum esto, per præsentem pudorem te a futuro liberari, et mandatis obediendo, non modo indulgentia, sed etiam coronis te dignum fieri.” Ipsi deinceps “mansueta et serena voce dicit: Quomodo frater vel soror primum virginitas tua corrupta est? Per fornicationem, vel legitimum matrimonium, vel per molliem, aut aliquid eorum quæ sunt contra naturam. Consistentem vero et dicentem sic et sic, iterum ipsum interrogat, in quot mulieres inciderit, antequam uxorem duceret: Num aliquæ earum essent ancillæ, quantæ viduæ, et quantæ nuptæ? . . . Hæc imprimis confessorem oportet interrogare confitentem: in universum simul in quotas incidit. Ante enim omnia numerus quæritur, et personarum differentia.” Ταῦτα ἐν πρώτοις χρεὶ τὸν τὰς ἐξομολογήσεις ἀναδεχόμενον ἐρωτᾷ τὸν ἐξομολογούμενον καὶ τὸ ὅλον εἰς πόσας ὁμοῦ περιέπεσε. προ πάντων γὰρ ὁ ἀριθμὸς ζητεῖται, καὶ ἡ τῶν προσώπων διαφορά.<sup>1</sup>

104. Egbertus, Eboracensis Archiepiscopus, anno circiter 731 creatus, librum pœnitentialem exceptum e canonibus catholicorum patrum edidit, quem ex codice sexcentos annos ætate superante descripsit suo tempore Morinus. In eo pœnitens dicit: “Nimis peccavi in cogitationibus nefandissimis, delectando eis, et consentiendo illis, et meditando atque disponendo in sensu et in memoria, atque voluntate mea, qualiter explere potuissem opera quæ male cogitabam.”<sup>2</sup> Plures alias confessionis formulas continet ille liber, inter quas sacerdotis confessio habetur. De ipso munere confessiones audiendi: “Peccavi de illis pœnitentibus, qui ad me propter confessionem venerunt, quos ego nec secundum legem admonui, nec sollicitus fui de illis, sicut debui.”<sup>3</sup>

*Probatur V. exemplis.*

105. Socrates celebrem rem gestam tempore Nectarii patriarchæ Constantinopolitani refert singulorum post baptismum patratorum a muliere confessionem apud presbyterum pœnitentiarium peractam; κατὰ μέρος ἐξομολογεῖται τὰς ἁμαρτίας, ἃς ἐπεπράχει μετὰ τὸ βάπτισμα.<sup>4</sup> “Sigillatim confitetur peccata quæ admiserat post baptismum.” Erat ergo mos singula peccata sacerdoti confitendi. De S. Ambrosio narrat Paulinus diaconus. “Quotiescumque illi aliquis ob percipiendam pœnitentiam lapsus suos confessus

(1) Apud Morinum in calce operis: *Commentarius Historicus de disciplina in administratione Sacramenti Pœnitentiæ* p. 79.

(2) In calce Comm. p. 13.

(3) Ibidem p. 14.

(4) L. v. hist. c. xix.

esset, ita flebat, ut et flere illum compelleret: videbatur enim sibi cum jacente jacere.”<sup>1</sup> S. Audoenus, Rothomagensis episcopus, sæculo septimo, in vita S. Eligii Noviomensis episcopi, narrat: “Cum jam Eligius virilem ageret ætatem, cupiens se vas Deo exhibere sanctificatum, et metuens ne aliqua suum delicta pectus frustrarent, omnia ab adolescentia sua coram sacerdote confessus est acta.”<sup>2</sup> In actis sanctorum ordinis S. Benedicti ab anno 700 ad annum 800, ostendit Mabillonius rem perquam communem fuisse ea ætate ut principibus viris essent confessarii. Martinus monachus Corbejensis Caroli Martelli excipiebat confessiones. S. Ausbertus Theodorici III. Franciæ regis peccata in sacro tribunali audiebat. Theodorus Studites in vita S. Platonis scribit: “Quod laudabilius est, occultas mentis cogitationes, et acta cuidam eorum qui præerant, confitebatur: quæ res magnum religionis illius erat indicium. Idque cum perfecte facere solitus esset, qui confessionem ipsius audiebat admirationem ac stuporem afferebat.” Wilhelmus Malmesburiensis laudat milites Normannos, “quod tota nocte confessioni peccatorum vacantes, Dominico corpori communicaverint, antequam pugnam cum Anglis inirent.”<sup>3</sup> In concilio œcumenico Constantinopolitano IV., anno 870, legati pontificis Hadriani II. Theodorum Protospatharium interrogaverunt: “Fecisti confessionem, et accepisti pœnas de peccato illo pœnitens? Theodorus dixit: Etiam. Vicarii dixerunt. Cui confessus es? Theodorus dixit: Nescio, defunctus est: id tantum scio, quia chartularius et monachus qui quadraginta annos habitarat in columna: meum illi scelus confessus sum, a quo pœnam septennii irrogatam accepi, quam adhuc hodie subeo.”<sup>4</sup> S. Petrus Damiani refert Agnetem Augustam, Henrici IV. matrem, Romæ ante aram Principis Apostolorum, confessionem generalem peregissee: “Per lugubres gemitus et amara suspiria, ab ipsa quinquennii infantia quidquid subtile vel minimum potuit in visceribus titillare, quidquid in cogitationibus vanum, quidquid subrepere potuit in sermone superfluum, fidelibus relationibus evoluit.”<sup>5</sup>

*Probatur VI. ex Orientalium sectarum consensione.*

106. Notum est confessionem apud Græcos fieri, quod liquet ex responsione prima Hieremiæ patriarchæ Constantinopolitani ad Lutheranos, et ex confessione orthodoxa a quatuor patriarchis edita. Apud Syros etiam viget testante Nairono.<sup>6</sup> Sic apud cæteras plerasque sectas Orientis, quamvis apud aliquas non sit adeo frequens ejus usus. Ejus origo pro-

(5) In vita S. Ambrosii.

(2) In vita S. Eligii c. vii.

(3) L. iii. de gestis Anglorum c. xv.

(4) Conc. Const. act. ix.

(5) In opusculo lvi.

(6) Euoplia p. 195.

inde est prior qualibet secta, et merito recensetur inter pristina instituta ab Apostolis commendata, et a Christo ipso profecta.

*Probatur VII. præscriptione.*

107. Ubique per Ecclesiam obtinet confitendi lex et consuetudo, nec auctor, nec tempus originis, post Apostolicam ætatem adsignari potest. Ergo ad Apostolos, et proinde ad Christum referenda est. Equidem res est adeo per se difficilis, ut numquam humana auctoritate induci lex potuerit, vel consuetudo obtinere, quæ tamen omnes fideles absque gradus vel ordinis discrimine arcte ligat. Apud Anglicanos videre licet frustra esse omnem humanum conatum ad confessionem inducendam, divina sanctione sublata; ipsi enim eam valde commendarunt et sæpius hortati sunt suos ad eam peragendam, quam tamen vehementer omnes refugiunt. Inde videre est numquam contingere potuisse ut confitendi consuetudo induceretur, vel necessitas agnosceretur, nisi ab ipsis Ecclesiæ exordiis injuncta fuisset, Dei ipsius nomine et auctoritate.

#### OBJECTIONES SOLVUNTUR.

108. *Obj.* 1. Confessionis onus nimis grave est quam quod possit ratiocinando deduci ex potestate remittendi peccata, absque speciali Christi mandato.

*Resp.* Non ratiocinio humano, sed Christi mandato nititur confessio; nec alias potuit in Ecclesia universa ab antiquissimis temporibus obtinere. Quæ mandavit ipse optime innotescunt ex Apostolicis institutis, Apostolis quippe jussit ut docerent omnia quæcumque illis mandaverat: mos autem confitendi meritò recensetur inter instituta quæ Apostoli ex Christi mandato sanxerunt. Necesse non est ut omnia Scripturis contineantur, quum potius liqueat prædicationem et institutionem publicam, viva voce, fuisse præcipuam rationem a Christo statutam, et ab Apostolis adhibitam, ad promulgandum doctrinam et mandata Christi; nec nisi ex occasione ea fuisse scripto consignata. Non igitur ratiocinando confessionis onus inducimus et statuimus; sed consuetudinem pristinam et universalem confitendi vindicamus, tum Apostolicæ traditionis certissima auctoritate, tum Christi verbis, ex quibus judicandi potestas, quibusnam venia danda sit, quibusnam verò deneganda, manifestò probatur. Confessionis necessitas inde sequitur, haud longo et incerto ratiocinio, sed consecutione facili et obvia, quæ si cuiquam haud omnino manifesta videatur, traditionem et consuetudinem receptam argumentum præbere certissimum divini mandati contendimus.

109. *Obj.* 2. Ut judicium fiat cuinam venia danda sit, cuinam deneganda, parum prodest singula referre quæ quis patnaverit peccata, sed satis est pœnitentis animi habere indicia haud dubia.

*Resp.* Peccatorum notitia requiritur, ut quæ pœnitenti imponenda sint onera ad reparanda que patravit innotescant, et ut remedia congrua præscribantur. Præterea sui ipsius humiliatio est inter præcipua pœnitentiæ

indicia, ideoque maxime inservit confessio, ut sacerdos judicet utrum venia dignus sit.

110. *Obj.* 3. Venia datur absque ulla peccatorum confessione, quando hæc fieri nequit: quæ quidem plerumque nonnisi ex parte fit, vix enim aliquis singula in memoriam revocare potest.

*Resp.* Quandocumque confessionis facultas deest, animi voluntas Deo est accepta; qui etiam haud rejicit pœnitentem, qui omnia, quorum memor est, delicta recenset. Quod hisce in rerum adjunctis venia detur, ostendit nihil ultra vires nobis injungi, et bonam animi voluntatem esse Deo gratam; sed non tollit confitendi necessitatem, quæ ex scripturis et traditione innoscit.

111. *Obj.* 4. “Luculenta testimonia exstant tum in historiis, tum apud antiquos alios scriptores, quæ doceant hanc fuisse politicam disciplinam, ab episcopis institutam, non legem a Christo aut Apostolis positam. . . . Refert Sozomenus fuisse hanc episcoporum constitutionem diligenter observatam in Ecclesiis Occidentalibus, præsertim vero Romæ. Quo significat non fuisse universale omnium Ecclesiarum institutum.”<sup>1</sup> Ita objicit Calvinus.

*Resp.* Quod refert Sozomenus, spectat munus Pœnitentarii publici, uti fatetur ipse Calvinus: “Is est (quem hodie quoque in singulis cathedralibus Ecclesiis pœnitentiarium vocant) graviorum criminum, et quorum censura ad exemplum pertinet, cognitor.” Illud quidem munus ad disciplinam recte refertur, et ab episcopis tolli, sicut et statui potuit.

112. *Obj.* 5. Non alia tunc viguit confessio, quam quæ apud Pœnitentiarium peragebatur, nam apud eum mulier nobilis singula quæ post baptismum admiserat peccata confessa est, testante Socrate; et munere illo abrogato, ob diaconi facinus ea occasione evulgatum, Nectarius “unicuique permisit, pro arbitrio, et pro animi sui conscientia ad sacramentorum communionem accedere.”<sup>2</sup>

*Resp.* Viguit, sicut viguerat ab initio Ecclesiæ, confitendi sacerdotibus mos, nam ex necessitate confitendi occasio muneris illius instituendi orta est, uti fidem facit Sozomenus. Quod mulier illa nobilis omnia sua peccata apud Pœnitentiarium deposuerit, ostendit eum confessarii munere functum, sed non ideo cæteri sacerdotes eo caruisse censendi sunt. Munus quidem speciale Pœnitentarii, quod cum Confessarii munere in illo sacerdote conjunctum erat, abrogatum est, occasione stupri quod diaconus patravit, quum mulier illa orationibus in Ecclesia vacaret, pœnitentiæ opera sibi injuncta adimplens: sed eo ablato mansit confitendi necessitas apud sacerdotem quemcunque. Libertas unicuique permissa ad sacramenta accedendi in eo posita est, quod Pœnitentarii examini nemo subjaceret.

113. *Obj.* 6. De confessione singulis sacerdotibus tunc temporis pe-

(1) Calvinus Inst. l. iii. c. iv. n. 7.

(2) Socrates l. v. hist. civ. xix.

racta nihil a scriptoribus dicitur, sed soli pœnitentiarario, cujus muneris originem et munia Sozomenus sic describit: “grave ac molestum ab initio jure merito visum est sacerdotibus, tamquam in theatro, circumstante totius Ecclesiæ multitudine, crimina sua evulgare. Itaque ex presbyteris aliquem, qui vitæ integritate spectatissimus esset, et taciturnitate ac prudentia polle-  
ret, huic officio præfecerunt: ad quem accedentes ii qui deliquerant, actus suos confitebantur. Ille verò pro cujusque delicto, quid aut facere singulos aut luere oporteret, pœnæ loco indicens, absolvebat confitentes, a se ipsis pœnas criminum exacturos.” Ita Sozomenus.<sup>1</sup>

*Resp.* Originem hanc muneris presbyteri pœnitentiararii Sozomenus refer-  
ens, confessionis omnimodam necessitatem ei præbuisse causam declarat: “Cum in nullo penitus peccare, diviniore cujusdam naturæ sit, et humana præstantioris; pœnitentibus verò, etiam si sæpius deliquerint, veniam dare Deus præceperit: cumque in petenda venia peccatum necessario confiteri oporteat.”—μεταμελουμένοις δὲ καὶ πολλάκις αμαρτάνουσι, συγγνώμην νέμειν ὁ θεὸς παρεκείνεται, ἐν τῇ παρακλήσει οὐνομολογεῖν τὴν ἁμαρτίαν χρῆναι,—grave ac mo-  
lestum” etc. Ergo Dei mandatum ut pœnitentibus daretur venia, ad quam confessio omnino requirebatur, fuit occasio cur ab initio sacerdotibus visum sit, necesse non esse palam in cœtu fidelium peccata evulgare. Mu-  
nus pœnitentiararii serius inductum est in Constantinopolitanam et alias nonnullas Ecclesias, quum confitendi necessitas ab omnibus agnosceretur, ex divino præcepto dandi veniam pœnitentibus, quam nemo nisi confitendo assequi posset. Falsò igitur asseritur a Dallæo auricularis confessionis privatim sacerdoti solim faciendæ nullu vestigium ea ætate reperiri, quum Sozomenus eam plane adstruat, et pœnitentiarium eo functum esse munere, quamvis publicum aliud munus simul obiret, non obscure indicat.

114. *Obj.* 7. Si de auriculari confessione, auribus scilicet unius sacer-  
dotis insusurrata, esset sermo, diaconi facinus non innotuisset, quod divul-  
gavit mulier ultra modum confitendo progressa.

*Resp.* Profectò de confessione soli pœnitentiarario facta loquitur uterque  
scriptor, uti verba eorum manifestam faciunt fidem. Quomodo autem divul-  
gatum fuerit flagitium, non satis exploratum est. Sozomenus dicit: “Matrona quædam nobilis, ob peccata quæ confessa fuerat, jussa ab hoc presbytero jejuna-  
re, ac Deum suppliciter orare; dum hujus rei causa in Ecclesia moraretur, a diacono se stupratam esse prodidit”—κατεμήνυσεν. Socrates dicit eam apud pœnitentiarium omnia post baptismum admissa deposuisse; deinceps post aliquod temporis intervallum accusando aliud  
peccatum detulisse, quod scilicet, dum pœnitentiæ causa in Ecclesia ver-  
saretur, cum diacono concubuisset: ἡ δὲ προβαίνουσα, καὶ ἄλλο πταίσμα εαυτῆς  
κατηγορεῖ.<sup>2</sup>—Voces ab utroque scriptore adhibitæ *indicium*, *delationem*,  
*accusationem* proprie significant, nec ad confessionem indicandam ple-

(1) Hist. Eccl. l. vii. c. xvi.

(2) Eccl. hist. l. v. c. xix.

ramque usurpantur.<sup>1</sup> Narrat Socrates diaconum idcirco ab Ecclesia ejectum, et turbas magnas excitatas, et abrogatum pœnitentarii munus : quæ omnia optime cohærent, si mulieris indicio apud ecclesiasticum judicem res gesta innotuerit. Cæterum tota series orationis obstat ne de publica confessione intelligatur, quum Sozomenus dicat grave ac molestum ab initio visum esse in cœtu fidelium confiteri. Ideo autem abrogatum est munus, quod ex pœnitentiæ impositæ a pœnitentiaro occasione patratum sit facinus. Cuique deinceps facta est facultas sibi consulendi, juxta conscientiæ dictamen, quin Pœnitentarii, etiam de gravioribus delictis, sicut antea, standum foret judicio. Profectò privatam confessionem haud fuisse sublatam constat ex plurimis certissimisque documentis, quæ de ea vigente omni ætate in Ecclesia Constantinopolitana, sicut et ubique, fidem faciunt, et ex consuetudine numquam interrupta, quæ adhuc ibi servatur.

115. *Obj.* 8. Omnis confessionis ritus abrogatus est in Ecclesia Constantinopolitana: “ Hanc autem abrogationem tot locis evidenter Chrysostomus testatur, Constantinopolitanæ et ipse Ecclesiæ præsul, ut mirum sit istos (*Catholicos*) audere contra mutire.” Ita Calvinus, qui pergit plura Chrysostomi referre testimonia.

*Resp.* Chrysostomus sæpius in suis concionibus ad muneris Pœnitentarii abrogationem alludere videtur, et inde sumere occasionem hortandi fideles ad confessionem Deo faciendam. Quum autem maxime laboret in pravo pudore, quo ab hac retinebantur nonnulli, depellendo, liquet eam intelligi quæ sacerdoti Dei vices obeunti fit. Sic in loco, quem inter plura objicit Calvinus, dicit: “ Si huc usque fuerimus negligentes, iniquitatem in opus progressam mox occidamus per confessionem, per lacrymas, per priorum commissorum accusationem. Nihil enim tam exitiale peccato, quam peccati accusatio condemnatioque, cum pœnitundine lacrymisque conjuncta. Condemnasti peccatum tuum? deposuisti sarcinam. Quis hæc dicit? ipse judex Deus. Dic tu peccata tua prior ut justificeris? Cur igitur, te quæso, pudescis et erubescis dicere peccata tua? Cave enim homini dixeris, ne tibi opprobret. Neque enim conservo confiteris, ut in publicum proferat, sed ei qui Dominus est, ei qui tuæ curam gerit, ei qui humanus est, ei qui medicus est, ostendis vulnera.”<sup>2</sup>

116. *Obj.* 9. Venerabilis Beda dicit: “ Quisquis vel hæretica pravitate, vel superstitione gentili, vel Judaica perfidia, vel etiam schismate fraterno, quasi vario colore per Domini gratiam caruerit, necesse est ad Ecclesiam

(1) Censet Perrone iterato eam confessam esse apud pœnitentiarium, quod ex versione Valesii colligitur: textus verò *indicium* magis denotat, nisi quod suipsius dicatur delictum quod detulit. Facilius explicatur quomodo res divulgata sit cum tanto muneris Pœnitentarii odio, si dicamus eam detulisse stuprum, forsan ad ipsum Pœnitentiarium in foro tamen externo. Cæterum plurimis aliis rationibus res potuit innotescere.

(2) De Lazaro Concio iv. t. ii. p. 548. Vide apud Jacobum Boileau in Historia Confessionis auricularis c. xii. et xiii. loca Chrysostomi illustrata.

veniat, coloremque fidei verum quem acceperit, ostendat. Cætera vero vitia, tamquam valetudinis, et quasi membrorum animæ atque sensuum, per seipsum interius in conscientia et intellectu Dominus sanat et corrigit.”<sup>1</sup> Ergo sacerdoti horum confessio non est facienda.

*Resp.* Mens est venerabilis scriptoris eos quos recenset ad Ecclesiam accedere debere, ut a lepra mudentur, fideles autem in ipsa Ecclesia munditiam, si qua eos infecerit labes, recuperare, opera tamen sacerdotum; ait enim alibi: “ Porro gravioris lepræ immunditiam juxta legem sacerdoti pandamus, atque ad ejus arbitrium qualiter et quanto tempore jusserit, purificari curemus.”<sup>2</sup> Ipse autem narrat militem quendam Cœnredo regi acceptissimum sæpius ab eo admonitum “ ut confiteretur et emendaret ac relinqueret peccata sua;” distulisse, et in mortis discrimine positum noluisse ea confiteri, ne metu mortis videretur egisse; et desperatione obrutum obiisse, quum dæmon illi visus sit codicem obtulisse in quo “ omnia scelera, non solum quæ opere vel verbo, sed etiam quæ tenuissima cogitatione” peccaverat referebantur. “ Hanc historiam, sicut a venerabili antistite Pechtelmo didici, simpliciter? ob salutem legentium sive audientium, narrandam esse putavi.”<sup>3</sup> Ita venerabilis scriptor.

117. *Obj.* 10. Confessio juris divini haberi nequit, nam “ certe nullam de ea statim fuisse legem aut constitutionem ante Innocentii III. tempora”<sup>4</sup> constat ex annalibus ecclesiasticis.

*Resp.* Calvinum ex ore suo damnamus, nam confessionis *vetustissimum esse usum* fatetur, quem nulla lege aut constitutione ecclesiastica nixum esse declarat. Ad jus divinum igitur referendus est, nec enim existimandum fideles tanto oneri sese ex antiquissimis temporibus sponte veluti subjecisse, nulla lege cogente. Recte ad Innocentii tempora lex ecclesiastica refertur, sed ex ipsius verbis liquet non novam ea induci obligationem, sed divinum jus urgeri, pœna ecclesiasticæ censuræ intentata ei qui annum integrum ei satisfacere negligeret.

118. *Obj.* 11. Apostolos excepisse baptizatorum hominum confessiones nullibi legimus. De munere eas audiendi silet S. Paulus in epistolis ad Timotheum et Titum, licet munia sacrorum ministrorum ex professo explicet.

*Resp.* Res gestæ Apostolorum paucæ referuntur, et quæ potius ad Ecclesiæ exordia et diffusionem pertinent, quam ad animarum regimen. Cæterum post relatum dæmoniaci hominis impetum in septem filios Sceva, Jesu invocationem in suos usus adhibentes, dicitur innotuisse Judæis et Gentilibus Ephesi morantibus, “ et cecidit timor super omnes illos, et magnificabatur nomen Domini Jesu. Multique credentium veniebant, confitentes et

(1) L. v. in c. xvii. Luc.

(2) In c. v. ep. Jacobi.

(3) L. v. hist. Eccl. c. xiv.

(4) Calvinus Inst. l. iii. c. iv. n. 7.



annuntiantes actus suos.”—Πολλοί τε τῶν πεπισκυμένων ἤρχοντο ἐξομολογούμενοι καὶ ἀναγγέλλοντες τὰς πράξεις αὐτῶν.<sup>1</sup>—Liquet fideles qui jam crediderant, verbo præterito notari, quos salutari timore perculsos magicas artes et superstitionem omnem penitus abjecisse ea occasione contigit, adeo ut ipsi accesserint sui accusatores, et sigillatim actus suos contra divinam legem enarrarint, libris, quos pravo studio consueverant legere, Apostolis ad comburendum traditis : “ Multi autem ex eis, qui fuerant curiosa sectati, contulerunt libros, et combusserunt coram omnibus : et computatis pretiis illorum, invenerunt pecuniam denariorum quinquaginta millium.”<sup>2</sup> Quod confessori munus non recensuerit Paulus, non obstat, nec enim sibi proposuit singula sacrorum ministrorum munia explicare, sed dotes præsertim quibus ornari debent ; et episcopi in regenda Ecclesia sollicitudinem commendare. Cæterum quæ ad Timotheum scripsit : “ Manus citò nemini imposueris, neque communicaveris peccatis alienis ;” a S. Paciano et aliis de manuum impositione quæ fiebat absolvendo peccatores explicantur, hæc scilicet temere facta consortium est quoddam peccatorum alienorum.

119. *Obj.* 12. Nemo potest sua omnia recensere peccata, ideoque singulorum peccatorum examen et confessio impossibilis est : “ Hac carnificina plus quam crudeliter divexatæ sunt eorum animæ, qui aliquo Dei sensu afficiebantur.”<sup>4</sup> Ita Calvinus.

*Resp.* Satisfit oneri confitendi dum quis ea confitetur quæ post diligens conscientiae examen novit a se patrata. Igitur nihil impossibile exigitur, nec ulla carnificina fit animarum ; sed puritas conscientiae fovetur, latebras omnes perscrutando, et remedium animæ impetratur, expositis medico vulneribus. “ Impium est,” inquiunt patres Tridentini, “ confessionem quæ hac ratione fieri præcipitur, impossibilem dicere, aut carnificinam illam conscientiarum appellare. Constat enim nihil aliud in Ecclesia a pœnitentibus exigi, quam ut, postquam quisque diligentius se excusserit, et conscientiae suæ sinus omnes et latebras exploraverit, ea peccata confiteatur, quibus se Dominum et Deum suum mortaliter offendisse meminerit : reliqua autem peccata, quæ diligenter cogitanti non occurrunt, in universum eadem confessione inclusa esse intelliguntur.”<sup>5</sup>

120. *Obj.* 13. Quæ obtinuit apud veteres confessio, erat publica delictorum quorundam agnitio, in sui humiliationem, et scandali reparationem : omnino diversa a secreta confessione uni sacerdoti facta.

*Resp.* Confessio, juxta Apostolicam regulam, ab initio usitata fiebat

(1) Act. xix. 18. Animadvertit Bloomfield : “ The expressions are nearly synonymous, and denote frank and open confession, with a narration of all circumstances. By the *πράξεις* are especially meant magical practices, though also including sins of every kind.”

(2) Ibidem 19.

(3) I. Tim. v. 22.

(4) Inst. l. iii. c. iv. n. 17.

(5) Sem. xiv. cap. v.



solis sacerdotibus, uti Origenes, Cyprianus, Basilus, Leo, et alii plurimi fidem faciant. Contigit nonnumquam peccata publice agnosci, quod tamen ad consuetudinem vel legem ecclesiasticam quorundam locorum, potius quam ad divinum jus referendum est. Privatam apud sacerdotes confessionem præmitti consuevisse publicæ illi confessioni ex Origene colligitur. Apud omnes exploratum est publicam confessionem non esse a Deo injunctam: quapropter ea veterum testimonia quæ confessionis adstruunt necessitatem, de privata confessione intelligere necesse est.

121. *Obj.* 14. Tota Casisteriana disciplina posterioris ætatis est, quæ argumento est haud levi confessionis usum recens esse adinventum.

*Resp.* Fatetur Calvinus confessionis usum esse vetustissimum: nec desunt in Tertulliani et Augustini et aliorum operibus casus conscientiarum, quamvis non statim disciplinæ formam scientia morum nata sit. His et dogmatum vindictis tardius in formam scholarum redactæ sunt. Equidem prioribus sæculis instituebantur candidati a sacerdotibus; quorum præceptis viva voce traditis ad munia omnia rite obeunda parabantur. Præcedente tempore visum est pluribus enucleatius exponere morum principia, eoque singulis accommodare casibus: quæ disciplinæ tradendæ ratio et magis necessaria visa est, quod plurimis latæ legibus ecclesiasticis et censuris, casuum solutio non unice penderet ex principiis morum ratione et fide innotescentibus.

#### ANIMADVERSIONES.

122. Ex confessionis necessitate sequitur omnia peccata mortalia quæ quis se patrasse noverit, necessariò exponenda esse confitendo: nam quidquid saluti obstat clavium potestate tollendum est, ut in regnum cælorum pateat ingressus. Eadem de singulis peccatis mortalibus viget ratio, sed et de peccatorum numero, quodlibet scilicet peccatum est ab alio distinctum. Imo circumstantiæ quæ mutant speciem necessariò exponendæ sunt, nam novam malitiam inducunt, quæ alteri peccato respondet. Sic homicidium sacerdotis in Ecclesia patratum sacrilegii habet malitiam, personæ locique ratione, et divinæ legi proinde pluribus ex capitibus adversatur.

123. Divino jure confessio sacerdotibus injuncta est; ut autem fiat secretò, vel publice, non est definitum lege Christi, ideoque sufficit confessio soli sacerdoti facta, uti ex S. Leone didicimus. “Quoad modum confitendi secretò apud solum sacerdotem, etsi Christus non vetuerit, quin aliquis in vindictam suorum scelerum et sui humiliationem, cum ob aliorum exemplum, tum ob Ecclesiæ offensæ ædificationem, delicta sua publice confiteri possit: non est tamen hoc divino præcepto mandatum, nec satis consulte humana aliqua lege præciperetur, ut delicta, præsertim secreta, publica

essent confessione aperienda.”<sup>1</sup> Ita Tridentini patres. Apud aliquas Ecclesias ea disciplina recepta olim fuit, ut peccatorum quorundam confessio publice fieret. Quando palam patrata sunt facinora cum gravi fidelium offensione, ad peccatoris humiliationem et reparationem scandali, exigebatur sæpius publica delicti agnitio ; sed peccata occulta plerumque luebantur confessione secreta. Saltem nulla Ecclesiæ universalis lege unquam præceptum est ut occultorum delictorum fieret publica confessio : nec unquam alicubi obtinuit mos omnia absque discrimine peccata publice in cœtu fidelium confitendi : qui sane vix bonis moribus conveniret, et gravia et immania secum traheret incommoda.

124. Ex ipsa confessionis natura sequitur confessarium arctissime teneri ad celanda omnia quæ fuerint apud eum *sacramentaliter*, uti aiunt, deposita, in confessione scilicet ad peccatorum remissionem consequendam directa. Hinc Concilium Lateranense IV. decrevit : “ Caveat omnino ne verbo, vel signo, vel alio quovis modo prodat aliquatenus peccatorem ; sed si prudentiori consilio indiguerit, illud absque ulla expressione personæ caute requirat : quoniam qui peccatum in pœnitentiali iudicio sibi detectum præsumpserit revelare, non solum a sacerdotali officio deponendum decernimus, verum etiam ad agendam perpetuam pœnitentiam in monasterium detrudendum.”<sup>2</sup>

125. Nihil aliud a concilio Lateranensi de obligatione confitendi statutum censendum est, quam ut divino præcepto hac de re semel saltem in anno satisfiat, pœna excommunicationis negligentibus intentata : “ Omnis utriusque sexus fidelis, postquam ad annos discretionis pervenerit, omnia sua solus peccata confiteatur fideliter, saltem semel in anno, proprio sacerdoti, et injunctam sibi pœnitentiam studeat pro viribus adimplere, suscipiens reverenter ad minus in Pascha eucharistiæ sacramentum : nisi forte de consilio proprii sacerdotis, ob aliquam rationabilem causam, ad tempus ab ejus perceptione duxerit abstinendum : alioquin et vivens ab Ecclesiæ ingressu arceatur, et moriens christiana careat sepultura.”<sup>3</sup>

(1) Sess. xiv. cap. v. de Pœnit.

(2) Cap. xxi.

(3) Ibidem.

## CAPUT V.

## DE SATISFACTIONE.

## §. I. DE PENA TEMPORALI.

126. Tres esse pœnitentiæ partes tradit concilium Tridentinum, contritionem scilicet, confessionem et satisfactionem. *Satisfactionis* nomine intelligitur opus in pœnam peccati a sacerdote injunctum, et a pœnitente acceptatum. Illud jam pro explorato habemus, hominem nihil posse facere quo ob injuriam Deo peccato irrogatam satisfaciat : et omne pœnitentis opus totam suam virtutem a gratia Dei derivare, nec nisi Christi meritum intuitu Deo posse aliquatenus esse acceptam. Igitur dum de pœnitentium satisfactione quatenus ad sacramentum pertinet, fit sermo, id tantum intelligimus, opera in pœnam peccati a sacerdote injungi posse, eaque rite peracta, per Christum prodesse ad pœnas temporales peccatis debitas luendas. De ipso reatu peccati, et de suppliciis æternis nulla est quæstio ; ea enim nullo hominis conatu tolli, sed unius Christi meritis constat.

127. Jam, in *tractatu de Gratia*, de oratione, jejunio et eleemosynis disseruimus, eaque bona opera rite vocari, et mercedem apud Deum mereri ostendimus. Ad hæc tria veluti genera omnia pœnitentiæ opera revocantur, quod enim dicitur apud Tobiam : “ Bona est oratio cum jejunio et eleemosyna ;”<sup>1</sup> omnia complectitur : “ Jejunio scilicet,” uti animadvertit Augustinus, de Christi sermone loquens, “ universam corporis castigationem significans, eleemosynis omnem benevolentiam et beneficentiam, vel dandi, vel ignoscendi ; et oratione insinuans omnes regulas sancti desiderii.”<sup>2</sup> Satisfactionis nomen novatoribus sæculi decimi sexti invisum fuit, qui opera pœnitentiæ oderunt. Lutherus ait : “ Vehementer odi, et sublatum vellem hoc vocabulum, satisfactio.”<sup>3</sup> Calvinus veteres omnes adversarios agnoscens, iis haud veretur refragari : “ Parum me movent quæ in veterum scriptis de satisfactione passim occurrunt. Video quidem eorum nonnullos, dicam simpliciter omnes fere quorum libri extant, aut hac in parte lapsos esse, aut nimis aspere et dure locutos.”<sup>4</sup> Sectarii omnes hos sequuntur

(1) Tob. xii.<sup>8</sup>.

(2) L. de perf. just. c. viii.

(3) In assert. art. v.

(4) Inst. l. iii. c. iv. n. 38.

duces magno consensu, si exceperis Oxonienses, qui sanius sapere cœperunt, quamvis nullam plenam peccatorum indulgentiam ante diem iudicii concedi peccantibus post baptismum errando censeant.

128. Concilium Tridentinum definitionem hanc edidit : “ Si quis dixerit, totam pœnam simul cum culpa remitti semper a Deo, satisfactionesque pœnitentium non esse aliam quam fidem qua apprehendunt Christum pro eis satisfecisse, anathema sit.”<sup>1</sup>

## PROPOSITIO.

*Tota pœna peccati non semper a Deo remittitur simul cum culpa.*

*Probatur I. ex Scripturis.*

129. Moyses et Aaron in pœnam culpæ admissæ, occasione aquarum educendarum e rupe, prohibiti sunt ingressu in terram Chanaan ;<sup>2</sup> quæ iis gravissima erat pœna. David a Nathan increpitus dixit : “ Peccavi Domino. Dixitque Nathan ad David : Dominus quoque transtulit peccatum tuum : morieris. Verumtamen quoniam blasphemare fecisti inimicos Domini, propter verbum hoc, filius qui natus est tibi morte morietur.”<sup>3</sup> Hæc quoque gravissima habenda est pœna, pœnitenti, dimissa culpa, irrogata. Eidem cujusdam elationis animi in recensendo populo veniam deprecanti, gravissima pœna est inflicta : “ Peccavi valde in hoc facto ; sed precor Domine, ut transferas iniquitatem servi tui, quia stulte egi nimis.” Gad propheta ei iudicium divinum annuntiavit : “ Aut septem annis veniet tibi fames in terra tua : aut tribus mensibus fugies adversarios tuos, et illi te persequentur ; aut certe tribus diebus erit pestilentia in terra tua.”<sup>4</sup>

*Probatur II. ex Patribus.*

130. AUGUSTINUS ait : “ Cogitur homo tolerare, etiam remissis peccatis, quamvis ut in eam veniret miseriam, primum fuerit causa peccatum. Productior est enim pœna, quam culpa, ne parva putaretur culpa, si cum illa finiretur et pœna. Ac per hoc, vel ad demonstrationem debitæ miseræ, vel ad emendationem labilis vitæ ; vel ad exercitationem necessariæ patientiæ, temporaliter hominem detinet pœna, etiam quem jam ad damnationem sempiternam reum non detinet culpa.”<sup>5</sup> Et alias : “ impunita peccata eorum, etiam quibus ignoscis, non reliquisti. Sic prorogasti misericor-

(1) Sess. xiv. can. xii.

(2) Num. xx.

(3) II. Reg. xii. 13. Adnotant Oxonienses : “ Here is a perspicuous instance of a penitent restored to God’s favour, at once, yet his sins afterwards visited, and it needs very little experience in life to be aware that such punishments occur continually, though no one takes them to be an evidence that the sufferer himself is under God’s displeasure, but rather accounts them punishments, even when we have abundant proofs of his faith, love, holiness, and fruitfulness in good works.” Tracts Vol. iv. No. 79. p. 7.

(4) II. Reg. xxiv. 10.

(5) Tract. cxxiv. in Joan. n. 5.

diam, ut servares et veritatem.”<sup>1</sup> S. GREGORIUS MAGNUS: “Nequaquam igitur peccato parcitur, quia nullatenus sine vindicta laxatur. Sic David audire post confessionem meruit: ‘Dominus transtulit peccatum tuum;’ et tamen multis post cruciatibus afflictus, reatum culpe quam perpetraverat, exolvit.”<sup>2</sup>

#### OBJECTIONES SOLVUNTUR.

131. *Obj. 1.* Plena peccatorum indulgentia poenitentibus in Scripturis promittitur: “Ego sum, ego sum ipse qui deleo iniquitates tuas propter me, et peccatorum tuorum non recordabor.”<sup>3</sup>

*Resp.* Peccata a Deo delentur, et oblivioni veluti dantur, quando ea poenitentibus remittit: constat autem eum non semper omnem relaxare poenam, ideoque generales illae indulgentiae promissiones intelligendae sunt de plene culparum remissione, salvo jure exigendi poenam temporalem, vel de omnimoda remissione iis qui vehementiori dolore plangunt peccata.

132. *Obj. 2.* “Impietas impii non nocebit ei, in quacumque die conversus fuerit ab impietate sua.”<sup>4</sup> Noceret autem si adhuc luenda foret poena temporalibus.

*Resp.* Eo loci Deus per vatem peccatores certiores facit eorum delicta non obstare saluti, si ex animo ea abjecerint: de peccatore scilicet ad bonam frugem redacto dicit: “Omnia peccata ejus quae peccavit, non imputabuntur ei: judicium et justitiam fecit, vita vivet.”<sup>5</sup> Inde autem inferre non licet nullum incommodum vel detrimentum peccatori obventurum: liquet enim eam esse divinae justitiae consuetam oeconomiam, ut plurimas poenas adhuc luat, quod in Davide a regno pulso maxime videre est.

133. *Obj. 3.* Christus abunde pro nobis satisfecit: unica sui oblatione omnium deletis peccatis: “ipse est propitiatio pro peccatis nostris.”<sup>6</sup> “Christus semel oblatus est ad multorum exhaurienda peccata.”<sup>7</sup> Ergo quoties intuitu ejus datur venia, nulla manet poena luenda; haec enim foret ejus satisfactioni injuriosa.

*Resp.* Copiosa quidem est Christi redemptio, cui nihil prorsus deest; sed applicatio ejus ex ipsius consilio pendet, qui noluit peccatores ejus frui beneficio, nisi conditionibus quibusdam adimpletis. Quod culpa ejus intuitu poenitentibus remittatur, poena temporali plerumque manente, ex divina

(1) Enarr. in Ps. l.

(2) L. ix. moral. c. xxvii.

(3) Isaiae xliii. 25.

(4) Ezech. xxxiii. 12.

(5) Ibidem 16.

(6) 1 Joan. ii. 1.

(7) Heb. ix. 28.

œconomia in Scripturis exhibita, et ex perpetuo Ecclesiæ sensu didicimus : nec hac ratione injuria fit Christi satisfactioni, quæ plenissima agnoscitur. Pulchre Oxonienses animadvertunt nos non aliter posse ad Deum accedere, quam sacrificio a nobis oblato, quod Christi cum sacrificio conjungatur.<sup>1</sup>

134. *Obj.* 4. Remissio illa dimidiata Deum dedecet: nec enim vere ignoscere dicendus est qui pœnam adhuc irrogat. Præterea remissa culpa tollitur omnis pœnæ ratio, quæ proinde injusta erit.

*Resp.* Deum maxime decet misericordiam cum justitia conjungere, ne peccator veniæ facilitate relabatur. Semel concessa in baptismo peccatorum indulgentia plenissima, sapienter misericordiæ exercitium deinceps attemperat, ut peccator intelligat non adeo levem essem culpam data sibi dona peccando abjicere.

135. *Obj.* 5. Quæ in Scripturis enarrantur peccatoribus post remissa peccata, inflicta, in aliorum terrorem et ad reparandum scandalum decreta censenda sunt, potius quam ad peccata expianda.

*Resp.* Inflicta sunt in pœnam peccatorum, uti ex Scripturæ verbis patet; cesserunt autem in aliorum terrorem, et in scandali reparationem. Cæterum non constat populum scandalum passum esse ex censu Davidico, quem tamen pœnas gravissimas attulisse liquet.

136. *Obj.* 6. S. Ambrosius de Petro dicit: "Lacrymas ejus legimus; satisfactionem non legimus."

*Resp.* Satisfactio apud auctores profanos excusationem seu vindicias significat, quo sensu eam usurpat Ambrosius, uti ex contextu liquet: "Non invenio quid dixerit, invenio quod fleverit: lacrymas ejus lego, satisfactionem non lego: sed quod defendi non potest, ablui potest."

---

## §. II. DE OPERUM PŒNITENTIÆ VIRTUTE.

137. Pœnam temporalem, quæ culpa remissa sæpe superest, redimi posse operibus pœnitentiæ definivit concilium Tridentinum: "Si quis dixerit, pro peccatis, quoad pœnam temporalem, minime Deo per Christi merita satisfieri, pœnis ab eo inflictis, et patienter toleratis, vel a sacer-

(1) "If the doctrine of the Atonement is conveyed in the expression of CHRIST crucified, as used by St. Paul, it is by teaching, at the same time, the necessity of our mortification, which is repugnant to opinions now received. It is expressing, in other words, our SAVIOUR'S declaration, 'he that cometh after me must take up his cross daily and follow me.' They both imply that we cannot approach God without a sacrifice,—a sacrifice on the part of human nature in union with that of our SAVIOUR." Vol. iv. Tract No. 80. p. 75.

(2) L. x. in Lucam § 88.

dote injunctis, sed neque sponte susceptus, ut jejuniis, orationibus, eleemosynis, vel aliis etiam pietatis operibus, atque ideo optimam pœnitentiam esse tantum novam vitam; anathema sit." "Si quis dixerit, satisfactiones, quibus pœnitentes per Christum Jesum peccata redimunt, non esse cultus Dei, sed traditiones hominum, doctrinam de gratia, et verum Dei cultum, atque ipsum beneficium mortis Christi obacurantes; anathema sit."<sup>1</sup> Hæc placita adhuc novatoribus communia sunt, ideoque contrariam Ecclesie doctrinam vindicare juvat.

## PROPOSITIO.

*Satisfactiones, quibus pœnitentes per Christum Jesum peccata redimunt, sunt cultus Dei; nec aliquatenus doctrinam de gratia, vel verum Dei cultum, vel beneficium mortis Christi obacurant.*

*Probatur I. ex Scripturis.*

138. Daniel Nabuchodonosorem hortatus est: "quamobrem, rex, consilium meum placeat tibi, et peccata tua eleemosynis redime, et iniquitates tuas misericordiis pauperum—**וְעָשִׂיתָ כְּמַתְּנֵי עֲנִין**—forsitan ignoscet delictis tuis."<sup>2</sup> Igitur eleemosynæ, pœnitentis animi indicia, ad placandum Deum oblatae, ei gratæ sunt, et ad redemptionem peccatorum prosunt: nisi enim Daniel id pro explorato habuisset, haud suavisset Nabuchodonosori eas spe illa et consilio dare.

139. Ninivitarum exemplum celebre est, Jona enim prædicente Ninive subversionem post quadraginta dies, jejunium publicum omnium civium indictum est, qui et saccos induti planxerunt peccata: "crediderunt viri Ninivitæ in Deum: et prædicaverunt jejunium, et vestiti sunt sacco majore usque ad minorem. . . . Et vidit Deus opera eorum, quia conversi sunt de via sua mala; et misertus est Deus super malitiam, quam locutus fuerat ut faceret eis, et non fecit."<sup>3</sup> Illa opera, pœnitentiæ indicia et fructus, Deum placarunt. Ea igitur quæ nunc fiunt animo pœnitenti, et per Christum Deo offeruntur, ei grata procul dubio sunt; nec ullatenus cultui ejus adversa.

140. Ad opera illa pœnitentiæ passim hortati sunt sacri vates: "Convertimini ad me in toto corde vestro, in jejunio, et in fletu, et in planctu. Et scindite corda vestra, et non vestimenta vestra, et convertimini ad Dominum Deum vestrum: quia benignus et misericors est."<sup>4</sup> Joannes Baptista ad fructus pœnitentiæ faciendos turbas hortatus est: "Facite fructum dignum pœnitentiæ."<sup>5</sup> Apostoli ad pœnitentiam prædicandam missi sunt.

(1) Sess. xiv. can. xiii. xiv.

(2) Daniel iv. 24.

(3) Jona iii. 5, 10.

(4) Joel. ii. 12.

(5) Matt. iii. 8.



Ex usu loquendi hæc denotabat non tantum animi dolorem, sed et ejus indicia operibus exhibita. Ergo hæc Deo grata sunt, et ad cultum ejus pertinent.

*Probatur II. ex Patribus.*

141. TERTULLIANUS ait: “Quam porro ineptum pœnitentiam non adimplere, et veniam delictorum sustinere? Hoc est pretium non exhibere, ad mercedem manum emittere. Hoc enim pretio Dominus veniam addicere instituit: hac pœnitentiæ compensatione redimendam proponit impunitatem.”<sup>1</sup>—“Offendisti, sed reconciliari adhuc potes; habes cui satisfacias, et quidem volentem.”<sup>2</sup>

141. ORIGENES: “Si tamen invenerit manus tua pretium quod restituat. Quale pretium? Pœnitentiæ sine dubio lacrymis congregatum, et manibus, id est labore boni operis inventum.”<sup>3</sup> Et alias: “Pœnitendo, flendo, satisfaciendo debeat quod admissum est.”<sup>4</sup>

142. S. CYPRIANUS, de martyrum, scilicet qui aliquid supplicium propter fidem passi erant, intercessione, ut lapsi statim donarentur Ecclesiæ communionem, querens, dicit: “Intercedunt ne rogetur Deus, qui indignari se ipse testatur. Intercedunt ne exoretur precibus et satisfactionibus Christus, qui negantem se negare profitetur . . . . ne Deo indignanti satisfiat. . . . Datur opera ne satisfactionibus et lamentationibus justis delicta redimantur, ne vulnera lacrymis abluantur.” Lapsos a Novatianis recipi, omni pœnitentiæ lege soluta, queritur: “Sublata pœnitentia, nec ulla exomologesi criminis facta, despectis episcopis atque calcatis, pax non a veris presbyteris verbis fallacibus prædicetur, et ne lapsi surgant, aut foris ad Ecclesiam redeant, communicatio non communicantibus offeratur? Quibus etiam non satis fuit ab Ecclesia recessisse, spem lapsis satisfactionis et pœnitentiæ sustulisse, fraudibus involutos, vel adulteriis commaculatos, vel sacrificiorum funesta contagione pollutos, ne Deum rogarent, ne in Ecclesia exomologesin criminum facerent, ab omni sensu et fructu pœnitentiæ removisse, foris sibi extra Ecclesiam et contra Ecclesiam constituisse conventiculum perditæ factionis, cum male sibi consciorum, et Deum rogare ac satisfacere nolentium caterva conflueret.”<sup>5</sup> Et alias: “Orare oportet impensius, et rogare, diem luctu transigere, vigiliis noctes ac fletibus ducere, tempus omne lacrymosis lamentationibus occupare, stratos solo adhærere cineri, in cilicio et sordibus volutari . . . qui sic Deo satisfecerit, qui pœnitentia facti sui, qui pudore delicti plus et virtutis et fidei de ipso lapsus sui dolore conceperit, exauditus et adjutus a Domino, quam

(1) L. de Pœnit. c. vi.

(2) Ibidem c. vii.

(3) Hom. xv. in Levit.

(4) Hom. vi. in Exodum.

(5) Ep. ad Cornel. l. i. ep. iii. alias lv.

contristaverat nuper, lætam faciet Ecclesiam : nec jam solam Dei veniam merebitur, sed coronam."<sup>1</sup>

145. S. AMBROSIVS : "Crimina bonis operibus fideique pretio et miseratione redimamus."<sup>2</sup> Et alias eleemosynarum largitione redimi quodammodo peccata tradit : "Habemus plena subsidia, quibus peccata nostra redimamus. Pecuniam habes ? Redime peccatum tuum. Non venalis est Dominus, sed tu ipse venalis es : redime te operibus tuis ; redime te pecunia tua."<sup>3</sup> Et alias : "Sicut qui pecunias solvunt, debitum reddunt, nec prius evacuatur scenoris nomen, quam totius sortis ad nummum usque quocumque solutionis genere quantitas universa solvatur ; sic compensatione charitatis actuumque reliquorum vel satisfactione quacumque peccati pœna dissolvitur."<sup>4</sup>

146. S. HIERONYMVS : "Qui peccator est, et quem remordet propria conscientia, cilicio accingatur, et plangat sua delicta . . . et cubet vel dormiat in sacco, ut præteritas delicias, per quas Deum offenderat, vitæ austeritate compenset."<sup>5</sup>

147. S. AUGUSTINVS : "In melius est vita mutanda, et per eleemosynas de peccatis præteritis est propitiandus Deus, non ad hoc emendus quodammodo, ut ea semper liceat impune committere, nemini enim dedit laxamentum peccandi : quamvis miserando deleat jam facta peccata si non satisfactio congrua negligatur."<sup>6</sup> Et alias : "Non sufficit mores in melius commutare, et a factis malis recedere, nisi etiam de his quæ facta sunt, satisfiat Deo per pœnitentiæ dolorem, per humilitatis gemitum, per contriti cordis sacrificium, cooperantibus eleemosynis."<sup>7</sup>

148. S. PAULINVS : "Obtestor et deprecor ne pudeat in hoc opere, ne pigeat opportuna quamprimum remedia salutis invadere, dejicere mæroribus animum, sacco corpus involvere, cinere perfundere, macerare jejunio, mærore conficere, multorum precibus adjuvare. In quantum pœnæ vestræ non peperceritis, in tantum vobis Deus parcat."<sup>8</sup>

*Probatur III. ex disciplina pœnitentiali.*

149. *Publica pœnitentia* ob nonnulla gravissima delicta semper imponi consuevit ; et a tertio sæculo juxta certas leges peragebatur, *Canonica* idcirco dicta. Gravissimæ sane pœnæ injungebantur, quæ per annos plurimos luebantur ob delicta etiam occulta, uti ex librorum pœnitentialium

(1) L. de lapsa.

(2) L. ii. de Abel et Cain. c. iii.

(3) L. de Elia et jejunio c. xx.

(4) L. vii. in Lucam.

(5) Comm. in c. i. Joel.

(6) Enchirid. c. lxx.

(7) Serm. cœcli. alias l. inter quinquaginta.

(8) Parænes. ad Pœnit.

regulis constat. Igitur persuasum est veteribus ea opera prodesse ad placandum Deum, et ad pœnarum alias luendarum remissionem.<sup>1</sup>

## OBJECTIONES SOLVUNTUR.

150. *Obj.* 1. “In hanc summam recidunt omnia, nos quidem a Dei clementia delictorum veniam impetrare, sed intercedente merito operum, quibus peccatorum noxa compensetur, quo debita justitiæ Dei satisfactio persolvatur.”<sup>2</sup> Ita Calvinus.

*Resp.* Non merito operum veniam impetramus, sed Christi intuitu, qui pro nobis justitiæ divinæ satisfecit; opera tamen post veniam impetratam facta gratiæ auxilio per Christum valent ad pœnas temporales luendas.

(1) Sæculo tertio solemniores pœnitentiæ gradus jam distinguebantur, uti liquet ex epistola canonica S. Gregorii Neocæsarensis can. xi. “*Fletus* seu luctus est extra portam Oratorii, ubi peccatorem stantem oportet fideles ingredientiæ orare, ut pro se precetur. *Auditio* est intra portam, in porticu, ubi oportet eum qui peccavit stare, usque ad Catechumenos, et illinc egredi: Audiens enim, inquit, Scripturas et doctrinam, ejiciatur, et precatione indignus censeatur. Subjectio autem seu *Substratio* est, ut intra templi portam stans cum Catechumenis egrediatur. Congregatio seu *Consistentia* est, ut cum fidelibus consistat, et cum Catechumenis non egrediatur.” Vide etiam Conc. Ancyranum Can. 4. 5. 8. Nicænum. Can. 11. et 12. Postea in Occidentali Ecclesia eadem disciplina invaluit, cujus meminit S. Felix iii. Epist. 7. ad universos episcopos, scripta sæculo quinto ad finem vergente. *Flentes* sacco induti, cinere capiti insperso, capillis et barba promissis in vestibulo manebant: *audientes* intra portam in loco qui *narthex* seu ferula dicebatur; *substrati* genuflexi variis pœnis ac laboribus exercebantur, accipiebantque manus impositiones, sacerdotibus pro iis orantibus. Eorum locus fuit in ea Ecclesiæ parte quæ ad *ambonem* usque protendebatur; ambo autem erat excelsius quoddam suggestum in templis ad quod gradibus ascendebatur, et ex quo epistola et evangelium legebantur. *Consistentes* deinceps usque ad sanctuarium cum fidelibus cæteris miscebantur, communionis tantum expertes. Non omnes pœnitentiæ gradus singulis peccatoribus percurrere opus fuit, nec idem omnibus temporis spatium per quod versarentur in unoquoque gradu: sed episcopis licuit hæc prudenti arbitrio definire.

Qui in veteri Ecclesia, episcopi aut presbyteri pœnitentiarii judicio, publicam pœnitentiam exequi debebant, in capite jejunii, seu prima Quadragesimæ die, ad Ecclesiæ januam comparebant, sordidati pro more lugentium. In Ecclesiam ingressi ex manibus episcopi cinerem capiti inspersum, et cilicinam vestem accipiebant, seque in terram prosternebant, dum a clero et populo pro iis funderentur preces. Episcopus deinceps, clero canente: “In sudore vultus tui, &c.” eos ex Ecclesia ejiciebat, sicut Adam e Paradiso ejectus est. Qui in hoc pœnitentiæ statu versabantur, domi manebant, precibus et suspiriis vacantes; diebus festis et stationariis ad Ecclesiam venturi. Stadio pœnitentiæ decurso, reconciliabantur vel in Parasceve, vel in die Cœnæ Domini pro vario Ecclesiarum more; episcopo eos absolvente, et restituente Ecclesiæ communioni. Non omnes tamen reconciliationis impetrabant beneficium post unam quadragesimam, plurimi enim plurimorum annorum pœnitentia adstringebantur juxta canones, quorum vim tamen indulgentia relaxabant sæpius episcopi graves ob causas. Vide plura apud Sardagnam Theol. Dogm. Polemic. t. viii de Sac. Pœn.

(2) Inst. l. iii., c. iv. n. 25.

151. *Obj. 2.* "Talibus mendaciis oppono gratuitam peccatorum remissionem, qua nihil in Scriptura clarius prædicatur. Cur *gratis* additur, nisi ad tollendam omnem satisfactionis opinionem!" Calvinus iterum.

*Resp.* Quæ Augustini verba supra retulimus, tacito auctore recenset Calvinus, et mendacia appellat principia illa certissima. Iis gratuita peccatorum remissio nullatenus adversatur, nam *gratis* remittuntur delicta, quum nihil quod nostris viribus fiat, ullatenus valeat remissionem mereri. Est mera et summa Dei liberalitas, quod, nullo a nobis pretio oblato, detur venia: est summa Servatoris misericordia, quod se Patri victimam pro nobis obtulerit, pretio soluto. Nulla satisfactio nostra meretur justificationem, ideoque *gratis* justificari dicimur;<sup>1</sup> sed non ideo satisfaciendi ob pœnas temporales facultate caremus, Christi gratia adjuti.

152. *Obj. 3.* "Quum Scriptura universa testimonium Christo deferat, quod per nomen ejus sit accipienda peccatorum remissio, nonne alia nomina excludit? Quomodo igitur per satisfactionum nomen accipi docent!" Calvinus.

*Resp.* Christi nomine prædicatur pœnitentia et remissio peccatorum, non alio quovis nomine impetranda, "nec enim aliud nomen est sub cœlo datum hominibus in quo oporteat nos salvos fieri."<sup>2</sup> Satisfactiones nostras nullas obtendimus, nisi quæ per ipsum valeant, vim suam omnem ab ipso derivantes. Ad Christi ipsius voluntatem referimus, quod et nostris operibus debeamus pœnas quasdam luere, ut illius satisfactionis beneficio plenissime fruamur. Oxonienses se a nobis in rei summa haud dissentire satis innunt.<sup>4</sup>

### §. III. DE OPERUM PœNITENTIÆ INJUNCTIONE.

153. Definierunt Patres Tridentini pœnas impositas pœnitentibus a sacerdotibus haud repugnare institutioni Christi: "Si quis dixerit, claves Ecclesiæ esse datas tantum ad solvendum, non etiam ad ligandum, et prop-

(1) Conc. Trid. Sess. vi. cap. viii.

(2) Inst. l. iii. c. iv. n. 25.

(3) Act. iv. 12.

(4) Post Davidis exemplum relatum, qui pœnam remissæ culpæ luit, animadvertunt: "So far then we cannot be said materially to oppose the Romanists. They on the other hand agree with us in maintaining that Caesar's death *might*, if God so willed, be applied for the removal even of these specific punishments of sins, which they call *temporal* punishments, as fully as it really is for the acceptance of the soul of the person punished, or the removal of eternal punishment. Further, both parties agree, that in matter of fact it is not so applied." . . . As far as this then we have no violent difference of principle." Tract 79. p. 7.

terea sacerdotes, dum imponunt pœnas confitentibus, agere contra finem clavium, et contra institutionem Christi, et fictionem esse, quod virtute clavium sublata pœna æterna, pœna temporalis plerumque exsolvenda remaneat; anathema sit.”<sup>1</sup> Quomodo autem hæc potestas exercenda sit, præclare docuerunt: “Debent ergo sacerdotes Domini, quantum spiritus et prudentia suggesserit, pro qualitate criminum, et pœnitentium facultate, salutare et convenientes satisfactiones injungere, ne, si forte peccatis coniveant, et indulgentius cum pœnitentibus agant, levissima quædam opera pro gravissimis delictis injungendo, alienorum peccatorum participes efficiantur. Habeant autem præ oculis, ut satisfactio quam imponunt, non sit tantum ad novæ vitæ custodiam, et infirmitatis medicamentum, sed etiam ad præteritorum peccatorum vindictam, et castigationem; nam claves sacerdotibus non ad solvendum dumtaxat, sed et ad ligandum concessas etiam antiqui Patres et credunt et docent.”<sup>2</sup>

## PROPOSITIO.

*Claves Ecclesiæ datæ sunt etiam ad ligandum, et propterea sacerdotes, dum imponunt pœnas confitentibus, non agunt contra finem clavium, nec contra institutionem Christi.*

*Probatur I. ex Scripturis.*

154. “Tibi dabo claves regni cœlorum: et quodcumque ligaveris super terram, erit ligatum et in cœlis.”<sup>3</sup> Ergo etiam ad ligandum claves datæ sunt. “Quaecumque alligaveritis super terram, erunt ligata et in cœlo.”<sup>4</sup> Acceperunt Apostoli, et per eos sacerdotes omnes ligandi potestatem: hæc includit potestatem præcepta ferendi: ergo possunt præcepta ferre de iis quæ ad pœnitentiæ condiciones spectant. Præterea quum constet ex pluribus Scripturæ locis Deum culpam remittendo, sæpe sibi reservare jus pœnas aliquas irrogandi, qui ejus legatione funguntur in remissione peccatorum merito imitantur divinam hanc agendi rationem, ut justitiæ jura in misericordiæ exercitio non penitus negligantur.

*Probatur II. ex Patribus.*

155. S. CYPRIANUS queritur de martyribus, qui gratia apud sacerdotes usi sunt, ut lapsi in persecutione ad communionem exciperentur, congrua tanto crimini pœnitentia non peracta: “Quos diligo, inquit Dominus, redarguo et castigo. Sic oportet Dei sacerdotem non obsequiis decipientibus fallere, sed remediis salutaribus providere. . . . Contra Evangelii vigorem, contra Domini ac Dei legem temeritate quorundam laxatur incautis communicatio. Irrita et falsa pax, periculosa dantibus, et nihil accipientibus profutura. . . . Non quærunt sanitatis patientiam, nec

(1) Sess. xiv. can. xv.

(2) Ibidem c. viii.

(3) Matt. xvi. 19.

(4) Ibidem xviii. 19.

veram de satisfactione medicinam. Pœnitentia de peccatoribus exclusa est, gravissimique extremique delicti memoria sublata est. . . . Cæterum si quis præpropere festinatione temerarius remissionem se cunctis dare putat posse, aut audet Domini præcepta rescindere, non tantum nihil prodest, sed et obest lapsis."<sup>1</sup>

156. S. AMBROSIIUS: "Grandi plagæ alta et proliza opus est medicina: grande acelus grandem necessariam habet satisfactionem."<sup>2</sup>

157. S. AUGUSTINUS exigit ut pœnitens "a præpositis sacramentorum accipiat satisfactionis suæ modum."<sup>3</sup> Vide et S. Leonis M. et S. Innocentii testimonia supra relata.<sup>4</sup>

*Probatur III. ex disciplina veteri.*

158. Per plura sæcula obtinuit disciplina qua singulis fere delictis graves adsignatæ sunt pœnæ; qua abrogata, per tempus satis diuturnum sacerdotes in tribunali adhuc eas vel similes pœnitentibus consueverunt injungere. Ea Ecclesiæ totius per plura sæcula consuetudo nitebatur certa fide Deum satisfactione humana placandum, nec alia lege offerri nobis satisfactionis Christi beneficium. Juvat nonnullos pœnitentiales canones, speciminis instar recitare. "Qui a fide desciverit, pœnitentiam agat annis decem. Qui magos consuluerit, in pœnitentia erit annos quinque. Qui opus aliquod servile die Dominico festivo fecerit, pœnitentiam agat tres dies in pane et aqua. Si quis jejunia a S. Ecclesia indicta violaverit, pœnitentiam agat dies viginti in pane et aqua. Qui parentibus maledixerit; quadraginta dies pœnitens sit in pane et aqua. Si quis hominem occiderit, ad januam Ecclesiæ semper erit, et in obitu communionem recipiet. Si laicus solutus cum fœmina soluta concubuerit, pœnitens erit tres annos. Pro adulterio septennii et decennii pœnitentia imponitur. Qui usuras accipit, rapinam facit, pœnitentiam agat annis tribus, uno in pane et aqua."<sup>5</sup>

#### OBJECTIONES SOLVUNTUR.

159. *Obj. 1.* Christus veniam concessit paralytico, mulieri adulteræ, meretrici, latroni, nulla pœna imposita. Patrem filium prodigum redeuntem excepiasse narrat, omni lætitie indicio, nulla injuncta pœna.

*Resp.* Penes Christum erat veniam donare amplissimam, quin inde inferre liceat eandem indulgentiam semper peccatoribus omnibus exhibendam. Cæterum non constat mulierem adulteram fuisse crimine absolutam. Vehementiori peccatricis dolori, et dilectioni indulget Christus remissionem integram, quam et in dies sacerdotum ministerio dat iis qui eadem dilec-

(1) L. de lapsis.

(2) Tract ad Virginem lapsam c. viii.

(3) Serm. cœcli. alias l. c. 4.

(4) Supra p. 315.

(5) Plures vide apud S. Alphonsum de Ligorio l. vi de Pœn. n. 530.

tione flagrant, et vehementia pari plangunt peccata : sed quum hoc paucorum sit, optimo consilio pœnæ irrogantur confitentibus, ut qua valent ratione satisfaciant Dei justitiæ. Patris filium redeuntem excipientis exemplum nobis proponitur, ut infinitam Dei misericordiam erga perditissimos quosque peccatores ex animo conversos miremur : sed justitiæ, quæ plerumque reservat, jura aliunde innotescunt.

160. *Obj.* 2. Quæ injungit sacerdos confitentibus inter mandata hominum, quæ Christus improbavit, recensenda sunt.

*Resp.* Christus inanes Pharisæorum observationes improbavit, quum earum occasione lex divina negligeretur : sed obtemperandum voluit sacerdotibus, et legitimæ omni potestati : “ Qui vos audit, me audit ; ”<sup>1</sup> dixit præconibus a se missis.

161. *Obj.* 3. Levia sunt et inania quæ a sacerdotibus consueverunt injungi, v. g : quarumdem precum, quæ haud intelliguntur, recitatio : hac autem ratione fovetur superstitio et morum corruptela, quum gravissima et immania flagitia sic redimi censeantur.

*Resp.* Id præ omnibus exigitur ut cordis contriti et humiliati offeratur Deo sacrificium : quæ autem injunguntur opera ad satisfaciendum pro pœnis temporalibus, proportionem quamdam cum delictis habeant oportet, quamvis pœnitentis virium, et indolis haud negligenda sit consideratio. Equidem vix possunt impræsentiarum injungi quæ veteris disciplinæ severitatem præseferunt ; sed injungenda sunt saltem quæ peccatorem aliquatenus puniunt, et a peccati discrimine longius removent. Nulla fovetur superstitio, vel morum corruptela, omnes enim norunt se non posse Dei veniam consequi, nisi peccatis derelictis, et, pro viribus, expiatis.

(1) Luc. x. 16.



## CAPUT VI.

## DE SACRAMENTI RATIONE.

162. Veram Sacramenti rationem pœnitentiæ convenire ex disceptatis liquet, est enim ritus externus, iudicii formam præseferens, divinitus institutus in peccatorum post baptismi admissorum remissionem. Patres ideo passim dicunt eam veluti tabulam naufrago divinitus relictam, ut quam peccato amiserat baptismi gratiam recuperet. "Hæc igitur venena ejus (*diaboli*) providens Deus, clausa licet ignoscentiæ janua, et intinctionis (*baptismi*) sera obstructa, aliquid adhuc permisit patere: collocavit in vestibulo pœnitentiam secundam, quæ pulsantibus patefaciat."<sup>1</sup> Ad pœnitentiam amplectendam jam hortatus fuerat: "Eam tu peccator, mei similis (immo me minor; ego enim præstantiam in delictis meam agnosco) ita invade, amplexare, ut naufragus alicujus tabulæ fidem. Hæc te peccatorum fluctibus mersum prolevabit, et in portum divinæ clementiæ protulabit:" (*perducat*).<sup>2</sup> Eadem tabulæ imagine usus est Ambrosius.<sup>3</sup> Hieronymus etiam: "pœnitentia quasi secunda post naufragium miseris tabula."<sup>4</sup> Sacramenti rationem ei inesse, patrum iudicio, ex comparatione sæpe facta cum baptismo, sicut et ex miris quos ei tribuunt effectibus manifestum est. Ambrosium jam audivimus remissionem peccatorum contra Novatianos vindicantem, eo quod et baptizando remittant peccata: "nec interest, utrum per pœnitentiam, an per lavacrum, hoc jus sibi datum sacerdotes vindicent; unum in utroque ministerium est."<sup>5</sup> S. Hieronymus, ut probet ignorantia aliquando peccari, animadvertit homicidam, qui casu interfecerit hominem, ad urbem fugitivorum conferre se debere, "et tamdiu ibi esse, quamdiu sacerdos maximus moriatur, id est redimatur sanguine Salvatoris, aut in domo baptismatis, aut in pœnitentia quæ imitatur baptismatis gratiam, per ineffabilem clementiam Salvatoris, qui non vult perire quemque: nec delectatur mortibus peccatorum, sed ut convertantur et vivant."<sup>6</sup> S. Augustinus ait: "Si a catechumeno factum

(1) L. de pœnit. c. vii.

(2) Ibidem c. iv.

(3) Ep. ad Virg. lapsam.

(4) In cap. iii. Isaia.

(5) L. i de pœnit. c. vii. Jam *mysterium* scripsimus, quæ ratione laudatur a Perone, sed *ministerium* habet editio Basilensis anno MCCCXVIII.

(6) Dialog. contra Pelagianos L. i. fo. 125. edit. Basil. an. MXXVI.

est homicidium, baptismate abluitur; si a baptizato, pœnitentia et reconciliatione sanatur.’<sup>1</sup> Solitudinem maximam morientium quorundam ut accipiant baptismum, aliorum pœnitentiam, describens ait: “aliis baptismum flagitantibus, aliis reconciliationem, aliis etiam pœnitentiæ ipsius actionem, omnibus consolationem, et SACRAMENTORUM confectionem atque erogationem: ubi si ministri desint, quantum exitium sequitur eos, qui de isto sæculo vel non regenerati exeunt, vel ligati? quantus est etiam luctus fidelium suorum, qui eos secum in vitæ æternæ requie non habebunt?”<sup>2</sup>

163. Materiam et formam in pœnitentia non ejusdem generis ac in baptismo, vel eucharistia, exquirere licet, sed pro ratione judicii. Distinguunt Theologi materiam *circa quam* versatur ab ea ex qua constat. Versatur circa peccata veluti res judicandas, et quidem necessario circa peccata *mortalia* post baptismum admissa, quatenus hæc necessariò subjicienda sunt sacerdotali judicio in sacro tribunali, quæ idcirco dicuntur *materia necessaria*: peccata verò *venialia* possunt clavium potestate remitti, quamvis et aliis rationibus tolli queant, ideoque vocantur *materia libera*.<sup>3</sup> Mortalia jam hoc sacramento dimissa, libera materia etiam habentur.<sup>4</sup> Materia verò *ex qua* constat sacramentum, censetur a plerisque actus pœnitentis, contritio, confessio, et satisfactio, quibus sacerdotis absolutio, tamquam *forma*, accedit, eis tribuens vim et effectus sacramenti. *Quasi materia* vocantur illi actus, quia non sunt materia, instar aquæ, panis, vini, vel alterius rei sensibilis. Scoti discipulis placet materiam et formam in absolute totam agnoscere, *materiam* enim eam prædicant quatenus verba sonant, veluti voces aliquæ ore prolatae, *formam* vero quatenus veniam et remissionem significant. Ne Theologorum placitis detraherent Tridentini patres, *quasi materiam* vocarunt pœnitentis actus, satis habentes definire eos actus ad remissionem peccatorum requiri: “Si quis negaverit ad integram et perfectam peccatorum remissionem requiri tres actus in pœnitente, quasi materiam sacramenti pœnitentiæ, videlicet contritionem, confessionem et satisfactionem, quæ tres pœnitentiæ partes dicuntur . . . anathema sit.”<sup>5</sup> Præcesserat Eugenius IV. in decreto pro Armenis, quasi materiam actus pœnitentis designans.

(1) L. ii. de adulter. conjug. c. xvi.

(2) Ep. ad Honoratum CLXXX. novæ edit. CCXXXVIII. Oxonienses morientium consolationem apud suos verbis speciosis, quibus rerum veritas male respondet, sic describunt: “When he lieth sick upon his bed, does not his SAVIOUR ‘make all his bed in his sickness,’ when his Minister comes to him, *to receive the confession of his sins*, and to relieve his conscience of the ‘weighty’ things which press it down: and then, (if he humbly and heartily desire it,) by virtue of CHRIST’S authority committed to him, assures him of the pardon of all his Sins.” Vol. i. Tract. 17.

(3) Vide Conc. Trid. Sess. xiv. cap. v.

(4) Benedict. xi. in Decretali: *Inter cunctas*.

(5) Sess. xiv. Can. iv.

164. Absolutio, quæ forma habetur sacramenti, verbis deprecantis sacerdotis olim enuntiabatur, sicut etiamnum fit apud Græcos.<sup>1</sup> Indicativa forma sæculo duodecimo exeunte apud Latinos cœpit usurpari, qua scilicet se absolvere affirmat sacerdos, Christi fungens auctoritate. “*Te absolvo*” præcipua sunt verba, quæ prorsus necessaria sunt, et juxta multos sufficiunt, quamvis sint qui censeant “a peccatis tuis,” ad vim sententiæ definiendam requiri. Omnes conveniunt totam formam, quam præscribit Ecclesia esse ex præcepto recitandam. Ex varia forma liquet ad disciplinam quæ pendet ex Ecclesiæ arbitrio pertinere, utrum verbis deprecantis vel affirmantis sententia exprimatur. Cæterum utroque modo est judicii instar, sed verbis deprecantis rite enuntiatur, quia a sacerdote, non suo nomine, sed Dei, fertur. Hinc S. Leo deprecationi vim solvendi tribuit: “Multum enim utile ac necessarium est ut peccatorum reatus ante ultimum diem sacerdotali supplicatione solvatur.”<sup>2</sup>

165. “Si quis dixerit,” inquiunt patres Tridentini, “absolutionem sacramentalem non esse actum judiciale, sed nudum ministerium pronunciandi, et declarandi remissa esse peccata confitenti, modo tantum credat se esse absolutum . . . anathema sit.”<sup>3</sup> Equidem quum tota sacramenti ratio sit instar judicii, absolutio seu sententia sacerdotis absolventis est actus plane judicialis, quo pœnitentem veniæ judicat idoneum, eumque solvit culpæ ligaminibus, vere remittens Dei nomine peccata. Ministerium quidem exercet sacerdos, sed non nudum: habet enim potestatem veram remittendi peccata, non tantum declarandi ea esse remissa. Clavium metaphora potestatem veram aperiendi cœli januas peccatorum veniæ denotat. Patrum testimonia hanc vim sacerdotis sententiæ inesse plane probant.<sup>4</sup> Ejus beneficio frui nequeunt quos peccatorum haud pœnitet; sed non ideo sacerdos mere declarat veniam tribui pœnitentibus, eam enim Dei nomine vere largitur. Quod ad quorundam inter veteres scholæ doctores sententiæ attinet, qui sacerdotem declarare tantummodo dicebant peccatorum veniam, loquendi ratione peccasse videntur, potius quam sententiæ, quippe qui munus non suo sed Dei nomine a sacerdote peragi intelligerent. Cæterum nostrum non interest eorum vindicare placita.

166. Consuevit antiquitus absolutio canonica nonnisi pœnitentiæ functis concedi, nî mortis immineret periculum, aut gravis alia urgeret causa: absolutionem autem sacramentalem concessam fuisse rite pœnitentibus, arbitrio confessarii, ante peractam publicam pœnitentiam verosimile est: nec enim ulla suppetit ratio cur Ecclesia pœnitentes auxiliis gratiæ destitutos

(1) Inter preces quas ea occasione recitant, reperitur *Oratio condonatoria super confessos*. In hac dicitur: “ipse Salvator noster et Dominus Jesus Christus remittat tibi omnia quæ nunc coram tenuitate mea confessus es.”

(2) Ep. xcl.

(3) Sess. xiv. can. ix.

(4) Vide supra p. 313 et seq.

relinqueret, salutis discrimini obnoxios. Absolutionem sacramentalem qua pœnitentes Deo reconciliabantur a Canonica, qua Ecclesiæ restituebantur Communioni, et fidelium juribus, aperte distinguit Sozomenus Pœnitentiarii munus describens : “ Ad quem accedentes ii qui deliquerant, actus suos confitebantur ; ille verò pro cuiusque delicto quid aut facere singulos, aut luere oporteret, pœnæ loco indicens, absolvebat confitentes a seipsis pœnas criminum exacturos.”<sup>1</sup> En absolutionem sacramentalem ante pœnitentiam peractam. De absolutione canonica intelligenda sunt quæ deinceps refert de aliarum Ecclesiarum moribus. “ Ubi vero præstitutus dies advenit ; tamquam debito quodam persoluto, a pœna commissi sceleris liberatur, et reliquo Ecclesiæ populo sociatur. Hæc episcopi Urbis Romæ ab ultima vetustate ad nostram usque ætatem custodiunt.” Liquet igitur nec ipsam priorum sæculorum disciplinam iis suffragari qui contendunt pœnitentiam necessariò peragendam, antequam quis venia in sacro tribunali donetur. Mitis agendi ratio, qua vere pœnitenti statim ignoscitur, Christi nititur documentis et gestis ; paralytico scilicet statim indulsit, seque pastori, aberrantem ovem statim in ovile referenti, et Patri in osculum revertentis prodigi ruenti assimilavit : “ Cito proferte stolam primam.”<sup>2</sup> S. Chrysostomus in homilia quinque diebus ante festum Christi Nativitatis habita dicit : “ Neque mihi quisquam dixerit ; ‘ vereor, habeo conscientiam peccatis oppletam, sarcinam circumfero gravissimam.’ Sufficit enim horum quinque dierum tempus, si sobrius fueris, si attentus, si vigilaveris ut multitudinem peccatorum reddas contractionem. Nec illud perpende quod breve est tempus ; sed illud considera, quod benignus est Dominus : quandoquidem et Ninivitæ tridui spatio tantam iram Dei a se depulerunt. Nec obstitit illis temporis angustia ; sed animi promptitudo amplectens Domini benignitatem totum peragere valuit. Et meretrix illa brevi temporis momento, cum ad Christum accessisset ; omnia probra diluit.”<sup>3</sup> Merito igitur damnavit Sixtus IV. hanc Petri de Osma propositionem. “ Non sunt absolvendi pœnitentes, nisi peracta prius pœnitentia eis injecta.”<sup>4</sup>

167. Fides docet sacerdotalem potestatem requiri in pœnitentiæ ministro, quod scriptura et perpetua traditione nixi definierunt Tridentini patres. “ Si quis dixerit . . . non solos sacerdotes esse ministros absolutionis . . . anathema sit.”<sup>5</sup> “ Jus hoc,” inquit Ambrosius, “ solis permissum sacerdotibus est.”<sup>6</sup> “ Sic divinæ bonitatis præsidii ordinatis” inquit Leo M. “ ut indulgentia Dei nisi supplicationibus sacerdotum nequeat obti-

(1) Hist. Eccl. l. vii. c. xvi.

(2) Luc. xv. 22.

(3) Hom. de S. Philogonio.

(4) Eundem errorem damnavit Alex. VIII. an. 1690, prop. 16. 17. et 18. enunciatur, et Clemens XI. in Bulla *Unigenitus* prop. 87. 88.

(5) Sess. xiv. cap. x.

(6) De pœnit. l. 1. c. ii. n. 7.

neri !"<sup>1</sup> Diaconi olim, gravissima urgente necessitate, canonicam absolutionem impertiebantur, ut moribundi, scelera sua agnoscentes, pacem Ecclesiæ adipiscerentur, ejus suffragiis post mortem fruituri. Id liquet ex S. Cypriano : "Occurrendum puto fratribus nostris, ut qui libellos a martyribus acceperunt, et prærogativa eorum apud Deum adjuvari possunt, si incommodo aliquo et infirmitatis periculo occupati fuerint, non expectata præsentia nostra, apud presbyterum quemcumque præsentem, vel si presbyter repertus non fuerit, et urgere exitus cæperit, apud diaconum quoque exomologesim facere delicti sui possint; ut manu eis in poenitentiam imposita, veniant ad Dominum cum pace, quam dari martyres litteris ad nos factis desideraverunt."<sup>2</sup> Quæ coram laicis fiebat aliquando peccatorum confessio, deficiente sacerdote, in humilis animi et poenitentis indicium peragebatur.

168. Potestas remittendi peccata in ordinatione confertur, sed quum instar judicii exercenda sit, jurisdictio exigitur in eos in quos exerceatur: quapropter non valet absolutio sacerdotis qui jurisditione caret. Id explicant Tridentini Patres : "Quoniam igitur natura et ratio judicii illud exposcit, ut sententia in subditos dumtaxat feratur: persuasum semper in Ecclesia Dei fuit, et verissimum esse Synodus confirmat, nullius momenti absolutionem eam esse debere, quam sacerdos in eum profert, in quem ordinariam, aut subdelegatam non habet jurisditionem."<sup>3</sup> Jurisdictio illa ab episcopo necessario est impetranda, ut sacerdos, seu regularis, sive sæcularis, sæcularium, etiam sacerdotum, audiat confessiones.<sup>4</sup> Nonnumquam limites jurisditioni apponuntur, vel casus reservantur episcopis, et etiam Summo Pontifici, in quos proinde nil possunt cæteri. "Si quis dixerit episcopos non habere jus reservandi sibi casus, nisi quoad externam politiam, atque ideo casuum reservationem non prohibere quominus sacerdos a reservatis vere absolvat; anathema sit."<sup>5</sup> Errores synodi Pistoriensis hac de re reprobavit Pius VI. in Constitutione *Auctorem fidei*. Qui his inficiebantur contendebant definitionem Tridentinam respicere absolutionem a censuris; sed liquet eam omnem casuum reservationem complecti: in quos docet synodus sacerdotes nihil posse extra articulum mortis, quo in discrimine tollitur reservatio, ne hac occasione aliquis pereat.<sup>6</sup>

169. Jam verò poenitentiae tractatui ponendus est finis, plurimis prætermis-  
sis quæ ad Ethicæ spectant, vel quæ scholarum disputationibus permittun-  
tur. In poenitentia fidelibus commendanda magnum studium collocandum  
est; est enim summa prædicationis evangelicæ, ut animæ a peccatis ad virtu-

(1) Ep. cviii. cap. i.

(2) Ep. xiii.

(3) Sess. xiv. cap. vii.

(4) Sess. xxiii. cap. xv. de Reform.

(5) Sess. xiv. can. xi.

(6) Ibidem cap. vii. de Pœnit.

tem revocentur, Christi gratia, ejus sanguine in sacramentis abluendæ. Veterum exempla sæpius fidelibus proponenda sunt, ut discant peccata plangere, et se puniendo Dei prævertere vindictam. Pulchre S. Pacianus pœnitentes olim hortatus est: “flere in conspectu Ecclesiæ, perditam vitam sordida veste lugere, jejunare, orare, provolvi, si quis ad balneum vocet, recusare delicias; si quis ad convivium roget, dicere: ‘Ista felicibus; ego deliqui in Dominum, et periculator in æternum perire.’”<sup>1</sup>

(1) Parœnesi ad Pœnit.



# TRACTATUS XIII.

## DE INDULGENTIIS.

---

### PRÆNOTANDA.

1. Indulgentiarum occasione orta est Lutheri hæresis : quum enim Leo X. fidelium studium ad eleemosynas in templi S. Petri erectionem conferendas ut excitaret, obtulisset indulgentias, has promulgandi in Saxonia munus Tezelio ex ordine S. Dominici, et fratribus suis, demandatum est ab Alberto, Archiepiscopo Moguntino, quæ res Luthero aliisque ex Eremitis S. Augustini offensione fuit. Anno 1517 ad finem vergente, dum turbæ undique confluerent ad indulgentias comparandas, Lutherus Wittenbergi de iis habuit concionem, in qua de earum abusu questus est, et earum necessitatem impugnavit, nova proposita doctrina de fide qua justi efficiamur, nullo satisfaciendi onere gravati, nulla proinde pœnæ indigentes remissione. Credenti Christi justitiam imputari docuit, ad plenam peccatorum veniam. Calvinus ejus pressit vestigia, et æmulatus est calumniandi libidinem, omni prorsus contumelia indulgentias infamans. Præiverant utrique Waldenses et Wickliffitæ : secuti sunt Janseniani, quibus meritò accensetur episcopus infelix Pistoriensis, Riccius, cum sua synodo ; hi scilicet vim indulgentiarum evacuantes, de sola canonice pœnitentiæ relaxatione eas explicant. Oxonienses, indulgentias, quales nunc obtinent, dicunt recentiori ævo esse adinventas.<sup>1</sup>

2. Vera *indulgentiæ* notio, prout in documentis Ecclesiasticis usurpatur, est remissio pœnæ temporalis peccatis jam remissis debitæ, facta extra sacramentum ab eo cui clavium potestas est, et jus thesaurum Ecclesiæ dispensandi. Peccati remissio nulla indulgentiis conceditur, nam hæc pendet ex clavium usu in tribunali pœnitentiæ ; sed pœnæ peccatorum, quas sæpe manere luendas demonstravimus, indulgentiis remittuntur.

(1) Tract 38, vol. i.



Quod autem in nonnullis documentis veteribus tertia pars peccatorum indulgentia aliqua remissa dicatur, intelligendum est de pœnis temporalibus iis debita; qua ratione etiam explicanda quæ de peccatis omnibus remissis nonnumquam dicuntur.<sup>1</sup> Non aliam indulgentiarum notionem præbuit ipse Tezelius, uti liquet ex libello quem in usum præconum indulgentiarum edidit.<sup>2</sup>

3. *Plenaria* ea dicitur indulgentia qua tota pœna peccatis debita remittitur: *partialis*, ea est qua pœnarum pars tollitur. Notum est pœnitentibus per annos plurimos in operibus durioribus ut se exercerent olim injunctum; peccatis haud adeo gravibus leviori, puta quadraginta dierum, luendis pœnitentia. Indulgentia igitur quadraginta dierum solvit pœnam debitam peccato quod tot dies luere oportebat, juxta veterem canonum disciplinam. Sic indulgentia septem annorum tollit pœnam quam olim septem annos luere necesse erat.

4. Dispositio animi ad indulgentias lucrandas omnino necessaria est *status gratiæ*, nemo enim potest remissionem pœnæ temporalis, quæ peccatis debetur, consequi, peccati labe haud sublata. Exigitur etiam quædam Deo satisfaciendi voluntas, "bonis operibus inhærendo, commissos excessus plangendo," uti rescripsit Gregorius VII. Remigio episcopo, quam exquisiverat indulgentiam plenariam ei elargiens.<sup>3</sup> Hinc animadvertit scriptor Protestanticus Reinhard in omni indulgentiarum Bulla exigere, ut contritii confiteantur peccata qui eas lucrari cupiunt.<sup>4</sup>

5. Calumniantur qui dicunt indulgentiis dari licentiam peccandi;<sup>5</sup> vel remissionem *per anticipationem*, quasi jam remittantur pœnæ quæ peccatis in posterum patrandis debebuntur. Nil autem vetat concedere indulgentias, quarum beneficio in mortis discrimine positi frui valeant: nam non actu recipiunt veluti *per anticipationem* indulgentias hujusmodi, sed fiunt idonei ut eis in illo discrimine fruantur. Sic proficiscentibus ad bellum sacrum Urbanus II. indulgentiam plenariam concessit, quæ in

(1) Vide Perronem tract. de Indulgentiis. n. 37. nota.

(2) Instructions-Büchlein für die Prediger, zur Anpreisung des Ablasses, cit. a Audin Vie de Luther p. 135.

(3) L. I. ep. xxxiv.

(4) "Alle über den Ablass erschienenen päpstlichen Bullen setzen als Bedingung fest, dass der Ablass-suchende seine Sünden beichten, und bekennen, und eine Büssung übernehmen muss." Reinhard p. 277.

(5) *Taxam Cancellariis Romanæ* ex libello famoso quem Lugduni edidit anno 1564 Pinetus, Calvinianus homo, protulit nuperrime, post tot alios, præco e Baptistarum sectæ, ut probaret cuilibet flagitio veniam olim in Curia Romana tribui, imo licentiam illud patrandi dari consuevisse, certo soluto pretio: sed calumniam dissipavit episcopus Carolopolitanus, ostendens libellum illum nulla prorsus fide dignum, utpote ab adversario infenso in lucem primum editum, et rejectum prorsus et damnatum a Romanis tribunalibus. Siluisse Lutherum et Calvinum de consuetudine adeo fœda, si unquam extitisset, ultra omnem fidem est. Vide præsulis prælaudati egregiæ hac de re litteras.

mortis articulo valeret, dummodo tamen vere pœnitentes obirent: “ Qui autem in vera pœnitentia decesserint, et peccatorum indulgentiam et fructum æternæ mercedis se non dubitent habituros.”<sup>1</sup>

6. Colligi olim consuevisse eleemosynas occasione indulgentiarum promulgandarum in confesso est: unde orta est calumnia eas fuisse venales: sed quæ dabantur eleemosynæ in rei christianæ subsidium, non fuerunt pretium quo indulgentiæ comparabantur. Inter conditiones iis lucrandis necessarias eleemosynarum largitio locum habebat, quia est virtutis exercitium in Scripturis admodum commendatum. Cedebant in communem Ecclesiæ utilitatem, dabantur enim ad Ecclesias ædificandas, ad impensas bellorum sacrorum faciendas, ad orphanotrophia erigenda et ad alia plurima charitatis christianæ opera, necnon aliquando ad publicam utilitatem promovendam pontium extructione, et viarum refectione. Qui eas colligebant *Quæstores* dicebantur, quorum excessus Pontifices et concilia pluries reprobarunt, munusque tandem in concilio Tridentino prorsus abrogatum est. Cæterum inter conditiones indulgentiæ, quæ dicitur Jubilæus, eleemosynarum largitio adhuc recensetur, quas tamen unusquisque pro suo arbitrio in opus quodcumque pietatis vel charitatis tribuit, nemine eas colligente. Concesserunt etiam plures Summi Pontifices indulgentias societati in Galliis cœptæ et florenti jam in pluribus Europæ regnis, cujus membra singulis hebdomadibus obolum in Missionum Sacrarum auxilium conferunt. Quis hoc improbet?

(1) Conc. Claromont. De jure quo sacra illa bella gesta sunt, egit erudite satis et accurate Protestanticus præco B. M. Drake, e secta Methodistarum, districtui Natchetensi præfectus, in dissertatione quam habuit coram quodam Lyceo, Martii 12 die 1836. Inter cætera dicit: “ It is our deliberative opinion that no aggressive war was ever undertaken from more just and christian motives. It was not a war to propagate their faith, but to relieve their suffering brethren from persecution. The Turks had no more just right to the dominion of Palestine than the French. . . . We do not say that aggressive war is right, but in this case, it seemed to be the only way to prevent invasion. Had the European princes waited until they were attacked, the Turks could have easily conquered them all in detail.”

## CAPUT I.

## DE POTESTATE INDULGENTIAS CONCEDENDI.

7. Tridentinum concilium, plurimas quæ de indulgentiis agitabantur quæstiones consuli prætermittens, satis habuit definire Ecclesiam a Christo accepisse potestatem eas concedendi, et eas esse utiles: "Cum potestas conferendi indulgentias a Christo Ecclesiæ concessa sit, atque hujusmodi potestate, divinitus sibi tradita, antiquissimis etiam temporibus illa usa fuerit, sacrosancta Synodus indulgentiarum usum christiano populo maxime salutarem, et sacrorum conciliorum auctoritate probatum, in Ecclesia retinendum esse docet et præcipit, eosque anathemate damnat, qui aut inutiles esse asserunt, vel eas concedendi in Ecclesia potestatem esse negant."<sup>1</sup> Fidei igitur dogma est potestatem indulgentias concedendi a Christo Ecclesiæ concessam esse, easque esse utiles.

## PROPOSITIO.

*Est in Ecclesia potestas indulgentias concedendi, quæ et utiles sunt. Probatur I. ex Scripturis.*

8. Petro dictum est: "Tibi dabo claves regni cœlorum: et quodcumque ligaveris super terram, erit ligatum et in cœlis: et quodcumque solveris super terram, erit solutum et in cœlis."<sup>2</sup> Cæteris quoque Apostolis ligandi et solvendi potestas amplissimis verbis est data.<sup>3</sup> Illa solvendi potestas, clavium metaphora significata, auctoritatem denotat omnia tollendi quæ cœli ingressum impediunt. Ergo vi illorum verborum possunt Ecclesiæ præsules pœnas temporales remittere: hæ enim obstant ne anima cœlum ingrediatur.

9. Hujus potestatis exercitium erga Corinthium pœnitentem videmus. Quum Paulus eum incestus reum communione Ecclesiæ privasset, et Satanae tradidisset in interitum carnis, eum humiliatum jam et pœnitentem venia amplissima donavit, orans fideles ut benignius eum haberent. "Sufficit illi, qui ejusmodi est, objurgatio hæc quæ fit a pluribus: ita ut e contrario magis donetis, et consolemini, ne forte abundantiori tristitia absorbeat qui ejusmodi est. . . . Cui autem aliquid donastis, et ego: nam et ego quod donavi, si quid donavi, propter vos in persona

(1) Sess. xxv. in decreto de indulgentiis.

(2) Mat. xvi. 19.

(3) Mat. xviii. 18.

Christi"—καὶ γὰρ ἐγὼ ὁ πεχάρισμαι, εἰ τι πεχάρισμαι δι' ὑμᾶς, ἐν προσώπῳ Χριστοῦ.<sup>2</sup> Plenam delicti veniam Christi auctoritate donare se significat; quod culpam jam pœnitentia sublatam indicat, et pœnas temporales cum censura canonica remissas ostendit. Datam ab Apostolo non tantum Ecclesiæ communionem externam, sed etiam plenissimam quamdam indulgentiam Christi nomine inde colligere est.

*Patres damus interpretes.*

10. S. JOANNES CHRYSOSTOMUS agnovit Apostolum veniam largitum esse quam ipsa pœnitentiæ vehementis ardua opera haud merebantur: "quamvis peccatum confessus fuerit, ipsiusque pœnituerit, ostendit tamen eum non tam pœnitentiæ opera, quam gratia et beneficio veniam consequi. Unde subdit: 'ob idque donetis et consolemini;' et quod sequitur idem declarat: non enim, inquit, quod id promereatur, nec quod eam quam par sit pœnitentiam præstiterit; sed quia infirmus est, idcirco hoc peto: 'ne forte abundantiori tristitia absorbeatur, qui est ejusmodi:' quæ verba sunt hominis magnæ pœnitentiæ testimonium ipsi tribuentis, nec eum in desperationem ruere sientis . . . hincque docemur, quod non solum ad peccatorum naturam, verum etiam ad mentem habitumque peccantium oporteat moderari pœnitentiam."<sup>3</sup> Liquet Chrysostomum censere Apostolum de pœnitentiæ severitate aliquid remisisse, ideoque de pœna ob quam luendam pœnitentia erat peragenda.

11. Item THEOPHYLACTUS: "Pulchre autem dixit Apostolus *donare* attendit enim, quod non tantum ex pœnitentia sua, quantum ex gratia et donatione dimissionem recipiat."<sup>3</sup>

12. S. PACIANUS hoc objecit exemplum Novatiano homini: "vides Apostoli indulgentiam, proprias etiam sententias temperantem? vides mitissimam lenitatem, longe a vestro supercilio separatam? longe a Novatiani fronte dissimilem, communi vero vitæ ac saluti omnium consulentem."<sup>4</sup>

*Probatur II. ex perpetua Ecclesiæ consuetudine.*

13. Sæculis secundo et tertio sæpissime martyrum rogatu, precibus scilicet eorum qui fidei causa supplicium tulerant, relaxabant episcopi leges pœnitentiæ, reos ampliori venia donantes. TERTULLIANUS dicit: "Pacem quidam in Ecclesia non habentes, a martyribus in carcere exorare consueverunt."<sup>5</sup> S. CYPRIANUS pluribus in locis testatur hanc esse consuetudinem, et modum adhibendum orat, ne temere quid fiat.<sup>6</sup> Nicænum concilium de pœnitentibus statuit: "Licebit episcopo de his aliquid humanius

(1) II. Cor. ii. 6.

(2) Hom. iv. in ii. Ep. ad Corinth.

(3) In locum.

(4) Ep. iii. ad Sympronianum.

(5) L. ad Martyr. c. i.

(6) Ep. xiii. ad Presbyteros et Diaconos Carthagin. Ep. x. ad Martyres. L. de Lapsis.

statuere.<sup>1</sup> Sic et Ancyranum,<sup>2</sup> et Laodicenum II.,<sup>3</sup> et Carthaginense IV.<sup>4</sup> Patres quarti et quinti sæculi hanc potestatem passim in episcopis agnoscunt, ut canonum qui pœnitentiæ opera præscribebant severitatem relaxent. Sæculo XI., Urbanus II., in Concilio Claromontano omnem pœnam remisit illis qui, devotionis et fidei studio, laboribus et periculis pro terra sancta recuperanda sese objicerent. Idem indulserunt plures alii pontifices. S. Bernardus indulgentias ab Eugenio III. concessas promulgavit tanto cum fidelium studio ad eas lucrandas, quod urbes et castella vastarentur, plerisque ad bellum sacrum se conferentibus.<sup>5</sup> Sæculo XII. indulgentiæ quasdam Ecclesias visitantibus concessæ sunt. Jam verò constat pœnas a canonibus eo consilio impositas fuisse ut Deo satisfaceret pœnitentium operibus; ergo relaxatis hac in re canonibus indulgentiarum concessione, remissa est præsulum auctoritate pœna quæ alias luenda erat.

14. Indulgentiarum usum maxime salutarem esse liquet ex eo quod pia foveant opera, quæ ad eas consequendas injunguntur, et contritionem cordis omnino exigant, et virtutum uberes fructus pariant, uti ex Jubilæi celebratione, qui solemnior est indulgentia, ubique innotuit.

#### OBJECTIONES SOLVUNTUR.

15. *Obj.* 1. Paulus Corinthium ab excommunicatione absolvit, quin pœnam aliquam remiserit, eique dicit donasse se, si vere aliquid donaverit, Christi nomine, cæterorum fidelium causa, quos secum donare innuit.

*Resp.* Apostolus Corinthium tradiderat Satanæ in pœnam delicti, eumque pœnitentem plenissima donavit venia. Merito igitur censendus est omnem remisisse pœnam temporalem, quum Christi nomine egerit. Dubitare se haud significat iis vocibus: "si quid donavi;" sed utitur Græca loquendi ratione, cujus vis est: "quicquid tandem donaverim;" modeste de potestatis suæ exercitio, et largitione veniæ loquens. Motus est utilitatis omnium studio ad veniam illam concedendam; novit enim indulgentiam pœnitenti præstitam in aliorum cessuram commodum et profectum. Eos ad donandum hortatus est, quia omnibus facta erat injuria, crimine quod omnibus probro erat, et omnes sibi mente jam adseiverat, plexurus gladio spiritali prævaricatorem, omnibus veluti probantibus. Jam igitur ospit ut injuriæ obliviscantur, et jura communionis et consortii fraterni, quæ ex Apostoli ipsius mandato subtraxerant, restituant. Cæterum aliter Apostolus donat veniam, Christi personam gerens.

(1) Can. xii.

(2) Can. v.

(3) Can. ii.

(4) Cap. lxxv.

(5) Bernard. Ep. cccxvi. L. ii. de consid. c. i.

16. *Obj. 2.* Christus ligandi et solvendi potestatem pollicens, retinendi quoque et remittendi peccata, illam distinctionem inter culpam et pœnam non statuit, nec inter absolutionem sacramentalem a culpa, et remissionem pœnæ extra sacramentum.

*Resp.* Christus amplissimis verbis auctoritatem tradidit quæ variis rationibus exercenda est. Distinctionem culpam inter et pœnam necesse non erat statuere, innotuerat enim ex divina œconomia erga peccatores in Scripturis veteribus relata. Cæterum verbis specialibus tradidit potestatem remittendi peccata, quæ culpæ reatum directe respicit, pœnas nonnisi indirecte. Quum autem culpæ remissio gratiam et justitiam secum ferat, sacramentum habetur ritus quo ea contingit : relaxatio verò pœnæ potest extra sacramentum fieri, quia fit absque nova gratiæ collatione. Igitur ex verbis Christi recte inferimus pastores Ecclesiæ posse culpas et pœnas remittere, præsertim quum præcepto ligent ad pœnas satisfactionis instar luendas.

17. *Obj. 3.* Martyres pacem lapsis tribuentes, vel impetrantes, communionem Ecclesiæ, non verò pœnæ alicujus coram Deo remissionem iis obtinuerunt. Eos etiam graviter increpuit Cyprianus ob eversam hac ratione disciplinam, imo Dei legem violatam.

*Resp.* Pacem et communionem Ecclesiæ cum omnibus quæ amiserant defectione jura martyres lapsis impetrabant. Quoties hæc, justa urgente causa, dabantur præsulis auctoritate, ea agnovit Cyprianus apud Deum valere: “qui libellos a martyribus acceperunt, et prærogativa eorum apud Deum adjuvari possunt, si incommodo aliquo et infirmitatis periculo occupati fuerint, non expectata præsentia nostra apud presbyterum quemcumque præsentem . . . . exomologesin facere delicti sui possint ; ut manu eis in pœnitentiam imposita veniant ad Dominum cum pace, quam dari martyres litteris ad nos factis desideraverunt.”<sup>1</sup> Pax igitur plena erat venia, quando dabatur vere pœnitenti, et æquam ob causam. Cæterum leviter et temere oblata disciplinæ et Evangelii vigori adversabatur ; quapropter merito questus est sanctus ille præsul de nimia martyrum quorundam in porrigendis precibus ad eam impetrandam facilitate.

18. *Obj. 4.* Episcopi canonum relaxantes severitatem nihil de Dei juri-  
bus in peccatores remiserunt ; sed christiani hominis privilegia restituerunt pœnitenti, indiciis eximiis doloris datis.

*Resp.* Quum constet ex libris pœnitentialibus et ex patrum scriptis, pœnas a canonibus præscriptas satisfactionis Deo oblatae habuisse rationem ; canonum hac ex parte relaxatio pœnarum peccatis debitarum remissio censenda est. Pœnitentibus, qui majori doloris vi plangebant admissa, venia merito dabatur facilius, utpote magis idoneis ei suscipiendæ : quorum conatus potestatis a Christo datæ exercitio adjuvare præstabat.

19. *Obj. 5.* Indulgentiarum, quales in veteri Ecclesiæ usurpabantur,

(1) Ep. xiii. ad presbyteros et diaconos Carthag.

usus nullus est, abrogata pœnitentiæ publicæ disciplina: supervacaneum quippe est relaxare leges quæ a sæculis pluribus haud vigent.

*Resp.* Indulgentiarum usus non fuit, uti ostendimus, mera relaxatio canonum, sed remissio Christi nomine facta pœnæ temporalis, ad quam luendam opera pœnitentiæ a sacris canonibus præscripta sunt. Eadem viget nunc ratio, quum divina justitia nullis temporum vicibus varietur. Nil igitur interest leges ecclesiasticas abrogatas diu fuisse, quum indulgentia remittat pœnam peccatis debitam.

20. *Obj.* 6. Indulgentiarum origo a satisfactionum severiorum quæ olim pœnitentibus injungebantur relaxatione petenda est: "Remissio, quæ talibus fiebat, indulgentia vocabatur. Ubi autem satisfactiones ad Deum transtulerunt, ac compensationes esse dixerunt, quibus se redimant homines a judicio Dei, simul etiam indulgentias eo traxerunt, ut essent expiatoria remedia, quæ nos pœnis meritis liberat." Ita Calvinus.<sup>1</sup>

*Resp.* Constat ex Cypriani, Augustini, et cæterorum patrum testimoniis satisfactiones illas ad Deum semper referri consuevisse, quæ idcirco viguisse noscuntur Tertulliani ætate, antequam pœnitentiæ exercitia canonibus definita fuerint. Antiquissimum igitur morem esse indulgentias concedendi fateri debet Calvinus, qui eas cum pœnitentiæ disciplina connexas agnoscit. Eas verò habere vim quamdam expiandi ex earum relatione ad satisfactiones, quarum locum supplent, manifestum est.

21. *Obj.* 7. Indulgentiæ olim extiterunt venales, unde locus est conjiciendi eas ex turpi lucri cupidine excogitatas.

*Resp.* Aliquando, uti supra diximus, concedebantur indulgentiæ iis qui eleemosynas in rei christianæ subsidium sponte conferrent; quod non erat venales eas exponere, sed gratiæ et beneficii spiritalis intuitu fideles ad opera charitatis allicere. Sicut in Evangelio magna promittuntur præmia eleemosynas facientibus, ita visum est præsulibus Ecclesiæ thesauros spirituales effundere, ut fideles ad eleemosynas largiendas excitarentur. Sic concilium Triburiense anno 895 permisit iis qui jejunare non poterant, juxta canonum vigorem, ut eleemosynarum largitione jejunia veluti redimerent; exigens tamen ut impedimento cessante jejunarent: "postquam de itinere domum revertatur, aut de infirmitate liberetur, prædictas ferias non redimat, sed statuto tempore pœniteat."<sup>2</sup> Abbas Regino in collectione manuscripta redemptiones illas recensuit: "Si quis forte non potuerit jejunare, et habuerit unde possit redimere, si dives fuerit, pro septem hebdomadibus det solidos viginti," etc.<sup>3</sup> Occasione bellorum quæ susceperunt christiani crucesignati, indulgentiæ oblatae sunt cuicumque qui "pro sola devotione, non pro honoris, vel pecuniæ adeptione, ad liberandam Ec-

(1) Inst. l. iii. c. v. n. 5.

(2) Can. lvi.

(3) Apud Drouenium de re Sacramentaria l. vi. qu. vii. de Indulgentiis.



clesiam Dei Hierusalem profectus fuerit ;”<sup>1</sup> et etiam omnibus pecuniam in belli sacri impensas, vel milites suppeditantibus. Æquum visum est ut qui fidei studio pecuniam conferrent, haud omni carerent mercede apud Ecclesiam, ideoque et pœnitentiæ severitas his mitigata est. Simili ratione indulgentiæ postea concedebantur iis qui sponte conferebant eleemosynas in Ecclesiarum erectionem, vel in alia pietatis opera: quæ tamen numquam in alicujus privatam utilitatem cedere debebant. Hodie ubique terrarum exquiruntur a fidelibus subsidia in pia opera, absque illa indulgentiæ pollicitatione: quæ quidem si adjiceretur, non desinerent eleemosynæ esse voluntariæ, et Deo acceptæ. Cæterum ob Quæstorum abusus, qui vel indulgentiarum vim exaggerabant, vel nimis importunos se præbuerunt in eleemosynarum petitione, munus illud a concilio Tridentino abrogatum est, et nullæ indulgentiarum occasione jam colliguntur eleemosynæ. “Abusus vero,” inquit, “qui in his irrepserunt, et quorum occasione insigne hoc indulgentiarum nomen ab hæreticis blasphematur, emendatos et correctos cupiens, præsentì decreto, generaliter statuit, pravos quæstus omnes pro his consequendis, unde plurima in christiano populo abusum causa fluxit, omnino abolendos esse.”<sup>2</sup>

22. *Obj.* 8. Infamis prorsus fuit olim indulgentiarum nundinatio, nam vendebatur a pontifice jus colligendi eleemosynas fidelium, quæ proinde in privati hominis, emptoris scilicet, cedebant utilitatem.

*Resp.* Non ea fuit consueta ratio eleemosynas colligendi; sed quum urgeret necessitas, non iniquum Leoni X. visum est a divite statim recipere summam templi erectioni impendendam, quam hic ex eleemosynis fidelium colligendam sperabat. Non ideo mutata est ratio indulgentiarum, fideles enim sponte offerebant eleemosynas, quæ divitem indemnem redderent de soluta Ecclesiæ causa pecunia. In privatam utilitatem non cedebant, quamvis contingere posset ut cui locatum erat jus eas colligendi aliquid lucraretur, quod periculum in se susceptum compensaret. Cæterum magna secum trahere incommoda, et speciem malam præseferre illam agendi rationem haud gravamur fateri:<sup>3</sup> nostrum enim non interest quicquid occasione indulgentiarum factum fuerit vindicare, sed ipsam eas elargiendi potestatem, et earum utilitatem.

23. *Obj.* 9. Bonis moribus adversatur indulgentiarum usus, qualis in Ecclesia Romana obtinet, levissimis enim actibus plurimorum dierum, imo et annorum indulgentiæ conceduntur, quæ adeo multiplicantur, præsertim

(1) Conc. Claromontan. an. 1095.

(2) Sess. xxv. Decr. de Indulgentiis.

(3) “Che poi questo ritratto dell’ Indulgenze fosse venduto ad appaltatori particolari, ha parimente sconcia sembianza; e tale, ch’ io confesso ingenuamente, essersi dovuto più tosto divorare ogn’ incommodo, che dar questo scandalo, o attivo, o passivo ch’ egli si fosse, a Cristiani. Ma considerato l’ affare in se stesso, chi è perito dell’ umano commercio, vedrà come a pena si poteva tener altro modo.” Pallavicini, Istoria del Concilio di Trento l. i. cap. iii. p. 56.



in regionibus catholicis, ut cœlum modico mercentur incolæ, tantis ditati beneficiis.

*Resp.* Morum fovet integritatem et sanctitatem indulgentiarum usus, eas enim nemo lucrari valet qui animo haud detestetur peccatum, et Dei gratia non fruatur. Quod autem actibus qui levissimi in se videntur indulgentia aliquando amplissima adnectatur, contingit plerumque ob specialia rerum adjuncta. Sic osculum crucis in amphitheatro Flaviano erectæ dierum ducentorum pœnitentiam solvit, quia specialis affectus erga Christum Dominum monstratur ipso quo martyrum sanguis effusus est loco. Magnum sensum pietatis hac ratione excitandum sibi polliciti sunt merito pontifices supremi. Cæterum plurimæ indulgentiæ circumferuntur quæ incertæ sunt, vel plane supposititiæ. Quod ad copiam in catholicis regionibus oblatam attinet, majora illis salutis subsidia tribui ostendit, quam rationem in ipsa Dei erga genus humanum œconomia adorare oportet: sed quum indulgentiæ temporales pœnas tantum respiciant, cœli gaudia non alia lege ubique promittuntur, quam ut fide, spe, et dilectione colamus Deum, omnibus cupiditatibus compressis: “abnegantes impietatem et sæcularia desideria, sobrie et juste, et pie vivamus in hoc sæculo.”<sup>1</sup> Certe facilioribus conditionibus cœlum pollicentur Protestantes, satisfactiones omnes et pœnitentiæ opera rejicientes.

24. *Obj.* 10. Illa indulgentiarum doctrina ingeniose quidem excogitata est ad argumentis quibus impugnantur satisfaciendum: re autem vera plerisque persuasum est omnia sibi licere, indulgentia impetrata, quo pacto plurimi in vitiis consenescent, indulgentiæ plenariæ sub mortem fiducia.

*Resp.* Quotquot sunt Catholici per orbem norunt absque pœnitentia et morum emendatione nullam sibi sperandam esse salutem, nihilque per se malum posse ulla auctoritate licere. Nemo adeo ignarus reperiri poterit, qui indulgentiæ consequendæ spe vitiis inhæreat: quamvis sint plurimi qui divinæ misericordiæ, quam verbis amplissimis efferunt sacri scriptores, fiducia peccare pergant. Profecto ipsa plebs catholica optime intelligit indulgentias ea præsertim niti conditione, ut corde contrito deponantur confitendo peccata. Quod si forent qui ignorantia vel superstitione aliqua abuterentur indulgentiis, non est cur legitimus earum usus tollatur.

25. *Obj.* 11. Indulgentias lucrandi studio virtutum negligitur exercitium, adeo ut tota sit sollicitudo in confessione peragenda, et suscipienda communione, et paucis recitandis precibus.

*Resp.* Qui hæc munia rite obit ad virtutes exercendas impellitur: quod si quis in iis consistat, neglectis virtutibus, culpandus erit, quin ideo damandæ sint indulgentiæ. Cæterum conditiones quibus nituntur, virtutum exercitium exigunt: et experientia constat tunc maxime has florere, dum indulgentiæ promulgantur.

26. *Obj.* 12. Si satisfactiones divino jure præcipiantur, uti tenent Catholici, eas remittere nequit Ecclesia.

(1) Tit. ii. 12.

*Resp.* Deus pœnas exigit temporales a peccatore, qui idcirco in pœnitentiæ opera incumbere debet: sed quum remissionis facultatem Christus Apostolis dederit, ipsius auctoritate tollitur debitum ad quod solvendum opera illa peragenda erant. Igitur divino juri non derogatur, quum Dei nomine fundamentum satisfactionum tollatur: sicut quisque tenetur proximo suo quod debet solvere; sed remissione debiti sponte facta a creditore, eo onere immnis fit debitor. Cæterum non omnis satisfaciendi tollitur indulgentiis necessitas, sed adjuvatur infirmitas nostra, ut quod nobis deest, ex thesauro Ecclesiæ suppleatur.

27. *Obj.* 13. Indulgentiæ, quales hodie prædicantur, omnino diversæ sunt ab iis quæ Lutheri tempore, et sæculis prioribus consueverunt promulgari: hæ enim dicebantur immania quæque flagitia remittere.

*Resp.* Ex libello Tezelii, quem laudavimus, constat eandem traditam ab ipso indulgentiarum notionem; nec eum monstra illa ac portenta unquam locutum. Consueverunt quidem indulgentiarum præcones verbis Ezechielis plenam polliceri veniam flagitiosissimo cuique, dummodo eum vere pœniteret.

## CAPUT II.

## DE INDULGENTIARUM VIRTUTE.

28. Indulgentias olim relaxasse pœnitentiæ canones apud omnes in confesso est: eas verò pœnam divinæ justitiæ debitam coram Deo remittere præfracte negant hæretici. Lutherus dixit: "Indulgentiæ his, qui veraciter eas consequuntur, non valent ad remissionem pœnæ pro peccatis actualibus debitæ apud divinam justitiæ."<sup>(1)</sup> Simili errore Janseniani plures laborant, inter quos auctor synodi Pistoriensis, in qua docetur: "indulgentiam secundum suam præcisam notionem aliud non esse quam remissionem partis ejus pœnitentiæ, quæ per canones statuta erat peccanti."<sup>(2)</sup> Hanc propositionem sic intellectam: "quasi indulgentia præter nudam remissionem pœnæ canonicæ, non etiam valeat ad remissionem pœnæ temporalis pro peccatis actualibus debitæ apud divinam justitiæ," damnavit Pius VI., tamquam falsam, temerariam, Christi meritis injuriosam, ac dudum in articulo 19<sup>o</sup> Lutheri damnatam. Proxime ad fidem accedit doctrina, qua indulgentiæ censentur pœnas temporales apud divinam justitiæ remittere, nam si de sola canonicarum pœnarum relaxatione ageretur, haud ægre assentirentur ipsi novatores.

## PROPOSITIO.

*Indulgentiæ valent ad remissionem pœnæ temporalis pro peccatis actualibus debitæ apud divinam justitiæ.*

*Probatur I. ex Scripturis.*

29. Indulgentiæ conceduntur, uti jam probavimus, vi potestatis clavium, qua solvuntur peccatorum ligamina et cœli panduntur januæ. Ergo valent ad pœnæ temporalis peccatis actualibus debitæ apud divinam justitiæ remissionem. Equidem juxta probata, ratum habetur in cœlis hujus potestatis exercitium, quod in persona Christi a præsulibus Ecclesiæ fit.

*Probatur II. ex Patribus.*

30. TERTULLIANUS, ad Montanistas delapsus, martyrum intercessionem pro mœchis impugnat: "Quis permittit homini donare, quæ Deo reservanda sunt? Sufficiat martyri propria delicta purgasse."<sup>(3)</sup> Censuit ergo Catholicos credere veniam, martyrum intercessione datam, ad delictorum

(1) Art. xix. a Leone x. damn.

(2) Constitutio quæ incipit: *Auctorem fidei*.

(3) Lib. de Pudicitia cap. ult.

purgationem dirigi. S. CYPRIANUS, loco jam adducto, docet fideles prærogativa martyrum apud Deum adjuvari posse.

*Probatur III. ratione theologica.*

Indulgentiæ quæ pœnas canonicas remitterent pœna apud Deum haud remissa, magis obessent, quam prodescent, quippe quæ pœnitentia opera tollerent, pœna manente. Præterea conceduntur indulgentiæ abrogata jam a pluribus sæculis disciplina canonica. Ergo ad pœnam ipsam apud Deum remittendam diriguntur.

OBJECTIONES SOLVUNTUR.

31. *Obj. 1.* Indulgentia olim erat remissio pœnæ canonicæ: ergo idem nunc sentiendum; nec proinde aliquam pœnam apud divinam justitiam tollit.

*Resp.* Indulgentia post pœnitentiæ disciplinam inductam relaxabat canones, simulque remittebat pœnam coram Deo ob quam luendam canones pœnitentiæ opera præscribebant. Ante latos canones, et post eorum abrogationem, indulgentiæ vis in sola pœnæ apud Deum remissione ponenda est: nec enim relaxatur lex, quæ jam est abrogata.

32. *Obj. 2.* Formulæ adhuc usurpatæ ostendunt canonum relaxationem etiamnum fieri indulgentiarum concessione, nam temporis spatiorum pœnitentibus olim adsignatorum fit mentio. Sic indulgentia septem annorum et totidem quadragenarum ad disciplinam pœnitentiæ plane refertur.

*Resp.* Consuevit Ecclesia veteres formulas retinere, veluti pristinæ ætatis monumenta pretiosa. Ideo autem concedit indulgentias hujusmodi verbis, ut intelligatur pœnas temporales remitti, quæ per ea temporis spatia, juxta canones, essent luendæ.

33. *Obj. 3.* Concilium Tridentinum declaravit se cupere moderationem servari in indulgentiis concedendis, ne disciplina enervetur. Jam verò si tota canonum disciplina de pœnitentiæ operibus abrogata sit, inanis est metus ne enervetur.

*Resp.* Disciplinam Ecclesiæ suo tempore vigentem intellexerunt patres Tridentini, canones autem pœnitentiæ a quinque saltem sæculis desierant servari. Nimia facilitate indulgentias concedendi pœnitentiæ exercitia, quæ sponte suscipiuntur, vel a sacerdotibus in sacro tribunali injunguntur negligi possent, ideoque moderationem in iis concedendis servandam cupiebat concilium.

34. *Obj. 4.* Fervori pœnitentium canones veteres aliquid indulgendum censuerunt, quum e contra hodierna tempestate indulgentiæ ratio præbeatur, quod deferbuerit pœnitentiæ studium, nec spes sit pœnitentiæ ardua exercitia suscipienda. Ergo indulgentiæ notio tota mutata est; apud veteres quippe significabat relaxationem pœnæ canonicæ in foro externo: apud recentiores est remissio pœnæ apud Deum, subsidii instar infirmitati præstita.

*Resp.* Fervoris poenitentium causa meritò relaxata est severitas disciplinae, ut quo majori flagrabant studio Deo satisfaciendi, majorem experirentur Ecclesiae liberalitatem. Cæterum et aliis sæpius indulserunt episcopi, precibus martyrum moti, quod argumentum est de poenis apud Deum remitti. Monet Chrysostomus Apostolum Corinthio indulgentem infirmitatis ejus habuisse rationem: quam maximopere vult attendendam in peccatoribus sanandis. Nil mirum si ob rationes fere inter se oppositas Ecclesiam potestatem sibi datam exercent, pro personarum et temporum diversitate, ut fervidos præmio muneret, infirmis vero subveniat. Hæc œconomia sapiens et provida, non aliam veteribus, aliam hodiernis præsulibus Catholicis indulgentiarum notionem placuisse probat, utrisque enim vera habita est poenæ apud Deum remissio, parcius vel largius pro adjunctorum varietate tributa.

#### ANIMADVERSO.

35. Moderationem quam commendarunt patres Tridentini in indulgentiis concedendis desiderari queruntur nonnulli, ob magnam earum quæ plenariæ sunt copiam, quæ hodie habetur. Cæterum supremorum Ecclesiae rectorum est judicare qui modus adhibendus sit pro temporum diversitate. Studium fidelium ad eas lucrandas videtur accensum recentioribus his temporibus, quod pontifices fovendum duxerunt, ut eo magis claresceret Ecclesiae auctoritas ab hæreticis frustra impugnata, et ut sacramentorum susceptorum frequentia, et bonorum operum exercitio Deus honoraretur.

## CAPUT III.

## DE THESAURO ECCLESIAE.

36. Clemens VI. in constitutione quæ incipit: “Unigenitus Dei Filius.” dicit: “thesaurum militanti Ecclesiæ acquisivit . . . . ad cuius quidem thesauri cumulum B. Dei Genitricis, et omnium electorum a primo justo usque ad ultimum merita adminiculum præstare noscuntur.” Lutherus in hanc doctrinam insurrexit, dicens: “Thesauri Ecclesiæ, unde Papa dat indulgentias, non sunt merita Christi et sanctorum.”<sup>1</sup> Synodus Pistoriensis docuit “Scholasticos suis subtilitatibus inflatos invexisse thesaurum male intellectum meritorum Christi, et Sanctorum, et claræ notioni absolutionis a pœna canonica substituisse confusam, et falsam applicationis meritorum ;” quam propositionem intellectam quasi thesauri Ecclesiæ, unde Papa dat indulgentias, non sint merita Christi et Sanctorum, falsam, temerariam, Christi et Sanctorum meritis injuriosam, dudum in articulo XVII. Lutheri damnatam, reprobavit Pius VI.<sup>2</sup>

37. Abundantem esse satisfactionem a Christo præstitam, res est apud omnes explorata: quapropter thesauro infinito ditasse Ecclesiam credendus est. Attamen merita Sanctorum adminiculum præstare dicuntur, quia quatenus satisfactiones sunt, per Christum Deo Patri offeruntur ad luendas pœnas aliis debitas. Totum meritorum præmium sanctos accepisse constat; sed quum plures vitæ illibatæ sponte sibi inflixerint pœnas, vel supplicia et mortem propter Christum passi sint, vis quædam satisfaciendi in iis reperitur, quæ aliis communicari queat: illud scilicet est sanctorum in Christo consortium, ut sit communicatio satisfactionum. Ad fidem proxime accedit doctrina de thesauris quam exposuimus.

## PROPOSITIO.

*Thesauri Ecclesiæ, unde dantur indulgentiæ, sunt merita Christi et Sanctorum.*

*Probatur ex ipso Ecclesiæ sensu et doctrina.*

38. Quæ de indulgentiis Clemens VI. tradidit constitutione prælaudata, ex sensu et traditione Ecclesiæ derivata sunt, et ejus consensu agnita.

(1) Art. xvii.

(2) Constit. Auctorem Fidei.

Porro consona sunt iis quæ de Sanctorum operibus sentire juvat, habitatione virtutis quam ex Christi gratia derivant, et ex communione qua omnia Christi membra inter se gaudent. Re quidem vera SSmæ Virginis omni labe immunis cruciatus, anima gladio transfixa; S. Joannis Baptistæ austeram vitam, et Sanctorum plurimorum propter Christum labores vim quamdam expiandi et satisfaciendi, illis procul dubio haud necessariam, habent: quam æquum est, et divinæ misericordiæ consonum, in nostram cedere utilitatem. Ecclesiæ autem est omnibus suis filiis consulere, clavium potestate, et æqua thesaurorum quibus datur dispensatione.

39. In operibus quæ justi pro aliis suscipiunt, et Deo offerunt, vel ut convertantur peccatores, vel ut avertantur pœnæ a justis, communicationis hujusmodi exemplum videre est. Sic AMBROSIVS de Corinthiis agens ait: "Jam tunc igitur Apostolus reddendum sacramentis judicavit cælestibus, si purgari se ipse vellet. Et bene ait, *expurgate*; velut enim operibus quibusdam totius populi purgatur, et plebis lacrymis abluatur, qui orationibus et fletibus plebis redimitur a peccato, et in homine mundatur interiore. Donavit enim Christus Ecclesiæ suæ, ut unum per omnes redimeret, quæ Domini Jesu meruit adventum, ut per unum omnes redimerentur."<sup>(1)</sup> Et iterum: "Consideremus ipsum Apostoli sermonem: '*expurgate*,' inquit, '*vetus fermentum, ut sitis nova conspersio, sicut estis azymi.*' Sive quod tota Ecclesia suscipiat onus peccatoris cui compatiendum et fletu, et oratione, et dolore est: et quasi fermento ejus se totam conspergat; ut per universos ea quæ superflua sunt in aliquo pœnitentiâ agente virilis misericordiæ, aut compassionis velut collativa quadam admixtione purgentur."<sup>(2)</sup>

#### OBJECTIONES SOLVUNTUR.

40. *Obj. 1.* Injuria fit Christo, sanctorum meritis, seu satisfactionibus, tamquam thesauri sui adminiculis adhibitis: "qui enim poterat scèdus profanari Christi sanguis, quam dum negatur sufficere ad peccatorum remissionem, ad reconciliationem, ad satisfactionem, nisi velut arecentis et exhausti defectus aliunde suppleatur et sufficiatur?"<sup>(3)</sup> Ita Calvinus.

*Resp.* Satisfactiones Sanctorum non adjiciuntur, veluti ad defectum supplendum; sed juxta divinam œconomiam quæ inter Christi famulos consortium sanctum, et communicatio satisfactionum statuitur, quarum tamen vis omnis a Christi gratia et meritis derivatur. Equidem Apostolus

(1) De Pœnitentiâ l. 1. c. xv. n. 80.

(2) Ibidem n. 81.

(3) Inst. l. iij. c. v. 2.

absque Christi injuria dixit: "Adimpleo ea quæ desunt passionum Christi, in carne mea, pro corpore ejus, quod est Ecclesia."<sup>1</sup> Quæ igitur Calvinus congerit de remissione peccatorum martyrum sanguini tributa, et de sanctificatione a martyribus perfecta, carent fundamento, et a libidine calumniandi proficiscuntur.

41. *Obj.* 2. "Præclare adversus hæc sacrilegia Leo Romanus episcopus ad Palæstinos: epist. 81: Quamvis, inquit, multorum sanctorum in conspectu Domini pretiosa mors fuerit (Ps. 116, 15,) nullius tamen insontis occisio propitiatio fuit mundi. Accepere justi, non dederunt coronas, et de fortitudine fidelium nata sunt exempla patientiæ, non dona justitiæ: singulares quippe eorum mortes fuere, nec alterius quispiam debitum suo fine persolvit: quum unus extiterit Dominus Christus, in quo omnes crucifixi, omnes mortui, sepulti, suscitati."<sup>2</sup>

*Resp.* Nihil in his adversatur indulgentiis; nec enim alium quam Christum agnoscimus propitiationem mundi, nec alii accepta dona justitiæ referimus, nec quempiam debitum alterius suo fine persolverisse dicimus. Quæ igitur ex Leone objicit Calvinus, probant quod apud omnes in confesso est, nos Christi morte, non alterius cujuscumque, redemptos esse. Obierunt martyres, non debitum alterius persolventes, sed Christo ferentes testimonium, quorum tamen mortem patienter toleratam per Christum nobis aliquatenus prodesse, nil detrahit infinitæ virtuti redemptionis, quam pro omnibus ipse unus dedit.

42. *Obj.* 3. "Agnoscant (CATHOLICI) annon hæc sint sua placita, martyres plus morte sua Deo præstitisse ac meritos esse quam sibi opus esset: tantamque illis meritorum largitatem superfuisse, quæ in alios redundaret. Ne igitur supervacuum sit tantum bonum, commisceri eorum sanguinem sanguini Christi, et ex utroque thesaurum Ecclesiæ confici ad remissionem et satisfactionem peccatorum."<sup>3</sup> Calvinus.

*Resp.* Non hæc sunt placita nostra, nam martyres credimus plenam meritorum mercedem a Deo consecutos; sed suppliciis eorum præter meritum, vim quamdam inesse censemus luendi pœnas, eaque idcirco offerri posse Deo, ut infirmioribus fratribus per Christum ad pœnarum temporalium valeant remissionem. Non credimus eorum sanguinem Christi sanguini commisceri, ut ex utroque veluti partibus thesaurus conficiatur; sed ad cumulum infiniti thesauri Christi sanguinis, martyrum sanguinem veluti adminiculum accedere, qui nobis prosit ad remissionem pœnarum Christi intuitu. Non igitur, ut calumniatur Calvinus, Christum vulgarem sanctulum facimus, qui in turba vix dignoscatur; sed unicum Redemp-

(1) Coloss. 1. 24.

(2) Inst. l. iii., c. v. 3.

(3) Ibidem.



torem eum agnoscimus et prædicamus, licet martyrum egregiū labores et supplicia nobis valeant, ut redemptionis Christi beneficio largiori done-  
mur. Hac ratione ad solvendum debita nostra apud divinam justitiam  
martyrum satisfactiones valent, ea quam e Christi gratiæ derivant vim  
nobis impertita. Cæterum ex divina acceptatione fit ut hac fruamur  
utilitate.<sup>1</sup>

(1) Vide Christ Lupum dñs. de peccatorum et satisfactionum indulgentiis, c. vii.

## CAPUT IV.

## DE INDULGENTIARUM APPLICATIONE.

43. Indulgentias applicari posse animabus fidelium defunctorum constans est sensus et doctrina Ecclesiæ. Eas quidem *per modum suffragii* prodesse docent Theologi, verba pontificii indulti præ oculis habentes, et conditionem animarum; quæ quum extra ditionem Ecclesiasticorum præsulorum sint positæ, non possunt proprie absolvi ab aliqua pœna. Suffragii autem ratio in eo sita est; quod Pontifex Deo offerat ex thesauro Ecclesiæ solutionem debiti quo gravantur animæ illæ, deprecans ut acceptetur, in earum utilitatem. Vis magna insit necesse est hujusmodi suffragio, ab illo oblato cui Christus ipse ligandi et solvendi in terris dedit potestatem. Negavit Lutherus mortuis utiles esse indulgentias, quem errorem cum cæteris confixit Leo X. Riccius cum sua synodo pariter erravit, meritò idcirco a Pio VI. damnatus: “In eo quod superaddit (synodus) luctuosius adhuc esse, quod chimerica isthæc applicatio transferri volita sit in defunctos;” propositio XLII. damnatur veluti falsa, temeraria, piarum aurium offensiva, in Romanos Pontifices, et in praxim, et sensum universalis Ecclesiæ injuriosa, inducens in errorem hæreticali nota in Petro de Osma confixum, iterum damnatum in art. 22. Lutheri. “In eo demum, quod impudentissime invehitur in tabellas indulgentiarum, altaria privilegiata” etc., propositio XLIII. declaratur temeraria, piarum aurium offensiva, scandalosa, in Summos Pontifices, atque in praxim tota Ecclesia frequentatam contumeliosa.”

44. Applicatio indulgentiarum mortuis probatur præcipue ex consuetudine Ecclesiæ, nixa sanctorum communione. Equidem quum, ex constanti sæculorum omnium fide, magna proveniat utilitas defunctis ex vivorum precibus, nulla occurrit ratio cur indulgentiarum omni beneficio priventur. Enimvero membra sunt Christi, sancta proinde nobiscum consortio conjuncti: “neque enim piorum animæ mortuorum separantur ab Ecclesia,” uti recte monet Augustinus.<sup>1</sup> “Non est,” inquit S. Thomas Aquinas, “quare Ecclesia transferre possit communia merita quibus indulgentiæ innituntur, in vivos, et non in mortuos.”<sup>2</sup> Constat Pontifices Summos has indulgentias ex vetusto more concedere consuevisse, quod

(1) L. xx. de. civ. Dei c. ix. n. 2.

(2) Suppl. Q. 71. art. 10.

temere eos fecisse, vel inaniter, absit ut vir Catholicus suspicetur. Joannes VIII. anno 878, et Joannes IX. anno 900, et alii plurimi noscuntur eas largiti fuisse. Porro undique per Ecclesiam indulgentiæ hujusmodi promulgantur ab episcopis, et magno cum devotionis affectu expetuntur a fidelibus, adeo ut sensus totius Ecclesiæ huic consuetudini suffragetur.

45. Plenaria indulgentia mortuis applicata animam liberare a pœnis purgatorii dicitur; quæ quum sacrificii Missæ celebrationi adnectatur, *privilegium altare* vocatur. Illud sic explicatur a Benedicto XIV.: "Summus Pontifex, cum privilegiatas aras declarat, ac pro Missæ celebratione, quæ in illis indicitur ad expiandam defuncti alicujus animam, thesauri Ecclesiastici eam partem tribuit *per modum suffragii*, quæ satis est ut eadem anima, si Deo placitum sit, e purgatorii cruciatibus eripiatur."<sup>1</sup>

46. Inter indulgentias ea quæ dicitur *Jubilæi* præcipua est, utpote plenaria, cum privilegiis amplissimis. A Judæis desumptum est nomen, annus scilicet quinquagesimus apud eos sic vocabatur, quo recurrente omne æs alienum remittebatur, agri ac domus venditæ suis prioribus dominis restituebantur, servi cum suis liberis in libertatem vindicabantur, omnisque labor in agris colendis cessabat:<sup>2</sup> Bonifacius VIII., anno 1300, proposita indulgentia plenaria fidelibus universis qui Urbis inviserent templa, contritique susciperent sacramenta, facultatem simul fecit ut a censuris quibuscumque ecclesiasticis absolverentur. Clemens VI. anno 1350 voluit Jubilæum quinquagesimo quoque anno celebrari. Urbanus VI. anno 1389 indulxit ut post annos triginta tres in Christi in terris vitæ honorem celebraretur. Paulus II. anno 1470, vigesimo quinto anno recurrente, eum celebrari permisit. Plures Pontifices eum promulgarunt occasione suæ exaltationis, vel ob gravem aliquam reipublicæ christianæ necessitatem.

47. Summi Pontificis est, utpote supremi in terris Ecclesiæ rectoris, cui claves regni cœlorum datæ sunt, indulgentias concedere amplissima auctoritate, sed sapienti illa œconomia quæ decet illum quem constituit Dominus super familiam suam. Hinc suspecti de erroribus Wicklessi et Huss interrogandi erant, utrum crederent, "quod Papa omnibus Christianis vere contritis et confessis ex causa pia et justa possit concedere indulgentias."<sup>3</sup> Innocentius III. in concilio Lateranensi episcoporum auctoritatem in iis elargiendis certis limitibus arctavit, vetuit scilicet ne ultra annum indulgentiam tribuerent in dedicatione Ecclesiæ, et ultra quadraginta dies in aliis casibus.<sup>4</sup> Hinc interrogabantur iidem: "Utrum

(1) Instit. lvi. n. 15. Magnæ offensioni plerisque viatoribus A catholicis est hæc rationem loquendi, quæ *anima e Purgatorio liberari* dicitur, celebrata in quodam altari Missæ, sed sensus ejus ex pontificia declaratione innocuus est.

(2) Lev. xxv. 27.

(3) Acta Concil. tom. viii. col. 915.

(4) Tit. lxi. ib. l. vii. col. 66.

credant, quod singuli episcopi suis subditis secundum limitationem sacrorum canonum hujusmodi indulgentias concedere possint.”<sup>1</sup>

48. Hæc de indulgentiis sufficiant. Cui persuasum est Christum claves regni cœlorum Petro tradidisse, et omnibus Apostolis ligandi et solvendi dedisse potestatem, haud facile quæstionem movebit de remissione quam præsules Ecclesiæ Christi nomine concedunt. Largitatem hanc mirari et amplecti oportet, et in ea virtutum opera incumbere, quæ ad thesauros hos nobis comparandos requiruntur, haud neglectis pœnitentiæ exercitiis, quibus idonei tantis beneficiis fruendis efficiamur.

(1) Tit. lxii. t. viii. col. 915.



# TRACTATUS XIV.

## DE EXTREMA UNCTIONE.

---

### CAPUT I.

#### DE SACRAMENTI VERITATE.

1. *Extrema* vocatur *Unctio* illa quæ fieri consuevit ægrotis in mortis discrimine constitutis. Eam sacramentum esse negavit audacter Lutherus, Jacobi epistolam, in qua commendatur, stramineam esse, et Apostolo prorsus indignam, affirmans. “Omitto enim,” inquit “quod hanc epistolam non esse Apostoli Jacobi, nec apostolico Spiritu dignam multi valde probabiliter asserant, licet consuetudine authoritatem, cujuscumque sit, obtinuerit. Tamen si etiam esset Apostoli, dicerem non licere Apostolis sua authoritate Sacramentum instituere: hoc enim ad Christum solum pertinebat.”<sup>1</sup> Calvinus dicit: “Tertium fictitium sacramentum est extrema unctio. . . . Ejusdem rationis est ista unctio, cujus esse manuum impositionem supra demonstravimus: nempe histrionica hypocrisis, qua citra rationem et sine fructu Apostolos referre volunt.”<sup>1</sup> Errores hos confixit concilium Tridentinum: “Si quis dixerit, extremam unctionem non esse vere et proprie sacramentum a Christo Domino nostro institutum, et a Beato Jacobo Apostolo promulgatum, sed ritum tantum acceptum a patribus, aut figmentum humanum; anathema sit.” “Si quis dixerit, sacram infirmorum unctionem non conferre gratiam, nec remittere peccata, nec alleviare infirmos; sed jam cessasse, quasi olim tantum fuerit gratia curationum, anathema sit.” “Si quis dixerit, extremæ unctionis ritum et usum, quem observat Sancta Romana Ecclesia, repugnare sententiæ Beati Jacobi Apostoli, ideoque eum mutandum, posseque a Christianis absque peccato contemni; anathema sit.” “Si quis dixerit, pres-

(1) L. de captiv. Babylon.

(2) Inst. l. iv. c. xix. n. 18.

byteros Ecclesiæ, quos Beatus Jacobus adducendos esse ad infirmum ungendum hortatur, non esse sacerdotes ab episcopo ordinatos, sed ætate seniores in quavis communitate, ob idque proprium extremæ unctionis ministrum non esse solum sacerdotem; anathema sit.<sup>(1)</sup>

2. Leibnitius a suorum errore hac in re, sicut in aliis fere omnibus, tandem aliquando recessit, scripsit enim: "De unctione infirmorum, non est cur multa disputemus. Verba habet Scripturæ sacræ, interpretationem Ecclesiæ, cui pii et catholici homines tuto fidunt, nec video quid in eo more quem recipit Ecclesia, reprehendi a quoquam possit."<sup>(2)</sup> Barclaius autem cœnam Protestantium rejiciens, argumento quod ex usu veteris Ecclesiæ desumunt, occurrit, objiciendo eos ritum unctionis, qui speciali mandato injungitur, negligere.<sup>(3)</sup> Neglectus hic omnibus sectis hodiernis inter quas versamur communis est.

#### PROPOSITIO.

*Extrema Unctio est vere et proprie sacramentum a Christo Domino nostro institutum, et a Beato Jacobo Apostolo promulgatum.*

*Probaturs ipsius Jacobi celeberrimo testimonio.*

3. Scribit Jacobus Apostolus: ἀσθενεῖ τις ἐν ὑμῖν; προσκαλεσάτω τοὺς πρεσβυτέρους τῆς ἐκκλησίας καὶ προσευξάσθωσαν, ἀλείψαντες αὐτὸν ἐλαίῳ ἐν τῷ ὀνόματι τοῦ Κυρίου. Καὶ ἡ εὐχὴ τῆς πίστεως σφραγίσσει τὸν κάμνοντα, καὶ ἔγερει αὐτὸν ὁ Κύριος πάντων ἁμαρτίας ἢ πειρημάτων, ἀφεθήσεται αὐτῷ. A vulgato interprete sic redditur: "Infirmatur quis in vobis? inducat presbyteros Ecclesiæ, et orent super eum, ungentes eum oleo in nomine Domini: et oratio fidei salvabit infirmum, et alleviabit eum Dominus: et si in peccatis sit, remittentur ei."<sup>(4)</sup> Quum hæc universim ad fideles scribantur, liquet agi de ritu qui ad omnes spectat, et qui perpetuo servandus foret; nil enim dicitur, quo ad tempus restringatur. In graviore infirmitate quæ mortis periculo haud vacat,<sup>(5)</sup> jubet accessi presbyteros Ecclesiæ, sacerdotes scilicet qui hoc nomine in novo Testamento passim designantur, quorum munus est pro periclitante

(1) See. xiv. can. i. ii. iii. iv. de Extrema Unctione.

(2) System. Theol. p. 280.

(3) "How come they to pass over far more positive commands of the Apostles, as matters of no moment? as James v. 14, where it is expressly commanded that the sick be anointed with oil in the name of the Lord." Apology Prop. xiii. § viii. p. 418. edit. Birmingham 1765.

(4) Jacobi v. 14.

(5) In Demosthenis prima Oratione contra Philippum, Atheniensium de morte Philippi expectatio refertur; interrogabant scilicet: quid novi? mortuumne est Philippus? et quum eum graviter egrotare noverant, solabantur se spe proximæ ejus mortis: Τεθνήκε φιλίππος. Οὐ μὰ Δί, ἀλλ' ἀσθενεῖ: ut cum in extremis fere versari insinuat. Bloomfield in Jacobi locum scribit: "The ἀσθενεῖ must from the context be understood of severe sickness." Τὸν καμνοντα in extreme laborantem significare constat, nam καμνοντες significat mortuos.

orare, eumque sacro oleo perlinire, Deo invocato. Ritus externus plane designatur, unctio scilicet peragenda a sacro ministro, oratione comite. Effectus orationi huic adnexus refertur, scilicet salus periclitantis, animi levamen, et peccatorum, quæ admiserit remissio. Est igitur signum visibile invisibilis gratiæ. Porro quum Apostolus ipse non potuerit hos effectus huic adnectere ritui, manifestum est eum tantummodo promulgasse ritum cuius Christus ipse auctor est, ejus enim est vim gratiam impertiendi ritui adnectere.

*Probatur II. ex Patrum interpretatione.*

4. ORIGENES remissionem peccatorum, quæ impetratur pœnitentia, sacerdoti Domini indicando peccatum suum, referens, ait: “in quo impletur et illud quod Apostolus dicit: ‘Si quis autem infirmatur, vocet presbyteros Ecclesiæ, et imponant ei manus, ungentes eum oleo in nomine Domini, etc.’”<sup>1</sup> In exemplum hanc pœnitentiam, quæ fit in extremis, adducit, satisque indicat ritum illum ungendi adhuc suo tempore servari, et secum ferre peccatorum remissionem.

5. S. CHRYSOSTOMUS, sacerdotum erga laborantem et morti jamjam propinquam animam officia extollit: “neque enim solum cum nos regenerant, sed postea etiam condonandorum nobis peccatorum facultatem obtinent: ‘Infirmatur,’ inquit, inter vos aliquis? accersat presbyteros Ecclesiæ, et orent super eum, ungentes eum oleo.”<sup>2</sup> Igitur Chrysostomi quoque ætate, sæculo scilicet quarto, ritus peragebatur veluti munus sacerdotii christiani peccatorum veniam afferens.

6. S. INNOCENTIUS I. consultus ab Eugubino episcopo, Decentio, utrum episcopo extremam unctionem ministrare conveniret, plerumque enim a sacerdotibus dabatur, respondit: “Non est dubium (*verba Jacobi*) de fidelibus ægrotantibus accipi vel intelligi debere, qui sancto oleo chrismatis perungi possunt. . . . “Cæterum illud superfluum videmus adjectum, ut de episcopo ambigatur, quod presbyteris licere non dubium est. Nam idcirco de presbyteris dictum est, quia episcopi occupationibus aliis impediti, ad omnes languidos ire non possunt. Cæterum si episcopus aut potest, aut dignum ducit aliquem a se visitandum et benedicere, et tangere chrismate sine cunctatione potest, cujus est ipsum chrisma conficere. Nam pœnitentibus istud infundi non potest, quia genus est sacramenti. Nam quibus reliqua sacramenta negantur, quomodo unum genus putatur posse concedi?”<sup>3</sup> Liquet rem indubiam habitam esse Jacobi verba de ægrotantibus fidelibus intelligenda esse, et ritum quinto sæculo ineunte totam vim suam retinere. Pœnitentiam publicam agentibus non dabatur, a sacramentorum enim perceptione prohibebantur, nisi sub ipsum vitæ exitum, quum aliis in gravi quocumque vitæ discrimine daretur.

(1) Hom. ii. in Levit.

(2) L. iii. de Sacerdotio c. vi.

(3) Ep. ad Decentium.



7. Auctor antiquus, qui S. Cæsarius Arelatensis a plerisque censetur, dicit: "Quoties aliqua infirmitas supervenerit, corpus et sanguinem Christi ille, qui ægrotat, accipiat: et inde corpusculum suum unget, ut illud, quod scriptum est impleatur in eo: 'Infirmatur aliquis, inducat presbyteros, etc.' Videte, fratres, quia, qui in infirmitate ad Ecclesiam concurrerit, et corporis sanitatem recipere, et peccatorum indulgentiam merebitur obtinere."<sup>1</sup> Hæc corporis sanitas haud adeo certa est, quum pendeat omnino ex Dei voluntate, nec sacramenti sit effectus præcipuus, sed prout ad Dei gloriam et animæ salutem prosit.

8. VENERABILIS BEDA in Jacobi testimonium scribit: "Hoc et Apostolos fecisse, in Evangelio legimus, et nunc Ecclesiæ consuetudo tenet, ut infirmi oleo consecrato ungantur a presbyteris, et oratione comitante sanentur."<sup>2</sup>

*Probatur III. ex libris Ritualibus.*

9. Sacramentarium S. Gregorii M. præscribit olei benedictionem ab episcopo, et preces recitandas ungendo infirmum. Inter cætera dicitur: concede ut medelam tuam non solum in corpore, sed etiam in anima sentiat."<sup>3</sup>

10. Liber pœnitentialis Theodori, Cantuariensis Archiepiscopi, qui nono sæculo exeunte floruit, injungit: "Ab infirmis in periculo mortis positis pura est inquirenda confessio peccatorum . . . et secundum auctoritatem canonicam, ne illis janua pietatis clausa videatur, orationibus et consolationibus ecclesiasticis sacra unctione olei inuncti, secundum statuta sanctorum patrum communionem viatici reficiantur." Hæc ex synodo Moguntina, anno 847 habita, descripta videntur.<sup>4</sup>

11. Græcorum Euchologium ritum ungendi infirmos septem sacerdotibus adstantibus peragendum præscribit. Sacerdos qui ungit eos dicit: "Pater sancte, animarum et corporum medice, qui Filium tuum Unigenitum Dominum nostrum Jesum Christum, omnem morbum curantem, et ex morte nos liberantem misisti: sana quoque servum tuum N. a detinente illum corporis infirmitate, et vivifica illum per Christi tui gratiam."

*Probatur IV. conciliorum auctoritate.*

12. Concilium Cabilonense, anno 813, decrevit: "Secundum Beati Apostoli Jacobi documentum, cui etiam documenta Patrum consentiant, infirmi oleo quod ab episcopis benedicatur, a presbyteris ungi debent. Sic enim ait: 'Infirmatur quis in vobis? inducat presbyteros etc. Non est itaque parvi pendenda hujuscemodi medicina, quæ animæ corporisque medetur languoribus.'"<sup>4</sup>

13. Concilium Aquisgranense anno 836: "Si quis autem infirmitate

(1) Serm. ccxv. de Tempore inter Augustinianos.

(2) Comm. in locum.

(3) Synod. Mog. cap. xxvi.

(4) Can. xlviii.

depressus fuerit, ne confessione atque oratione sacerdotali, nec non unctione sacrati olei, per presbyteri negligentiam careat.”<sup>1</sup>

14. Concilium Ticinense, anno 850, dicit: “Illud quoque salutare sacramentum quod commendat Jacobus Apostolus dicens: ‘Infirmatur quis in vobis? etc. solerti prædicatione populis innotescendum est, magnum sane ac valde appetendum mysterium, per quod, si fideliter poscitur, et remittuntur peccata, et consequenter corporalis salus restituitur.”<sup>2</sup>

*Probatur V. exemplis.*

15. Paschasius Radbertus, sæculo nono, in vita Adelardi Abbatis Corbejensis, narrat Hildmanum episcopum, audito morbo Adelardi, advenisse illico: “interea cum cœpisset idem sanctus episcopus a nobis percontari, utrum benedictionis oleo, sicut a Beato Apostolo sancitum est, deberet perungi: interrogavimus utrumne vellet? . . . quod ille audiens, erectis oculis in cœlum, obsecrabat ut fieret.” De S. Oswaldo, Eboracensi episcopo sæculo decimo, narratur, quod mortem imminere sentiens, “convocatis fatribus, hortatur eos impendere sibi ministerium sacræ unctionis, cum viatico Dominici corporis.” In vita Leonis IX. refertur, “cum intelligeret, non diutius retinendum se carnis ergastulo, decrevisse, ut quoniam plures episcoporum, abbatum, cæterorumque fidelium effluxerant turbæ, eis præsentibus inungeretur sacri olei liquore.” De S. Malachia refert S. Bernardus: “Jubet se sacro oleo ungi.”<sup>3</sup>

*Probatur V. Græcorum et Orientalium sectarum consensione.*

16. Græci vocant hoc sacramentum *ἐνχέλαιον oleum cum prece*. In confessione orthodoxa dicunt: “Septimum sacramentum est extrema unctio a Christo præscripta. Cum enim cœpisset discipulos suos binos mittere, (Mar. 6. v. 7. et 13) ungebant oleo multos et sanabant: quam deinceps unctionem religiosa consuetudine Ecclesia observavit, prout ex epistola Sancti Jacobi compertum est: ‘infirmatur quis in nobis?’ etc.”<sup>4</sup> fructus hujus sacramenti sunt, quos velut ei proprios Sanctus Jacobus Apostolus explicat, videlicet remissio peccatorum, animæ salus, corporis denique sanitas, quam etsi non semper importet, semper tamen animam per remissionem peccatorum in meliorem statum restituit.”<sup>5</sup>

17. Maronitæ in rituali suo præscribunt unctionem infirmi morti proximi: “Oratio super infirmum hora obitus appetentem. Afferat sacerdos ex oleo sancto in vase mundo, et dicat ‘Pater noster,’ et reliquas ad hoc statutas orationes, tunc benedicat oleum signo crucis, et ungat corpus in-

(1) Can. v.

(2) Cap. viii.

(3) In vita S. Malachiæ c. xxxi.

(4) Quæst. 117.

(5) Quæst. 119. Vide et Jeremiæ patriarchæ Constantinopolitani responsionem ad Lutheranos.

firmi in septem locis." (1) "Eodem fore modo," subjungit Naironus, "cæteræ nationes orientales conficiunt."

18. Fuit igitur ritus hic antiquissimis temporibus ante sectarum orientalium originem toti Ecclesiæ communis; et Christi mandatum et gratiam habere credebatur.

*Probatur VI. præscriptione.*

19. Viguit ubique per orbem christianum sexto decimo ineunte sæculo ritus periculoso morbo laborantes ungendi, et tamquam sacramentum a Christo institutum habebatur; quin ostendi possit eum Apostolica ætate posterius inductum esse. Imo constat eum Apostolorum temporibus servatum, Jacobo testante, et omnibus id fatentibus. Porro ostendi nequit eum unquam intermissum, vel doctrinam de ejus virtute ab aliquo ortam post Apostolicam ætatem. At vero quum esset res quotidiana, facile non erat novam aliquam de ea notionem ubique per orbem invehere, et statuere.

OBJECTIONES SOLVUNTUR.

20. *Obj. 1.* "Oleum positum esse videtur pro remediis aliis etiam salutaribus et necessariis. Nam in regionibus orientalibus et ad meridiem olea erant valde generosa, et usus oleorum permultus medendis variis morbis obtinebat." (2) Ita Rosenmüller.

*Resp.* De remedio naturali non agitur, sed de animæ salute, quapropter orationem et Dei invocationem adhibendam esse injungit Apostolus. His, non autem olei, quantumvis generosi, virtuti, adscribit ritus hujus effectus: "Oratio fidei salvabit infirmum."

21. *Obj. 2.* Ad donum curationum respexit Jacobus, ideoque ægrotis restituendam pollicetur sanitatem, ob orationem ex fide profectam, qua scilicet miracula patrabantur. "Ungebant," inquit Marcus, "oleo multos infirmos et sanabantur. (Marc. 6. 13.)" "Huc respexit Jacobus, quum jussit arcessi presbyteros ad ungendum infirmum." (3) Ita Calvinus.

*Resp.* Hoc sacramentum, uti monent patres Tridentini, "apud Marcum quidem insinuat, per Jacobum autem Apostolum, ac Domini fratrem, fidelibus commendatum ac promulgatum" est. Quæ dicit Jacobus non conveniunt dono curationum; nec enim hoc certo hominum ordini allegatum est, nec pro arbitrio exercendum erat, sed ex Spiritus Sancti impulsu, prout cuique datum fuerit. Quum igitur jubeat presbyteros arcessi, orationem fundi, unctionem fieri, loqui censendus est de subsidio cuilibet ægrotanti a ministris sacris porrigendo. Ipse Rosenmüller dicit: "Nulla necessitas postulare videtur, ut extraordinariam et miraculosam sanandi facultatem intelligamus." (4) Quod autem fidei orationi tribuantur effectus,

(1) Apud Naironum in Euoplia p. 206.

(2) In locum.

(3) Inst. l. iv. c. xix. n. 18.

(4) In locum.

non suadet de miraculis agi, nam oratio ex Ecclesiæ auctoritate prolata, nixa fidei certissimis principiis, fidei oratio rectissime dicitur. Leibnitius animadvertit: “Videmus olim et donum curationis sæpe affuisse; cujus usus nunc cum aliis extraordinariis beneficiis, stabilita Ecclesia, infrequentior factus est, semper tamen ne tunc quidem sanatos fuisse credendum est, qui ungebantur.”<sup>1</sup>

22. *Obj.* 3. “Sacrum ritum *unctionis extremæ*, quæ morituris jam impenditur, minime ex hoc loco posse demonstrari facile patet; commemoratur enim adjumentum sanitatis, non præsidium et adjumentum pacatius moriendi.”<sup>2</sup> Rosenmüller.

*Resp.* Ad salutem animæ Apostoli verba maxime referuntur, nam remissio peccatorum huc plane pertinet, et verbum *σωσαι* salutem apud Jacobum passim designat: “Numquid poterit fides *salvare* eum? *μὴ δύναται ἡ πίστις σωσαι αὐτόν;*”<sup>3</sup> Vox *ἐγέρσει* excitabit ad animi levamen non inepte refertur, fatente Schleusnero,<sup>4</sup> quamvis nil vetet eam de corporis adjumento intelligere, quod ritus hic sacer præstat, juxta sapientem Dei œconomiam, supremis ejus consiliis statutam. Ipse Rosenmüller dicit: “Notum enim est in novo Testamento, ut in vita communi, sæpe universe enuntiari, quod cum restrictione intelligendum est. Juvabunt preces ægrotantem, si ei expediat ad salutem æternam.”<sup>5</sup>

23. *Obj.* 4. “Jacobus vult infirmum ungi a senioribus Ecclesiæ: isti unctorem non admittunt, nisi sacrificulum.” Ita Calvinus.<sup>6</sup>

*Resp.* Presbyteri Ecclesiæ intelliguntur sacerdotes, ideoque nomen illud his adhæsit, et in plerasque linguas adscitum est.<sup>7</sup> Profectò puduit Rosenmüller Carpzovii subscribere sententiæ, qui vocis etymologiæ inhæreno *profectos ætate* intellexit: “Huic sententiæ obstare videtur, (Vide Noesselt, Fasc. ii. p. 328) quod Presbyterorum *Ecclesiæ* nomen in novi Testamenti libris semper de viris in Ecclesia primariis, iisque vel magistris vel præsidibus usurpetur.”<sup>8</sup> Ex usu igitur scriptorum novi Testamenti, et omnium qui rem illustrarunt christianam ab initio Ecclesiæ, presbyteri intelliguntur sacerdotes. Equidem munera sacra illis plane a Jacobo assignantur, nempe orationem solemnem fundere, sacram adhibere uno-

(1) System. Theol. p. 280.

(2) Ibidem.

(3) Jac. ii. 14. Videt et i. 14. iv. 12. v. 20.

(4) Novum Testamentum Græcum perpetua annotatione illustratum, edit. Koppianæ vol. ix. Gottingæ 1799.

(5) In locum.

(6) Inst. l. iv. c. xix. n. 21.

(7) De vocabulo ‘Priest’ dicunt Oxonienses: “In truth it is one of the very words you mentioned, only somewhat shortened by our forefathers in their pronunciation of it—Presbyter was made Prester, and that by degrees became Prest or Priest.” Tract. No. 12.

(8) Rosenmüller in loc.

tionem, Deo invocato, et peccatorum excipere confessionem, remissione eorum opera data.

24. *Obj. 5.* "Quod apud Jacobum presbyteros interpretantur sacerdotes, et pluralem numerum ad decorem positum nugantur, nimis frivolum est: quasi vero Ecclesiæ eo tempore sacrificiorum examinibus abundarint, ut in longa pompa procedere potuerint ad ferendum sacri olei ferculum."<sup>1</sup> Calvinus.

*Resp.* Presbyteri Ecclesiæ necessario intelligendi sunt sacerdotes, nam ita constans fert usus loquendi scriptorum novi Testamenti. Pluralis autem numerus obvio sensu usurpatur pro quolibet e cœtu; sicut quum Christus præciperet leprosis a se mundatis, ut se sacerdotibus exhiberent,<sup>2</sup> uni sacerdoti satis erat se ostendere.<sup>3</sup> Cæterum et plures sacerdotes possent ad unctionem ministrandam operam præstare, quum ipsa Apostolorum ætate plures sæpe simul adesse in urbe aliqua contingeret. Apud Græcos septem sacerdotes adsunt quoties ritus hic peragitur, qui olim apud Latinos pluribus præsentibus plerumque peragebatur.

25. *Obj. 6.* Peccatorum remissio, de qua Jacobus loquitur, intelligenda est de morborum causa sublata: "morbo curato, etiam peccatum ipsum condonatum esse dicebatur." Ita Rosenmüller.<sup>4</sup>

*Resp.* Nil sinit, ut ab obvia verborum acceptance discedatur; sed e contra, quum de animæ salute præcipue sit sermo, peccata vere remissa credenda sunt. Hæc de morborum curatione explicatio non potest statui tamquam norma, ad quam tota oratio Apostoli referatur, quum consuetum eum haud de corporis morbis sollicitiorem, sed de subsidiis salutis in tota epistola agere. Profectò non distinguit infirmitatem ex peccato proveniente, ab alia, quæ absque peccato contrahitur; sed cuilibet graviter ægrotanti illud præscribit remedium, quo peccatorum venia et animæ salus comparatur. Rosenmüllero objicimus Leibnitium, qui, etsi existimaret donum curationum ab Apostolo indicari, quod aliquando unctioni adnecteretur, censuit tamen animæ subsidia semper conferri, et in Ecclesia esse perpetua: "Superest igitur saltem hodieque efficacia illa sanitatis perpetua, et numquam fallens, quæ ad animam ipsam bene dispositam pertinet, atque a Jacobo Apostolo additur, quando hujus sacramenti usum describit, et in peccatorum remissione ac fidei virtutisque munimento collocatur, quo numquam magis opus est, quam in vitæ periculo atque terroribus mortis ad ignea tela Satanæ, tum maxime ingruentia, repellenda."<sup>5</sup>

26. *Obj. 7.* Jacobus dicit: *καὶ ἀπαρτίως ἢ παντοίας, ἀφεθήσεται αὐτοῖς.* "Si patnaverit peccata, remittentur ei." Id de peccatis immanibus, quæ mor-

(1) Inst. l. iv. c. xix. n. 21.

(2) Luc. xvii. 14.

(3) Lev. xiv. Vide plura exempla apud Augustinum l. iii. de consensu Evangelistarum c. xvi.

(4) In locum.

(5) Synt. Theol. p. 280.

borum habebantur causæ, intelligendum est; nam de peccatis quibuscumque si loqueretur, nulla fuisset apponenda conditio, quum nemo est qui non peccet.

*Resp.* Nil exigit ut de peccatis morborum causis ea verba intelligantur, quum de peccatis gravibus quibuscumque obvio sensu explicari valeant: sunt autem qui nullius peccati lethalis labem contraxerunt.

27. *Obj.* 8. Juxta hanc explicationem peccata lethalia unctione remittuntur: apud Catholicos vero prædicatur vivorum sacramentum, quod nefas est suscipere, conscientia peccato gravi irretita.

*Resp.* Remissio peccatorum impetratur extrema unctione, venialium quidem ex fine ejus primario, sicut et reliquiarum peccatorum lethaliū, quæ scilicet ex peccatis jam remissis remanent incommoda. Ipsa lethaliū peccatorum venia impetranda est sacramento pœnitentiæ, confessione peracta, uti insinuat Jacobus, dicens: “Confitemini alterutrum peccata vestra;” nam optime intelligitur loqui de confessione presbyteris, de quibus mox agebat, facta. Profectò Rosenmüller ipse de peccato censens sermonem esse, quod causa fuisset morbi, fatetur confessionem faciendam injungi presbyteris, quos jusserat Jacobus arcessi: “Hunc (*infirmum*) ne pudeat, peccatum hoc in conspectu presbyterorum fateri.” . . . . “Recte, ut mihi quidem videtur, ea, quæ hoc commate dicuntur, trahuntur ab interpretibus ad *ægrotum*, et ad *presbyteros*, quorum mentio vs. 14 facta est.”<sup>1</sup> Catholicæ doctrinæ admodum congruit totius textus series, nam confessione remittuntur peccata lethalia; unctione verò venialia, et peccatorum reliquiæ absterguntur, et, si forsan conscientia gravi macula inquinata sit, quam confiteri non valet moribundus, alioquin animo pœnitens, sed loquela carens, vel peccati sibi non conscius, emundatur etiam et sanatur. Ita docet S. Carolus Borromæus,<sup>2</sup> quod consonum est Tridentinorum patrum documentis: “delicta ipsa, si quæ sint adhuc expianda, ac peccati reliquias abstergit.”<sup>3</sup>

28. *Obj.* 9. Totum ritum ad sanitatem recuperandam dirigi, patet ex iis, quæ subjungit Apostolus—*εὐχεσθε ὑπὲρ ἀλλήλων ὅπως ἰαθῇτε*—orate alius pro alio, ut sanemini.

*Resp.* Vox illa sanandi passim in Scripturis usurpatur pro animæ salute,<sup>4</sup> quod Rosenmüller post Carpzovium haud diffitetur. Hinc vertit Carpzovius: “*ut ad mentem saniores redeatis, et vobis condonet Deus peccata.*”<sup>5</sup> Rosenmüller quidem censet corporis sanitatem hic significari; sed de animæ salute præcipue agi totus sermonis contextus demonstrat.

(1) In locum.

(2) Instruct. de Extrema Unctione.

(3) Sess. xiv. Extrema Unctione.

(4) Matt. xiii. 15: *ἐπιστρέψωσι, καὶ ἰάσωμαι αὐτούς*—“convertantur et sanem eos.” Vide et Heb. xii. 13.

(5) Apud Rosenmuller in locum.

29. *Obj. 10.* Ad Apostolicam statuta, in qua donum curationum frequentius erat, totum illud Jacobi documentum refertur. Ergo ablato dono frustra ritus retinetur.<sup>2</sup>

*Resp.* Ostendimus de dono curationum haud agi, sed de animarum remedio, quod graviter aegrotanti adhibendo. Documenta virtutis universis hominibus per omnia saecula congrua obsequuntur tota illa epistola; nec est cur preceptum de infirmorum unctione ad tempus latum censeatur. Equidem constat ritum ungendi infirmos saeculo sequenti Apostolorum aetatem, et deinceps per omnia, quae secuta sunt saecula ubique in Ecclesia obtinuisse: quod argumento est haud levi Apostoli verba hunc sensum exigere.<sup>3</sup>

30. *Obj. 11.* Immense est discrimen inter Jacobi mandatum et ritum Catholicorum: "Jacobus omnes infirmos vult ungere: isti non infirmos, sed semimortua cadavera sua pinguedine inficiunt, quum jamjam animas in praeparatis labris laborat, vel (ut ipsi loquuntur) in extremis." Ita Calvinus.<sup>4</sup>

*Resp.* Infirmi de quibus loquitur Jacobus, juxta vim vocis et sensum orationis intelliguntur periculose decumbentes, quos omnes ungere consueverunt Ecclesiae presbyteri in id maneris arcessiti. Quod si in extremis ungantur ii, qui antea non habuerunt facultatem unctionis suscipiendae, vel qui distulerunt, spem valetudinis recuperandae quam haberent, nihil in Apostoli verbis occurrit, quod id vetet.

31. *Obj. 12.* De ritu ungendi moribundos altum apud scriptores priorum quatuor saeculorum Ecclesiae silentium, licet plures ex professo de sacramentis egerint.

*Resp.* Non adeo silent veteres scriptores, Origenes enim tertio Ecclesiae saeculo ineunte haud ambiguum praebet testimonium. Victor Antiochenus presbyter, qui ante medium quartum saeculum floruit, et commentarium in Evangelium Marci, ex eorum, qui eum praecesserant, scriptis concinnavit, adnotat in caput sextum: "Interim quae Apostolus Jacobus in sua canonica narrat, ab his non dissentiunt; scribit enim: 'infirmatur quis in vobis? etc.'"<sup>4</sup> Quod autem in operibus plerisque, quae supersunt non commemo-

(1) Barclaius animadvertit: "Though this might many ways be answered, to wit, that prayer then might as well be *forborn*, to which also the *saving of the sick* is there ascribed . . . since our adversaries, and that rightly, think a *ceremony* ought to cease where the virtue fails, they ought by the same rule to forbear the laying on of hands, in imitation of the Apostles, since the gift of the Holy Ghost doth not follow upon it." *Apology* Prop. xiii. §. viii.

(2) "There can be little doubt, however, that in the next generation the thing became (what, indeed, most recent Commentators here suppose it) a *solemn religious ceremony* comprehending a *symbolical rite*, the use of which tended to produce the blessings prayed for, as far as was consistent with the plans of Divine providence." Ita Bloomfield in locum, fatens ritum obtinuisse post Apostolorum aetatem.

(3) *Inst.* l. iv. c. xix. n. 21.

(4) *Comm. in Marc.* p. 91. in editione Ingolstadii 1580.

retur unctio extrema, contigit quia ad propositum scriptorum non pertinebat, sunt enim plerumque fidei vindiciæ contra Ethnicos, vel contra errores tunc grassantes; et ipsa quæ de sacramentis agunt, ad catechumenos fere directa sunt, quos oportebat de iis quæ mox suscipienda erant edocere. Equidem raro admodum de extrema unctione impræsentiarum in sacris concionibus agitur, quamvis quotidie ministretur, prævia instructione his quibus est ministranda.

32. *Obj.* 13. Ab Heracleonitis, quos memorat Irenæus,<sup>1</sup> ritus inungendi moribundos desumptus videtur: illi enim oleum aquæ immixtum capiti injiciebant, invocationibus adjectis.

*Resp.* Toto cælo distat ritus sacer quem Apostolo obtemperantes peragimus, a profanis Heracleonitarum moribus: nec enim aquam oleo infirmorum immiscemus, neque voces; “Basema, Chamose, Bæænora, etc.” proferimus, neque mortuos inungimus.

(1) L. 1. adv. hæ. c. xviii. Vide et Aug. l. de hæ. c. xvi. et Epiphanium hæ. xxxvi.



## CAPUT II.

## DE SACRAMENTI MINISTRATIONE.

33. Materiam sacramenti esse oleum, ex Jacobi verbis liquet; quæ po-  
tius oleum olivæ intelligitur, adeo ut oleum edulcoratum, vel quod distilla-  
tione exprimitur ex aqua oleaginosa, non possit adhiberi. Benedicendum  
esse ex consuetudine et mandato Ecclesiæ constat. Venerabilis Beda in  
capitulum sextum Marci scribens, Jacobi testimonium ad illud illustrandum  
recitat, subjungens: "Unde patet ab ipsis Apostolis hunc sanctus Ecclesiæ  
morem esse traditum, ut energumeni, vel alii quilibet egredi ungantur oleo,  
pontificali benedictione consecrato."<sup>1</sup> Utrum benedictio sit prorsus ne-  
cessaria ut valeat unctio, non constat, Theologis varie sentientibus. Sa-  
cerdotes Græci et Armeni ipsi benedicunt oleum, antequam ungant in-  
firmum,<sup>2</sup> qui mos non est improbat; quamvis episcoporum apud La-  
tinos jus sit speciale. Consecratur solemniter feria V. in cena Domini.

34. "Infirmus ungendus est," juxta decretum pro Armenis, "in oculis  
propter visum, in auribus propter auditum, in naribus propter odoratum,  
in ore propter gustum, vel locutionem, in manibus propter tactum, in  
pedibus propter gressum, in renibus propter delectationem ibidem vigen-  
tem." Renum unctio," inquit Rituale Romanum, "in mulieribus hones-  
tatis gratia semper omittitur, atque etiam in viris, quando infirmus commodè  
moveri non potest." Consuetudo aliquorum locorum est ut semper  
omittatur, prout in fœderatis his provinciis. Pedes aliis in locis non  
unguntur. Magna varietas in vetustis temporibus permissa est de partibus  
ungendis, adeo ut res sit disciplinam spectans, quæ ex consuetudine et  
lege pendet.

35. Forma sacramenti, in Rituali Romano tradita, est: "Per istam  
sanctam unctionem et suam piissimam misericordiam indulgeat tibi Deus  
quidquid per visum deliquisti;" et sic per singulos sensus organa eorum  
inungendo. Græcorum forma aliquanto proluxior est. Apud Latinos  
variatur, nam in sacramentario Gregorii M. dicitur: "Ungo te de  
oleo sancto etc." et sic in Ecclesia Mediolanensi ætate S. Bonaventuræ.<sup>3</sup>  
Liquet igitur verba specialia quibus constat forma, ad disciplinam pertinere,

(1) L. ii. c. xxiv.

(2) Vide Arcudium l. v. Concordiæ c. ii. et Leonem Allatum l. de consensu utrius-  
que Ecclesiæ c. vi. Benedictum xiv. de Synodo Diocesana l. viii. c. viii.

(3) In iv. Sent. Dist. 23 art. 1. qu. 4.

quamvis adhibenda sint necessario quæ unctionem ad sacrum effectum determinent.

36. “Minister hujus sacramenti est sacerdos,” prout declaratur in decreto Eugeniano toties citato. Id constat ex Jacobi verbis, tota suffragante traditione. Crucem aliquibus figunt Innocentii I. verba de oleo unctionis : “quo ab episcopo confecto, non solum sacerdotibus, sed omnibus uti christianis licet, in sua aut suorum necessitate inungendo.”<sup>1</sup> De unctione suscipienda loqui censendus est Pontifex ; nam adeo constabat sacerdotem esse ministrum sacramenti, ut quæstio orta sit, utrum episcopis id liceret conferre, cui satisfacit postea in eadem epistola. Fuit quidem ritus apud veteres quo oleum benedictum a fidelibus quibuscumque adhibebatur,<sup>2</sup> ad usus quosdam sicut aqua benedicta adhuc usurpatur. De hoc placuit quibusdam Innocentii verba interpretari. Quidquid sit, de sacerdote ministro adeo constat ex Scriptura et traditione, ut sententia illa ambigui sensus non possit officere. Porro unum sacerdotem sufficere declaravit Alexander III.<sup>3</sup>

37. “Hoc sacramentum nisi infirmo, de cujus morte timetur, dari non debet,” juxta decretum pro Armenis, quod nititur verbis Apostoli, quæ de infirmo in discrimine intelligenda esse ostendimus. Cæterum non est expectandus ipse mortis articulus ; sed præstat illud ministrare, dum ægrotus valet animo se parare uti beneficio ejus gaudeat. In eodem morbo ministrari iterum potest, si ægrotus evaserit mortis periculum, et deinceps in illud relabatur : qua in re sacerdotem non debere nimis angi monet Benedictus XIV., quum vetus Ecclesiæ consuetudo iterationi faveat, varaito periculo.<sup>4</sup>

38. Effectus Sacramenti sunt gratiæ augmentum, abstersio reliquiarum peccati, animæ alleviatio, delictorum, si quæ adhuc sint expianda, ablatio, sanitatisque, si expedierit ad salutem, restitutio. Hæc tamen fit adjuvando remedia, juxta ordinem constitutum a Deo, ideoque absque miraculo.

Breviter de hoc ultimo subsidio egimus. Jam vero et Tractatui et volumini finis sit : ut de Ordinis sacramento, quod tanti momenti est toti reipublicæ christianæ, quarto quod aggredimur volumine agamus.

(1) Ep ad Decentium Eugubinum. Gerundium illud : *inungendo* ; posse intelligi de unctione suscipienda censent plurimi. Exemplum haud absimile ex Virgilio adducit Perrone : “ Alitur vitium, vivitque tegendo. Georgic iii. v. 454.

(2) Vide apud Ruffinum l. ii. hist. Eccl. c. iv. Palladium hist. Lausianæ c. xx.

(3) Cap. Quæsivit, Extra de Verb. signif.

(4) De synodo Diœces l. viii.

















JAN 31 1949

